





Ad usum Fris Stanislai Kostka E.C.M.C.
verbo.


F. III. 9.

(a-b)









C
L
V

S A C R A
PEREGRINATIO

Per Sanctam

CRUCIS VIAM

AD

MONTEM CALVARIÆ,

Viginti diversis praxibûs illustrata, Re-
ligiosis præsertim, & Sacerdotibus
accommodata.

à

Quodam Sacerdote Ordinis Sera-
phici Provinciæ Argentinæ, seu
Germaniæ Superioris.

Anno 1761.



CUM LICENTIA SUPERIORUM.

Ex Ducali Campidonensi Typographæo per
Andream Stadler.

OPISANIE

Cudownego nawrocenia, Wielkiego iednego Grzesznika, z łaski Serca P. JEZUSOWEGO wyjęte z świadełwa W. X. Fidelisa Madera, Który go na śmierć dysponował R. P. 1766. w Lipcu:

SKazano ná śmierć pod miecz Kátowski, S Człowieka dzikiego wielce przyrozdzenia, nazwiskiem Filippa Geispergera w Mieście Ambergu, wyższego Palatynatu, za popełnione przezeń Zaboystwo. Skoro ten nieszczęśliwy, usłyszał wydaną ná siebie Dekret śmierci, rátychmiał jak gdyby w niejakie wpadł szaleństwo, począł wywierać okrutną złość swoją ná Sędziów swoich, Których bezwładnie rowoływał ná Sąd Boski, i oświadczał się że njechciał im nigdy urazy swojej przeciw nim odpuścić, co moment, bardziey się załadły a po azywał, zgrzytał strąszliwie zębami, ó co goręza, często szátana wzywał áby go żywego porwał wraz i z Sędziami swemi. Szczęściem dla tego Grzesznika (mowi X. przerzeczony) zániossem mu Obraz Zbawiciela, ná którym on był wyrażony,

JESU CHRISTO
VIÆ CRUCIS

AUTHORI
MATRI DOLOROSISSIMÆ,
PROPAGATRICI,

ET

FRANCISCO, ejusdem Restauratori,
se, unà cum hoc libello Demis-
sissimo affectu
D.D.D.

F. III. 9. (a)

FA-

E
Re
seu
vin
lib
era
cer
co
put
fit.
Pri
gul
lib
imp

FACULTAS
A.R.P. PROVINCIALIS
ET
PRIVILEGIUM CÆSAREUM.

E Go F. Leo Stehle SS. Theologiæ
Lector Emeritus, Ordinis FF. Min.
S.P. Francisci strictioris Observantiæ
Recollectorum, Provinciæ Argentinæ,
seu Superioris Germaniæ Minister Pro-
vincialis, hisce facultatem concedo, ut
libellus, cui Titulus : *Peregrinatio Sa-
cra ad Montem Calvariæ*, ab aliquo Sa-
cerdote nostri Ordinis ac Provinciæ
compositus, ac à Theologis ad id de-
putatis lectus ac census prælo dari pos-
sit. Cùmque S. Cæsareæ Majestatis
Privilegio cautum sit omnibus & sin-
gulis Typographis, & Bibliopolis, ne
libros à nostri Ordinis Patribus editos
imprimant, vel recudant &c. Abs-

que assensu & facultate dictorum Patrum sub gravissima multa &c. Hinc Domino Andreæ Stadler Typographo Aulico Campidonensi facultatem pariter impertior dicto Privilegio utendi pro prima tantum impressione præfati Libelli. In quorum fidem has manu mea subscriptas, & Officij mei Sigillò munitas dedi in Conventu nostro Salisburgensi Die 30. Maij. Anno 1745.

F. Leo Stehle
qui supra.
Mppria.

APPRO-

APPROBATIO

Theologica I.

Peregrinationem præsentem per sanctam vi-
am Crucis ad montem Calvariæ , quam
quidam Ordinis , & Provinciæ nostræ Argen-
tinenſis Sacerdos studioſiſſime adornavit , oculo
& mente relegi. Ea ſanè tam ad intellectum
illuminandum , quàm ad voluntatem amore
Crucifixi Domini inflammandum plurimum con-
ferre poterit ipſam devoto affectu obituris.
Cùmque præterea à recta fidei , & morum ſe-
mita , quam S. Romana tenet Eccleſia , nec in
minimo deſectat , imò recta ad cælum ducat ,
digna eſt , quæ cunctis Crucis Chriſti amato-
ribus prælo publicò pandatur , junctioque en-
comiò recomendetur. Ita cenſeo ex Conventu
Lenzfridano Fratrum Minorum Recollectorum.

Die 25. Maij 1745.

F. Cherubinus Mayr
Lect. Jub. p. t.
Guardianus.

APPRO-

APPROBATIO

Theologica II.

DE voluntate A. R. Patris Ministri Provincialis libellum , cui titulus : Peregrinatio sacra ad montem Calvariæ , à quodam Provinciæ Argentinensis Sacerdote laboriosissimè , ac studiosissimè conscriptum , sedula , solertique lectione volvi , & evolvi ; qui , cum nihil fidei Orthodoxæ , aut bonis moribus adversum contineat , sed potius Dominicæ Passionis Mystèria in solatium , & utilitatem ad montem Calvariæ spiritualiter peregrinantium , concinnè , solidèque commendet ; hinc prælo , & luce publica dignissimum censeo.

Die 25. Maij. 1745.

F. Amadæus Zembisch,
in Conventu Lenz-
fridano p. t. Philiæ
Lector.

Ad

Ad Lectorem.

PAtere, Religioſe Lector! ut vel in primo hujus libelli, quem manibùs tuis, & obtutu dignaris, limine paulisper te morer, haud absque conſilio Tituli rationem redditurus. Præviè enim te admonendum duxi, ut, dum à prima fronte: *Peregrinatio Sacra* legis, non ſtatim naſeam contrahas, utpote cui fors nec animus, nec facultas eſt peregrinandi. At verò non ea mihi mens eſt, ut ad laborioſas, & ſumptuoſas te peregrinationes allicere ſatagam; ſed unicè, *quoniam dum ſumus in corpore, peregrinamur à Domino*, teſte Apoſtolo 2. Cor. 5. ut non tantùm à Domino, verùm etiam *cum Domino* peregrineris. Hæc te peregrinatio non fatigat, ſed roborat: non eſt ſumptuoſa, ſed fructuoſa: non movet locò corpus, ſed movet animum, niſi fortaiſſis motum corporis eò uſque ſaſtidias, ut è cubili ad Eccleſiam, ab una Statione ad aliam, è terra in coelum, deportari illud verearis. Nec illud te offendat, quòd hæc *Peregrinatio ſit per viam Crucis ad montem Calvariae*. Trita enim hæc via eſt, & cruentis Salvatoris veſtigiis prava in directa, & aſpera in vias planas mutata ſunt. Noli metuere, nè fortè offendas ad lapidem pe-

dem tuum , nisi offendi pedem credas lapide angulari , qui factus est in caput anguli , & universam hanc viam suo stravit sanguine. Hæc insuper via tam secūra est , ut nemo sanæ mentis possit errare : tam lucida , ut etiam oculos cæcorum aperiat : tam præstans , ut egenos locupletet , locupletes faciat locupletiores : Reges potentiâ , Optimates prudentiâ , cives saturitate , Religiosos sanctitate , Sacerdotes immortalitate , peccatores veniâ , poenitentes consolatione , tribulatos fortitudine , universos universali lætificet , ac absorbeat beatitudine. In vita ditat , in morte juvat , post mortem beat. Quid multis ? *Ambula ubi vis : quære , quodcunque volueris , & non invenies altiorem viam supra , nec securiorem viam infra , nisi viam sanctæ Crucis* , ait Thomas Kemp. l. 2. de Imitat. Christi c. 12. In vita ditat ; siquidem nec unicum quidem passum in hac via feceris absque ingenti emolumento. Nam , ut Ludov. Blof. l. 1. instit. Spirit. c. 6. testatur ; *Nullus omnino potest aliquid de Domini Passione humiliter legere , aut cogitare , licet modico fortè affectu id faciat , quin eximium salutis fructum inde referat ; & , si imago Crucifixi piè inspicitur tantum , non erit inanis hæc inspectio*. Profec- &c non erat inanis hæc inspectio in S. Pau-
lo

lo Apostolo, qui candidè fatetur 2. Cor. 7.
Superabundo gaudio in omni tribulatione nostra. Ejusdem gaudij participem exinde se factum esse testatur S. August. l. 9. Confess. c. 6. sic aspirans: *Quantùm flevi, bone JESU! in acerbissima mortis tuæ meditatione, tantò misericordiæ tuæ prodigiò commotus acriter! Eliquabatur scilicet misericordiæ tuæ dulcedo in cor meum; & ex ea æstuabat affectus pietatis, & currebant lacrymæ, & bene mihi erat cum eis.* S. P. meus Franciscus per integros interdum menses incessabilibûs lacrymîs deflens Passionem Domini ad ocularis usque luminis jacturam, tantò se gaudiò, consolatione, & spirîtus exultatione repleri fassus est, ut per omne vitæ tempus, etiamsi ad novissimum diem protrahendum esset, alio se gaudio, & solatio non indigere arbitraretur, præterquam illo, quo hactenus se repletum sensisset. Id nimirum interest discriminis inter humanum solatium, & Passionis Dominicæ planctum; quòd humanum solatium desinat in luctum, luctus autè Passionis Dominicæ desinat in gaudium, & solatium mentis ineffabile. Hac veritate convictus exclamat Jacobus Tyrinus in illud Cant. 5. *Messui myrrham meam cum aromatibus: sed en! mirabilem statim metamorphosin! myrrha amarissima fit favus dulcissimus, &*
(5 *vinum*

*vinum sapidissimum ; nec jam ampliùs torquet
sua amaritudine ; sed recreat, & inebriat instar
generosissimi vini.* Idipsum latè demonstrat
novissimè noster P. Sabinianus Fritsch, in
aureo suo libello, quo viæ Crucis amorem
vehementer instillat. Inter alia refert Au-
thor hic, Religiosum quemdam eò tepo-
ris, tristitiæ, ac languoris pervenisse, ut
nec orationi, aut lectioni vacare, nec
aliud bonum opus aggredi auderet. Conti-
git fortè, ut tædiò, & languore plenus in
sua cella moraretur ; cùm de repentè cœ-
lestem hanc vocem auribus suis illapsam sen-
sit : *Quid hic sedes otiosus in te ipso tabescens ?
surge, & meam devotè pertracta Passionem,
& in ejus amaritudine tuum vinces dolorem.*
Surrexit ille, obsecutus est, vicit. Quid
adhuc egemus testibûs ? si ipse cœlestis
Medicus pro morbo hoc communissimo
curando non aliud, quam Passionis suæ re-
colendæ pharmacum præscribit : quis au-
deat de illius efficacia dubitare ? Jactet nunc
suas divitias Cræsus : studeant alij ex recon-
ditis terræ latebris thesauros eruere : ditior
est, qui sacram Crucis viam vel à limine
attingit. Enimverò quis civium, quis prin-
cipum, quis Regum, tantarum divitiarum
aut hæres est, aut possessor, ut absque æ-
rarij dispendio, & crumenæ suæ rugis, tam
pro-

propria , quàm genitorum , ac majorum
suorum debita valeat expungere ? Valeat
hoc noster per viam Crucis Peregrinus , in
qua apertus exstat inexhaustus Ecclesiasti-
carum divitiarum thesaurus : & nè quis ina-
ni deciperetur persuasione , tantam , & non
majorem quotam , certósque limites ex hoc
thesauro ditescere volentibus positos esse :
sacræ Congregationis decretò cautum est ;
nè quis taxare , aut specificare præsumat In-
dulgentias , singulis Stationibus concessas ;
quia credibile est , longè plures , ac deter-
minari possint , Apostolica largitate esse pro-
fusas. Porro tanta est ipsius Dei , ac Do-
mini nostri JESU Christi , erga viam Cru-
cis , & sacros Peregrinantes , affectio , ut ,
licèt prædictam Vicarij sui , Romani Pon-
tificis , liberalitatem , quàm dignantissimè
ratificet , ipsemet tamen ex Divinis suis
thesauris (ut cuidam devoto Dei famulo
revelatum est teste Joanne Thaulero) se-
quentes novem pretiosissimas margaritas ad-
jiciat.

Prima est : Devotus in via Crucis Pe-
regrinus à peccatis omnibus emundatur , &
quidquid neglexit , id illi ex meis meritis
restituitur.

Secunda : Ad resistendum hostibus suis
ita confortatur , ut nullum ex eo trium-
phum

phum ferre queant ; & etiamſi ex infirmitate non nunquam labatur , dexteram tamen meam ſuppono , nè collidatur , & pereat.

Tertia : Ad bona quæcunque opera , diverſasque virtutes peragendas , vires acquirit.

Quarta : quantumlibet brevi cogitatione eandem Paſſionem meam revolvat , ſemper anima ejus in gratia mea renovatur.

Quinta : Devotè Paſſionem meam commemoranti libenter ego commoror.

Sexta : Arcana , mihi à Deo Patre manifeſtata , illi ſimiliter aliquando pandam.

Septima : Ante mortem cum mihi placentem reddam , & deſunctum cum amicis meis remunerabor.

Oſtava : Nihil eorum , quæ ſeriò , rationabiliter , convenientérque petit , illi negabo.

Nona : In morte illi adverſus hoſtes aſſiſtam ; & de vita æterna ipſum faciam certum , atque ſecurum.

Via igitur Crucis *inſinitus eſt theſaurus hominibus , quo , qui uſi ſunt , participes facti ſunt amicitia Dei.* Sapient. 7. Ditat ergo in vita.

Juvat etiam in morte. Et quid nî juvet in extremo illo rerum articulo , de Deo eſſe

esse optimè meritum , & Judicem sibi habere obstrictum ? juvat utique. O! quàm prægrande in morte habiturus es juvamen , qui frequenti , ac devoto per viam Crucis itinere Deum tibi , & Judicem tuum devinxisti. Fatetur incarnata Veritas apud Ludolphum Chart. vitæ Christi p. 2. c. 58. Non posse se magis creaturæ devinciri , & gratius sibi ab ea obsequium exhiberi , quàm frequenti , & gratâ Passionis suæ memoriâ. Porro , si iter æternitatis ingressurus de bonorum operum penuria cruciaris : timorem protinus abjice : multam collegisti bonorum operum messem , si sacras sæpiùs per viam Crucis peregrinationes obiisti. Non mea hæc est sententia ; sed B. Alberti Magni apud Discip. ser. 1. in Parasceve. Ludovici Granat. Ludovici de Ponte , & aliorum Ascetarum docentium , quòd *simplex meditatio Passionis Christi plus valeat , quàm si quis per annum jejunaret in pane , & aqua , quolibet feriâ sextâ : vel disciplinaret se quolibet hebdomada per annum usque ad effusionem sanguinis : vel quotidie legeret Psalterium.* Hæc , si tu fecisses , nescio , quæ te æternæ salutis teneret fiducia : atqui fecisti plura per unicam simplicem de Passione cogitationem : imò fecisti talia , tantâque opera coram Deo , quanta nec crede-

res à creatura procedere posse. Audi, quæ ex revelationibus B. Mechtildis duco, quam Christus aliquando ita affatus est : *Quoties homo in meditatione Passionis meæ ex amore suspirat , toties vulnera mea , tanquam cum vernante rosa suaviter tangit : ex quo sagitta amoris in animam ejus evibratur.* L. I. Revel. c. 24. Alia vice : *In veritate dico tibi , quòd si quis ex devotione erga Passionem meam lacrymam fuderit , hoc ita acceptabo , ac si pro me passus fuisset.* L. I. c. 27. Ostupendam Dei bonitatem ! Denique lib. 2. Revel. c. 15. hæc à Christo illi revelata sunt : *Si quis mihi pro illo dolore , quòd in Cruce ita extendebar , ut omnia membra mea numerari potuerint , gratias egerit , tale mihi præstat obsequium , ac si vulnera mea unguento unxisset.* Et, *si quis mihi gratias egerit pro siti , quam sustinui , hoc ita accepto , ac si sitim meam extinxisset.* Et, *si quis mihi gratias egerit , quòd clavīs Cruci affixus sim , hoc mihi ita gratum est , ac si me de Cruce liberasset.* Obstupescentem jam seponerem calamum , nisi te monendum duxissem , ut , si de enormi tuæ salutis incuria evidenter convinci nolis , frequenter in hac Crucis via peregrineris : Hæc peregrinatio juvabit te in luctuoso mortis conflictu.

Beabit denique post mortem. Refert
Cæ-

Cæsarius l. 13. c. 51. Religiosum quem-
dam, è divi Benedicti familia (quæ in no-
stra Germania exercitio viæ Crucis addictis-
sima est) subitò correptum morbô , & de-
functum , confestim suo Abbati post fata
apparuisse ; eidémque indicâsse, se recta ad
coelestem Patriam absque remora tendere.
Ergône fili mi ! ajebat Abbas, absque pur-
gatorio in cœlum tendis ? ita est, reposuit
ille ; quotiescunque enim imaginem Cru-
cifixi prætergressus sum, per sacra ejus vul-
nera, illámque amaritudinem, ac dolores,
quos ejus anima in Cruce fuit perpeffa, ro-
gavi, ut esset animæ meæ propitius in ho-
ra mortis. Propitius mihi fuit ; & hinc cœ-
lum conscendo. Idipsum est, quod suprâ
ex Thaulero retuli. Nec mirum ? si enim
tam profusum se exhibet Deus illis in vita,
& in morte, qui Passionem Dominicam re-
colunt ; an poterit eorum oblivisci post mor-
tem ? nunquid post obitum nostrum abbre-
viata est manus Domini ? aut poterit Do-
minus oblivisci servi sui, qui sedulò recor-
datus est Domini sui ? Minimè gen-
tium ! *Nihil enim in anima ita operatur uni-
versalem sanctificationem, sicut meditatio Pas-
sionis Christi*, ait sanctus meus Bonav. in
Stim. amoris.

Hæc cum ita sint, ut post mortem
bea-

beata te expectet æternitas , quæso , cogi-
tatus tuos illuc converte , ubi *abluit Domi-
nus sordes filiarum Sion in Spiritu ardoris* ,
Isa. 4. ut Dominus noster JESUS Christus ,
juxta vaticinium Zachariæ 9. c. *in sanguine
testamenti sui emittat vinctos suos de lacu , in
quo non est aqua ; sed ignis conflans , & e-
mundans argentum , ac purgans filios Levi.*
Malach. 3. Exclama cum S. Aug. l. 9. Conf.
c. 33. *Pro peccatis Matris meæ* (aut alia-
rum animarum , in individuo determinan-
darum) *te deprecor , exaudi me per medici-
nam vulnerum tuorum , quæ pendit in Cru-
ce.* Qualis hæc medicina ? *Purgationem pec-
catorum faciens.* ad Hebr. 1. Passio nimi-
rum Christi , cujus usum (testis est S. An-
toninus p. 3. tit. 4. c. 8. q. 15.) optime æ-
stimavit B. noster Joannes de Alvernia ; nam
*observatum est non raro , vulnerum Salvatoris
affectuoso cultu tot animas è Purgatorij flam-
mis solvisse , quot ab ingenti igne vehementer
agitato in aërem evolant scintillæ.* Hinc mi-
rum non est , quòd animæ , piacularibus
flammis destinatæ , nihil æque desiderent ,
quàm ut de sacra viæ Crucis peregrinatio-
ne participant , velut testatum facit P. Hi-
larius de Borgo Novo , in via Crucis illu-
minata l. 2. c. 26. referens , Mariæ de an-
tiqua , Moniali Hispanæ , sanctitate claræ ,

unam

unam ex defunctis religiosis suis sororibus
apparuisse, in hæc lamenta erumpentem :
Ut quid pro me, & alijs defunctis, non fre-
quentatis sacras viæ Crucis Stationes ? Pro
hoc utilissimo charitatis officio vos meo, & om-
nium fidelium purgantium nomine vehementer
imploro. Similibus forsan vocibûs parentes
tui, propinqui, & confratres tuam opem
implorant : cave, nè detestandâ socordiâ
ligatus tam ardentem supplicationem non
exaudias. Nolito credere, alia de causa in-
gentem Indulgentiarum copiam à Romanis
Pontificibus huic exercitio adjectam fuisse,
quàm ut earum reliquiæ, quas tibi applica-
re non potes, cadant quasi de mensâ tua
in stagnum flammæ ardentium, ut ab
his solutæ evolent in libertatem filiorum
Dei perfectam. Ecce, sic beat post mortem
sacra per viam Crucis peregrinatio. Sum-
ma summarum : *Non potest Deo gratius Sa-*
criticium offerri pro defunctis, certius remedium
pro vivis, majus gaudium Angelis, & SS.
Trinitati excellentius grati animi, & debitæ
reverentiæ argumentum, quàm se quotidie ex-
ercere in contemplatione Passionis Salvatoris
nostri, ait S. Bonav. Ad hanc contempla-
tionem, & sacram peregrinationem frequen-
tandam, nos exhortantur SS. Patres ; existi-
mulant Ascetæ : propria trahit felicitas : nul-

la absterret difficultas : invocant animæ purgatorii : invitant commoditates , ac utilitates ineffabiles , & lucra prorsus ingentia : allicit ipse Christus Dominus promissis superexcessivis : impellit summus Christi in terris Vicarius Innocentius XII. & Benedictus XIII. qui pro singulis horæ quadrantibus , in hac sacra peregrinatione transactis , centum dierum Indulgentias in Domino concessere : plenariam item Indulgentiam , defunctis applicabilem , ijs , qui per mensem integrum quotidie , vel unico horæ quadrante huic exercitio vacaverint , ubi die placita confessi , & communicati ordinarias Indulgentiarum preces fuderint. Movet denique exemplum B. V. Matris Dei MARIÆ , quæ (ut ipsamet B. Brigittæ revelavit) indefinenter peregrinabatur , & obibat loca , in quibus Filius suus dulcissimus passus est. MARIÆ exemplum secuti sunt sancti Apostoli , alique Christicolæ plurimi , præsertim sancti sacrorum Ordinum Fundatores , qui omnes in meditatione Dominicæ Passionis mirè exarserunt. Utinam eorum Spiritus in nobis vigeret ! resuscitabitur saltem , si Superiores , & animarum Pastores (uti hætenus , ita & deinceps) oves suas bono exemplò præeant , nec verecundentur sacras Stationes perambulare , quas cum ingenti verecundia erexit Deus Homo.

En, Lector Religioſe ! quàm te non offendere debeat libelli titulus, ſed ædificare. Plures tibi ſubminiſtravi praxes, ut Spiritum devotionis, haud ſecùs, ac lampadis animam, affuſò ſenſim oleò, foverem. Varietas enim delectat, & conſueta paſſim exercitia ſolent tepeſcere. Tu qualicunque hoc meo labore frui, pro quo aliam mercedem non quæro, quàm frequens Viæ Crucis exercitium, & fructum Spiritualem exinde tibi reſultantem. Nil modò reſtare videtur, quàm ut te alloquar illis verbis, quibus S. Thomas Apoſtolus alios ſuos Coapoſtolos allocutus legitur Joan. 11. *Eamus & nos, ut moriamur cum eo.* Eamus ergo, Religioſe Viator ! eamus per ſanctam Crucis viam ad montem Calvariæ : eamus de virtute in virtutem : eamus de vita viti-
orum ad mortem criminum, ut moriamur JESU, & vita noſtra abſcondita ſit cum Chriſto in Deo. Eamus in comitatu B. V. *MARIÆ* ; & aſcendamus montem Calvariæ, ut videamus, in quem tranſfixerunt. *Ingrediamur dein has vulnerum Domini Apothecas ; ut accipiamus in illis medicinam ſanativam, reſtaurativam, præſervativam, & conſervativam, & pretioſa electuaria, quæ animæ noſtræ ſtomachum faſtidientem ad Divinum guſtum reſtituant.* S. Bonav. ſtim. amor. p. 1. c. 2. Eamus ergo, & procedamus in Pace.

Oratio

Oratio Præparatoria.

Domine JESU Christe Filij DEI Vivi ! qui ex infinito salutis humanæ desiderio sacram Crucis viam & calcâsti primus , & tuïs Sacro-Sanctis signâsti vestigijs. Ecce ! ego miser homuncio , tuô inflammatus exemplô , & ex fervidissimo tibi compatiendi desiderio , hanc sacram Crucis viam in eo , meos passus cum tuis dolorosissimis passibus , meos gemitus , & suspiria , cum tremendis illis tuis gemitibus , ac suspirijs conjungens. O dulcissime JESU ! ad amantissimæ Passionis tuæ memoriam dignè , & fructuosè recolendam , durissimum cor meum emolli , illudque compassivo erga te dolore confringe , ut tibi in hac sacra viâ Crucis devotione sincero affectu compatiatur : Et quia ô clementissime Redemptor ! non vis mortem peccatoris , sed ut magis convertatur , & vivat , ideo tuam supplex effragito gratiam , ut omnia peccata mea (propter quæ tam acerbissimos cruciatus subire dignatus es) efficaciter detestari , & Te posthac semper super omnia diligere valeam. Ad lucrandas igitur omnes indulgentias (quas sancta Romana Ecclesia fidelibus pia , & compassiva in Christum patientem mente , istam devotionem recolentibus unquam concessit , quarum unam plenariam animæ meæ , reliquas verò omnes animabus in purgatorio igne detentis applicare desidero) hanc sacram piæ Crucis Peregrinationem ad solius Christi JESU pro me passi gloriam & honorem , meamque salutem tuâ sanctâ adjutrice gratiâ instituire intendo.

PRA-



t



PRAXIS PRIMA.

Statio I.

Pilatus Christum Morti adjudicat.

- ✱. Adoramus te sanctissime Domine JESU Christe,
& benedicimus tibi !
- ✱. Quia per sanctam Crucem tuam redemisti mun-
dum.

OMnem Pilatus adhibuit conatum, ut JESUM, quem ex Judæorum invidia traditum noverat à morte, & se ipsum ab injustæ sententiæ pronuntiatione liberaret : At verò, ne Cæsaris excideret gratiâ, dixit : *Accipite Eum vos, & secundum legem vestram judicate. (a)*

Perpende primam tremendæ hujus tragediæ scenam ! Tu es ille Pilatus, cui ex invidia non Judæorum, sed maledictorum dæmonum, traditus est JESUS. Et utinam ! hoc in puncto Pilatus fuisses, & omnem adhibuisses conatum, ut JESUM à Morte, & te à peccato, quod est injusta contra JESUM sententiæ pronuntiatio, immunem fecisses. Ast (O rem detestandam) dixisti dæmonibus, indomitis tuis cupiditatibus, iræ, superbix, gulæ &c. *Accipite Eum vos.* Acceperunt igitur JESUM, & secundum legem suam judicaverunt. Quanam est autem lex cupiditatum tuarum, & passionum ? nulla præter hanc solam : *Circumveniamus justum, quoniam contrarius est operibus nostris : morte turpissima condemnemus eum ! (b)*

A

Sic

Sic quidem non dixi verbô, sed opere. Hæc ego feci, & necdum puteus infernalis urget super me os suum !

O Pater æterne ! qui, ut servum redimeres, Filium tradidisti : En ! habes fatentem reum, & quidem longè peiorem pessimo Iudice Pilato ; hic multùm laboravit pro salvatione Christi tui, etiam si Ethnicus fuerit ; ego autem Christianus, & quidem Religiosus cùm sim, laboravi, ut Eum dolô tenerem, & crucifigerem, secundùm legem perversæ meæ naturæ vivendô, & post concupiscentias meas abeundô. O JESU pro me condemnate ! ad tribunal tuum procumbo : sententiam meam iniquam revoco, & annullo. Pænitet, ah pænitet, transgressorem legis tuæ fuisse ! *dixi custodire legem tuam, deprecor faciem tuam in toto corde meo : Misere mei secundùm eloquium tuum, Amen.*

Pater, & Ave.

O Amor Crucifixe ! miserere mei.

(a) Joân. 18. (b) Sap. 2.

Statio II.

JESUS Crucem suscipit.

†. Adoramus, ut suprà.

JESUS Christus Crucem gravissimam, & amarissimam omni virium annisu suscipit. Haud parcit laboribus, haud parcit sudoribus, non parcit corpori, non parcit sanguini, imò nec parcit ani-

animæ, ut Crucem ferat, eamque mihi levem, dulcem, ac portabilem faciat.

O ! Qualis ego sum Crucis bajulus ? non tantum ad Crucem portandam extremas non adhibeo vires, sed ne extremò quidem digitò Crucem tango, sed omnibùs viribùs eadem me exonerare allaboro. Exultavit Christus ut gigas ad currendam viam Crucis : ego in via perfectionis, (quæ est via Crucis) nec testudinem celeritatè vinco. Ab oneribus Religiosis, ab obedientia magis laboriosa, velut à morfu serpentis horreo : quin etiam (quod videtur incredibile) meditationes præscriptas, psalmodias sacras, sacrificia tremenda, precesque consuetas depropero, aut omninò negligo. Quare ? ut citatis passibùs curam. Quorsum ? ah ! non ad montem Calvarie, non ad suscipiendam Crucem ; sed ad colloquia vana, occupationes frivolas, meæ solium tepiditati, non Deo, non superioribus aridentes. Omnis mihi mora in servitio Dei longa est, & tædiosa ; in colloquijs autem, recreationibus, & carnis cura perficienda, & ejus desiderijs explendis, omnis hora brevis. O me Misellum ! certus omninò sum, quòd cor meum vanum sit, alienum ab amore Crucis, & plusquam tepidum. Nescivi sanè, aut saltem non perpensi mecum, quod Thomas de Kemp. ait : *Tantum proficies, quantum tibi vim intuleris.* Heu me ! quantum ego profeci hactenus, & proficiam posthac, qui nullam mihi vim inferre soleo ?

Christe JESU ! quia spiritus quidem promptus, caro autem infirma est, & propterea gravissimam tuam Crucem portare nequeo ; hinc amore tui inflamatus saltem posthac portare satagam levem statutorum Religiosorum Crucem. Observabo omnia exactè : ad tremendum Missæ sacrificium celebrandum, & Communionem Sacrosanctam, devotius me accingam : sacras meditationes, & examina particularia solertiùs faciam : penso Canonico, & devotionalibus precibus non tantùm vocem, sed & sensus ex - & internos accomodabo. Ah ! tremendas meas negligentias clementer dimitte, fervorem infunde, & verum Crucis amorem benignus indulge, & , ut paucula illa, quæ te inspirante proposui, constanter exequar amore tui, inclina cor meum ad custodiendas justificationes tuas, Amen.

Pater, & Ave.

O Amor Crucifixe : miserere mei.

Statio III.

Jesus primò sub Cruce corruit.

†. Adoramus te, ut suprà.

Christus intolerabili Crucis pendere depressus in terram pronus labitur cum risu dæmonum, jocò lictorum, gaudio hostium, plausu Judæorum. Cadit profecto, ut stare discas Religiose, vel potius cadere ad pedes JESU, deprecari omnem offensam, calcare tuum fastum, & nimiam honoris proprii ambitionem. Non surget JESUS

nisi

nisi ipsum à terra allevaveris per verum humilitatis studium, per strenuum cum vitijs, & passionibus certamen. Nôsti anima mea? quamdiu jam jacet in terra pronus Salvator tuus? Si nescis, dicam: Tamdiu, quamdiu tua mens repit humi, affixa vanitatibus, nauseans Crucem, contemptus, & mortificationes. Edic: si conveniens est, JESUM in corpore suo extrema quæque perpeti, & te corpori tuo blandiri: Deum humiliari, & te superbire: Judicem & Salvatorem tuum ad tuos pedes prosterni, & à te Reo pedibus conculcari? Hæc pondera, & meditare, ut discas humiliari sub potenti manu Dei, immoderatum honoris proprii desiderium refrænare, & superioribus, eorumque dispositionibus, ut ut tibi contrarijs, humiliter te subdere, & acquiescere. Anne grave tibi accidat, superioribus amore JESU subdi, si aspicias JESUM, non tantum Patri Divino, sed & hominibus, & quidem carnificibus, ac licitoribus, quorum vel nomina exosa sunt, amore tui stupenda humiliatione subiectum?

Exurge Domine, adjuva me, ut, quemadmodum te Crucis pondus ad terram, & ad pedes meos dejecit; ita pondus amoris, & stupendi exempli tui, me totaliter sacrosanctæ Cruci tuæ, & pedibus superiorum meorum perfectè subiciat. Exurge in adjutorium mihi, ut memetipso fortior voluntatem meam cum tua, & propter te cum voluntate superiorum meorum perfectè conformem. Rideant mealij, plaudant inimici, ringatur superbum corpus, non curabo: Mihi enim au-

Praxis Prima

harere pedibus tuis cum Magdalena bonum
est. Fiat !

Pater, & Ave.

O Amor Crucifixe ! miserere mei

Statio IV.

Christus cum Cruce obviat Matræ.

✠ Adoramus te, ut suprâ.

JESUS Cruce onustus, ingenti catenarum pondere gravatus, ab infami carnificum, lictorû-
que plebe, inaudita crudelitate ad extremum rap-
tatur supplicium. Fugêre amici, & Discipuli om-
nes; sola non fugit mater JESU Maria, quæ, cum
ineffabili Filium prosequeretur amore, retardari
nullâ militum, armorumve vî potuit, quin ti-
more neglecto irrueret, ultimum Filio suo dictu-
ra vale.

Hæc sancti amoris virtus est, & proprietas, ut
superet omnia, & superetur â nullo. Quis jam
tibi sensus, O Religiosa anima ! Nunquid si tunc
temporis huic spectaculo fuisses præsens, & JE-
SUM fide supernaturali cognovisses, exemplô Ma-
tris amantissimæ inflammata hastas, & enses mi-
litumque, ac carnificum turbas penetrâsses, am-
plexu Divini Amoris fruitura ? Arma, ferocêsque
milites sunt irrefrenatæ tuæ passiones, & indo-
mitæ cupiditates, quæ te ab amplexu, & ab amo-
re JESU remonent. Has igitur generosus athleta
perrumpe : JESUM in via Crucis comitare, &
strenuè sequere. Ecquanâm causa est, quòd
Mariam

Mariam Dei Matrem non imitatus, fugeris cum Discipulis, viam Crucis rarò, aut nunquam obieris, & visitaveris? nunquid erubescabas ab una statione ad aliam repere? timebas, nè ab alijs ludibrio habereris, noménve devotæ Mulierculæ ex tua devotione reportares? Ecce erubescencia illa, timor ille, respectus ille humanus, omni milite fortius te arcet à sequela Christi, qui, cùm in forma Dei esset, non erubuit viam Crucis ambulare manibus tradi nocentium, & Crucis subire tormentum.

O JESU! quàm perversus homo sum ego, quàm superbus, & elatus! Tu Rex meus, tu Deus meus, non erubescis pro me flagellari, condemnari, confundi, pati, & mori: & ego erubesco in grata tuæ Passionis memoria, & ejusdem viæ Crucis visitatione! O JESU! O Amor! non erubescam posthac: viam Crucis frequenter visitabo: dicant homines perversi, quidquid velint, non erubescam te in hac vita, nè erubescas me in altera. Amen.

Pater, & Ave.

O Amor Crucifixæ! miserere mei.

Statio V.

*Simon Cyrenensis cogitur portare
Crucem post JESUM.*

✠. Adoramus te, ut suprâ.

Tantum fuit Crucis pondus, ut JESUS totus debilitatus illam solus portare amplius non

valeret. At verò ex amicis nemo, ex gente Judæorum nullus inveniri poterat, qui eam charitatem lassato Dei Filio impenderet. Coëgerunt igitur milites hominem alienigenam fortè transeuntem, & extremè reluctatum, ut Crucem post JESUM tolleret.

Homo ille alienigena fui ego, dum adhuc sæcularis, & mundanus, sedebam in Ægypto ad ollas carniū, ea, quæ Dei fuerant, parū curans, Crucem cane pejus, & angue fugiens, & solummodò post concupiscentias meas abiens. Quod verò quā homo sæcularis, & quasi alienigena, Crucem horruerim, non adeò mirum videtur; nunc autem per gratiam Dei prævenientem, excitantem, & vocantem, ad statum Religiosum, Clericalem & Sacerdotalem delatus, & inter comensales, & amicos Dei connumeratus, quòd Crucem post Jesum ferre, quasi alienigena recusem, hoc mirandum non tantum, sed & summè dolendum est. Est status Religiosus vera Crucis via, in qua invitat me JESUS ad humilem Crucis sequelam, monétque, ut si non suam gravissimam, saltem levem illam Religiosæ disciplinæ Crucem, tam, silentij leges, statutas Psalmodias, vigiliās, humiliações, paupertatis incommoda, jejunia, aliaque præcepta, & constitutiones monasticas, amore ipsius exactè observem, sacras meditationes, & recollectiones, & examina non negligam &c. Ego autem ut surdus petransi, & sicut homo non audiens: ego in via Crucis meas quære commoditates, & rosas extra spinetum.

O JESU ! tu amâsti me, vocâsti me, invitâsti me, non ad gravissimam tuam Crucem ferendam, sed ad levem regulâ, & statutorum observantiam : ego verò nec levem ferre volui Crucem hætenus, imposterum autem Divina tua opitulante gratia parvula illa, & paucula Religiosæ observantiæ incommoda, amore tui libens, lubens feram. Conforta me Deus meus !

Pater, & Ave.

O Amor Crucifixæ ! miserere mei.

Statio VI.

Veronica porrigit JESU sudarium.

†. Adoramus te, ut. suprà,

DEvotissima matrona Veronica, Christi facie, quæ sputis, sanguine, lutô, pulvere, vulneribus, & plagis horrendum in modum erat deformata, paulò attentius inspectâ, tanta fuit commiseratione commota, ut sancto impetu acta per milites, & carnifices irruens, velum capiti suo detractum, JESU porrexerit, quo faciei sacrosanctæ injuriosas maculas detergeret.

Hæc nimirum est Passionis Dominicæ prærogativa, ut facies Christi in via Crucis considerari non possit absque pijs motibus, commiserationis affectibus, & amoris incentivis. Respexerunt Israëlita in serpentem æneum, & à veneno sunt sanati : respexit Claudus ille in faciem Petri, & consolidatæ sunt bases ejus. Respice O Religioso, O Sacerdos ! respice in faciem Christi tui per

frequentem viæ Crucis visitationem , & sanaberis à veneno tepidæ , & irregulose conversationis , & consolidaberis in virtutibus : modò Veronicam imiteris , quæ non tantum in Divinam respexit faciem ; nec contenta fuit pio commiserationis affectu ; sed succurrere effectivè decrevit : velum capiti suo detraxit , per turbam , & milites penetravit , & sordes à Dominica absterfit facie. Hæc igitur tria in Veronica imitanda propone. 1. Quòd frequenter , & ferventer viam Crucis visitare velis , in eaque passionem Domini grata mente recolere. 2. Quòd pias inspirationes in effectum deducere velis , ut hac ratione Divinam recrees faciem. 3. Quòd bona proposita hic concepta annotare , de die bis relegere , & occasionem executionis quærere velis ; & hoc ideo tantum , quia JESUM pro te passum & amare , & imitari desideras.

Domine Deus , pro me passe ! aliud à me non exigis nec aliud tibi offerre possum velum , quàm compassivæ visitationis illius viæ , quam Crucem tibi bajulans ambulasti. Ex nunc firmissimè propono , te in visitatione sacræ viæ Crucis frequentius contemplari , contemplandò condolere , condolendò , quæ tibi sunt placita , & mihi inspirata , cruciformi spiritu operari. Amen.

Pater , & Ave.

O Amor Crucifixæ ! miserere mei.

✠ (†) ✠

Statio VII.

Secundò JESUS sub Cruce labitur.

✠. Adoramus te, ut suprà.

PRima vice JESUS ex nativo Crucis gravissimæ pondere debilitatus, & depressus in terram corruit; ast hac vice Judæorum, militum, carnificumque immiti rabie, confusionibus, tractionibus, percussionibus, ac inhumana ferocitate denudò prosternitur.

Ah mi JESU! scio, quare causas lapsum tuorum ità disposueris. Ego enim primitus ex fragilitate humanæ carnis, quam pro me assumere dignatus es, in terram peccati collisus sum, dereliquit me virtus mea, & lumen oculorum meorum non fuit mecum. Ast ubi tu altissimi virtus Dei meam imbecillitatem tua infirmitate curasti, & vires ad tibi ferventiùs serviendum duplicasti, tunc ego (horrendum dictu!) ego inquam, perduellis, & rebellis, omni carnifice immanior, vires meas ad frequentiore tuæ Majestatis offensionem adhibui, & plùs quàm diabolica crudelitate in terram dejeci. O tremendum spectaculum! ad meos prostratus pedes jacet Dei Filius, meum exspectans furorem; imò meam expertus impietatem. Pedibus eum tundo meæ superbiæ, qua subesse recuso, præesse desidero. Pugnis eum meæ iracundiæ, ac vindicativi animi percussio. Catenis ferreis cædo miserum carnis mancipium. Omni denique injuriarum genere in JESUM debacehor, qui carnis commoditatibus edusque.

usque in bio, ut mortificationis, debitæque castigationis oblitus effundar super ollas carnum, potens ad bibendum vinum, lusus, recreationes, extravagantias, sæculares conversationes, & omnis generis vanitates.

O JESU ! hæc ego feci, & tacuisti. A modo verâ ductus pœnitentiâ tuis Divinis advolvor pedibus, quosque lacrymis contriti animi irriigo, humillimè rogans, ut effundas super me spiritum Religiosæ mortificationis, & salutaris in me ipsum odij. Da gratiam, ut posthac mihi metipsum non parcam, qui tibi non peperci.

Pater, & Ave.

O Amor Crucifixæ ! miserere mei.

Statio VIII.

Pia Mulierum turba JESUM deplorat.

¶ Adoramus te, ut suprâ.

DEvotæ JESUM in crucis itinere plangunt mulieres ; at ipse ad eas conversus ait : *Filiæ Jerusalemy, nolite flere super me, sed super vos ipsas flete, & super filios vestros, quia, si in ligno viridi hæc faciunt, in arido quid fiet ?* (c)

Filia Jerusalemy est anima fidelis, lignum viride est Christus Dominus, qui fructum dedit in tempore suo, fructum boni exempli, Doctrinæ Evangelicæ, fructum Passionis, fructum sanguinis, fructum vitæ & mortis. Ast ego sum aridus remissus, dissolutus, tepidus, & absque succo. Quid ergo fiet de me ? profectò nihil aliud quàm
quod

quod fit cum ligno arido : excidetur , & in ignem mittetur , ardebitque semper , cessabit nunquam. O verba , quovis fulmine penetrantiora ! quid igitur consilij ? Audi : Æterna Veritas consiliarium agit : *Super vos ipsas flete* , ait mulieribus , & super filios vestros , id est , negligentias vestras , turpitudines , dissolutiones , & peccata ; malum enim ovum , malus partus sunt mea delicta. Atqui durus est hic sermo ; malim ego ex pumice rivum , quàm ex indurato corde meo lacrymulam elicere. Sed nè despera ! illæ etiam mulieres , nû fallor , rarò fleverint , donec Jesum in tormentis , & in via Crucis viderunt : hoc in spectaculo cordis durities emollita , & petraë disructæ sunt. Percussit Moyses petram , & delicta quas. Tu petram , quæ Christus est , tantummodò aspice , & fluent aquæ ex oculis tuis. Esto sedulus in Passione Domini meditanda , dimidiam horulam , quam vanò aliàs consumeres colloquiò , lusu , dormitatione &c. Christo posito dona , & experieris , quod hactenus expertus non es.

Domine JESUChriste ! convictus sum totus , idèò cor meum congelatum est , quia te non accessi , qui venisti ignem mittere in terram. Agnoscò , quòd , si tuæ tremendæ Passioni unum suspirium , unum , alterùmve quadrantem non condonavero , curæ carnis autem integros dies , & annos dederò , aridus sim , & ad combustionem æternam aptus. Da , ut in meditatione tuæ Passionis exardescat ignis , solvatur glacies cordis ,
 fleam

Ream super me, & securè veniam ad te, Amen. Pater, & Ave.

O Amor Crucifixe ! miserere mei.

(c) Luc. 23.

Statio IX.

Jesus tertio sub Cruce prosternitur.

✠. Adoramus te, ut suprà.

Ad pedem montis Calvariae Dei virtus, tertio viribus destituta horribili lapsu fatiscit, & Crucis succumbit. Dolorosissimus omnium erat hic lapsus; quia frequentiore corporis, artuumque collisione vulnera renovabantur, sacrosanctum Caput spinis de novo cruentabatur, Humerique Divini hiulco diducebantur vulnere.

Quis putas, Religiosa anima ! ter repetiti lapsus causavit dolores ? quis sacros collisit artus, renovavit vulnera, mille puncturas superinduxit capiti, humerosque perforavit ? quis ? Peccator elices, inveteratus, habituat, consuetudinarius. Benè dixisti ; sed ex ore tuo te judicas. Tu tu es ille vir, tu es ille Carnifex, Deicida, inveteratus malorum, & (quod dolendum !) habituat peccator, & consuetudinarius. Conscientiam tuam convenio. Quoties per vulnera JESU in S. Pœnitentiæ Sacramento à vulneribus animæ tuæ sanatus es ? & quoties non nova vulnera in anima tua JESU Christo inflixisti ? Quoties per corpus Christi Eucharisticum erectus es ?

&

& quotiès non idem corpus in terram dejecisti, dum nulla emendatione secuta priores reatus incurristi, & iisdem semper gravatus erroribus S. Poenitentiae Sacramentò abuteris. Emendationem promittis; sed promissum non servas, meliorationem vitæ proponis, sed propositum non exequeris. Hinc ad repetitos lapsus JESUM urges; te enim infirmato infirmatur, te labente labitur, te impellente corruit.

O JESU Fili David miserere mei! malitiosam meam crudelitatem, perrepetita peccata, & emendationis procrastinationem, in te exercitam, humili, & contrito corde detestor, abominor, execror; & ex nunc firmitus, quàm nunquàm ante hac, emendationem propono, leves etiam defensus velut zizania extirpabo, nec te amplius in terram projiciam, *nè projicias me à facie tua, & Spiritum Sanctum tuum nè auferas à me.* (d)

Pater, & Ave.

O Amor Crucifixe! miserere mei.

(d) Psalm. 50.

Statio X.

Jesus exiit vestibûs.

†. Adoramus te, ut suprà.

Postquam haustum vinarium, extremum ultimo supplicio plectendi confortamentum, impij negaverant Judæi Christo, tunicâ inconsutâ eum rabidâ violentia spoliant.

Adeò

Adeò nullam habet terrenam refocillationem moriens Deus, ut etiam gravissimam passus sitim felle potetur, & acetò. Tu verò hujus immemor crudelitatis, corpus tuum turpissimum, & flagitiosissimum, vinò optimò, & abundantissimò opes, totusque es in computationibus, & ebrietatibus, ac in evacuandis poculis. Gloriaris præterea, quòd potens sis ad bibendum vinum, & alios inebriandos. Quid igitur mirum, si violentie JESUM vestibùs exspolias? Nimirum, ubi incaluisti merò, in cubilibus, & impudicijs voluntaris. Propriam tuam convenito conscientiam, quandonam acriores expertus es impudiciæ stimulos? quandonam tepidiùs restitisti? quandonam frequentius (quod Deus avertat) lapsus es, aut parùm abfuit, quin labereris, quàm ubi vinò madens Baccho cognatam expertus es Venærem. Disce igitur sobrietatem, ut possideas castitatem, nè duplici vitiò JESUM & amaritudine & opprobrijs repleas.

Domine JESU Christe! propter reverentiam divissimæ illius sitis, qua salutis meæ causâ moriens cruciabar, firmissimum concepì propositum, ab omni excessu in potu gulositatem meam coercendi, & unà cum ea maledictos carnis petulæ insultus suppressendi: Confundor Domine, ab confundor memor turpitudinum, & flagitiorum meorum! absit à me deinceps tantum nefas! nè te denuo confundam, & tu me cum turpibus carnis mancipijs confundas in æternum. Pater, & Ave.

Ô Amor Crucifixæ! miserere mei.

Statio

Statio XI.

Christus Cruci affigitur.

- ¶. Adoramus te sanctissime Domine JESU Christe ,
& benedicimus tibi !
R. Quia per sanctam Crucem tuam redemisti
mundum.

IMmani JESUS crudelitate cruci affigebatur. Ut enim livida Judæorum insania gravius fureret, grossis, trabalibus, ac truncatis clavibus, tenerrimam penetraturi carnem, ictus geminare ictibus, & dolores immensos, immenioribus accumulabant doloribus. Interea omnia diduci membra, dinumerari ossa, solutæ compages artuum, venarum, nervorumque perforari substantia, vivere caro, & sanguineis tumere notis cœpit : Donec tandem in humano labore fracta quievit carnificis manus. Vah Sacrilegum facinus ! tremendum Spectaculum !

Et hoc facimus, hoc Spectaculum toties ego innovavi, aut innovo, quoties Mortali flagitiô Majestatem Divinam offendi ; Scriptum est enim, quod peccatores sibimetipsis crucifigant Filium DEI. At verò quid in me peccavit, aut quid mihi mali fecit innocens JESUS, quod tanto furore plecti mereretur ? Nihil profectò mali, sed omnia benè fecit. Ergo saltem posthac, licet serò, declinare à malo, & facere bonum stude, ac ità deprecare :

O Amor Crucifixe ! per illos ineffabiles terrores dolores, quos in dolorosissima illa crucifixione

B

pro

pro me, & à me sustinuisti : Peccata mea innumera, mortalia præsertim, quibûs te denuo in crucem egi, clementer dimitte. Parce Domine ! ah parce supplicanti ! deinceps cum tua gratia clavos illos, furorem illum, & barbariem à te avertam, & convertam in memetipsum, ut jam nihil, quod caro blanditur, libeat, & nihil, quod carnalem vitam trucidat, spiritus perhorrescat, Amen.

Pater, & Ave.

O Amor Crucifixe ! miserere mei.

Statio XII.

Christus in Cruce Moritur.

†. Adoramus, ut suprâ.

Christus Dominus, ut totum se expendat pro me, vitam in Cruce per mortem contumeliosissimam, & poeniosissimam, immolat.

Video ô Domine quod in Cruce totum te expenderis pro me. Nunc dubius hæreo, an cum S. Patre meo Francisco exclamare debeam : *Deus meus, & omnia !* an verò cum Propheta : *Pars mea Dominus, dixit anima mea, propterea expectabo eum ?* Ad hoc dubium tuus respondet Præco, te prius *Partem* vocari debere, quàm *Omnia*, dicens : *(f) adimplebo ea, quæ defunt Passionum Christi in carne mea : Nimirum de meo addendum est aliquid, ut toto gaudere possim Deo. Ah ! quanta, mi Domine, per me Passionibus tuis defunt ? Ego enim in carne mea nihil Passionum tuarum addimpleo.*

Oculis

Oculis sum vagus, etiam nunc, cum Divina operor. Linguâ incautus, & deditus multiloquio, in quo non deest peccatum. Aures exporrigo, non ad audiendas divinas tuas inspirationes, sed ad frivola, curiosa, novellas, vanitates, & jocos. Nares varijs odoramentis, aut, nescio, quo pulvere, intemperanter oppleo. Gustus delicias gulosâ cibi, potusque lautitiâ, & excessivâ copiâ, bruti ad instar insector: tactusque molliem, & indomitum cunctorum pruritus sensuum nullis castigationibus, nullis mortificationum Religiosarum frânis cohibeo. Ah miserum me!

Posthac, O Domine! tuô fretus auxiliô adimplebo me ipso fortior, quæ adhuc per me desunt Passionum Christi, in carne mea. Esto tantum *pars mea DEUS*, in hac vita, ut in altera possim dicere: *DEUS meus, & omnia*. Virtus divini amoris tui, dilecte mi JESU! sensus meos, & me totum tibi incorporet, ac intimè uniat, ut verè queam usurpare illud: (g) *Dominus pars hereditatis meæ, & calicis mei: tu es, qui restitues hereditatem meam mihi.*

Pater, & Ave.

O Amor Crucifixæ! miserere mei.

(e) Tbren. 3. 24. (f) ad Colos. 1. (g) Psal. 5.

Statio XIII.

Christus de Cruce deponitur ad sinum Matris.

†. Adoramus te, ut suprà.

Postquam emisit spiritum in Cruce Salvator, petijt corpus Ejus à Pilato Joseph Arimathæus, qui & illud de Cruce depositum in sinu Matris dolorosissimæ reclinavit.

Vidisti in priore statione, O anima Religiosa! qua ratione extremum duxerit spiritum Salvator; non autem vidisti Ejus vulnera, impeditus tenebris, quæ factæ sunt super universam terram. Accede jam propius! contemplare exangue Domini tui corpus, & numera vulnera, si potes. Attende interim, an non tibi, sicut olim devotæ cuidam animæ, Deus tuus loquatur ad cor in hunc modum: Dilecte fili! quid circa numerum vulnerum meorum occuparis? Vis nôsse, quot tui causâ perpeffus sim vulnera? Tot, quot tu in me commisisti crimina; quoniam secundum multitudinem peccatorum tuorum multiplicata sunt vulnera, & dolores mei. Numerato jam mea vulnera, si tua numerare potes scelera. Si verò numerandô deficias, saltem à planctu non defice? sed cum dolorosissima Matre Passionem, vulnera, Mortemque DEI tui deplora, & percutiens pectus tuum dic:

Agnus Dei, qui tollis peccata mundi, misere mei, & propitius esto mihi peccatori! Nunc intelligo Domine, prophetiam illam, secundum quam quærebant animam tuam. Quærebant pec-

peccatores, quorum ego primus sum, animam tuam in capite; ideo mille puncturâs foderunt illud. Quærebant animam tuam in corpore; ideo flagellis supra dorsum tuum fabricaverunt. Quærebant in manibus, pedibusque; ideo illos clavibus horrendis perforaverunt. Quærebant denique in pectore; & ideo lanceâ aperuerunt latus tuum. O Christe JESU! pro eo, quod ego insidiatus sim animæ tuæ, tu quære animam meam, crucifige animam meam, mortifica animam meam, ut vivam ego, jam non ego, vivas verò tu in me, & ego mihi metipsum mortuus. Tibi vivam soli.

Pater, & Ave.

O Amor Crucifixe! miserere mei.

Statio XIV.

Corpus Christi sepelitur.

†. Adoramus te, ut suprâ.

CORPUS JESU requiescere voluit in sepulchro novo, mundissimo, purisque involvi lintaminibus, & pretiosis condiri aromatibus.

Cor meum novum non est, nec purum; & tamen Jesus quotidie in eo deponi & reclinari dignatur. Ast hoc ipsum dolendum est, quod cor Sacerdotis tam spurcum sit & fœdum. DEUS ultionum Dominus severè hanc incuriam, & injuriam vindicabit. Si Rex, aut Princeps terrestris, venationis fervore longiùs à Palatio suo abductus, & nocte ingruente præoccupatus fue-

rit, vile non dedignatur intrare tugurium, modò omnino impurum, & fœculentum non fuerit, etsi non careat sordibûs. Ast domum suam Regiam reversus in suo cubili, in quo continuò morari consuevit, non tantùm sordes non patitur, sed & præter omnimodam munditiem aulae requirit si splendida, tapetêsque pretiosos. En! Imperator summus, Rex Cœli, & terræ, animas venaturus ex cœlo descendit, & mediantibûs speciebûs Evacharisticis habitare dignatur in cordibus hominum secularium; nec tale habitaculum despicit, modò decenter purum sit à grossioribus peccati mortalis sordibus. At verò cor Sacerdotis est domus Regia, Palatium illud Imperiale, in quo quotidie habitare solet Rex Regum, & Dominus Dominantium: Nunquid desiderat in eo splendorem, cultum, & apparatus sua Majestate dignum? Omnino. Siq̃ue immundum quidpiam, aut sordidum invenerit in domo sua Rex, gravissima Palatij Præfecto imminet pœna, & indignatio. Si cor tuum sepulchrum est Dei, si Palatium Regis æterni, tu profectò Palatij Præfectus, & sepulchri custos es. Discute jam conscientiam tuam, quantum curæ impenderis ad digne hospitandum Deum tuum? an omnia munda fuerint semper, & adhuc?

Tu Domine! qui corda nôstri omnium, tu scis insipientiam meam, & negligentiam, squalorem, & immunditiem cordis mei. Ego ad te dignè recipiendum non tantùm nullos stravi virtutum tapetes, mortificationis, & devotæ præpar-

parationis aulæ ; sed & temetipsum in sordes projecì, indignè habui, luridè tractavi. Ah ! rogo te, dele iniquitatem hanc maximam : cor mundum crea in me Deus, & Spiritum Rectum innova in visceribus meis, ut posthac dignius reclinatorium inveniat corpus tuum in corde meo, libentiùs in eo, ac honorificentius requiescat, Amen.

Pater, & Ave.

O Amor Crucifixe ! miserere mei.

Statio XV.

S. Helena Inventrix Crucis.

†. Adoramus te, ut suprâ.

CRux Christi est clavis Cœli. Neque enim aliâ clavî usus est Christus ad Cœlum referandum, quàm lignô Crucis. Novit hoc B. Helena ; & ideo tam operosè Crucem quæsit.

Innata hæc homini cura est, ut clavem thesaurorum suorum, aliarumve rerum, quibus præ cæteris affectus est, anxie custodiat, & continuò secum portet. Si verò hæc clavis perdatur : quantâ non quæritur curâ, & studiò ? En ! *Simile est regnum cælorum thesauro abscondito : (b)* Hujus clavis est Crux Christi. Eruiere hunc thesaurum non potes, nisi hanc clavem applies : hæc perditâ miser es, & pauper. Non projice, sed arripe hanc clavem, eamque nunquam à te dimitte.

O Crux Sacratissima ! clavique regni cœlestis pretiosissima ! tu quidem hæcenus odio mihi

fuiſti, & horrore: poſt hæc autem eris gaudio,
& conſolationi. Ah! ne dimitte me, ne dimit-
tam te, & à regno cœlorum excludar æternus
Crucis inimicus.

Pater, & Ave.

O Amor Crucifixe! miferere mei.

(b) Matth. 13.

Oblationem vide poſt ſtationem ultimam pra-
xis vigefimæ.

PRAXIS ALTERA.

Statio I.

Mortis ſententia fertur in Jeſum.

1. Adoramus te Sanctiſſime Domine JEſU Chri-
ſte, & benedicimus tibi,
2. Quia per Sanctam Crucem tuam redemiſti
Mundum.

INiquus Judex Pilatus Mortis ſententiam contra
JEſUM pronuntiat, qui demiſſo capite, vin-
ctis manibus, humili geſtu, eam ſuſcipit; non
contradicit, non ſeſe, cum poſſet, opponit, non
murmurat, non appellat; quia eam ſententiam
reſpectu hominis Judicis quidem injuſtam, aſt
quæ ab æterno Patre latam ut juſtiſſimam reve-
retur.

Tu, O Religioſe! non ad mortem (quam
quidem meritis eſſes) ſed ſolum ad aliquam cru-

cem

cem ferendam condemnatus es : sed quàm tepide, quàm remissè, quàm indignanter eam fers ? Infirmus es, lecto affixus hæres, persecutionem pateris, ob hanc, vel illam causam ab alijs contemneris vilipensus ? Recogita, quòd ad hanc Crucem, ad hanc ipsissimam infirmitatem, ad lectum, ad dolores, ad persecutionem, & contemptum, condemnatus sis, non ab homine iniquo, non à tyranno ; sed à Deo tuo, à Patre amantissimo, à Judice æquissimo, quia *non est malum in civitate, quod non fecit Dominus.* (a) Ergo æquanimiter fer crucem, & sustine, de impatentia tua dole, & dic.

Iustus es Domine, & rectum iudicium tuum ! Justa est tua Sententia, qua hoc genus tribulationum mihi decrevisti : justa est, & millies ego hanc crucem, & infinities peiorem merui propter flagitia mea. Da igitur gratiam, ut eam patienter de manu tua suscipiam, & cum gratiarum actione portem usque in finem à te præfixum.

Pater, & Ave.

O Amor Crucifixe ! miserere mei.

(a) *Amos 3. 6.*

Statio II.

Christus ad Crucem, & mortem ducitur.

†. Adoramus te, ut suprà.

JESUS pronuntiata mortis Sententiâ, licetorum immani rapitur rabie, & vî ducitur, seu potiùs

trahitur ad locum, ubi crux jacuerat, & ab hinc ad montem Calvariæ.

Prædixit quondam Salvator B. Petro Apostolo, fore, ut ipse, qui, cum esset junior, cingebat se, & ambulabat, quo volebat, senior factus, præcingendus sit ab alio, & ducendus, quò non voluerit. Tibi, O Religiose ! hoc dictum existima, qui, cum esses junior in servitio Dei, sugens lac sæcularium vanitatum, præcingebas te, & ibas, quò volebas, ubi erat impetus concupiscentiæ, illud gradiebaris. At ubi per ingressum Ordinis Religiosi quasi senuisti, & ad servitium Dei maturuisti, jam alius præcingit te, & ducit, quò tu non vis. Quis est ille alius ? ne quære ! Superior tuus est, qui te chorda, & sacro præcingit habitu. Ille te ducit, quò tu non vis secundum hominem inferiorem, & passiones indomitas. Hoc autem ut æquanimiùs feras, aspice in Authorem fidei, & Consummatorem JESUM, qui à Judæis ductus ad lanienam, ad mortem turpissimam, quam tota horrebat Natura humana, secutus est ducentes promptus.

O JESU Christe, veræ humilitatis & exemplar, & præmium ! ego a superioribus meis duci desidero, quò volo ; si aliorum me ducant, nolo, obstrepo, obmurmuro, & summo opere indignor. Sed sic ego te non sequor : sic ego voluntatem meam per votum obedientiæ non abnegavi : sic ego Religiosus non sum : aut Sacri, lega temeritate, quod tibi à me dicatum est, mihi

mihi usurpo. Maledicta sit propria mea voluntas ! non mea , sed Dei , sed superiorum voluntas fiat : Domini sunt , quod bonum est in oculis suis , faciant. Cesset propria voluntas , clamat S. Aug. & infernus non erit : cesset & mea voluntas , & non erit contradictio foris ; nec turbatio intus in anima mea.

Pater , & Ave.

O Amor Crucifixe ! miserere mei.

Statio III.

Primus sub Cruce lapsus.

†. Adoramus te , ut suprà.

JESUS , Divinus ille Sol , defectu virium primò deficit. O Eclipsin tremendam ! Et tamen hoc casu nil commoti exultant Judæi , tripu-
diant carnifices , propellunt verberibûs milites , & novîs tormentis affligunt afflictissimum.

Ità sanè fieri amat : Ordinariæ Crucis pedisse-
quæ sunt exultatio inimicorum , fuga amico-
rum , contemptus , & irrisiones , opprobria , sub-
sanationes , & temeraria hominum judicia. Haec affligunt afflictum , & vix non in terram
pulveris , & impatientiæ , prosternunt. Et
quis in re tam desperata præstabit juvamen ?

Ille solus , qui infirmitates nostras suscepit. Hunc
adjutorem expertus Propheta Regius exclamat :
(b) Dominus mihi adjutor : non timebo , quid
faciat mihi homo (c) Nisi quia Dominus erat in nobis
cùm exurgerent homines in nos , fortè vivos deglutis-
sent

Sent nos : cùm irasceretur furor eorum in nos, forsitan aqua absorbuisset nos. Verumtamen adiutorium nostrum in nomine (in Passione) Domini : Nisi torrentem hunc pertransisset anima nostra ; forsitan pertransisset aquam intolerabilem. Benedictus Dominus ! qui non dedit nos in captionem dentibus eorum. Anima nostra sicut passer erepta est de laqueo venantium : Laqueus contritus est, & nos liberati sumus.

O Miseri mortales ! ut quid stipulam siccam persequimini ? Quid existis, quid irridere, quid contemnere ? Nunquid arundinem ventô agitatum ? Igitur ridete, illudite, cachinnamini, persequimini me, per me licet ; & ego in Domino sperans non infirmabor, rideo sarcasmos vestros ; & non movebor à generatione hac in æternum. Hæc solum scitote : Dominus Deus Auxiliator meus ; & ideo non sum confusus.

Pater, & Ave.

O Amor Crucifixæ ! miserere mei.

(b) Psal. 117. (c) Psal. 123.

Statio IV.

Christus cum Cruce obviat Matri dolorosissima.

ψ. Adoramus te, ut supra.

O Ccurrit JESUS Matri afflictissimæ cum Cruce, extremum ei dicturus vale, & suorum dolorum participem facturus.

O Anima mea ! toties, crede, JESUS tibi occurrit cum cruce, quoties tibi mittit aliquam tribula-

bulationem, aut patiendi occasionem, aut internam voluntariæ cujusdam castigationis inspirationem. In his circumstantijs non dicit tibi vale, sed Ave. Quare? quia Crux, quàm Deus tibi immittit, signum est, quòd non à te recedere, sed ad te accedere, quòd non te deserere, sed apud te hospitari desideret. Ast (prò dolor) quoties valedictionem JESU præ salutatione exoptâsti, desiderâsti? Revera impium est hoc desiderium; quæsvisti enim maledictionem, & veniet tibi: noluisti benedictionem, & elongabitur à te tantùm, quantum crucem ferre dignaris. Deinceps emenda te, & quoties se crucis, ac passionis occasio obtulerit, cum fervidissimo Crucis amatore Andrea exclame:

Salve bona Crux! aut cum alijs: Salve flagellum Dei! quid? ego quotidie Dominum meum deprecari: *Fiat voluntas tua*; & cum ipse voluerit mihi submittere levem aliquam adversitatem, sacrilegè exclamem: *Fiat voluntas mea*.

O Domine! tua sanctissima voluntas fiat. Veni ad me cum Cruce, & ego illam de tuis innocentissimis humeris ad meos devolvam, ac transferam. Fiat voluntas tua! veniat Crux! veniat tribulatio! occurrat mihi JESUS cum Cruce! gaudenter eam suscipiam de manu, de humeris Domini. Ringatur amor proprius, horreat caro, non curo. Domine da crucem! da crucis desiderium! da crucis amorem, & humilem crucis patientiam. Hoc mihi impetra, ô Maria! hoc mihi da ô JESU! Amen. Pater, & Ave.

O Amor Crucifixæ! miserere mei.

Sta

Statio V.

Homo Alienigena cogitur ferre Crucem post JESUM.

†. Adoramus te, ut suprà.

Quia JESUS Crucem gravissimam ex defectu virium portare solus non valebat amplius, idcirco omnem in partem sacros gyrabat oculos, ut illis pectus alicujus hominis emolliret, & ad Crucem post se portandam commoveret. Sed nullus omnium misertus est Dei sui. Debuit itaque homo alienigena cogi, ut id obsequii morienti Domino vel invitatus præstaret.

O spectaculum extremè miserandum ! Ille, ad quem miseri clamant homines : *Miserere mei Deus*, ille, inquam, Deus deploranda sorte miseros in-
clamat Adæ posteros : *Miserere mei homo*.

O JESU ! O DEUS ! O Amor ! ferreum meum hæc vox dirupit pectus ; colliquesco, & quia præ intima compassione verba proferre non possum, in lacrymas abeo. - - - - Quid ? *Miserere mei*, ais ? Egone miserear tui ? homo, Dei ? reus, Judicis ? Eheu ! canis mortuus misereatur Domini sui ? O Domine ! si dixisses : *Miserere tui homo*, tolerabile mihi fuisset adhuc : ast cum modò miserabili, & cordifraga, ac semi-mortua voce me inclamas : *Miserere mei homo*, cor meum conturbatum est, & contabuit intra me, & aliud nil possum, quàm singultire, lacrymari, & præ commiserationis vehementia colliquescere. Et ô Deus infinities dilectissime ! an non miserear tui, à prava mortaliter delinquendi con-
sue-

suetudine desistendô ? an non miserear tui , peccata mea dolorosè confitendô ? an non miserear tui , illam tribulationem , quasi Crucem tuam , patienter , & humiliter suscipiendô ? viam Crucis sæpius devotè obeundô , & propter te quotidie meæ rebeli , & impiissimæ carni , aliquam mortificationem imperandô ? Miseret me tui , & meam compassionem ostensurus præacta faciam , poenitentiâ ductus meæ in te exercitiæ crudelitatis. Poenitet ! Ah *miserere mei Deus!*

Pater , & Ave.

O Amor Crucifixe ! *miserere mei.*

Statio VI.

Veronica cum Sudario.

†. Adoramus te , ut suprâ.

INtuens B. Matrona Veronica in faciem JESU Sacrosanctam , in quam desiderant Angeli prospicere , & notans in ea sputorum , & vulnerum maculas , conspicatâque aureum frontis ebur spinarum aculeis confractum , genas corrosas , ostumens , oculos sanguineis suffusos lacrymâs , crines sanguine , sudore , & pulvere concretos , manus , pedesque faucios , ut Domino Deo suo suum commiserationis affectum ostenderet , velum , capiti suo detractum , eidem offert , quo pristinus Divinæ Majestatis splendor , detergis maculis , purissimæ faciei rediret.

Scilicet non potuit devota hæc Christi famula patientis faciem Salvatoris intueri , quin macula-

las

las , eam obfuscantes , confestim velò capitis sui studeret detergere. O Religiose ! illæ maculæ , quæ faciem Christi deturpavêre , peccata sunt venialia , quibûs illam commaculas , dum in conspectu Domini sub sacra Psalmodia , Misæarum celebratione , precum tuarum persolutione indecenter te habes , vagè , impositè , ac minùs religiosè. Quid igitur facies ? in faciem Christi tui intendes , viam Crucis frequentius obibis , & majorem conatum veli locò Redemptori tuo offeres , quo exactiùs , devotiùs , & ferventiùs , quæ Dei sunt curabis , & sic maculas , quæ Divinam in anima tua faciem inhonoraverunt , ab amantissimo Domino quàm longissimè removebis , & præcavebis. Insuper firma fide Dei te , & tuas actiones , observantis præsentiam apprehendes , ut illo præsentem non audeas , quod alio præsentem non auderes.

Utique ô Domine ! si in Divinam tuam faciem exactiùs intendissem , non adeò luridus in meis actionibus , tepidus in Divinis , & ubique negligens fuisset ; nihil perfunctoriè , & præcipitanter egissem , sed modestè , & cautè : neque ignominia , & irreventia Divinum tuum obtutum suffudissem. Imposterum cum tua gratia ero exactior , & observabo me ab iniquitate mea , ambulabo coram te , & ero perfectus in tuo Divino obsequio , Amen.

Pater , & Ave.

O Amor Crucifixæ ! miserere mei.

Statio VII.

Secundò Christus in terram cadit.

✠. Adoramus te, ut suprà.

Christus Dominus post tot languores, verbera, & vulnera, à Judæis nihil mitius tractatus, sed novis tormentis indefinenter affectus, secunda vice, quasi exanimis, in terram collisus fuit, altum sub cruce gemiscens.

Speraveram, Dominum Deum meum, ex quo Simonem Cyrenensem in Cruce ferenda socium habuit, reliquum mortis iter facilius confecturum. Sed contrarium præsens Statio exhibet. Suspicio sanè, ne Simon ab initio Crucem Christi dedignatus, Judæos convitiis, & Salvatorem irreverentiâ affecerit. Quid si Crucem non solum non tetigisset, sed illi incumbendò, aut insidendò, aggravâisset potius, quàm alleviâisset? Mirum profectò non foret, Dominum novo onere denuo fuisse depressum.

Ah! quàm optarem, ut ego tantas in Christum irreverentias non commissem in suffrenda tribulatione, & ferenda cruce post JESUM? Ego enim Crucem dedignatus, iracundiâ, & variis impatientiæ motibus impulsus, indignatus sum illis, qui me coegerunt ad crucem ferendam. Ego parùm de Cruce, multùm autem de vindicta sollicitus fui. Hinc Crucem Jesu non alleviavi sed aggravavi, & novo peccatorum pondere oppressum in terram collisi Salvatorem.

C

Do-

Dominus meus, & Deus meus ! qui iteratim viribus à me in terram dejectus, contra me inimicum tuum non indignatione, non iracundiâ, sed amore exarsisti, da, quæso veniam, meæ in ferenda Cruce tua socordiæ, quemadmodum & ego omnibus, & singulis, qui me quocunque modo, justè, vel injustè affligerunt, amore tui ex corde remitto, quidquid in me peccaverunt, si tamen in me peccare potuerunt, qui omnium odiò, & execratione dignus sum. Omnis mihi debetur persecutio, odium, & contemptus. Concede igitur, ut omnia adversa feram ea intentione, ut Crucem à te mihi communicatam, & millies debitam, Amen.

Pater, & Ave.

O Amor Crucifixe ! miserere mei.

Statio VIII.

Mulieres plangunt JESUM.

¶ Adoramus te, ut suprà.

A Spiciens JESUS piam faminarum, se sequentium, & deplorantium turbam, simul ob oculos sibi ponebat seriem æternæ ipsarum, & filiorum earundem, prædestinationis, & reprobationis, dependenter à peccatis committendis; & quia cognovit, plerâsque illarum, & posterorum suorum, esse æternum reprobandas, dolore cordis tactus intrinsecus, eas sic affatur: *filia Jerusaleme: Nolite flere super me, sed super vos ipsas flete, & super filios vestros.* (d)

Hoc

Hoc fuit unum ex maximis tormentis , quæ innocentissimus Salvator unquam sustinuit : dum scilicet ipsi repræsentabantur tam enormia hominum flagitia, & scelera, ut ejus passio, sanguis, vita, & mors, ex ipsorum improbitate nullum sint operatura fructum, præterquam æterni incendiij augmentum. O Religiose ! etiam te vidit Salvator : & quid vidit ? certè si ex vita hæctenus transacta judicandum est, nil vidit ; nisi scelera, & flagitia, tepiditates, & curam carnis. Estne hic fructus passionis Dominicæ ? si sic perrexeris, de malo in pejus, de pejore in pessimum incidēs, nimirum in æternæ reprobationis periculum. Ah utinam hanc non debuisset prævidere mens Dei omniscia ! at verò si sic forsan permanseris, affliges afflictissimum JESUM, & dolorissimum æternæ circa te dispositionis intuitum causabis. Desse igitur te ipsum, desse filios tuos, peccata tua, quæ genuisti ; crimina, quæ commisisti ; consuetam tepiditatem, cui adhæcisti.

O JESU afflictissime ! contere cor meum lapideum, ut ex eo velut ex lapide contrito, scintillæ amoris exilient in oculos meos, & hi integros lacrymarum torrentes depluant, ex vera contritione decurrentes. Filius quidam occidit patrem suum incognitum, cognito autem errore præ doloris vehementia expiravit. Ego, ego te occidi, ô Pater misericordiarum, & Deus totius consolationis ! & non tantum te occidi, sed crudelissima morte, post mille millena vul-

nera , post peccata innumera , te occidi. Ah ! poenitet, & factò tam sacrilegò torqueor, emendationem efficacissimam spondeo , & ob hanc causam omnes præparabo impensas.

Pater, & Ave.

O Amor Crucifixe ! miserere mei

(d) *Luc. 23.*

Statio IX.

Tertiò Christus in terram corruit.

✠. Adoramus te, ut suprà.

Tantum erat, tam insatiabile Jūdæorum odium, ut, etiamsi illum summè debilitatum, extremè lassatum, & viribûs destitutum cerne-
rent, verberibûs tamen, & calcibûs, pugnîs, & fustibûs eò usque ad progrediendum impelle-
rent, donec JESUS horribili lapsu tertiò in ter-
ram prosterneretur; & tantùm absuit, ut ei com-
paterentur, quin potius novîs fustigationibûs lac-
cessitum crudeliter propellerent.

Hæc legis Religiose ! & nullam in te sentis
compassionis scintillam. Quid ! si videres bovem
sub plaustro, aut asinum sub sarcina fatiscentem,
& immaniter ab agasone tractatum, & toto cor-
pore miserè dilaniatum, dimanare sanguine : an
non accurreres, asinûmque aut exonerares, aut
à terra levarès, vectorem verò inhummanum ver-
bîs dirissimîs increpares ? ita sanè. Sed quare
hoc faceres ? nunquid ideo, quia bovem, aut a-
sinum

sinum, tanquam animal innocuum, naturaliter amares? quod inde patet, quia si tale animal patrem tuum occidisset, non levares ex odio, & ei non compatereris. Superi! quid hoc portenti? ad asinum accurris in terra jacentem, & sub onere fatiscentem, quia ipsum amas. At, dum Filius Dei in terra jacet propè exanimis propter te, dum sub Cruce fatiscit, ad eum non accurris. Ergo asinum amas, & filium Dei non amas. Eheu! asini sarcinam levares tuïs humeris, & ne digito quidem tangis Crucem Christi amantissimi Patris, & Benefactoris tui. Quid sequitur? ergo etiam amare Deum non vis, portare nihil potes, salvari non vis, nec potes: si verò salvari non vis, fac possis. Compaterere Deo tuo, Crucem leva Religiosæ modestiæ: esto disciplinæ amans, sobrius, castus, obediens, humilis, &c.

O Domine! ego te dejeci in terram, ego te prostratum non allevavi, ego Cruce suppressum non exoneravi: ego plus amavi asinum, corpus meum, quàm te: ego asinum illud animal ab omni molestia, & Crucis mortificatione eximere studui, quod tamen te amantissimum Patrem meum vulneravit, occidit. Da ergo mihi salubre asini hujus odium, ut ipsum adigam ad onera, ad Crucem, ad poenitentiam, & sic te refocillum, &c.

Pater, & Ave.

O Amor Crucifixæ! miserere mei.

Statio X.

Christus vestibûs Spoliatur.

✠. Adoramus te, ut suprâ.

HOrrenda, lugenda, inexplicabilis, inconceptibilis, immensa, infinities infinitissima erat confusio, quam sustinuit JESUS Christus Filius Dei, Filius Immaculatus Virginis Matris Immaculatæ, dum violenter detractis vestibûs nudus coram ingenti hominum multitudine stare, & erubescere coactus est.

Hoc martyrij pelagus amarissimum absorbit Salvator dulcissimus; tu, ô Religiose! pia quadam cogitatione solummodo gusta. Quis tibi foret sensus, quæ mens, quæ vita, si coram Religioso tuo cætu nudus absque vestimento comparere deberes, vel unico horæ quadrante? quàm molestum, quàm intolerabile, tibi, homini honesto, & castitatis studioso, id genus supplicij foret? quid? si coram communitate hominum sæcularium, si in foro publico, coram scurris, & rabulis idipsum sustinere cogereris? quis te timor, quæ anxietas, quæ verecundia incederet? Eheu! quid erit, cum in novissimo die, tota inspectante creaturarum universitate, turpium desideriorum fætor, cogitationum impurarum sponte præfixa obscœnissima objecta; cum verborum procacia, execrandæ sensuum illecebræ, & actus erubescendi, cum omnibus circumstantijs suis, manifestabuntur? ô quàm optares tunc (si simile quid commisisti) ut caderent montes super

per te, & operirent te. A tam tremendo erubescendi debito Deus tuus te liberaturus immanem confussionis vim dignanter sustinuit. An adicies ultra tam crudeli supplicio verecundissimum castitatis Authorem subicere ?

Abst, ô JESU ! abst à me tantum nefas, maledicta sint illa momenta, quibûs cogitationi turpi, aut desiderio improbo, auditum prabui. Maledicta omnia verba, quorum obscœnitas os meum sæpe numero inquinavit. Maledicta, & in æternum maledicta opera, quibûs tibi, ô JESU ! lethalem incussi ruborem. Maledictæ denique occasiones, & societates, quas honori Divino anteposui. Imposterum Domine ! hæc sit mea, æternum duratura protestatio : millies, & infinities millies mori malo, quàm vel minimum quid sacrosanctæ castimonix contrarium deinceps facere. Ita me Deus adjuvet, & immaculata ejus Mater, & Virgo.

Pater, & Ave.

O Amor Crucifixe ! miserere mei.

Statio XI.

Jesus Crucifigitur.

Ÿ. Adoramus te, ut suprà.

Postquam ad montis Calvarix verticem ventum est, Agnus Dei à carnificibus in Crucem prosternitur : ipse verò promptissimè, & voluntariè manus, pedesque extendit Cruci affigendos,

nec eos, ubi clavīs ingentibūs perforabantur, unquam retraxit.

Fratres ! *hoc enim sentite in vobis, quod & in Christo JESU.* Ita quidem monet Apostolus. Nos quidem sensimus cum Christo JESU, ubi voluntariē relicto sēcūlō extendimus manus, pedēsque crucifigendos in Cruce Religiosæ professionis, per tres clavos obedientiæ, paupertatis, & castitatis. Non autem sensimus in - & cum Christo JESU. dum asperitatem horum clavorum sentientes manus retraximus. Obedientiæ opera, nostræ perversæ voluntati contraria, quērulē, invitē, & cum multa impatientia executi sumus, aut omnino negleximus. Pauperitatis rigorem pertæsi, non villia, non incommoda, non pauca quæsiimus sed pretiosiora, pulchriora, commodiora, eaque non pauca desideravimus, mensam pauperem per multam impatientiam amaricavimus, & fastidivimus. Angelicam castitatis virtutem, oculorum divagatione, aurium, mentis, & oris indisciplinata effusione, non debite custodivimus; nec corpus luxurians mortificationum largitate, & cibi, potūsque parcitate, ac frugalitate edomuvimus. Retraximus ergo membra nostra à crucifixione, & quæ placuit semel pugna, hoste comparente displicuit.

Domine Deus noster ! tu scis inconstantiam nostram, spiritūs promptitudinem, & carnis infirmitatem. Ah ! supplici te exoramus voce: *confige timore tuo carnes nostras*, ut voluntarius Crucis amor tantum in nobis valeat, ut, carni petulan-

tulanti imperet, tres Religiosorum votorum clausulas vos constanter sustineat, & in Cruce regularis observantiæ tecum expiret.

Pater, & Ave.

O Amor Crucifixæ ! miserere mei.

Statio XII.

Christus in Cruce moritur.

Ÿ. Adoramus te, ut supra.

JESUS Christus, meta Judaicæ rabiei, Herodis risus, militum ludibrium, derelictus à Patre, blasphematus à latrone, crucifixus ab hostibus, occisus meīs sceleribūs, clamans voce magna, expiravit.

Desideras nôsse, ô Religiose ! quis clamor, quæ vox illa fuerit ? Thomam Kempensem consule, (e) qui Christum introducit, tibi sic clamantem : *Fili ! venias ad me, cum tibi non fuerit bene.* Vocem profectò magnam ! quia me vocat *filium*, qui sum parricida. Rebellem, & latronem pessimum jubet *venire ad se* clementissimus Pater, meorum misericordiarum, immemor injuriarum. Vocat, ut *bene sit mihi*, qui omnia mala merui. Et ideo hæcenus bene mihi fuit nunquam. Conscientia me accusat, flagitia damnant, & mala, poenæ, & culpæ undique me perturbant. Sed quia clamas *voce magna*, idcirco hæc quoque auribus mentis meæ se insinuat ; vocanti pareo, & ad aram Crucis compareo, ut effundam in conspectu

specū tuō orationem meam , & tribulationem meam ante te pronuntiem.

Tu Domine , qui corda nōstri omnium , variis crucibus , ac arumnis undique obsessum me conspicis : multa sunt flagella peccatoris , non est pax ossibus meis à facie peccatorum meorum. Ad hæc non est sanitas in carne mea. Et insuper lumbi mei impleti sunt illusionibus , & sentio aliam legem in membris meis , repugnantem legi mentis meæ ; & propterea iniquitates meæ supergressæ sunt caput meum , & sicut onus grave gravatæ sunt super me. Mente sum aridus , cogitatione vagus , propria existimatione superbus , voluntate indomitus , amore proprio cæcus. Ecce Domine ! hæc est facies mea , hæc vitæ meæ ratio : & ideo venio ad te , cū mihi non fuerit bene. Tu es vita mea : da , ut moriar pro te ! tu pro me mortuus es : fac , ut tibi soli vivam ! tu pro me crucifixus es : concede , ut tibi per te me concrucifigam ! tu de Cruce non descendisti : tribue , ut tandem & ego ascendam ! tu non pepercisti tibi pro me : largire , ut nec ego parcam corpori meo , & cupiditatibus meis effrenibus ! Denique tu in manus Divini Patris tui emisisti Spiritum : permitte , ut & ego in manus tuas emittam spiritum meum , ut bene mihi sit tecum in æternum. Fiat.

Pater , & Ave.

O Amor Crucifixe ! miserere mei.

(e) L. 3. de Imit. cap. 30.

Statio

Statio XIII.

De Cruce deponitur Corpus Jesu.

✠. Adoramus te, ut supra.

Non absque providentissimo DEI consilio factum puta, quod corpus sacratissimum Jesu Christi è Cruce depositum, ad sinum Virginis Matris fuerit deportatum, nimirum ut ex hujus aspectu Mater Dei evidenter evaderet Regina Martyrum. Enimverò vertex Divinus mille puncturis saucius, facies de scedata, oculi emortui, capilli sanguine concreti, os lividum, humeri exulcerati, dorsum concisum, genua confracta, manus, pedesque perforati, latus lanceatum, costæ diductæ, totum corpus quasi excoriatum, & mortuum, quid potuere aliud, quàm cor Maternum transfodere, & crudeli tormento excruciare?

Quis tibi tunc sensus, dum cernis talia Virgo? talis sensus utique, qualis fuit illi matri, quæ (ut testatur Ludov. Gran.) visò filij sui ob enormia scelera ad mortem condemnati, & decapitati, cruento vertice ad publicum horrorem in patibulo affixo, & exposito, in inconsolabiles effusa lacrymas, tanto dolore correpta est, ut domum reversa mæstissimam exhalârit animam. Quis ergo dolor pervasit cor Virginis, & Matris, aspicientis vulnera, fixuram clavorum, aculeos, livorem, mortemque sui Filij innocentis, sanctissimi? S. noster Bernardinus ait: *Tantus fuit dolor*

dor Virginis in Passione Christi, ut si in omnes creaturas divideretur, omnes subito interirent. (f)

O Mater dolorosissima! si ego Filium tuum non tam enormi morte trucidassem, tam vehemens te non macerasset luctus, & dolor. Super mea inaudita crudelitate totus quantus consternatus doleo, & tuis passionibus sincerissimo affectu condoleo; & ut magis condeleam, unicam inexhausti ferè tui doloris guttulam mihi Materna pietate communica. Nec interitum ob doloris gravitatem horreo, sed potius in JESU, Filij tui doloribus, & tuis condolentijs, mori exopto. Ah! rogo te in hora mortis meæ impetra mihi unicum ex dolorisissimis illis suspirijs, quæ JESUS meus, Filius tuus, moriens pro mea salute emisit, & quæ tu eidem amorosissimè compatiens, ex dolorisissimo tuo pectore expressisti. Pro hac gratia impetranda, nullus abibit dies, quo non aliqua mortificatione JESU passionem, & tuam compassionem venerabor.

Pater, & Ave.

O Amor Crucifixe! miserere mei.

(f) Tom. 1. ser. 61.

Statio XIV.

Corpus Christi Sepelitur.

✠. Adoramus te, ut suprà.

EX sinu Virginis in sinum terræ deponitur corpus Redemptoris, & in sepulchro collocatur

tur, de quo pridem vaticinatus est Propheta : & erit sepulchrum ejus gloriosum.

O utinam anima mea esset gloriosum corporis Christi sepulchrum ! gloria sepulchri Domini in eo consisolebat , quòd esset novum , mundum , in petra excisum , lapide grandi clausum , Mariæ Matris Virgineæ , Apostolorum , Discipulorum , piarum mulierum , & modò Christianorum devotionibûs , ac peregrinationibûs honoratum. Econtra quàm inglorium habet Corpus Domini gloriosum in corpore , in corde , in anima mea sepulchrum ? Non *novum* ; quia sum inveteratus maiorum. Non *mundum* ; quia plenum miserijs , & peccatis , foetore , & putredine. Non *in petra excisum* ; quia cor meum non est solidatum supra firmam petram , quæ Christus est , sed incumbit vanitatibus , & insanijs falsis. Non *lapide clausum* ; quia ipsum faciliè penetrat vanæ gloriæ ventus , humanæ conversationis pulvis , divagatio ad externa , ad vana , ad ea , quæ sunt mundi , & non manet in eis , quæ sunt Christi JESU. Nec *denique Mariæ , aut piorum affectibûs honorabile* ; quia affectus meus est rarus ad pietatem , frequens ad vanitatem , ad colloquia , recreationes , comotationes , occupationes frivolas &c. Siccine honoras , & glorificas Corpus Dei JESU Christi Salvatoris tui ? Edic sodes ! an in strato immundo , aut in eo , in quo jacuit leprosus , collocas corpus tuum ? veritatem fateere. Absit ! ais. Convictus ergo es , quod corpus tuum turpe , stercoreum , flagitiosum honorificentius trahes ,

ctes, quàm Sacrosanctissimum JESU Christi corpus. Prô pudor ! & Religiosus , aut Sacerdos tu sis ? quid posthac facies ?

Hoc faciam, ô JESU ! nullus sol occidet, qui non viderit me aliquid passum pro te , & corpori meo, hosti tuo, & meo , aliquam violentiam illatam, ut corpus meum , tuo configuratum in passione, configuretur etiam in gloria.

Pater, & Ave.

O Amor Crucifixe ! miserere mei.

Statio XV.

Crux Christi gloriosa.

✠. Adoramus te, ut suprà.

Non immeritò Crux Christi Sacrosancta solet comparari scalæ Jacob, stanti super terram, cujus cacumen cœlum tangebatur.

Stat igitur Crux super terram, è qua ad illius cacumen ascendendum est ; novissima enim Crucis cœlum tangunt. Vidit quoque Jacob Angelos Dei ascendentes, & descendentes per scalam. Angeli Dei sunt Religiosi, aut Sacerdotes, quorum est jugiter ministrare, cantare, aut assistere Domino Deo. *Ascendunt*, qui cruces, tribulationes, angustias, pressuras, & mortificationes arripiunt avidè, iisque quasi gradibûs utuntur ad cœlum conscendendum. *Descendunt* ; qui suæ professionis obliti, commoditates corporales quærunt in clauastro, quas non invenissent in sæculo. Edic !
de


de quorum numero es tu ? & de quorum eris posthac ? & qua ratione Crucis cacumen ascendes ?

Domine mi Crucifixe ! mira quidem de Cruce, ejusque præstantia audio ; sed non capio verbum istud. Intellectum igitur meum illumina, affectum inflamma : ut per hanc scalam ascendam ad te Domine, & descendat super me misericordia tua, Amen.

Pater, & Ave.

O Amor Crucifixe ! miserere mei.

(g) Gen. 28.



PRAXIS III.

Statio I.

Pilatus profert mortis sententiam in Christum.

- †. Adoramus te sanctissime Domine JESU Christe, & benedicimus tibi !
- ✠. Quia per sanctam Crucem tuam redemisti mundum.

UT tandem Pilatus ab importunis Judæorum clamoribus se liberaret, injustam contra Deum tulit mortis sententiam, dicens : *Accipite eum vos.* (a)

Amor scilicet proprius, corporalis commoditatis studium, carnalis voluptas, & molestiæ hor-

ror ita judicant, talem ferunt sententiam. An non & tu consimilem tulisti? erat tempus orandi, aut surgendi; sed quia hoc importunum tibi erat, orationem neglexisti, somno indulxisti. Instabat pruritus, curiosè audiendi nova, vana, jocosa, sæcularia: aliud suadebat silentij, & mortificationis ratio; at quia corpori, & curiositati gravior videbatur eorum carentia, silentium violasti, mentem vanis occupasti. Zelum animarum, sensuum coërcitionem, cibi, potusque parsimoniam, sacræ viæ Crucis visitationem frequentiore suadebat amor DEI, & æternæ salutis cura: sed incommoditas corporalis subeunda creavit nauseam; & ideo tuis concupiscentiis victus, dicebas intrate: *Accipite eum vos*; & sic inspirationes pias, desideria bona, cogitationes sanctas acceperunt, & in cunis quasi suffocavere. Putas, rectène judicasti? quomodo deinceps judicabis?

Frustra clamasti Domine Deus meus! per os Prophetæ: *recta judicate filij hominum.* (b) Perversè judicavi, & amore proprio excecatus hætenus fui iudex in propria causa. Ut verò posthac justius judicem, rogo te, ô Christe JESU! in cujus manu omne judicium posuit Pater: *Judica me Deus, & discerne causam meam: de gente non sancta, ab homine iniquo, & dolofo (qui egomet sum) erue me.* (c) Pater, & Ave.

O Amor Crucifixæ! miserere mei.

(a) Joann. 19. (b) Psal. 57 (c) Psal. 42.

Statio II.

Christus Crucem suscipit.

ŷ. Adoramus te, ut suprà.

AUditâ Judæi injustâ, sed à se dudum optatâ Pilati sententiâ, tripudiantes raptant innocentissimum Deum ad locum, ubi Crux erat parata. JESUS autem eâ conspectâ cum ingenti dignatione, & fervore, voluntariè se inclinat, & omnium virium annisu in suos sacrosanctos humeros suscipit.

Tota vita Christi est exemplar, & magisterium nostræ. Si igitur Salvator crucem suscipit, & voluntariè suscipit, etiam nos debemus crucem nostram suscipere, & voluntariè quidem. Neque hoc consilij est, sed præcepti; sic enim Christus voluntatem suam legislativam declarat: *Qui vult venire post me, abneget semetipsum, & tollat crucem suam, & sequatur me. (d)* Tolle igitur crucem tuam, & adversa omnia, quæ tibi accidunt, & in hac cruce Christum sequere. Sed fors causaberis, te crucem, quam tollas, non habere? Ain tu: an non habes passionibus rebelles, indomitas, peccaminosas? Ecce! hæ crux tua sunt: ergo illas tolle, & è medio tolle, ut sub te sit appetitus tuus. Hoc autem aliter haud facies, nisi crucem voluntariè tollas, crucem, inquam, continuæ custodiæ, continuæ tuimetipsum humiliationis, superpressionis, mortificationis. Hac, & similia,

D quo:

quotidie legis , & audis , cur non etiam facis ? Visne tu venire post Christum ? si vis , fac , quæ ad hoc Christus , tanquam conditiones , requirit ; aliàs tua voluntas efficax non est.

Domine JESU Christe ! ego vî vocationis meæ me obligavi venire post te ; sed necdum me abnegavi , necdum crucem meam sustuli. Tu igitur da mihi tantam fortitudinem , ut crucis horrorem vincat amor tui , & ad tuam me sequelam per crucis mortificationem trahat hic ad montem Calvariæ , ibi ad montem gloriæ.

Pater , & Ave.

O Amor Crucifixe ! miserere mei.

(d) Marc. 16.

Statio III.

JESUS vivibûs destitutus primò in terram cadit.

ψ. Adoramus te , ùt suprà.

E Tiam si Salvator meus adeò Crucis mole fuerit pressus , ut eidem debuerit corpore tenus succumbere , illam tamen dimisit nunquam : imò cum debilitate corporis crescebat vigor mentis , plura amore Patris æterni , plura quoque amore salutis meæ patiendi.

Ego verò degener sum filius , nam me quæcunque tribulatio , & crux , adeò posternit , ut & animum à ferenda cruce avocem , & crucem

om-

omnino excutere præsumam. Ast modò Deo inspirante, hoc concipio propositum : in reverentiam infirmitatis, quam JESUS pro me suscepit, omnes dolores, corporis afflictiones, infirmitates, persecutiones, contemptus, & irrisiones ità feram, ut, licèt corpus allidant terræ, affigant læto, & valde sensibilibiter afficiant, ac diserucient, mente tamen semper stem erectus pro amore JESU, & pro salutis æternæ bravio accipiendo, memor illius, quod dicit S. Augustinus : *Patere, quæ non vis, ut adipiscaris, quod vis. (e)*

Surge ò Domine ! ut surgam ego : confortare, ut conforter ego. Ego enim longè sum infirmissimus, qui ea, quæ carnem meam vel leviter cruciant, adeò horruì, ut eorum horrore victus curam carnis perfecèrim, crucem meam fugerim, & tuam aggravaverim. Verumtamen tua infirmitate confortatus non cedam ampliùs ; stabo ut miles Christi, & in infirmitatibus meis, & omnibus adversitatibus, unde unde imminentibus gloriabor.

Pater, & Ave.

O Amor Crucifixæ ! miserere mei

(e) in Psal. 29.

Statio IV.

Maria Christo obviat.

†. Adoramus te, ut suprà.

MAter Dei amantissima cum inexplicabili animæ suæ dolore Filium impigrè sequitur, & attentè omnem ejus passionem observat. Certè novit Virgo prudentissima, & Spiritu S. plena, se gratus Filio suo obsequium exhibere non posse, quàm eum in via Crucis comitari, observare, & plangere.

Cogita Religiose! si tu absque gravi tuo incommodo æquale potuisses JESU Christo præstare obsequium, aut omnino à morte liberare, vel pro eo pati, aut saltem singula ejus vulnera fragrantissimâ rosâ perlinire, an non fecisses? subsiste hic, & delibera, quid facturus fuisses? Nónne quàm libentissimè eam charitatem Salvatori tuo impendisses? ecce! optata se offert occasio, id ipsum hodie adhuc, si libet, & deinceps sæpius exequendi. Quâ ratione, quæris? dicam: visitando viam Crucis, recolendo memoriam Passionis Domini. Sic enim revelatum est S. Mechtildi à Christo Domino, dicente: *Quoties homo in meditatione Passionis mee suspirat, toties vulnera mea, tanquam cum vernante rosa, suaviter tangit.* (f) Rursus: *in veritate dico tibi, quòd, si quis ex devotione erga passionem meam lacrymam fuderit, hoc ità acceptabo, ac si pro me passus fuisset.* (g) Et iterum loquitur Christus: *Si quis mihi pro illo dolore, quòd in Cruce ità extendebar, ut omnia membra mea dinumerari potuerint*

tuerint, gratias egerit, tale mihi præstat obsequium, ac si vulnera mea unguento unxisset. Et si quis mihi gratis egerit pro siti, quam sustinui, hoc ita accepto, ac si sitim meam extinxisset. Et si quis mihi gratias egerit, quod clavis Crucis affixus sim, hoc mihi ita gratum est, ac si me de Cruce liberasset. (b) Inexcusabilis es, ô homo ! si tam grande obsequium Salvatori tuo denegas propter aliqualem aut erubescen-
tiam, aut incommoditatem, quam tua fingit phantasia.

Christe JESU ! si gravia à me postulasses, & aspera, deberem omnia subire lubens propter te. Nunc autem cum levia postulas, an tergiverfer ? Absit ! memoriâ memor ero tuæ passionis. Ah ! da lacrymas, ut pro te patiar ; da suspiria, ut vulnera tua disfluavies : da gratum animum, ut sitim tuam extinguam, & de Cruce te liberem : da denique amorem, ut amore tui moriar, Amen.

Pater, & Ave.

O Amor Crucifixe ! miserere mei.

(f) *L. 1. Revel. c. 24.* (g) *ibid. c. 27.* (b) *lib. 2. c. 15.*

Statio V.

*Cyrenæus cogitur ad portandam Crucem post
JESUM.*

✠. Adoramus te, ut supra.

IN tantum JESUS Crucis gravitate, & tortorum sævitie, debilitatus erat, ut vix vale-

ret pedem movere , nè dicam , intolerabile Crucis pondus portare.

Utinam ! dicis , utinam ego fuisssem præsens ! quàm gaudiosissimè portâsssem , & suscepisssem in me Crucem IESU. Sic est in meditatione Passionis Dominicæ videris tibi torrente ignis Divini absorberi , ingentia spiras desideria mortem , ac martyrum lubeundi , ut fidem defendas. In contritionibus dicebas millies mori , omnia tormenta subire paratus sum potius , quàm deinceps Deum meum offendere. Sed en præclarum Martyrem ! venit Superior , & te paternè corrigit : alius te levî verbô vexatoriô , aut (ut vocas) despectivô pungit ; & immediatè totus exardescis in flammâ , vehementissimè irasceris , fratrem odisti &c. Superior est tibi vir indiscretus , murmurâs , & omnia querelâs replet , ac amaro es animo. Et tu caput dabis carnifici , corpus tormentis , animam pro Deo ? tu feres probra , confusiones , & supplicia , qui unicum verbum portare non potes ? Charissime ! deest tibi martyrij cruenti occasio : non deest incruenti : dissimula , patiens esto , degluti aspera , devora injurias ; & eris martyr in religione incruentus. Hoc si non feceris , nec martyr eris , nec religiosus. Eja ! exere vires , crucem arripe , hac die à colloquio vano , à cibo magis arridente &c. abstine , & ejusmodi actibus dispone te ad habitum mortificationis , & martyrij , omittendô ea , in quibus te hætenus reprehensibilem expertus es.

Fa.

Fateri cogor coram te Domine Deus meus , desideria mea , & affectus meos , quos pios puto , & amerosos , esse ventô plenos , & fucô , & similes folio , quod ventô rapitur . Sic ergo , Martyr ero ; sed eò connitar , ut , dum alij famuli tui magna amore tui fecerunt , & sustinuerunt , levia ego feram , & vincam . Scio ô Domine , quòd grandia à me non exigas , qui nec levia superare possum . Concede tantum , ut in his non deficiam ; sed de parvo ad majus , à leviori ad graviora pro te sufferenda enitar , Amen .

Pater , & Ave .

O Amor Crucifixe ! miserere mei .

Statio VI.

Veronica Christo sudarium offert.

✠ Adoramus te , ut suprâ .

TAm horrendus erat humanæ Christi faciei aspectus , ut hominis vix ullum vestigium appareret . Cùm igitur Christus raptaretur ad necem , omnes eum videre desiderabant : hi quidem intendebant ad Judæorum tripudia , illi ad carnificum ferocitatem : alij ad militum armaturam , aut ad Crucis ac mortis , quæ præferebantur , instrumenta . Hi in plateis , illi per fenestras scenam spectabant tragicam : quos inter B. Veronica , quæ tamen aliud observabat nihil , quàm faciem Domini patientis , ex cujus aspectu miserando ità cor ejus ad genero-

fos ausus, & fervores fuit inflammatum, ut de-
tactò sibi capitis velò ad eam a sordibus pur-
gandam, per strictos enses, & hastas ad Chri-
stum usque penetraverit.

Tu econtra, cùm per horas canonicas, aut
celebrationem Missæ, Passionis Dominicæ re-
cordari deberes, alijs omnibus intendis, faciem
autem Domini non observas: & utinam ean-
dem tuarum distractionum, divagationum, &
lurditatum sputis non de novo commaculares!
Propone deinceps majori fervore, ac attentio-
ne divinis rebus interesse, & fervidís affecti-
bus Divinam faciem recreare. In præmium
devotionis suæ reportavit B. Veronica faciem
Christi sudario impressam: tu verò reportabis
faciem Christi animæ tuæ impressam, id est, gra-
tiam sanctificantem, prævenientem, excitan-
tem, cujus defectu tepidus permanebis, & ari-
dus: hæc autem gratia non datur, nisi devotè
supplicantibus, & orantibus mente, ac spiri-
tu.

O Divine Magister, doce me orare, & qui-
dem orare in spiritu, & veritate tanto fervore, &
studiò, quantò coram facie Judicis causam suam
perorat reus; ut inveniam gratiam coram ocu-
lis Divinæ Majestatis tuæ, quæ ad ea, quæ
Dei sunt, promptiorem me faciat, & alacrio-
rem, Amen.

Pater, & Ave.

O Amor Crucifixæ! miserere mei.

Statio

Statio VII.

JESUS iterum cadit.

✠. Adoramus te, ut supra.

INvitus licet, permisit tamen truculentus lictorum, Judæorumque grex, ut Veronica sudariò Christi faciem detergeret. Ast hanc qualem qualem refocillationem majori crudelitæ compensavit. Quare Christus Dominus cogitur iteratò eorum pedibus, & Crucis oneri succumbere.

Tu pariter Religiose ! breve quoddam obsequium exhibes Deo tuo, dum in visitatione sacrarum Stationum viæ Crucis Christo compateris, delicta commissæ plangis, & proponis plangenda posthac non committere. Hòc inquam sudariò refocillas non nihil faciem Domini tui. Vix enim hoc exercitium finivisti, in antiqua relaberis crimina, faciem Christi de novo commaculas, & illum honorem exhibitum duplicatâ injuriâ destruis. Putas, quid solatii habebit Christus, si post levem honorem graves ei injurias inferas ? quid tibi prodest, si ter etiam in die sacram Crucis viam citò percurras, & te non emendes, proposita non serves, & non exequaris ? Disquire intra temetipsum occasiones, quibùs oblati concepta proposita in effectum deducere velis, & possis.

O Domine, ità sanè est ! sæpe in meditatione sacræ tuæ Passionis tibi compassus sum ;

D. 5

sed

sed quòd hæc compassio non fuerit vera, ac genuina, opere ostendi; quia statim novis te injuris laceffivi, & nullam adhibui diligentiam, tui offensas præcavendi. Dixi, nunc cæpi, totò animò in id incumbam, ut, quantum fragilitas mea permittit, deliberatè nunquam posthac te offendam leviter, multò minùs graviter, tuâ firmatus gratiâ, Amen.

Pater, & Ave.

O Amor Crucifixæ ! miserere mei.

Statio VIII.

Mulieres deplorant JESUM.

¶ Adoramus te, ùt suprà.

TRistissimam Christi ad montem Calvariæ processionem, carnificum barbariem, militum furorem, Judæorum rabiem, JESU vulnera, & immania tormenta, conspiciatæ quædam mulieres, in lacrymas, & lamenta, & doloris, ac compassionis affectus proruperunt, & hoc quidem ex naturali motivo; quia homini, Prophetæ magno, & suo benefactori compatiebantur, cujus Divinitatem ignorabant.

Ego autem tot, & tanta JESU Christi supplicia, tormenta, ac martyria siccis specto oculis, qui tamen fide Divina illuminatus credo, eum esse Dominum, & Salvatorem meum, Conservatorem, & Benefactorem meum, omnem spem, & consolationem meam, summum & infinitum Bonum, ac ultimum finem meum.

Certè

Certè ipsam hanc cordis durtiem, & obstinaciam sanguineis deberem lacrymis deplorare. Sed unde tantus cordis mei torpor? inde, quòd cum illis mulieribus beneficia Domini rarò recogitem; nullas pro iis agam gratias, & quasi rei inanis statim obliviscar. Quoties enim ego gratà recolo memorià beneficium vocationis religiosæ? beneficium ordinis Sacerdotalis? beneficium quotidianæ de mensa Domini participationis? Et (ut alia taceam) beneficium beneficiorum omnium maximum, & admirabilissimum Passionis Dominicæ? si enim hæc sedulò recogitarem, non adèò ingratus, immortificatus, tepidus, & vecors permanerem, ac lapideus, & insensitivus.

Domine Deus meus, qui de tortente voluptatis tuæ potas Sanctos, & Electos tuos. Rogo te humillimè, etiam pota me de torrente, non quidem voluptatis tuæ (quia dulcia non meruit, qui non gustavit amara) sed de torrente amaritudinis tuæ, ut cor meum in planctum, & oculi in rivos aquarum defluant, & dolorosis lacrymīs te defleam patientem, & me non compatientem, te summum Benefactorem pessimè tractatum, & me ingratum peccatorem, tibi non regratiantem, Amen.

Pater, & Ave.

O Amor Crucifixe! miserere mei.

Statio

Statio IX.

Christus tertio prosternitur.

✠. Adoramus, ut suprà.

IESUS sentiens infirmitatem, quam pro nobis assumpsit, tertia vice gravissimo lapsu in terram collisus est, eò quidem graviore, quò imitius in eum debacchati sunt carnifices.

Perpende hanc doloris vim, ô anima! simulque recogita, tres dorsi, flagris antea excarnificati, articulos esse conquassatos, humerosque Christi (ut S. Bernardo revelatum est) profundissima cicatrice fuisse ex Crucis onere sauciatos. Et, eheu! horum dolorum causa iterum ego fui. Tres illas dorsi juncturas ego confregi, dum tres animæ meæ potentias à Cruce avocavi; intellectum quidem ad vana, & illicita convertendò: memoriam à Crucifixi, à virtutum, & obligationis meæ recordatione cohibendò: voluntatem autem à Crucis amore, ad carnalitatum, & desideriorum pravorum prosecutionem inclinandò, & sic Crucem Domini in immensum aggravandò. Insuper humeros Christi tam graviter vulneravi, quia meos Cruci subtraxi, & soli Deo universam molem portandam reliqui. Comedi, & bibi, quod, & quantum potui: dormivi multum, vigilavi parum: garrivi frequenter, tacui nunquam: amavi recreationes, odivi occupationes: Choro coactè, non voluntariè interfui: sensibus

bus, ex - & internis frana non injeci, Christi Crucem, Crucis mortificationem, mortificationis incommoda diligenter cavi, & me summè defectuosum non expavi, sed meiipſus palpo fui.

Inde etiam, ô JESU ! te prostravi, te debilitavi, te conculcavi. Ah piissime Domine ! debilita me ad malum, & conforta ad bonum, prosterne ad Crucem, ut eidem sceleratos subdam humeros, & conculcem leonem, & draconem, id est memetipſum, ut tu exalteris, & ego confringam inimicos meos in fortitudine brachij tui, Amen.

Pater, & Ave.

O Amor Crucifixe ! miserere mei.

Statio X.

Christus potatur aceto.

¶ Adoramus te, ut suprâ.

VErè ingens fuit dolor, quo JESUS torquebatur ex sui acerrima. At potus Ei non dabatur alius, quam vinum Myrrhatum, acetumque amarissimum; sed noluit potu amaro suam dulcedinem, ac dulcissima viscera amaricare Redemptor.

Ô Religiose ! pro hoc tremendo dolore quid putas, exigit à te JESUS dolorosissimus ? ne mireris, si dicam, quod sentio : hoc exigit à te, ut nullos posthac dolores sentias corporales ; ut infirmitatem contrahas nullam : ut à mentis hebetudine

tudine sis liber, & nullam deinceps circumferas ad functiones tuas indispositionem. An potuisset tibi gratius quidpiam, an proficuum magis præcipi, ignoro penitus. Hoc solum, nî fallor, optas, ut in tua sit potestate habere, quod à te Deus exigit. Atqui in tua potestate est, quod exigitur. An non in tua potestate est gulam coercere, intemperantiam cibi, potûsque mitigare, ingluviem moderari? An non in tua potestate est parior vini usus, aut aquatilis dilutio in memoriam acceti, quò JESUS, tuum gulositatis pruritum expiaturus, potari voluit? Refrena gulam, moderare appetitui, Sobrietatis leges observa; & raras patiè vertigines capitis, stomachi dolores, hebetudinem mentis nullam, quæ omnia parturit maledicta ebrietas. O! si tantos dolores amore Christi sitientis sustinuisses, incomparabilis in Cœlo te expectaret gloria: at ebrietatis, & gulositatis ergò hæc sustinuisse, inferni diros cruciatus prælibasse est.

O Christe JESU! da, ut insatiabilis me invadat sitis, non Bacchi, sed tui, ut sitiat anima mea ad Deum fortem, vivum; sitiat; sed replemi vinò compunctionis, & amarissimæ compassionis absynthiò; nec alius liquor hanc meam sitim restinguere valeat, quàm illius fontis, qui salit in vitam æternam.

Pater, & Ave.

O Amor Crucifixe! miserere mei.

Statio

Statio XI.

Christi Crucifixio.

✠. Adoramus te, ut suprâ.

Christus violentiâ rabiosâ in Crucem agitur, extenditur, & eidem horrendis clavîs affigitur. O tormentum ! ô dolor ! Tacet nihilô minus, & patitur patienter, ut opus Redemptionis Humanæ, quod dederat ipsi Pater, consumaret.

Quis crederet, Christum in Theatro Crucis personam Religiosi egisse, seu potius sustinuisse ? Religiosus enim violenter in crucem actus est, dum aliquid patitur, quod ei molestum accidit, aut cum violentatione suæ voluntatis certæ cuidam Superiorum circa se dispositioni subiaceret. Præterea in utraque hac cruce, aut saltem harum unâ extenditur ; quia per notabile tempus eam jam circumfert. Dolorem augent repetiti clavorum ictus, irrisiones, oblocutiones, vexationes, murmura, & contemptus. Violenta profectô crucifixio ! ô Utinam ! Religiosus vice versâ Personam Christi sustineret, taceret, pateretur patienter. Hoc enim opus est, quod dederat ei Pater cœlestis, ut illud operandô, sustinerendô, exantlandô longanimiter, & patienter, suæ salutis opus consummaret. Secus si fecerit, pati debet absque merito, cum gravi æternæ salutis perdendæ periculo.

Domine ! si tibi in infirmitatibus meis complaces, libenter gloriabor in infirmitatibus meis, ut
inha-

inhabitet in me virtus Christi (i) verumtamen tu esto patientia mea, spes mea, & fortitudo mea, nè deficiam à te, Amen.

Pater, & Ave.

O Amor Crucifixe ! miserere mei.

(i) 2. Cor. 12. v. 9.

Statio XII.

Jesus expirat in Cruce.

ÿ. Adoramus te, ut suprà.

JESUS, filius Dei vivi, enormitate dolorum, & multitudine tormentorum tandem victus, & fractus, in manus aeterni Patris beatissimam exhalavit animam.

O Spectaculum, Spectaculorum Tragicorum luctuosissimum ! Moritur Deus, ut vivat homo : moritur Vita, ut mortem occidat : moritur Innocentissimus, ut millenas mortes meritis peccator vivat. Moritur (contremiscite Cœli, & inferni) moritur Creator Immortalis pro mortali creatura. Moriture heu ! & mea manu moritur. O manum crudelem, & omni dignam supplicio ! Porsennæ Regi necem machinatus, & alterius per errorem Interfector, ardentibus carbonibus errantem cruciavit dexteram. Quod igitur mea merebitur supplicium manus, quæ, cum ense justæ ultionis in Reges meos, in passionones meas indomitas, stringere debuisset, non errore, sed præmediatâ malignitiâ, Filium Dei interfecit ?

Domi-

Domine ! si tibi placet dare mihi supplicij
electionem, aliam non eligerem meæ crudelita-
tis poenam, quàm *penam Talionis*. Ego te per
summum nefas crucifixi : tu jam me per summum
fas crucifige ! perversa voluntas mea fuit illa
manus, quæ te crucifixit : crucifige ergo vo-
luntatem meam, & eò usque cruci affixam re-
linque, donec perfectè didicerit, ea, quæ sibi
sunt contraria, absque nausea acceptare, tuis-
que sapientissimis, & superiorum meorum di-
spositionibus, absque contradictionis nota sub-
jicere, & non tam disquirere, quid alios face-
re oporteat, quàm quid me sustinere deceat,
Amen.

Pater, & Ave.

O Amor Crucifixæ ! miserere mei.

Statio XIII.

Corpus Christi deponitur de Cruce.

†. Adoramus te, ut suprà.

Corpus Domini postquam de Cruce fuit de-
positum, in sinu Virginis Matris fuit reclu-
datum.

Sed cur sacrum illud Corpus non alterius ex
presentibus Christi cultorum exceptum est bra-
chijs ? cur solummodo in sinu Virginis Matris
mortuum voluit requiescere ? Ideo (nî fallor)
quia cor Virginis præ cæteris erat Filio ma-
gis compassivum. Nam (k) JESUS, & Ma-

E

ria

ria erant duæ mysticæ citharæ, quarum una sonante resonabat & altera, etiam nullo pulsante. JESU dolente dolet & Mater; Christo crucifixus crucifigitur & Mater: Crux, & clavi Filij fuerunt etiam Matris. Et teste S. Hieron. Quot læsiones in corpore Filij, tot fuere vulnera in corde Matris. Clavi quibus corpus Christi pendebat in Cruce, & cor Virginis confixum habebant: nullum ictum recipiebat Corpus, cui non tristis echo responderet in corde Matris. Ecce! Sic amat Deus pro nobis passus

Passionis suæ memoriam, ut dignantissime, & placidissime in corde compassivo requiescere velit. Ego verò, qui memoriam Passionis Dominicæ per immolationem Hostiæ incruentam quotidie ago, & Corpus Domini quotidie confecro, ac fumo, aut nullam, aut raram admodum foveo compassionem, aut Passionis Dominicæ gratam reminiscenciam, contra expressam Domini voluntatem præcipientis: *Hæc quotiescunque feceritis, in mei memoriam facietis.* (1)

O JESU! per dolores te rogo Mariæ. O Maria! per JESU te obtestor vulnera, ut sentire in corde meo merear verum compassionis affectum: ut cor meum velut altera cithara ad vestros dolores doleat, ad vestros plactus plangat, vestris passionibus compatiatur, vestris cordibus incorporetur, Corpusque Salvatoris Sacramentale dignum in illo inveniat receptaculum, Amen. Pater, & Ave.

O Amor Crucifixe! miserere mei.

(k) S. Greg. in Moral. (l) Eccl. in Miss.

Statio

Statio XIV.

Sanctum Domini Sepulchrum.

† Adoramus te, ut suprâ.

IN duro, & lapideo sepulchro collocatur venerabile Corpus Christi Domini. Adeò nihil mollietiei, etiam post mortem, suo indulget corpori Salvator, sed omni austeritati semper illud subjecit.

Quid ? si ego nimiam, quam turpi corpori meo impendo curam, Religiosa pietate corpori Servatoris impenderem ? si unâ, alterâve horâ somnum vincerem : aut abbreviarem, ut dulcius dormiret JESUS meus ? si uno, alterâve haustu vini ordinario, aut extraordinario abstinere, ut eodem vulnera JESU perungerem ? si frigoris, aut æstûs incommoda patientius, vel diutius ferrem, ut Corpus Christi foverem ? si ciliciò, flagris, aliòve sanctæ crudelitatis instrumentò, in meum quandòque corpus sævirem, ut Corpus Christi hac ratione non nihil mitius tractaretur, aut à Sacerdotibus reprobis, aut ab indignè communicantibus ? hæc, & similia, quæ Sancti docet Spiritûs unctio, propone, & exequere. Si enim sanctum illud, Divinum, virgineum, & adorandum Corpus, à Domino tam dirè hac in vita habitum est : ànne convenit, ut ego corpus meum fætidum, lascivum, & rebelle palpem, illique blandiar ?

a sonan-
e. JEsu
rfiguratur
am Ma-
s in cor-
s. Clavi
cor Vir-
cipiebat
orde Ma-
s passus
imè, &
cere ve-
nis Do-
uentam
lie con-
admo-
s Domi-
pressam
quoties
(1)
ia. O
ut sen-
passionis
thara ad
planctus
r, vest-
e Salva-
eniat re-
fiss.

Frater asine ! corpus meum flagitiosum de-
cretoriam audi sententiam ! parum boni , &
carnalis commodi expectare habes. Pabula-
bor te per jejunia , potabo te siti , vestiam te
frigore , curabo te negligenter , affligam fre-
quenter , castigabo quotidie , parcam nunquam ;
non enim expedit , ut tu molliter tracteris , &
Corpus Domini tui malè habeat. Tu , ô Do-
mine ! da gratiam , ut corpori meo , in reve-
rentiam Corporis tui , in hac vita reconcilies
nunquam. Fiat !

Pater , & Ave.

Ô Amor Crucifixe ! miserere mei.

Statio XV.

Vexillum S. Crucis.

✠. Adoramus te , ut suprâ.

Inæstimabili ardore prosequabatur sanctam
Crucem Beata Helena. Unde etiam non
quievit , donec eam erigeret in titulum , &
publicæ adorationi exponeret.


En ! Sancta Helena à toto mundo multâs en-
comiis celebratur , quòd Crucem Domini stu-
diosè quæsserit , inventamque honoraverit.
Verùm nec minimam laudem mereretur , nisi e-
tiam Crucem jugiter in suo corpore pro Divi-
ni nominis honore portâisset. Pariter , quid me
juvat , Crucem Christi quæsisse in Religioso
Ordine , eamque per emissionem votorum so-
lemnium invenisse , nisi ea observem , & exe-
quar ,

quar , quæ Cruci Religiosæ indispensabiliter sunt annexa ? Quænam illa ? unum commemoro : arduum in virtutibus proficiendi studium. In hoc studio decertatur pro præmio : tu vix meruisti ascensum.

Deus meus , & omnia ! negligentissimus haetenus fui in schola Crucis discipulus. Studebo tamen , ut tuo sub magisterio proficiam in Crucis studio, Amen.

Pater, & Ave.

O Amor Crucifixæ ! miserere mei.



PRAXIS IV.

Statio I.

Condemnatio Christi ad mortem.

- Ÿ. Adoramus te sanctissime Domine JESU Christe, & benedicimus tibi !
 R. Quia per sanctam Crucem tuam redemisti mundum.

Platus , nè Caesaris offensam incurreret , ejusve gratiâ excideret , sua autoritate abusus tradidit JESUM , ut crucifigeretur. Infandum revera scelus ! ut homini placere pergat , displicere Deo non timet.

O utinam meum non foret hoc scelus ! computare nequeo , quoties Deum , & ea , quæ Dei sunt , neglexerim propter respectum humanum. Nè homini displiceam , sacram si-

lentij legem temeravi : devotiones tam debitas , quàm liberas , aut deproperavi , aut neglexi , aut miserè perfolvi : facetijs , vanitatibus , recreationibus , computationibus indulsi : cum lupis ululavi , cum murmurantibus murmuravi , cum dissolutis dissolutus fui. Recordabar equidem , talia displicere Deo , sed quia placere hominibus , Deum inhonoravi , ut hommuncioni placeam.

Ah Domine ! cognosco : quamdiu hominibus placere desidero , non placebo Domino in regione vivorum , & tuus servus esse non potero. Recede ergo improbum hominibus placendi studium ! recede ! displiceam tibi deinceps , non curo ; modò Deo placeam. Dicant me melancholicum , proclament me exoticum , vocent , quidquid velint ; malo displicere hominibus , quàm Deo , malo habere pacem in angello cum libello , quàm amicitiam hominum.

Pater , & Ave.

O Amor Crucifixe ! miserere mei.

Statio II.

Christus Crucem suscipit.

ψ. Adoramus te , ut suprà.

EXutus , quâ pro illusione Herodiana induebatur , vili purpurâ , propriâ induitur veste , ut eò facilius ab omnibus agnitus majori exponeretur ludibrio , & confusioni. Deinde
Crucem

Crucem ponderosissimam , & ignominiosissimam cogitur in suos sacrosanctos suscipere humeros. Et hæc omnia Salvator silenter sustinet incredibili humilitatis, & patientiæ exemplò.

Tantæ molis erat , ab æterna , quam dudum metui , me eripere confusione , & æternorum facere gaudiorum hæredem. Ut quid igitur erubescō ego , & gravor peccata mea uni homini , vices Dei sustinenti , in aures revelare ? anne momentanea , & existimata hæc confusio , quam apud confessarium incurrendam vereor , æquiparari poterit confusione , quam tota die pro me sustinuit verecundissimus DEI Filius , Salvator meus JESUS Christus ? O stultum me ! si pro æternis opprobriis sustinere nolo momentaneam confusionem : si pro honoribus infinitis exiguum recusem ferre verecundiam.

Ibo igitur , & adibo statim confessarium meum , & eidem latebras conscientiæ meæ aperiam , ostendam vulnera , manifestabo scelera , & turpissimas eidem iniquitates meas omnes humili , & contrito corde detegam. Absorbeat me infernus viventem , si sacram pœnitentiæ Crucem , tota reluctante superba natura , in humili mei accusatione , propter amorem JESU Christi ocyùs non suscepero , memor illius : quoniam *justus accusator est sui*.

Pater , & Ave.

O Amor Crucifixæ ! miserere mei.

Statio III.

Sub Cruce corruit.

✠. Adoramus te, ut suprâ.

PErgit cum Cruce Salvator majore animi ,
quàm virium corporalium constantiâ , qui-
bûs deficientibûs miserando lapsu in terram col-
lisus est, & prostratus.

Si cæcus cæco ducatum præstet , ambo in
foveam cadent , ait æterna veritas. Cæcus ni-
mirum duce opus habet , quò dirigente secu-
rior incedat , & offendicula declinet. Quòd
cæcus ego hætenus fuerim , negare non pos-
sum ; propter cæcitatem enim meam tam fre-
quenter in foveam cado peccatorum : tot detur-
por conversationis humanæ maculis , tot offen-
diculis mea fauciatur anima. Sed ecce ! ex in-
finita misericordia sua Filius Dei descendit de
coelis , & incarnatus est , ut ducatum mihi præ-
stet. Et ideo mihi cæco baculum Crucis por-
rigit , ut eò apprehensò ducentem Dominum se-
querer ; qui , ut ego tutus incedam , periculis
se objicit : ut ego flem , ipse cadit : nè ego of-
fendam ad lapidem pedem meum , ipsius pe-
des vulnerantur ; nè ego commaculer , ipse for-
datur. Alt (ô me insipientem !) ego relictò
baculò , spreto Duce , solus ingredi ausus sum.
Quid igitur mirum , si toties cecidi ? porrigit
mihi Divinus Dux ille securum crucis baculum ,
dum certam immittit infirmitatem , persecu-
tio-

tionem, contemptum, injuriam &c. & ego nefaria tenerritate hunc baculum respuo, Crucem fugio, & sic lapsus irremediabilis periculo me expono. Quis scit, an hæc infirmitas &c. sit ad mortem, quin potius, ut aperiantur oculi mei, & videant veritatem,

Gratias tibi Domine JESU ! quòd per Crucis tuæ baculum non tantum Dux, sed & Medicus meus fueris. Tu mediante tribulatione aperuisti oculos mentis meæ, ut agnoscerem meam miseriam, ut ambularem cautiùs, & pro salute mea securiùs. Bonum mihi, quia humiliasti me, ut discam justificationes tuas. Hoc demum te supplex flagito, nè relinquas me mihi.

Pater, & Ave.

O Amor Crucifixæ ! miserere mei.

Statio IV.

Mater Dolorosa occurrit Filio.

ψ. Adoramus te, ut suprà.

A Moris impetu acta Mater tanti DEI, per hastas, & enses, irruit, ut postremo Filium suum stringeret. At verò Judæa barbaries, & ferox miles, violenta manu Matrem à Nato, & Natum à Matre separant.

Perpende, ô anima mea ! quantum hæc violenta separatio dolorem causaverit in corde Matris ardentissimè amantis, & Filij tenerriimè redamantis. Hanc tamen avulsionem & Filius, & Mater,

E s

vul.

vulnerato quidem corde , sed resignatissima voluntate fuerunt. Ah ! utinam ego Horum exemplò avulsionem spontaneam à rebus caducis , quas amo perditè , non tolerarem tantum , sed & promoverem. Separari se patiatur JESUS à MARIA , quam longè ardentiori (ut dignum erat) prosequeretur amore , quàm cæteras creaturas omnes : & ego amore JESU , amore Mariæ , separari me non patiar ab occasione peccandi proxima , aut saltem ea , in qua frequentius labi soleo ? Si quidpiam carnali meo affectui contrarium aut Superior præcipat , aut ab alio proveniat : mox recenseo antiquam consuetudinem , arguo indiscretionem , sinistram suspicor erga me affectum. Siccine ! majorne mihi consuetudo , & arctior confœderatio cum meis carnalitatibus , quàm JESU cum Maria ? An discretionem peto ab homine , qui indiscretus sum Deo ? An ideo Religiosus factus sum , ut mihi egomet blandiar , & hominum lucrer affectus ? *Si me quæritis*, ait Christus, *sinite vos abire (a)* Abite igitur favores hominum ! abite propria commoda ! abite ! mihi debetur nihil præter verbera , & opprobria , ut inter hæc solum possideam Deum.

Domine ! qui venisti separare hominem à patre suo , & matrem à filia , & nurum à socru : per gratiam tuam separa me à prava peccandi consuetudine , à licentia vitæ , à commoditatum carnalium amore , ut hīs omnibūs expeditus à te non separer amplius. Pater , & Ave.

O Amor Crucifixæ ! miserere mei.

(a) *Joann. 18.*

Statio

Statio V.

Deus juvatur ab homine in portanda Cruce.

✠. Adoramus te, ut suprà.

A Ngariatus fuit Simon ab injustitiæ ministris, ut Crucem Dominicam, infirmatò Dominò, ipse portaret. Sed Simon magis suo honori, & commodo, quàm Christi desiderio intendens, maximopere Crucis bajulationem recusavit. Postremò tamen victus amore Christi patientis, constanter eam portavit.

Consimilem Crucis horrorem, nauséamve ego concepi. Crucem hæcenus ferre recusavi, aut ejus pondere absterritus, aut probrositatem veritus, aut carnis molestiam abhorrens, aut cuti meæ tenellæ adblandiens. Veruntamen timui, ubi non erat timor. Deus grandes à me, cujus infinitatem perspectissimam habet, non exigit mortificationem, flagella, sputa, opprobria, spineas coronas, cruces. Hoc solum desiderat, ut crucem Religiosioris observantiæ amplectar, ut communia ritè perficiam, ut intellectum fortiùs cohibeam, nè in persolutione Divinæ laudis divagetur : ut oculos modestè coërceam, nè videant vanitatem : ut alacriter surgam, ubi surgendum : ut parcè comedam, bibámve, ubi natura reficienda : ut devotè laborem in vinea Domini, ubi laborandum : ut taceam, ubi tacendum, orem, ubi orandum, faciam, quod faciendum, obediam præcipienti, supportem æqualem, æstimem inferiorem &c. Ah me miserum ! nè levia hæc quidem feci.

Fi-

Fixum, ratumque est! communia Religiosæ ob-
servantiæ munia, & functiones, accuratori post-
hac sectabor studiò. Hoc facere vî statûs mei
teneor: ad hoc invitat amor Dei. Minus facere
non permittit mea obligatio, plus non requirit
Deus. Dolet, ô Domine! dolet acerbè, & pu-
det fœcundiæ meæ. Salve ô Religiosa Disciplina!
tu Crux mea eris, in te vivam, in te moriar,
Pater, & Ave.

O Amor Crucifixæ! miserere mei.

Statio VI.

Veronicæ erga Salvatorem pietas.

†. Adoramus te, ut suprà.

Beatissima Matrona Veronica ubi inaudiit, quòd
Magnus ille Propheta, quem ipsa Filium Dei
crediderat, ad extremum raptaretur supplicium,
cohtinere se non potuit, quin accurreret, &
compassivo intuitu Divinam ejus faciem conside-
raret. Dein, ut eam indignissimè vidit commu-
lata, velum è suo detractum vertice Salvato-
ri affert, qui eodem & maculas deterfit, & ima-
ginem vultûs sui dignanter illi impressit.

Hic fuit fructus devotæ Meditationis, pius ni-
mirum affectus, amoris flamma, detractio veli,
ejusque oblatio, & reportatum Divinæ faciei ho-
norum. Undenam est, quòd raro pietatis sen-
su afficiar, in Divino obsequio frigescam, velum
tepeditatis retineam, supererogatorium nihil Deo
offeram

offeram, & Divinorum charismatum descendam incurram jacturam? Inde est (respondent Affectus omnes) quod sacras Meditationes passim negligam, aut ex frivolis, & ementitis causis fugiam, decurrem, & abhorream, velut tormentum animæ; cum tamen *Oratio mentalis tam necessaria sit animæ ad vitam spiritualem conservandam, quàm necessaria est anima ad naturalem vitam corpori subministrandam*, ut loquitur S. Chrysost. (b) Quid igitur mirum, si, velut corpus mortuum, nullo pietatis calore fovear, si putredine dissoluta conversationis foeteam, & stomacho animæ male disposito dulcem meditationis cibum respuam? Ast hoc ipso pharmaco remederi debeo tanto malo.

O Deus! hac sacra meditatione illuminasti cor meum, ut sciam, quid desit mihi, scilicet sanctum meditationum exercitium, cujus defectu in omni vita mea defectuosus permansi, & defectuosior in dies evasi. Detraham igitur hoc negligentiae velum capiti meo, & in lege tua meditabor die, ac nocte. Tu Domine! ostende mihi faciem tuam, ut in meditatione mea jugis exardescat ignis, Amen.

Pater, & Ave.

O Amor Crucifixe! miserere mei.

(b) Ser. 1. & 2. de Orat.

Statio

Statio VII.

JESUS iterum sub Cruce concidit.

¶ Adoramus te, ut suprà.

QUò majori virium debilitate laborabat Deus, eò majori crudelitatis efferatæ argumentò in eum sæviit insana Judæorum, & licetorum truculentia, usquedum incessabilibùs fustigationibùs, violentis tractionibùs, blasphemis, & contumeliis innumeris lassus succumberet Agnus.

Grandis injuria! eam potuit Dominus ulcisci, non verò voluit. Injuriam, ut puto, mihi illatam, ego ulcisci non possum, & volo. Mille occasiones ultionis quæro, vindictæ flammam sub cinere gliscentem circumfero, ut data opportunitate erumpat in incendium. Perpende, quisquis es, an gravior sit injuria tibi, servo indigno, an Domino tuo altissimo illata, & quidem à temetipso? qui (ut benè nōsti) persæpè indignissimis modis Deum tuum tractasti. Quid? si ille vindictam meditaretur, si irreconciliabilem se tibi exhiberet, quàm miser, quàm abominabilis esses? tu debes Deo centum talenta; & eorum dimissionem flagitas, ac obtines: debet tibi conservus tuus unicum: & tu illud absque misericordia exigis? in gratiam Dei condona, & vade reconciliari fratri tuo: non politicæ, sed charitatis fraternæ affectus ei exhibe &c.

Tu, ô Domine! dignus es, ut omnem injuriam, & quidquid proximus meus in me deliquit, propter

propter te dimittam ; sicut & actu ex corde dimitto omnibus , & singulis , qui quoquo modo me offenderunt. O Pater æterne ! dimitte nobis debita nostra , sicut & nos dimittimus debitoribus nostris , Amen.

Pater , & Ave.

O Amor Crucifixe ! miserere mei.

Statio VIII.

Mulieres flentes sequuntur JESUM.

¶ Adoramus te , ut suprâ.

Mulieres intuitæ sunt Christum patientem , & tanto commiserationis affectu commotæ sunt , ut , cum aliud , quod ei pro stupenda charitate , ac patientia redderent , non haberent , luxerint eum , & fleverint super eum. Promptam nimirum sequelam , & lacrymas reddidere.

Ego Christi patientis exemplò , & mulierum fletu non commoveor , non intueor. Non cogito , non computo mecum sumptus , quibûs aut peccata mea fletere Deo , aut quibûs ea redimere possem. Ego semper dico : volo amare Deum ferventiùs : volo ejus amarissimam Passionem de flere frequentius : volo me emendare ; nolo amplius peccare. Interim in effectum non transit voluntas illa inefficax ; quia occasiones id præstandi non inquirò , aut ultrò oblatas , passim negligo. Quid ? si Filius Dei dixisset solummodo : volo hominem

minem salvare : volo pro eo pati : volo eum ab æterna captivitate, ab his, aut illis angustiis liberare : quin tamen unquam te salvaret, quin te clamantem ad se, exaudiret ? maneres profectò omnium tribulationum centrum. Quid ergo mirum, si etiam maneat antiquarum passionum, & imperfectionum subjectum ? quid mirum, quòd te mulieres Ethnicæ in lacrymarum devotione, & devotâ Christi comitivâ confundant ? ut corpori satisfacias, in omnem occasionem argus es : ut pro peccatis tuis satisfacias, talpa es. Sed vae !

O JESU ! qui dedisti velle, da etiam perficere. Da ardens perfectionis, & poenitentiae desiderium ! da pium affectum, & fervidum effectum : ut ea, quæ agenda sunt, cognoscam, & cognita exequar, Amen.

Pater, & Ave.

O Amor Crucifixæ ! miserere mei.

Statio IX.

JESUS tertio cadit sub Cruce.

✠. Adoramus te, ut suprà.

Petulantis Judæorum, ac carnificum turbæ ira erat jocus, & recreatio, ut JESUM ab uno ad aliud latus impellerent, & in terram prostratum omnium hominum ludibrio exponerent. Crudelis sanè jocus, quo Deus adeò confunditur.

Quanto in his lapsibus dolore regale Christi pectus fuerit diverberatum, ex eo conjicies Religio-

fe ! quòd & tu, vilis licèt hominico, vehementer te moveri sentias, & dejiciaris animò, si à superioribus tuis à statu honorificentiore ad minus, ut putas, honorificum, ab alto in profundum, ab exultatione, & hominum æstimatione dejiciaris, in non nullam confusionem, & vilipensionem. Tu profectò ignominiam Crucis Christi gustas, & cum eodem in terram prosterneris. Sed tace cum Christo : confide in Deo ; tolerabilis enim est lapsus ille : quoniam non manus Judæorum, sed manus Domini tetegit te. Neque oportet te plus æquo erubescere in hoc lapsu ; quia dextera Domini fecit virtutem, dextera Domini exaltavit te in spem gloriæ sempiternæ. Hinc lætanter cum Psalte Regio exclama.

O Domine ! *bonum mihi ; quia humiliasti me, ut discam justificationes tuas.* Parum curo, quòd ab homine judicer, aut ab humano die. Dejicere me potes homo ; sed est, qui quærat gloriam meam, ille nimirum, qui humilia respicit, & alta à longe cognoscit, confundar in terra, ut glorificer in cœlis, Amen.

Pater, & Ave.

O Amor Crucifixæ ! miserere mei.

Statio X.

Christus privatur vestibûs suis.

†. Adoramus te, ut suprà.

Christus Dominus, humana in carne DEUS, licèt esset Dominus omniũ, & dives in
F omnes

omnes, voluit tamen extremam paupertatem experiri; & ideo vestibûs privari se passus est: imò privari voluit, ut per vestium temporalium dimissionem ostenderet, regnum suum non esse de hoc mundo.

Ego in Ordine Religioso voluntariè passus sum, me sæculari vestimentò exui, & paupere Religionis habitu indui. An cum vestibus sæcularia exui desideria? an curam carnis? an (quod veri Religiosi est) sine superioris scitu, & facultate ea non procuravi, non retinui, non ambivi, quæ pretiosiora, quæ rariora, quæ mirabiliora, quæ mihi commodiora fuere. An vilissima elegi tam in cibo, & potu, quàm in supellectili, quàm officijs? an talium privationem, & carentiam, æquò supportavi animò? hoc, si feci, verus in paupertate voluntaria imitator Christi sum: si secùs; sæcularem quidem deposui habitum, sed non animum: Ægyptò exivi; sed ad ollas carnum respexi, & ad insanias fallàs. Quomodò posthac amore paupertatis Dei studebo paupertati in mensa, in cella, in habitu, in affectu.

O JESU pauperrime! utinam omnes hujus mundi thesauros haberem! non quidem ut eos possiderem; sed ut propter te relinquere valerem. Quid enim mihi est in cœlo, & à te quid volui super terram? O DEUS! in cœlo volo tuam gloriam: & in terra illud V. Bedæ. *Pauper in cella, & dives in conscientia*

*tia, securior dormit in terra, quàm aurò di-
ves in purpura. (c)*

Pater, & Ave.

O Amor Crucifixe ! miserere mei.

(c) in 2. ad Corint.

Statio XI.

Crucifixio Christi.

Ÿ. Adoramus te, ut suprà.

A More mei Christus Dominus se passus est
Cruci affigi tremendò Martyriò.

Ingenuosus amor est, varia excogitat media,
quibùs non intermorituram amati memoriam
conservare valeat. Amici defuncti cadaver non
nemo, in cineres redactum, imposuit clepsy-
dræ, ut ea ante oculos posita continuo fluxu
dulcem amici memoriam diffuere non sineret.
Et quis credat, officiosum adeò amorem natu-
ralem esse, ut supernaturalem Dei amorem a-
mandò superet ? Christus JESUS incomparabili-
ter ingeniosorem in mei amore sese exhibuit.
Ipse omnes vitæ totius annos, universos anno-
rum dies, dierum horas, & horarum momen-
ta meæ salutis, mei sacravit amoris. Et tantus
ille amor cum sit, quàm raro, eheu ! quàm
raro à me recolitur. Quid autem deinceps fiet ?
scio, quid faciam : sacras hæc stationes, quæ
universæ passionis quasi compendium sunt, clep-

sydræ locò ante oculos positas , frequenter intuebor , & amorem amori , lacrymis lacrymas , morti vitam offeram , secuturus monitum Doctoris Seraph. *Semper , & ubique in omnibus Dominus noster JESUS Christus , pro peccatis nostris crucifixus occurrat. (d)*

O JESU ! tu totus mihi figaris in corde , qui pro me totus fixus es in Cruce , ut eò usque tibi compatiar , donec terrenarum voluptatum gaudia mihi perfectè desipiant : & ibi ego vivere incipiam tibi , ubi tu pro me mori dignatus fuisti , Amen.

Pater , & Ave.

O Amor Crucifixe ! miserere mei.

(d) in stim. Amor. c. 7.

Statio XII.

Christus JESUS in cruce expirat.

✠. Adoramus te , ut suprà.

Filius Dei in Cruce post trium horarum crudelle supplicium , præ dolorum vehementia & dulci amoris tyrannide , extremum duxit spiritum.

Recogita ô anima Religiosa ! JESUS tui amantissimus , non tantum (ut in præcedente statione agnovisti) perpetuum sui amoris pignus , & memnosynon , in sacris hisce stationibus tibi relinquere , sed & mutui amoris signum à te recipere

cipere, & retinere dignatus est. Quod illud profectò non aliud, quàm sacra, quorum tu causa es, vulnera. *Ecce ! ait (e) in manibus meis descripsi te.* Imò non tantum in manibus, sed & in corde meo tui amoris signaculum posui, aperturam lateris mei. Ast qualia ego reciproci amoris signa ostendere possum Salvatori meo ! ego non tantum manus non habeo vulneratas, sed omnino vacuas, de quibus meritò conqueri potest Salvator meus : *(f) non invenio opera tua plena.* Et : *non est, qui recogitet corde.* *(g)* Eheu ! Deum, qui me creavit dereliqui, & oblitus sum Domini Salvatoris mei. O ingratitudinem infinities detestandam, sed & emendandam !

O Domine ! *quid sunt plagæ istæ in medio manuum tuarum ?* *(b)* His nimirum plagatus es in domo eorum, non qui diligebant, sed quos tu dilexisti, & attraxisti miserans. O JESU ! tale stigma imprime cordi meo indelebiliter, ut non possim tui non recordari : ut à tui amore desistam nunquam : ut non in Cruce, sed in igne amoris tui moriar, & per manus tuas, in quibus me descrixisti, scribi merear in libro vitæ, in libro te diligentium, Amen.

Pater, & Ave.

O Amor Crucifixe ! miserere mei.

(e) Isa. cap. 49. (f) Apoc. 3. (g) Jerem. 12. v. 11. (b) Zachar. 13. 6.

Statio XIII.

Corpus Christi sinu Matris Virginis excipitur.

†. Adoramus te, ut suprà.

EXtremis in afflictionibus hæc erat consolatio Matris dolorosissimæ, quòd Corpus Filij sui dilectissimi, de Cruce depositum, in sinu suo fuerit collocatum. Deipara nimirum Virgo est sponsa illa amantissima, quæ Cant. 1. exclamat: *Fasciculus Myrrhæ dilectus meus mihi: inter ubera mea commorabitur.*

O anima Religiosa! utinam dilectus ille tuus pro te passus, pro te mortuus, jugi compassionis affectu in corde tuo commoretur! & sequere monitum S. P. Bernardi, te sic alloquens: *Tu quoque, si sapias, imitare Sponsæ prudentiam, atque hunc Myrrhæ fasciculum de principali tui cordis nec ad horam patieris avelli. Amara illa omnia, quæ pro te pertulit, semper in memoria retinens, & assidua meditatione revolvens, quo possis dicere & tu; fasciculus Myrrhæ dilectus meus mihi, inter ubera mea commorabitur. (i)*

O JESU! da ut memoriâ memor sim tui, pro me passi, & mortui. In amaritudine tuæ Passionis, amara mihi dulcescant omnia: afflictiones omnes, Religiosa onera, poenitentiae, & mortificationum rigor, recreent me in odore suavitatis, Amen.

Pater, & Ave.

O Amor Crucifixæ! miserere mei.

(i) Ser. 43. in Cant.

Statio

Statio XIV.

Sepultura Corporis Christi.

✠. Adoramus te, ut suprà.

CUm lacrymis copiosis, & luctu inæstimabili tam Matris Virginis, quàm Discipulorum, ac Discipularum Christi Corpus ejus sacratissimum sepulturæ mandatur, & cum eo amantium corda, præ mærore diffluentia.

Quid putas? Religiose! an, ubi corpus tuum (fors proximè) sepulturæ traditum fuerit, futurus sit, qui illud lacrymis comitabitur, & deplorabit? crede sis: nemo multum lugebit, nemo deplorabit, præterquam tu solus. Tu, tu sanguineis, & irremediabilibus deplorabis lacrymâs, quòd tempus acceptabile, dies salutis, momenta æternitatis, neglexeris: quòd negotijs, & occupationibus vanis plurimùm: negotio autem omnium negotiorum maximo minimè intenderis. Lugebis, laboribus tuis, & studijs, vanos fines fuisse præfixos: lugebis, tempus, quod in vivis male impendisti, non esse amplius; sed adesse noctem, in qua nemo potest operari. Hi, & similes luctus, nè post mortem obruant, luge modò, & veris poenitentiae lacrymis, singultibusque, Salvatoris tui monumentum perfunde, & sepulchrum aromatiza.

O Christe JESU! qui pro me flect, qui pro me lugeat, qui pro me luat in æternitate, nemo

est. Ut quid ergò mea hominibus, aut vanitatibus, & infantijs falsis obsequia consecro? cur non laboro pro itineribus aternitatis? ah! otiosus steti toto anteaetæ vitæ tempore: residuum saltem tibi consecro. Obliviscatur mei mortalis homo: tu modò mei recordare, cui posthac laborabo, vigilabo ad sepulchrum.

Pater, & Ave.

O Amor Crucifixe! miserere mei.

Statio XV.

Triumphus Sanctæ Crucis.

Ÿ. Adoramus te, ut suprà.

CRUX Christi via est ad cœlum: qui Crucem invenerit, de via securus est: modo crucem non deferat, nè à via aberret.

Per orbem Cristianum solent erigi signa Crucis secus vias, & compita, ut rectam itinerantibus viam indicent. Tale signum erexit Christus, ut rectam viatoribus cœli commonstret semitam. Errat, quisquis à via Crucis aberrat; hoc docuit Christus: hoc prædicavit Paulus: hoc credunt Christiani. Et tamen, quis est, qui viam quærat Crucis, viam amet mortificationis? hinc conqueritur Christus (*k*) *quomodò tu aliam viam quæris, quam banc viam Regiam, quæ est via S. Crucis?*

O Domine! gratias ago tibi immensas pro eo, quòd mihi viatori rectam ad patriam viam

in ligno S. Crucis signaveris. Hæc igitur non recedet à corde, & oculis meis, ut cum famulo tuo, per omnia tentato, dicere possim : *vestigia ejus secutus est pes meus : viam ejus custodivi, & non declinavi ex ea.*

Pater, & Ave.

O Amor Crucifixe ! miserere mei.

(k) Apud Thom. Kem. l. 2. de Imit. c. 12. (l) Jobi c. 23.



PRAXIS V.

Statio I.

Injusta Pilati sententia.

†. Adoramus te sanctissime Domine JESU Christe, & benedicimus tibi !

R. Quia per sanctam Crucem tuam redemisti mundum.

Platus Christum à morte liberaturus voce impia populi se vinci passus est : *Si hunc dimittis, non es amicus Cæsaris. (a)*

Religiose ! hoc tibi dictum existima : si hanc dimittis tuæ humiliationis &c. occasionem, non es amicus cœlestis Cæsaris, tuam quærens gloriam, & non JESU Christi. At cave ! ne tibi eveniat, quod Pilato, nimirum : *Gloria eorum in confusione ipsorum (b)* Ad hæc : tentaris vindictæ, ac iræ stimulis, luxuriæ pulsibus cola-

phizaris &c. ? si hunc dimittis , non es amicus Cæsaris. Quid ? ergo non est dimittendus spiritus iræ , aut stimulus carnis , angelus Sathana ? non ; sed tolle , tolle , crucifige eum ; si enim permiseris impunitum abire , redibit sapius , impellet gravius , radicabitur firmitus , causabitur habitus. Et quid ex habitu ; nisi frequens ruina , lapsus quotidianus , inimicitia cum Divino Cæsare sempiterna ? Apprehende igitur , & exentera hunc piscem ! néve te devoret , crucifige eum. Fecistine hactenus ? Ah ! minimè. Quid postea facies ? qua occasione ? &c.

Da , ô Domine ! ut , qui te per vitia mea quasi captivaveram , dimittam liberum ; & memetipsum cum vitijs , & concupiscentijs meis in tuam redigam captivitatem , & vinculis charitatis adeò fortiter adstringam , nè memetipsum mihi dimittam unquam , & inimicus tuus denuo evadam , Amen.

Pater , & Ave.

O Amor Crucifixe ! miserere mei.

(a) *Joun. 19. v. 12.* (b) *ad Phil. 3. v. 19.*

Statio II.

Christus Crucem suscipit.

✠. Adoramus te , ut suprà.

JESUS Christus innocentissimus Crucem confusibilem , & opprobriosam , ad quam ab impio

pio iudice Pilato fuit injustissimè condemnatus , cum gaudio in sacrosanctos suos elevat humeros.

O Religiose ! imponitur tibi Crux à Deo , & luges , turbaris , eam ferre detrectas , & mirum in modum conquereris , & dicis : non recusò Crucem , quæ à Deo venit : sed quod hanc injuriam ab illo homine patiar : quòd per calumniam inimicorum meorum ab officio depositus , honoris , famæque dispendium incurrem : quòd alijs postponar , & quasi vilipendar , hoc intollerabile mihi accidit. Ain verò tu ? numquid non innocens fuit DEUS ! & tamen per calumniam , & invidiam illorum , quos filios suos vocare solebat , accusatus , traditus , & ab homine flagitioso condemnatus est , cum ingenti dedecore suæ Regiæ Majestatis , & Prophetalis dignitatis. Aspice igitur in Authorem & Consummatorem JESUM , & unà cum eo Crucem millies promeritam humiliter suscipe , undecunque demum tibi advenerit , sive à Deo , sive ab homine , sive à diabolo ; certum enim est , quòd absque DEI nutu non acciderit.

O JESU adjuva me ! ut deinceps tantum amem Crucem , quantum eam hucusque odio habui. Insurgent homines , armentur detractores : fredeant demones , plus non efficient , quàm ut concupito Crucis amplexu potiar , Amen.

Pater , & Ave.

O Amor Crucifixæ ! miserere mei.

Statio

Statio III.

Virtus Dei infirmatur primò sub Cruce.

¶ Adoramus te, ùt suprà.

A Flictiſſimus Salvator , verè vir dolorum immane Crucis , quo premebatur , pondus & brutalem liſtorum truculentiam , ulteriùs humanis viribùs , ferre non valens , tremendo lapſu ad pedes eorum corruit , exoraturus forſitan , ut poſita feritate paulò mitiùs ſecum agerent ,

Anima Theophila ! ſi coram vidiffes deſtendam illam , qua in JESUM ſæviebatur , crudelitatem carnificum , ac rabularum : an cohibere te potuiſſes , quin ſanctâ exardeſcens iracundiâ aut in eos irrueres , tantâmqve vindicareſ injuriam : aut ſaltem Auhor fuiſſes , ut humaniùs cum Deo tuo ageretur ? O utinam non poeniteat te præconcepti fervoris ! Ecce ! non carnificum tantum , ſed & Indomitarum paſſionum tuarum pedibus ſubeſt , & malè ab eis torquetur , conculcatur , & affligitur . In te ipſum ergo ſanctâ excandeſce iracundiâ : accurre ad JESUM , Crucem ex humeris ejus in tuos leva : paſſiones tuas trucidâ , aut , ſi mavis , cruciſige , vel ſaltem in tantum cohibe , ut ad gravem lapſum denuo non impellant JESUM .

O Domine ! novi , quia verum eſt , quòd facienti , quod eſt in ſe , Deus non denegat gratiam . Amodò faciam , quod eſt in me , paſſiones meas coarctabo ; & , ſi iræ ſtimulis , aut vindi-

vindictæ , motus fuero : eam de me sumam ,
qui meimet inimicus sum , ut tuus fiam , sim ,
perseverem amicus , & filius , Amen.

Pater , & Ave.

O Amor Crucifixæ ! miserere mei.

Statio IV.

Mater vale dixit Filio.

ψ. Adoramus te , ut suprâ.

CUli comparabo te , aut cui assimilabo te Ma-
ter , Filia Sion ? vale dicis Nato , ad ex-
tremum supplicium ducto , Deo tuo super omnia
dilecto. O dolor ! ô gemitus ! ô tormentum !
ô valedictio !

Recogita anima mea ! quales quantosque Ma-
ter Dei sacratissima immaculatissima Deoque gra-
tissima debuerit sustinere dolores , cruciatus quan-
tos , qualia tormenta. Et quis ego sum in compa-
tatione Virginis Matris ? Ego qui sum mille mor-
tes meritus , flagitiosus peccator , & vix homuncio :
ego ferre nihil volo : exemptus cupio esse ab omni
afflictione : omnia , quæcunque corpori arrident ,
sectari desidero , & mihi persuadeo , absque Cruce
me vivere posse. Prô pudor ! Mater Dei à lege
Crucis ferendæ , & sentiendæ libera , & exempta non
fuit : qua ergo arrogantia id mihi privilegij ar-
rogo ? si Mater Dei exempta non fuit à Crucis
passione : ane ego exemptionem prætendam ? si verò ejus-
mo-

modi exemptionem non prætendo : cur in ob-
via quaque adversitate oneratum me reputo , &
Crucis pondus excutere satago ? certè eò usque
insanus proprii , & carnalis commodi me ade-
git amor , ut ego mancipium plus privilegii præ-
tendam , quàm cœli Domina , & Regina. Ab-
sit hoc stultitiæ genus à me.

Domine ! qui Christianos tuos omnes vis
esse Crucis gustatores , & ideo nec pepercisti
Matri tuæ : ecce , ego mancipium , ego servus
tuus , & filius (utinam non degener) Ancillæ
tuæ , me paratum offero ad omnem Crucem , si-
ve eam per verba , aut opera , sive per amicos ,
sive inimicos ferre habeam : paratum cor meum
Deus , paratum cor meum.

Pater , & Ave.

O Amor Crucifixæ ! miserere mei.

Statio V.

Simon Cyrenæus ferre Crucem cogitur.

¶ Adoramus te , ut suprâ.

R Eluctabatur quidem ab initio Simon , & ad-
modum ægrè tulit post JESUM Crucis pon-
dus : at post modicum temporis spatium adeò
invaluit amor Crucis in corde ejusdem , ut eti-
am postmodum illustri martyriò eum stabilive-
rit.

Ità est mi Religiose ! (c) orationi , & psal-
modiæ insistere , lectioni vacare , vigilijs , je-
junijs ,

junis, cæterisque virtutum exercitiis inhærere, quousque in consuetudinem vertantur, laboriosa videntur: cum autem in consuetudinem versa sunt, & non humanis viribûs, sed Dei auxiliô impleri creduntur, non dura, nec laboriosa, sed levia atque suavia sentiuntur. Expertus hoc est Simon Cyrenæus, experti alij sexcenti: experieris & tu, si (d) (ut Eusebius monet) maximè studueris, ut illa, quæ in DEI honorem agis, cum claro agas animo, cum fidei gaudio, atque cum bonæ, & devotæ voluntatis affectu: siquidem quidquid inviti, compulsique facimus, ex eo non solum nullum habemus fructum; sed etiam maximum incurrimus detrimentum. Disce ô Religiose! unde proveniat, quòd tibi communia Religiosæ disciplinæ exercitia gravia videantur: nimirum, *quia invitus, compulsusque ea facis.*

O Domine! fateri cogor, onus Religiosæ observationis hæcenus mihi visum est perdifficile, quia invitus illud sustinui. Cogat me jam amor tui, ut propter te promptô, & alacri animô, eidem me subjiciam, & ejus sentiam suavitatem: quoniam amanti nihil est difficile.

Pater, & Ave.

O Amor Crucifixæ! miserere mei.

(c) S. Cæsarius apud Dion. Carth. ser. ult. in Dom. 6. post Nativ. (d) Apud cit.

Statio VI.

Veronica offert Christo sudarium.

✠. Adoramus te, ùt suprà.

OCuli illi, quorum intuitus Divo Petro paulò antè amaras expressit lacrymas, livore, sanguine, & sordibùs adeò concreti fuère, ut apperiri, & respicere, ac respici non possent. Hoc indignè ferens Veronica, cum velo accurrit, ac eos purificat. Mercedis locò effigiem Divini vultùs sudario impressam refert.

Parem Divini vultùs & effigiem, & intuitum meretur anima illa, quæ frequenter Dominum suum in via Crucis contemplatur, ac suæ memoriæ omnes Christi passiones, sudores, & angores, sedulò imprimit. Per hoc enim fiet, ut majorem tibi vim inferas, mortificationes sitias, passionibus domineris, cruces omnes, & universas tribulationes generosè perferas, & generosus tuimetipsum victor immarcessibilem victoriæ laureolam emeraris. Ah! quoties, & quamdiu comparendum est in atrio Principis cujusdam potentis, donec ejus alloquiò, aspectùve frui licet. Summus autem Monarcha Christus JESUS te ipsum expectat in atrio, in sacris stationibus, suò non tantùm beatificò alloquiò, sed & aspectu, ac gratiâ gratum faciente beaturus. Quid ergò moraris? quin accurre, & frequenter eum affectuosa compassione salutato.

Domi-

Domine! ostende faciem tuam, & salvi erimus. Ostende faciem vulneratam, ut mea curentur vulnera : ostende faciem livore tabidam, ut tabescat in me anima mea præ compassione : ostende faciem tuæ misericordiæ, ut cum Petro conversus exeam foras, & fleam amarè super peccatis meis, & doloribus tuis, Amen.

Pater, & Ave.

O Amor Crucifixæ ! miserere mei.

Statio VII.

Christus denuò in terram cadit.

✠. Adoramus te, ut supra.

AD portam Judiciariam, quæ ducebat ad montem Calvariæ, JESUS denuò viribûs privatur, & horribili lapsu in terram colliditur.

Quænam putas, hujus tremendi lapsûs causa extitit ? Ait non nemo, causam fuisse hanc, quòd eminùs conspexerit montem Calvariæ, simulque mente vivaciter apprehenderit in eo se extremam Divinitatis suæ passurum injuriam, ignominiam, cum latronibus, furibus, & sceleratissimis quibusvis deputationem, ingratitude denique ineffabilem ; quòd in mercedem omnium laborum, dolorum, sudorum, ærumnarum, & gravissimorum pro hominis salute exantlatorum tormentorum, in ligno infami suspendendus esset, ac inter maledicta, & blasphemias moriturus. Ecce ! hæc omnia, aliæque adhuc longè pejora pro te susti-

nuit Deus tuus : & quam illi gratitudinis vicem re-
pendisti ? Pessimam sanè ! offendisti quotidie, ces-
sasti nunquam : ad mortem condemnasti , Cru-
cem imposuisti, ad lapsum impulisti, blasphemasti,
contempsisti, occidisti. (e) *Popule stulte, &*
insipiens ! hæccine reddis Creatori tuo ?

Vah me turpissimum ingratitudinis monstrum !
gratior, ô Domine ! gratior ero tibi per frequen-
tem tuarum passionum memoriam : per ferventio-
rem vitæ emendationem : occasionum fugam, &
feriam propositorum bonorum executionem. *Di-*
xi : tunc capi.

Pater, & Ave.

O Amor Crucifixe ! miserere mei.

(e) *Deut. 32.*

Statio VIII.

Piarum planctus Mulierum.

✠. Adoramus te, ut suprâ.

IN magna cordis tristitia piæ illæ mulieres secu-
tæ sunt Dominum patientem.

Optimum sanè consilium, & in consilio reme-
dium ! quod & Divus August. secutus esse noscitur :
cùm me pulsât (ait) aliqua turpis cogitatio, recurro
ad vulnera Christi : cùm me premit caro mea, recor-
datione vulnerum Domini resurgo : cùm diabolus mi-
bi parat insidias, fugio ad viscera misericordiæ Do-
mini mei, & recedit à me : si ardor libidinis mo-

vent

veat membra mea, recordatione vulnerum Domini, Filij Dei, extinguitur. In omnibus adversitatibus non inveni tam efficax remedium, quàm vulnera Christi. (f) Desine jam quærere, unde incessanter te molestant turpes cogitationes, premat caro, frequentes tibi paret insidias dæmon, & non rarò vincat, quòd ardor libidinis moveat te, & adversitates te opprimant? nimirum non fugisti ad viscera misericordiæ, ad vulnera, ad passionem Christi. Fuge igitur dilecte Religiose! fuge, & confuge ad sacras viæ Crucis Stationes. Hic stationem facere, non est regredi, sed progredi. Hic invenitur medicina tristitiæ, calcar acediæ, &c.

Domine! dum in hujus vitæ militia variis cum hoste multiplici confictionibus velitandum est, ad te confugio Dux exercitatissime! ut tuò ductus guberniò, tuò animantus præliandi zelò, tuo confortatus sanguine, *persequar inimicos meos, & comprehendam illos, & non convertar, donec deficiant.* (g) Pater, & Ave.

O Amor Crucifixe! miserere mei.

(f) ex Manual. c. 22. (g) Psalm. 17.

Statio IX.

Tertiò Christus sub Cruce cadit.

†. Adoramus te, ut suprà.

Vulnerum incessanti accumulatione, verberum & tusionum densitate, viarum asperitate,

sanguinis effusione debilitatus Dei Filius iterato lapsu in terram dejicitur; & tamen *velut agnus coram tondente se obmutuit.* (b)

Ecce Religiose ! ita cum Christo proceditur, & ita à Christo tacetur. Tu verò quantum conquereris, vel minimum quidquam passus? similis es illi Seraphici Ordinis Novitio (i) qui à Superiore graviter pœnitentiatus coram Crucifixi imagine in has prorupit querelas : *Ecce Domine ! quanta pro te patior.* Cui Dominus dignantissimè respondit : *Ecce etiam ! quæ pro te passus sum.* Noli igitur Superiorum circa te dispositiones ægrè ferre ; sed recogita humilitatem Divini Magistri tui, qui etiam te tacitè cum dicto queruloso reprehendit : tu pro me à Superiore tuo (nè dicam à confratre tuo) ferre nil potes : & ego pro te , à temetipso talia, tantæque pertuli. *Ecce quæ ego pro te passus sum.*

Domine Deus meus ! utique ego fui hætenus multum impatiens, & rarò ad exemplum tuæ patientiæ respexi. Imposterum autem in omnibus, quæ mihi adversa accidunt, ad te me convertam, & illa sæpiùs verba auribus animæ meæ illabi sinam : *Ecce ! quæ Filius Dei pro te passus est : Ut quid igitur tu pati refugis ?*

Pater, & Ave.

O Amor Crucifixe ! miserere mei.

(b) *Isa. 53. (i) Lucas Wad. in Chron. Ord. Seraph. 10. 2. Anno 1252. n. 47.*

Statio X.

Violenta Christi nudatio.

✠. Adoramus te, ut suprà.

Priusquam Christum Cruci affigebant carnifices, summâ ei immanitate vestes diripiunt. Nimirum ad mortem, ad Crucifixionem sic se præparat Christus, ut nihil hujus mundi, nec vestes quidem retinere velit.

Status Religiosus est status mortis, in quo mundo, carni, & diabolo moriendum est : est status crucifixionis, in quo caro propria (quomodocumque ringatur, horreat, & misericordiam suadeat impiam) caro, inquam, crucifigenda est cum vitijs, & concupiscentijs suis. Ergo vestimenta abjiciat Religiosus, necesse est, vestimenta, non Religiosa, sed sæcularia, puta, ambitionem, desiderium terrenorum, vanum hominibus placendi desiderium, & quidquid ineptiarum cosmophilo adhæret. His omnibus moriatur adeò, ut omnes, qui non sunt JESU Christi, eum despiciant velut cadaver alicujus defuncti, velut hominem insipidum, scrupulosum, melancholicum &c. Hæc & similia prædicata Regnum Crucifixi prætendunt titulum. Tu verò tantum id genus titulos horres, quantum ipsam crucis mortem.

Ità est mi Domine ! tanta me tenet vesania, ut amator mundi audire malim, aut saltem esse, quàm coram te magnus heros. Sic nimirum studeo

placere Deo , ut non displiceam mundo , carni , & diabolo. O me Religiosum irreligiosum ! maledicta hæc vestimenta , ô JESU ! à me per gratiam tuam abripe , ut ad Crucis mortificationem dispositior evadam , Amen.

Pater , & Ave.

O Amor Crucifixæ ! miserere mei.

Statio XI.

Crucifixio Christi.

✠. Adoramus te , ut suprâ.

Summâ vî in Crucem injectus Salvator , manus , pedesque porrigit tremendis malleorum ictibus conquassandos , & grossissimis clavâ perforandos.

Audi , ô anima Religiosa ! terrificos illos malleorum ictus , & horridam clavorum resonantiam. Audi ! obstupefce ! & erubescce , quòd delicatulus adeò sis , ut vel leve Religiosarum exactionum jugum fastidias. Ah ! quæso te , confortare , & esto robustus , tibi que illud usurpa , quod ^(k) Christus ipse , Joanni de Icontris , ab aratro Religioso , suscepti Ordinis Augustiniani manum retrahere cogitanti , aperto latere visibiliter apparens , dixisse perhibetur : *Fili ! ubi cibis tibi minus sapidus , lectus durior , nocturnæ vigiliæ , meis concinendis laudibus constitutæ molestiores fuerint , ingredere vulnus hoc , & intinge illa in Divino Sanguinis mei condimento ; & cælesti tibi suavitate*
dul-

dulcescent. Ah Religiose ! si quid Religiosæ austeritatis tibi non sapit : ingredi fixuram clavorum Salvatoristui, & in Sanguine illius idiptum intinge : & cœlesti tibi suavitate dulcescet , excutietur tepor , excitabitur ardor.

Christe JESU ! rogo te demississimè , ut Divinò sanguinis tui condimentò pariter aspergas religiosas meas observantias , quæ carni meæ refractariæ videntur valde amaricatæ , adeò , ut Præsumat aggravare animam , eamque ad similem teporem inducere. Voveo , & promitto tibi Deus meus ! novo spiritu observare Regulam &c.

Pater , & Ave.

O Amor Crucifixæ ! miserere mei.

(k) *P. Kybler in speculo mirac. part. 2. f. 88 f.*

Statio XII.

Mors Christi in Cruce.

¶. Adoramus te , ut suprà.

Christus JESUS tanquam novissimus virorum , cum latronibus deputatus est , & in medio eorum suspensus , exhalavit animam.

In medio duorum latronum pendet , quorum unus blasphemis eum impetebat , alter verò deprecabatur. Latro ille sinister , & reprobus est corpus meum : latro autem dexter , & probus est anima mea. Vah ! quoties blasphemavit Deum latro sinister , corpus meum ? si deinceps in simi-

les blasphemias gessit erumpere, volens abire post concupiscentias suas, fastidiens omnes mortificationes, & nolens aliquid sustinere, pative, omnemque Crucem respuens, coarctetur, & à latrone dextro, id est, ab anima Religiosa reprehendatur: *Nos quidem digna factis recipimus: Hic verò nihil mali gessit.* (1) Ego minora meritis tormenta sustineo, & conqueror. JESUS innocentissimus majora latronibus tormenta patitur, & silet. O Religiose! si in adversitatibus, aut humiliacionibus scđum conqueritur corpus, reprehende illud, dicens: *Nos digna factis recipimus.*

Utique ô Redemptor mi! digna factis recipimus, dum nos adversitatibus, sinistra valetudine, hominumve odio affici permittis; & tamen latro ille pessimus, rebelle corpus nostrum, te, omnis boni Largitorem, suâ impatientiâ, tristitiâ, & querimoniâ blasphemare præsumit. Da, ô Domine! vires, ut anima mea carnificis functura munere, sacrilegum hunc latronem in crucem agat, ut in ea moriatur, & spiritus salvus sit, atque cum latrone poenitente quondam ex Divino ore tuo audire mercatur: *Hodie mecum eris in Paradiso.* (m)

Pater, & Ave.

O Amor Crucifixe! miserere mei

(1) Luc. 13. 41. (m) Luc. 23. v. 43.

Statio XIII.

Depositiſio Chriſti de Cruce.

✠. Adoramus te, ut ſuprà.

COrpus Redemptoris mortuum de Cruce deponitur, & ad ſinum Virginis Matris deponitur, ut requieſcat à laboribus ſuis.

Conſummatis omnibùs, & ipſe JESUS conſummatus eſt, ac poſt tringinta trium annorum ærumnas, Cruces, tribulationes, labores, & ſudores ſemel introivit in ſancta; quia ſic oportuit pati Chriſtum, & ita intrare in gloriam ſuam. Et ego quid patior? aut ſi patior, an tamdiu patior? vel ſi tamdiu: an tanta patior? Ah patere Religioſe, patere! paſſiones tuæ æternum gloriæ pondus operabuntur in cœlis, & brevi omnis conſummationis videbis ſinem. Rex Saul ultra bis mille annos infernum patitur: & quamdiu infelix Cain? patiuntur hi abſque conſummatione, ſinè ſpe præmij: tu verò poſt pauculos annos educeris in refrigerium. Operæ igitur pretium erit, ut pro unius diei labore mille annorum quietem, pro unius horæ confuſione, aut paſſione æternum duraturam compares gloriam.

O MARIA! quæ conſtantî animò paſſiones, & mortem Filij tui in Materno corde tuo pertuliſti, & ob hanc cauſam ejusdem ſempiternam hæreditâſti gloriam: impetra mihi gratiam, ut conſimili fortitudine adverſa omnia feram, & patiar.

ut consummato vitæ cursu immarcescibile consequar bravium sempiternæ hæreditatis, Amen.

Pater, & Ave.

O Amor Crucifixæ ! miserere mei

Statio XIV.

Sepultura Christi.

✠. Adoramus te, ut supra.

Aliorum defunctorum more ad sepulchrum deferitur Corpus Domini pro nobis mortui. Putasne in hoc Sepulchro ejus quoque memoria recondetur, & abscondetur ? Minimè gentium.

Claudi potuit corpus JESU lapide sepulchrali : non autem ejus Resurrectio, gloria, & reviviscencia impediri. Eheu ! si ego mortuus fuero, & tumulatus, ubi erit gloria mea ? ubi celebritas nominis ? ubi memoria ? Nullibi sanè. An fors in ore hominum ? sed quid prodest, si anima peccatrix sit in ore Dæmonum ? Fortassis in scriptis, & libris ? sed timendum, nè, quot characteribùs constant, tot contra me clament linguïs, quòd in ipsis tantùm meam quæsiverim gloriam : quòd multùm laboraverim pro vanitate, pauca pro æternitate : multùm pro inferno, pauca pro Deo. Eliminandæ igitur hujuscemodi sinistra intentiones, & substituendæ sanctiores, nè quondam audire cogar : *recepisti mercedem in vita tua.* (n)

Absit hoc à me, quàm longissimè ! tanti pœnitere

tere non emo ! aliud exspecto [operibus meis futurum] proœmium, nobiliorem laboribus meis mercedem. Æternitati laboro. Tu, ô Domine ! concede propitius, ut omnis vana, inordinatæ affectio nullam in corde meo inveniat diverforium, nec oculus intentionis sinistrae totum obscuret corpus meum, Amen.

Pater, & Ave.

O Amor Crucifixe ! miserere mei.

(n) *Matth. 6.*

Statio XV.

Helena cum sancta Cruce.

ÿ. Adoramus te, ut supra.

Sancta Crux est arbor illa, quæ magnam habet antipathiam cum serpente illo maledicto, qui in ligno Matrem nostram circumvenit.

Appositè hic recordaberis sancti cujusdam figmenti. (o) Amor Divinus obviabat quondam amoris profano mœrens, & lugens. Causam roganti profano amoris reposuit : dolore conficior, quòd ego, Divinus cum sim, omnî humanò excludar diverforiò : tu econtrà, impius cum sis, & vanus, in omnium cordibus dominatum exerceas. His dictis sanctâ excandescens vindictâ, profanum illum amorem ad lignum crucis vinculabat : qui cruce vix tacta emortuus est. O Religiose !
fac


fac, ut hæc fabula in te historia fiat, non enim in eo potest ulterius vivere amor mundi, cui mundus crucifixus est.

O Domine! tua mihi commoda vincula & funes, ut ego comprehendam improbum mundi, carnis, & mei ipsius amorem, illumque irresolubili nexu sanctæ tuæ Cruci alligabo, ut tuus sanctus amor supremum in corde meo exerceat dominatum, Amen.

Pater, & Ave.

O Amor Crucifixe! miserere mei.

(o) *P. Spec in aureo virtutum lib. 3.c. 18.n. 9.*



PRAXIS VI.

Statio I.

Injusta Pilati in Christum sententia.

1. Adoramus te sanctissime Domine JESU Christe, & benedicimus tibi!
2. Quia per sanctam Crucem tuam redemisti mundum.

Non sufficiebat brutali Judæorum barbariei JESUM flagellis concisum aspicere; etiam Crucifixum videre desiderant. Ideo Pilatum urgent, ut reum mortis proclamet; quod & ab eodem tandem impetrarunt.

Si Pilatus Christum, licet innocentem, flagellasset tantum, utique minus ei indignareris, diceres-

cerésque forsitan, eum non nihil misericordem fuisse erga JESUM. Dum verò illum ad mortem omninò condemnavit, iniquissimus fuit, & omnium iracundiâ dignus. Misericors profectò judex est, qui hominem capitis damnandum alio non emendaret supplicio, quàm jejuniò mensili in pane, & aqua, aut dietim aliquot horarum precationibûs. Talis Judex Deus est. Ego peccator mortem merui sempiternam; & ad evadendum hoc supplicium aliud me non jubet facere misericors Deus, quàm Chorum diligenter, & ferventer frequentare, castitatem, & paupertatem servare, ac superiori humiliter obedire, modicam infirmitatem, aut contemptum patienter sufferre. Ut quid igitur hæc agere, aut pati detrecto?

O misericordissime Deus! qui non tantum meritissimam mortis sententiam in levissimam satisfactionem commutasti, sed & Filium tuum Unigenitum pro me mori voluisti: prostratissimo affectu te deprecor, da gratiam tuam sanctam, ut omnia Religiosi hominis munia quàm solertissimè exequar, & dignam pro peccatis meis agam poenitentiam, Amen.

Pater, & Ave.

O Amor Crucifixæ! miserere mei.

Statio II.

Christo Crux imponitur.

✠. Adoramus te, ut suprà.

CHristus JESUS Crucis pressuram, Crucis confusionem, dedecus, & dolores cum Cruce gaudenter suscipit, imò amplexatur, & ardentissimè exosculatur, infinities majori affectu, quàm postea S. Andreas Apostolus, exclamans : *(a) Salve Crux pretiosa, diu desiderata, & tandem cupienti animo præparata.*

O Domine ! quare Crucem tam cordialiter suasias ? quare eam tam ferventer exoptasti, & strinxisti inventam ? Omnes SS. Doctores dant pro te rationem ; quia sciebas, æterno patri ita placere ; quia me ambas ; quia in ea salutem meam eras operaturus ; & quia per eam me ab æterna damnatione liberare, salvare, & glorificare cogitabas. O Religiose ! si te premit magna aliqua crux, perturbatùmque, ac desolatum reddit, animò pcatò ad eam perferendam consimilibùs motivis temetipsum exstimula ; credisne æterno Patri placere, ut hanc crucem portes, qui in tua sibi complacet lucta, & patientia ? Si credis : ergo cum Christo eam libens lubens suscipe. Anne Deum amas pro te passum ? si amas : ergò re vera summa decencia est, ut, quemadmodum ipse amore tui Crucem portavit gravissimam, tu amore ejus portes multò leviozem. Ille alienam, tu propriam in cruce operare salutem, & gloriam sempiternam.

Ità

Ita ô Domine ! me ad patiendum excita , rationibûs illis sanctissimis , ut , sicut te reddiderunt perfectissimum amoris , & patientiæ prototypon ; ita me faciant tua vestigia premere , ut te hic sequar patientem , & ibi consequar gloriosum , Amen.

Pater , & Ave.

O Amor Crucifixæ ! miserere mei.

(a) *in ejus Officio.*

Statio III.

Christus primò infirmatur , & cadit.

ψ. Adoramus te , ut suprâ.

DElíquium virium patitur amantissimus Salvator ; quia undique hostilitates , & persecutiones mortíferas sustinebat , ut verè conqueri posset apud Prophetam Regium : (b) *Tota die constituebant adversum me prælia : ego autem orabam.*

O Domine ! quis , obsecro , constituit tota die adversum te prælia ? peccator , ais , præsertim Religiosus tepidus , qui sacrilegè perversis passionibus suis consœderatus , adversus JESUM constituit prælia. Cur autem , ô bone JESU ! orabas , & non expugnabas impugnantes te ? Intelligo : quia orabas pro delictis , & peccatis meis , quibus in terram prostratus es. Orabas flexo poplite , & presso in terram vultu exorabas Divinam clementiam , ut iram indignationis suæ averteret à me. Orabas denique , ut miserear tui , parcens animæ

animæ meæ. O Religioſe ! poterisne aliquid denegare Creatori tuo, tam humiliter ſupplicanti ? quid putas, orat, petitque à te ? aliud nihil, quàm ut Superiori te ſubdas, æquali te inclines, inferiori, aut te lædenti parcas, ac novo fervore Deo tuo infervias. Exaudi ergo tam dignas preces humilis Dei.

O Pater æternæ ! per reverentiam Filij tui, Salvatoris mei, te obteſtor, converte me, & à viâ peccatorum peſſima declinamem tuo Divino obſequio redde incorporatum, ut in militia vitæ præſentis ſolùm ſequar JESUM Chriſtum, quem mihi dedisti Ducem ſimul, & Magiſtrum, exemplar, & præmium, Amen.

Pater, & Ave.

O Amor Crucifixæ ! miſerere mei.

(b) *Psalmò 139. & 108.*

Statio IV.

Triflis Matris Doloroſæ occuſus.

†. Adoramus te, ut ſuprà.

NEque id ſolatij conceſſere milites efferi, ut Mater Doloroſiſſima Filio afflictiſſimo extremum dicat vale ; ſed crudeli Eam repellebant manu.

Perpende, ô Religioſe ! quòd Jeſus & Maria violentè ſejungi debent, aliàs ſeparandi nunquam. Ah ! quantus fuerit Eorum dolor ? inexplicabilis. Eheu !
quan-

quantô igitur torquebantur dolore, dum nullus miles tibi JESUM ademit, ejusve consortium; sed tu per summam ingratitude eundem vi ex corde tuo expulisti per peccata lethifera? Ad hæc non recessit Mater Dei, sed continuò sequebatur, pre-mens vestigia JESU, quàm proximè licuit: & hoc ideo, quia amabat. Tu verò cum Petro sequeris à longè, languidè, & tepidè. Et, ah, utinam non omnino defecisses! Quid facies igitur deinceps? Deum sequeris proximè, ut videas, quid patiat. Quomodo autem videre potes, si viam Crucis nunquam obeas, de passione Domini rarò mediteris? Qui amans est, amatum frequenter solet invisere, & ejus recordatione delectari. Hoc quia tu non facis, apparet, quòd non sis amans. Fac, fias; & quæ amantis propria sunt, nunquam non exequere.

O Domine! cum Divinæ gratiæ tuæ auxilio ostendam deinceps, quòd verè amem te. Quapropter jugiter memoriâ memorero tui, tuæque amarissimæ passionis: frequenter ad te invisam in via Crucis, ut in hac schola perfectionis videam, quid desit mihi de vero erga te amore: & quæ ratione tibi, amoris meo, magis placere, & perfectius deservire, & fortiùs uniri valeam, Amen.

Pater, & Ave.

O Amor Crucifixæ! miserere mei.

Statio V.

Christus admittit Crucis socium.

✠. Adoramus te, ut suprà.

NE JESUS moriatur non crucifixus, cogunt Simonem, ut Crucem ipse ferret. Hic verò nolebat, cogitans apud se : ego sum homo innocens : ut quid ergò Crucem suscipiam &c.

Ego crucem suscipere nolo, etiamsi non sim innocens, sed nocentissimus, & multorum flagitiorum reus, & tamen pati recuso, pœnam averfor, & pro meis peccatis nihil egi hactenus, quod rigori Divinæ justitiæ fecisset satis. Quid jam mirum, si Deus mortificationes (undecunque demum adveniant) mihi immittit, ut, quod per voluntarias mortificationes facere recusavi, invitus patiar ? Et in hoc quoque relucet Divina miseratio ; quia tribulationes, ac mortificationes à Deo immissæ, (utpote nil propriæ voluntatis habentes) si devotè, & patienter sufferantur, ascendunt coram Deo, sicut virgula fumi ex myrrha, & aromatibus, de quibus Propheta : (c) *Si voluisses sacrificium, dedissem utique cor contritum, & humiliatum.* O Religiose ! da hoc sacrificium Deo. Clama, nè cesses : ampliùs Domine, ampliùs ! Hic ure, hic seca, ut in æternum parcas.

Domine ! qui dixisti : *jugum meum suave est, & onus meum leve !* fac, ut portare istud sic valeam, quòd consequar tuam gratiam. (d) Novi, quòd impunita abire non queant mea, quæ feci, sce-

lera

lera; satiùs tamen est, ut in vita mea eadem de-
leam. Da mihi igitur tantùm audaciæ, ut, si tu
ea in hac vita plectere nolis per adversitates, ego
sponte sim eorum vindex: si verò tu velis; ut e-
go libenter sustineam, & gaudenter, Amen.

Pater, & Ave.

O Amor Crucifixe! miserere mei.

(c) Psalm. 50. (d) Sacerdos ad casulam.

Statio VI.

Veronica obsequium.

✠. Adoramus te, ut suprâ.

IN tantum fuit indignissimò prorsus modò de-
turpata, & dehonestata facies Christi, ut ve-
rissimè conquereretur per os David: (e) *Consi-
derabam ad dexteram, & videbam, & non erat, quì
cognosceret me.* Cognovit tamen B. Veronica, &
ideo sudariò sordes ejus absterxit.

Nota loquendi modum. Non dixit: *considera-
bam ad sinistram*, ubi impius latro, ubi Ethnici,
& Hæretici, ubi inimici crucis Christi; sed: *con-
siderabam ad dexteram*, ubi fideles Christiani. Et
etiam inter illos *non erat, qui cognosceret me.* Eru-
buere meam Crucem, & patibulo magis horruê-
re crucis viam: (f) *Omnes declinaverunt, simul
inutiles facti sunt.* Sed ignosce mihi, Salvator dul-
cissime! patrocinium eorum suscepturo. Irrisio-
nes aliorum timent, & dictèria; ideo verecun-

dantur in faciem tuam, in via Crucis, respicere. Siccine (reponit Christus) verecundatur me in via Crucis sequi, & contemplari, qui eorum causa non tantum per viam hanc poenositissimam ingressus sum, sed & tribus horis medius inter duos latrones nudus pependi. Audisti Religiose amarum tuam excusationis refutationem. Cave, ne tuam in recolenda Passione sua socordiam his increpet verbis: (g) *Vade post me satbana; scandalum es mihi; quia non sapis ea, quae Dei sunt, sed ea, quae sunt hominum.*

Christe JESU! qui non erubuisti meae salutis causa, cum infinitae tuae Majestatis verecundia, viam Crucis obire, & mori: concede propitius, ut damnabili rubore spreto in visitatione hujus viae sis frequens, & sedulus, ne quondam iusto tuo iudicio damnatus audire cogar: (b) *Qui me erubuerit, hunc Filius hominis erubescet, cum venerit in Majestate sua.*

Pater, & Ave.

O Amor Crucifixae! miserere mei.

(e) Psalm. 141. (f) Psalm. 13. (g) Matth. 16. (b) Luc. 9.

Statio VII.

JESUS iterum sub Cruce prosternitur.

✠. Adoramus te, ut supra.

ITeratis vicibus Salvator noster, gravissimè in terram corruit. Si quæras repetitorum cau-

causam lapsum, eam excipe ex S. Evang. (i)
*Simile est regnum cælorum homini negotiatori, quæ-
 renti bonas margaritas &c.*

O Religiose ! ideo in terram cadit Christus, ut
 animam tuam, tanquam pretiosam margaritam,
 optimus ille Negotiator quærat. (k) Propter
 hanc margaritam vendidit omnia, quæ habuit.
 Vendidit honorem, & famam : vendidit Majesta-
 tem Regiam : vendidit vitam, & sanguinem, ut
 ad eò jure exclamet Apostolus ; (l) *Empti estis
 pretiò magnò.* Et cum Apostolo Eucherius : (m)
*Quàm pretiosus sis, si Factori non credis, interroga
 Redemptorem.* Vade, interroga Redemptorem :
 cur tam horrenda pro te sustineat ? interroga :
 cur per tot ignominias, dolores, & vulnera, ad
 montem Calvariæ properet ? interroga deni-
 que : quare in via Crucis sæpius, exanimi similis
 in terram coruat ? & respondebit, hæc ideo fie-
 ri : *Quia venit Filius hominis quærere, & saluum
 facere, quod perierat.* (n) Hæc credis ; & pro sa-
 lute animæ tuæ tam parùm sollicitus es, nihilque
 operaris, quod verum indicet animæ, & æter-
 næ salutis tuæ zelum ?

O JESU Christe ! qui, quæsturus animam
 meam, non in terram tantum, sed in profun-
 dum amarissimæ Passionis mare, projici voluisti :
 excita in corde meo ardentem salutis animæ meæ
 procurandæ fervorem, & exactam hujus pretio-
 sissimæ margaritæ custodiam : ut in thesauro glo-
 riæ tuæ, pretiò sanguinis tui comparata, collo-
 cari mereatur, Amen.

Pater, & Ave.

O Amor Crucifixe ! miserere mei.

(i) *Matth. 13.* (k) *Haymo apud P. Fritsch in manud. ad viam Crucis* (l) *1. Cor. 6.* (m) *apud præcit. exhort. 6. ff. 1.* (n) *Luc. 19.*

Statio VIII.

Pius Mulierum planctus.

¶ Adoramus te, ut suprà.

SEquebantur Christum piæ quædam Mulieres, compassivis lacrymis ejus vestigia (ringentibus licet Judæis) recolentes.

En ! non ridebant, non jocabantur hæ mulieres ; sed plangebant, & dolorosè illacrymabantur. Hinc *Filiarum* nomine eas compellavit Salvator, & consolatoriè eis loquebatur. Sic nimirum plangentes solatur DEUS, ut propriâ novit experientâ, qui dixit : (o) *Secundum multitudinem dolorum meorum in corde meo, consolationes tue lætificaverunt animam meam.* Ego autem omnem penitus ex corde meo elimino dolorem, sanctamque, ac salutare tristitiam : & consolationes meas quæro in cibo, & potu, in confabulationibus, recreationibus, & inutilibus occupationibus. Quid ergo mirum, si pectus meum durissimum æqualem cum montibus Gelboe maledictionem sustineat, & nec pluvia, nec ros Divinæ consolationis, super illud veniat ? parcior ita-

itaque posthac ero in sectandis vanitatibus , & insanijs falsis , partemque temporis , malè hactenus impensi , meis deinceps defendis peccatis , & negligentijs , Passionique Dominicæ deplorandæ impendam.

O igitur ! quis dabit capiti meo aquas , & oculis meis fontem lacrymarum , ut diebûs ac noctibûs non cessem tuam , ô Deus ! Passionem amarissimam , & meam deffere iniquitatem ? O JESU misericordissime ! per sanguinea tua te obtestor vulnera , & vestigia , perque compassivas piarum mulierum (quas inter haud dubiè Mater tua dolorosissima fuerit prima) lacrymas concede mihi donum lacrymarum , & luctûs amorosi , ut post luctuosam hujus vitæ miseriam consolationes tuæ lætificent animam meam , Amen.

Pater , & Ave.

O Amor Crucifixe ! miserere mei.

(o) *Psalm. 93.*

Statio IX.

Christus tertia vice cum Cruce cadit.

✠. Adoramus te , ut supra.

Vulneribûs , lutô , sputis , & sanguine adeò obvolvebantur oculi JESU , ut vix aliquid videre posset. Unde ad saxum in via positum offendens , gravissimè in terram collapsus est.

O afflictissime JESU ! quomodo tu poteris cum

H 4

gravif-

gravissima Cruce Calvariæ montem ascendere, si vel saxò offensus corruis ? Sed amanti, ais, nihil est impossibile. Hoc autem est mirabile prorsus, & incredibile, quòd in vertice montis collocatus, in tuto positus, parvò interveniente lapillò, retrorsum decidat, qui securè in altum eluctatus est. O Divine Magister ! lucem affunde, & profundum hujus parabolæ declara. Religiosus, inquis, est, qui fortiter abdicatís sæculi voluptatibùs, variisque deliciarum saporibùs, fortis fuit adeò, & pernix, ut dulces affectus, jucundissimos piorum vultus parentum fugeret, quasi odisset : qui bellum pietati ingentis quodam modo indixit, & in abdicanda sæculi voluptate, tam magna promisit, ut verticem perfectionis, quasi præcoci volatu conscenderit. Ast in hoc ipso montis perfecti vertice ad lapillum offendens retro cecidit. Tales lapilli sunt (*p*) passionēs venenatæ, superbiæ, iræ, impatientiæ, & quidquid ad expugnandas negligentias, ad declinanda levissima vitia, nos debiles efficit. Superavimus montem, ingentia Religionis vota nuncupandò : offendimus ad lapillum, ausi obrectare, propter vilia commoveri, irasci in fratrem, scandalizare, & scandalizari.

O JESU ! ego tua inspirante gratia magna promisi, & in minoribus eò usque non consisto, ut iisdem non deiciar. Ah ! rogo te affectu verè humili, ut, qui dedisti mundum, carnem, & diabolum spernere, des & levia superare, tantum-

túmque concede luminis, & roboris, ut, qui magna amore tui sprevi, etiam leviora vincam, Amen.

Pater, & Ave.

O Amor Crucifixe ! miserere mei.

(p) *Dion. Carthus ser. 5. in Dom. 6. post Nativ.*
ad f.

Statio X.

Christus spoliatur vestibús.

†. Adoramus te, ùt suprà.

VErè Christus, in detractiōe violenta vestium, suarum, sicut ovis coram tondente obmutuit. Omnia avelli sibi passus est, ut ostendat patienter, se non esse de hoc mundo, sed ex mundo absque ulla rei mundanæ usurpatione velle dedecere.

Securè nimirum moritur, qui nec in affectu, nec in effectu habet quidpiam de hoc mundo, ejusque vanitate. Anima Religiosa ! si hodie moriendum tibi esset, putasne, quòd mundani affectus nihil tibi adhæreat, ut securè, & intrepidè morereris ? anne verus es omnis carnalis commoditatis osor ? an omnium honorum, omnisque humanæ existimationis contemptor ? an ad prælium cum toto inferno ineundum paratus ? si paratus es : anne omnia vestimenta abjecisti ? vestimenta, inquam, non illa corporis, sed mentis & affectuum ? de quibus loquitur S. Greg. (q)

H 5

Qui-

Quicumque ad agonem venimus, luctamen contra malignos spiritus sumimus. Nihil autem maligni spiritus in hoc mundo proprium possident: nudi ergo cum nudis luctari debemus. Nam si vestitus quisque cum nudo luctatur, citius ad terram dejicitur, quia habet, unde teneatur. Abjice igitur gulam, invidiam, amorem proprium, laudis humanæ appetitum, nè succumbas, & in terram illam dejiciaris, ubi umbra mortis, & nullus ordo, sed sempiternus horror inhabitat. (r)

O JESU ! per pœnositissimam illam, & confusibilem vestium tuarum detractionem, exoro te, aufer ex corde meo omnia perversorum affectuum vestimenta, ut in extrema mortis lucta post victoriosum agonem, tanquam bellator fortis, compaream coram tribunali tuo amictus lumine, sicut, vestimentò, Amen.

Pater, & Ave.

O Amor Crucifixæ ! miserere mei.

(q) Homil. 32. in Evang. (r) Job. 10.

Statio XI.

JESUS in Crucem agitur.

†. Adoramus te, ut suprà.

CHristus JESUS Filius DEI vivi, ubi ad locum crucifixionis perventum est, licet sponte sese in Crucem inclinaverit, rabiose tamen à Judæis in eam dejicitur, & crudelissimè in eadem extenditur.

Per-

Perpende, ô Religioſe ! patientiam JESU Magiſtri tui. Ipſe non ſciſcitabatur, cùm tam malè ſe tractarent, & omni crudelitatis genere debaccharentur : Tu verò indignabundus quæris, cur alius tibi præponatur ? cur tu alijs poſtponaris ? cur omnia vilia ſoli tibi demandentur ? cur cum alijs mitiùs, tecum duriùs (ut tibi perſuaſum viſ) agatur ? Tu, inquam, qui talia aut cogitas, aut loqueris, audi pariter JESUM te interrogantem : quare tu propter tua enormia, & ingentia, ac numeroſiſſima ſcelera, non es damnatus, & æternùm reprobatus ? Nimirum, quia ego propter te condemnatus ſum, omnibus poſtpoſitus, noviffimus virorum reputatus, & in diram Crucem actus. Hæc ego pro te : quid tu pro me ? quid pro temetipſo ? vilia, & vilipenſionem nè ſperne in terra, qui vilificari meruiſti in inferno. Inclina te ſponte in Crucem, & poſt modicum reſpirabis, & per memetiſum liberaberis.

O Domine ! ego vilis homuncio inclinare me vix poſſum ad Crucem ; adeò illius aſperitatem, & vilitatem horreo. Tota caro contremiſcit, dum de Cruce cogito, aut quidquam lego, vel audio. Hinc rogo te, parce mihi, & loco mei amorem proprium in Crucem age, ut, qui me ſolus à Crucis amore abſterret, ſuæ nequitia pœnam luat, & hòc crucifixò, Crucem ego diſcam amare, & memet ipſum diſſe, Amen.

Pater, & Ave.

O Amor Crucifixæ ! miſerere mei.

Statio

Statio XII.

JESUS in Cruce moritur.

†. Adoramus te, ut suprà.

IN Cruce moritur vita æterna : moritur innocens Deus ; moritur inter latrones : moritur inter blasphemias : moritur dolores inter maximos, innumeros, infinitos, inexplicabiles, & pro me moritur. Heu !

Hæc credo, hæc audio, hæc video : & quis mihi sensus ? quæ mens ? Profectò haud absimilis sensui, & menti illius, de quo scribitur, (S) quòd Seraphicam Religionem ingressus, & brevi austeritatis Monasticæ pertæsus, ad ollas carniū mundanarum regredi statuerit. Dum imprudens exequitur consilium, de repentè oculorum usu privatur, & à proposito nec quidquam desistens, felici errore in Ecclesiam delatus est, ibique Dominum, in imagine Crucifixum, interrogantem audivit : cur turpem fugam arripere attentasset ? cui juvenis, austeritatem vitæ, & Religiosæ disciplinæ rigorem se ferre non posse, reposuit. Salvator econtra : *Aspice ô delicatule ! manus, pedesque meos perforatos : vide latus pro te apertum, & collige sanguinem exinde profluentem : inunge collyriò hoc oculos tuos, & videbis, quàm exigua sint, quæ pateris, si cum cruciatibus meis conferantur.* Tu pariter, ô Religiose delicatule ! si te incedit vitæ Religiosæ tædium, disciplinæ Monasticæ horror, obedientiæ nausea, austeritatum timor

timor : aspice Salvatorem tuum, pro te Crucifixum, & sanguine diffluentem. Collige illum, ac hęc collyriõ oculos tuos inunge : & videbis quid desit tibi : miraberis, & dilatabitur cor tuum.

Domine JESU Christe, veræ Religiositatis & exemplar, & præmium ! tu nõsti, quòd sæpenu-
merò me incesse-rit Religiosæ observantiæ tædium,
& nausea, eò usque, ut etiam oculorum mentalium aciem perdiderim, ac dereliquerit me virtus mea, & lumen oculorum meorum. Ah ! rogo te : purifica oculos meos sacrosancto tuo sanguine, & illumina lumine gratiæ tuæ, nè unquam obdormiam in morte tepiditatis ; sed, quæ agenda sunt, videam, & ad agenda, quæ viderim, convalescam, Amen.

Pater, & Ave.

O Amor Crucifixæ ! miserere mei.

(f) Lucas Wad. in Chro. Ord. Seraph. tom. 2.
annò Xri. 1253. n. 44.

Statio XIII.

Corpus Christi de Cruce deponitur.

†. Adoramus te, ut suprà.

Reclinari voluit Salvator in sinu Matris, ut vel illa ex hoc pignore ingentium suorum dolorum lenimentum, vel compassionis augmentum acciperet.

Et

Et re vera, non tantum erga suum Divinum, sed & erga nos miseros Adæ filios, compassionis affectum hæreditavit pijsima Mater. (t) Expertus hoc est ille Novitius, qui duro, mucido, & emendicato pane ægrius victitans, querimoniarum causâ ejusmodi panem Matris dolorosæ imagini exhibuit, pro annonæ melioratione rogans. Misericordiarum Mater piè inclinata panem à novitio acceptavit, & in apertum Filij sui, in sinu virgineo reclinati, latus immisit, extractumque querulo novitio porrexit gustandum, qui mox, ut gustavit, coelestibus se deliciis immersum sensit. O Religiose ! cibos minus saposos, misere præparatos, vinumque aut nullum, aut acetosum, laborosque Monasticos, & obedientiarum onera, si nauseas, accede fiducialiter ad Matrem Dolorosam, præsentâ eidem cuncta, quæ tibi videntur amara, rogâque, ut cruento Filij sui lateri immerfa dulcoret : gusta dein, & experiere, quantum condimentum sacrosanctus ille cruor aspergat, & quàm benigna sit Matris dolorosissimæ misericordia. Hauries certè aquas consolationis, fervoris, & Religiositatis omnigenæ, de fontibus Salvatoris per manus Matris dulcissimæ.

O Mater Misericordiæ ! en ! offero tibi meas vigiliâs, orationes, Psalmodias, castigationes, opera obedientialia, & denique omnia, quæ mihi contraria videntur. Tu ea immitte lateri amantissimi Filij tui, ut sanguine ejus purpurata, & condita, appetitum provocent, & me ad cujusque
adver-

adversitatis humilem sufferentiam, docilem red-
dant, & expeditum, Amen.

Pater, & Ave.

O Amor Crucifixe ! miserere mei.

(i) Kybler in *specul. Miracul.* p. 2. f. 885.

Statio XIV.

Christus sepelitur.

✠. Adoramus te , ut suprà.

B *Eati Mortui, qui in Domino moriuntur. Qua-
re? Opera enim illorum sequuntur illos.* (u) Se-
quuntur jam opera Christum, ipsùmque beatum
probant, & eius sepulturam gloriosam efficiunt.

Religiose! quæ te sequuntur post mortem ope-
ra? fors acquisita scientia, vî cujus multa subti-
liter de Deo, & de virtutibus disputasti? fors
discursuum tuorum, concionum, doctrinarumve
copia, ex qua multa de gradibus perfectionis, &
de modis proficiendi solide, affectuosè, & effica-
citer locutus es? At verò, an etiam in praxin re-
degisti ea, quæ speculative nôsti? an ferventer
perfectioni inhiasti? an fecisti, quæ facienda opti-
mè cognovisti. Si ita: beatus eris, & opera
tua te sequentur. Sin minùs: quam aliam merce-
dem posthac à Deo recipies, quàm speculativam
beatitudinem à Deo tibi speculative dandum. O-
portet igitur, ut tu, qui speculative scis, opus es-
se homini humilitate: & propter humilitatem hu-
milia-

miliatione , practicè id etiam scias , & re ipsa facias. Si speculativè scis , hominem Religiosum debere esse virtuosum , modestum , à terrenis avulsum , & perfectionis cupidum , mortificatum , ac mundo , carni , dæmoni , omnibûsque corporis commodis mortuum , id ipsum scias practicè. Sicut enim mors Christi & Passio speculativa , tibi nil profuisset , nec Christo gloriam summam peperisset ; ita nec tibi vita speculativè Religiosa proderit quidquam.

O JESU ! verè ego non fui hætenus Religiosus practicus , sed speculativus præcisè , & verbotenus. Nam ubi debebam laborare , ego otiosus fui : ubi vigilandum fuit , dormivi : ubi mundo moriendum , ego mundum quæsi , sectatus honores , vanam gloriam , carnis delicias , & corporis voluptates ; cum tamen optimè nôrim , hæc à Religioso debere longiùs abesse , quàm cælum à terra. Firmissimè jam propono , activiùs me habere in virtutum operatione , & Religiositatis studiò , ut in te , ô JESU ! mori , & tecum æternaliter vivere merear , Amen.

Pater , & Ave.

O Amor Crucifixe ! miserere mei.

(u) *Apocal.*

Statio XV.

Christi Crux inventa.

✠. Adoramus te , ut suprà.

CRux Christi est virga , seu baculus ille Davidicus ,

dicus, quô superbus Goliath prosternitur, & canis infernalis fugatur.


Ergo cui Deus Crucem immisit, arma subministravit, ad fugandos dæmones efficacissima. Novit hoc, qui dixit: *Virga tua, & baculus tuus ipsa me consolata sunt.* (w) Inde etiam disces, ô Religiose! cur Dominus tribulationes tibi mittat, & Cruces? ideo: *Quia non relinquet Dominus virgam peccatorum super sortem justorum, ut non extendant justi ad iniquitatem manus suas.* (x) O! quoties tu extendisses manum ad iniquitatem, si tibi non reliquisset Dominus Crucem, seu virgam peccatorum, quâ non tantum peccata, sed & peccati authorem diabolum, ejusque machinamenta declinâsses? non igitur Crux fugienda pro supplicio; sed tenenda pro præmio.

Salve sis millies ô virga peccatorum, & baculus dæmonum, Crux Salvatoris! salve! tu indesinenter te mihi insinua. Hoc solum virtutis tue in me ostende, ut à peccato mortali liber, per te ad æternas veniam consolationes, Amen.

Pater, & Ave.
O Amor Crucifixæ! miserere mei.

(w) *Psal.* 22. (x) *Psal.* 124.





PRAXIS VII.

Statio I.

Christus damnatur ad mortem.

- ✠. Adoramus te sanctissime Domine JESU Christe, & benedicimus tibi !
- ✠. Quia per sanctam Crucem tuam redemisti mundum.

Dimississet Pilatus JESUM, nisi clamasset perfida Judæorum turba : (a) *Si hunc dimittis, non es amicus Cæsaris.* Qua voce victus est Pilatus.

Figura mei Pilatus est, & passionem meam sunt typus Judæorum. Si dimissem desideria carnis meae, non fuisset amicus mundi, carnis, & sathanae : ut igitur horum amicus manerem, Deum à corde meo expuli, & diabolum retinui. Et quousque eum retinebo ? profecto eò usque, donec bellum meis cupiditatibus indixerim. Sed quando hoc fiet ?

Nunc, ô JESU ! nunc fiet, ut bellum impietati meae indicam, & dimittam antiquas meas nequitias. Tu da gratiam, da robur, fer auxilium.

Pater, & Ave.

O Amor Crucifixe ! miserere mei.

(a) *Joan. 19.*

Statio

Statio II.

Christus Crucem suscipit.

†. Adoramus te, ut supra.

JESUS Crucem accipit de manibus impiorum Judæorum : & ego eam non libenter accipiam de manu JESU amoris mei ? Hic gravissimam portat Crucem, ego comparative levem. Ille Crucem ignominiosam, ego honorificam ; ut eximius Crucis amator ait Divus Paulus : *(b) Mihi autem absit glorificari, nisi in Cruce Domini nostri JESU Christi.* JESUS denique Crucem amplectitur ; quia novit, id æterno suo Patri summe placere : & ego levem contemptum, & quamecunque cruculam horreo, etiamsi sciam, me per Crucis sufferentiam Deo placiturum.

O Domine ! hanc unicam à te supplex efflagito gratiam : ut des mihi magnam Crucis sitim, ingens patiendi desiderium, inexplicabilem mortificationum, & austeritatum fervorem, & meipsum inextinguibile, ac salutare odium, Amen.

Pater, & Ave.

O Amor Crucifixe ! miserere mei.

(b) ad Gal. 6.

Statio III.

Primus Christi sub Cruce lapsus.

†. Adoramus te, ut supra.

Cadit Christus Dominus sub Cruce ; non tamen eam à se auferri desiderat, sed por-

tateaminter verbera, opprobria, & subsannationes, absque ulla consolatione, refocillatione, & respirio.

Ego, ut primùm à levissima cruce me incommodari sentio, statim ab eadem me exonerare allaboro, non attendens, quòd multa habeam, durante adversitate, lucida intervalla, consolationes - ex & internas, respirationes, & recreationes corporales. Et, quis est, qui à Cruce non prematur? Nec summus Pontifex, aut Monarcha ab eadem exemptus est: & ego, Religiosus cum sim, exemptionem prætendo.

Abfit, ô mi JESU! abfit, ut ego exemptus à cruce, & adversitatibus esse desiderem: non enim cupio exemptus esse à cœlo, & beatifico tuo consortio. Veniat igitur Crux, premat me adversitas, ut per eam ascendere merear ad cœlum & meum Redemptorem.

Pater, & Ave.

O Amor Crucifixæ! miserere mei.

Statio IV.

Christus occurrit Matri suæ.

✠. Adoramus te, ut suprà.

Mater Dei valedixit Filio suo, tali, tantoque: & hoc ideo, ne eum à salutis meæ operatione retardet, aut impediat.

Anne igitur non decens est, ut salutem meam operaturus valedicam levitatibus, garrulitatibus

bus, aliisque ineptijs, quas exterior me à salute mea, à fervore disciplinæ, ac observantiæ Religiosæ, remorari, & à perfectione, ad quam vî Professionis meæ obligor, non modice retardare? Quid? an ego majori amore adhæream vilissimis quibusdam sensualitatibus, quàm Mater Dei Filio Dei, ut ab ijs dimoveri nolim?

O MARIA! per illam amarissimam à dilectissimo Filio tuo separationem, rogo te, impetra mihi gratiam, tantumque robur, ut ex nunc valedicam, & respuam omnia illa, quæ me ab amore JESU, & perfectionis studio remorari possunt, Amen.

Pater, & Ave.

O Amor Crucifixe! miserere mei.

Statio V.

Simon cogitur portare Crucem.

✠. Adoramus te, ut suprà.

JESUS Crucem Simonis humeris imponi permittit. Ita nimirum Deus redimere me statuit, ut ex parte mea stet, fructum Redemptionis gustare, si & ego Crucem, ab humeris JESU ad meos translatam, lubem suscepero: aut fructum ejusdem Redemptionis perdere, si vacuus solummodo, & purè speculativus Passionis Dominicæ sum contemplator. Patiendum est, ferenda Crux est, si salvari desideras efficaciter.

Putasne, salvari efficaciter desideras Religiose!

si obedientiam Superiorum, tuis humeris impostam indignanter fers, excutis, eorúmque voluntati, ac dispositionibus streperè obloqueris?

Ah miserum me! qui fructum Redemptionis ferre recusavi, & crucem sum aspernatus, meam solummodo quærens voluntatem. O Crux sacratissima, veni! & ab humeris Salvatoris ad meos transito, meúmque velle proprium amato pondere opprime, Amen.

Pater, & Ave.

O Amor Crucifixe! miserere mei.

Statio VI.

Veronica offert Christo sudarium.

Visa JESU facie, horrendum defœdatâ, velum capiti suo detraxit Veronica, ut eodem divinam faciem à sordibus sacrilegè injectis, emundaret.

Ecce Religiose! tu vides JESUM eousque consputum, & tuis tepidatibûs, & irreligiøs actibus, ceu sputis dirè fœdatum. Quid ergo moraris? detrahe velum, amanda habitus vitiosos acediam, gulositatem, carnales consolationes, & quidquid nôsti, Divino obtutui displicere. Per-vade tuam conscientiam, & emenda te. Sed quando tua sequetur emendatio? aut quamdiu durabit?

Ex nunc, ô JESU Christe! ex nunc sequetur vera, & seria perverforum morum meorum emenda-

datio, & durabit tamdiu, quamdiu ego duro ;
ut tamdiu duret , conforta me , ô Domine !
tuâ Divinâ gratiâ, Amen.

Pater, & Ave.

O Amor Crucifixe ! miserere mei.

Statio VII.

Secundus Christi lapsus.

†. Adoramus te, ut suprâ.

Ingenti dolore, & vulnerum concussione altera
jam vice in terram prosternitur Dominus.

Rectè exclamat Isaias (c) *Confortate manus dissolutas, & genua debilia roborate.* Dissolutæ namque sunt manus nostræ, dum victis manibus in libertatem filiorum Dei nos asseruit filius Dei, vocandô nos ad Ordinem Religiosum. Confortate igitur manus dissolutas Religiosi ! & *estote fortes in bello, & pugnate cum antiquo serpente, (d) ut accipiatis regnum æternum. Et genua debilia roborate :* nè in peccata antiqua, aut tepidates periculosas incidatis. *Roborate genua ! qui enim stat, vident, nè cadat. (e)* Roborantur autem genua frequentibus precibus, assiduâ mortificationibus, jejuniis, vigiliis, lectionibus sacrâs, & meditationibus. Tu, si habes genua debilia, eadem dictis exercitationibus roborato.

O JESU virtus Dei ! qui me vinculis sæculi hujus nequam constrictum, in statum Religiosæ libertatis traxisti miserans : eâdem miseratione con-

forta manus dissolutas, & genua debilia roborato, ut pijs operibus jugiter intentus, nulla à te valeam tentatione abduci, aut animi remissione debilitari, Amen. Pater, & Ave.

O Amor Crucifixe ! miserere mei.

(c) *Isai. 35.* (d) *Eccles. in Offic. Apost.* (e) *1. Cor. 10.*

Statio VIII.

Solatur Christus Mulieres.

✠. Adoramus te, ut suprà.

Mulieribus sese desolentibus, & lugentibus dixit benignissimus Salvator: (f) *Nolite flere super me, sed super vos ipsas flete.*

Tibi fors, Religiose ingrati ! nec debet, nec potest dicere JESUS : *Noli flere super me* : Nam tu eum nunquam desles, eò quòd non venias ad solemnitatem Passionis Dominicæ, quæ in sacris Stationibus celebratur. Hinc nec super Dominum tuum passum, nec super te fles, aut super tua delicta, & tepidas actiones. Sed væ tibi ! quia cor induratum malè habebit in novissimis.

Emolli, ô Domine ! emolli cor meum durissimum, & compassivo illud dolore confringe, ut tibi & sincero affectu compatiar, & à noxijs deinceps ablineam excessibus, tuasque passionis gratò frequenter recolam animò, Amen.

Pater, & Ave.

O Amor Crucifixe ! miserere mei.

(f) *Luc. 23. v. 28.*

Statio

Statio IX.

Christus tertio sub Cruce cadit.

✠. Adoramus te, ut supra.

Tertia jam vice in terram Crucis onere deprimatur humilis Deus : magnamque sacrosancti sanguinis copiam, ex concussis, & renovatis vulneribus profluentem, effundit.

Sed quare Dens tam largus, & tam prodigus est in effusione pretiosissimi sanguinis sui ? Non alia de causa, nisi ut superbum Pharaonem, & exercitum ejus projiciat in hoc mare rubrum, hoc est : ut ex superbo me humilem efficiat, doceatque hominem antiquum, honorum appetitum, ac laudis humanæ pruritum conculcare, & novum hominem ædificare. Intelligisne, ô Religiose ! & exequeris hanc lectionem ?

Obsecro te Domine ! noli permittere, ut in hoc mari magno pretiosi sanguinis tui demergar, sed emergam. Demergantur autem in eo peccata mea, & inordinatæ affectiones meæ, superbique cogitatus, ut in corde contrito, & humiliato placeam tibi Deus meus, Amen.

Pater, & Ave.

O Amor Crucifixe ! miserere mei.

Statio X.

Christo violenter auferuntur vestes.

✠. Adoramus te, ut supra.

UT major pateat & vulneribus, & doloribus, ac

ac extremæ confusionis locus, improba carnificum manus Filium Dei vestibûs spoliavit.

Perpende Religiosa anima ! quòd licèt violentâ vestium detractiōe extremè confundatur Divina Christi Majestas, æqualem tamen, vel majorem sustineat confusionem, dum sibi objicitur à dæmonibus tua lurida vita : dum Ethnici, turcæ, ac damnati Deo oggerunt gratias, ac immensa beneficia tibi collata, quibûs, si ipsi fruii fuissent, majores protulissent fructus sanctitatis. Tu verò despexisti, & neglexisti, & abscondisti pecuniam Domini tui, qui cum usura exacturus est eam. Quid respondebis ? Quomodò subsistes ?

Agnosco, ô Domine ! quòd talenta tua, mihi concredita, malè applicaverim, & prodegerim. Da deinceps gratiam, ut eâ coadjuvante duplum de commissò talento lucrum reportem, nè nudus meritîs, & te, & me confundam, Amen.

Pater, & Ave.

O Amor Crucifixe ! miserere mei.

Statio XI.

Christus in Crucem agitur.

†. Adoramus te, ut suprà.

CRudelitatis ministri, infernalibûs furiis agitati, cpantherarum instarrabidarum adoriuntur Christum, calcibûs impetunt, & primo ictu atrocissimè in terram prosternunt, horribiliter vociferantes : Adesdum ô Seduc̃tor populi ! ocyùs super
hoc

hoc lignum te extende , expande brachia , & manus porrige.

O spectaculum ab orbe condito luctuosissimum ! DEUS suspenditur ! DEUS occiditur ! & homo ridet , & delectatur in rebus pessimis. O anima Religiosa ! dic saltem à longè (de propinguo enim Crucem accedere non audes) ultimum vale Salvatori tuo.

Vale ergo mi Redemptor ? vale ô Frater amabilissime ! vale ô Sponse animæ meæ ! sed prius ante discessum tuum ex hac vita , da Frater benedictionem , da amplexum ! da crucifixoribus tuis orationis affectum , latroni Paradisum , Matri Filium , Filio Matrem , mortuis vitam , mihi , & toti mundo tuum pretiosissimum sanguinem , Amen.

Pater , & Ave.

O Amor Crucifixe ! miserere mei.

Statio XII.

Christus in Cruce moritur.

✠ Adoramus te , ut suprà.

MOriturus Salvator dixit : *Consummatum est.* (g) Perpende , ô Religiose ! integrum illius verbi sensum. Consummatum est arduum Salvationis humanæ negotium , pro quo fudi in vita lacrymarum millia sexaginta : in horto Gethse- ni sudavi guttarum aquæ , & sanguinis plus quam millia nonaginta : tempore , quò passus sum , de- di guttarum sanguinis ultrà millia octingenta. In flagel-

flagellatione sola accepi ictuum millia quinque, & quadringentos, & plagarum millia sex, sexcentas & sexaginta sex : in coronatione tuli puncturas mille. Dolores mortis sensi sexies mille, sexcentos sexaginta sex. Emisi suspiria dolorosissima nongenta : gemitus lethales nonaginta. Sustinui percussiones, in capite, cervice, dorso, brachijs, pectore, & reliquis innocentissimis membris mille quinquaginta novem. (b) Consummati sunt à prætorio Pilati usque ad hunc Crucis, ac mortis meæ locum passus mille trecenti viginti & unus. (i) Consummati sunt dolores infiniti ; confusiones, & opprobria ingentia : consummata est vita. Solus homo ingratus suæ salutis opus non vult consummare ; nec aliquid amore mei facere, aut pati ; cùm tamen amore ipsius tam multa egerim, tam gravia passus sim. Hæc ingratitude animam meam è corpore, & me è vivis expellit.

O JESU ! miserere mei, aliud enim præ dolore non possum dicere, aut cogitare, quàm, ô JESU ! Fili David ! miserere mei, & propitius esto mihi peccatori. Mori malo, quàm te offendere.

Pater, & Ave.

O Amor Crucifixe ! miserere mei.

(g) Joan. 19. (b) hebdomas Sacra. (i) Andrichom. in sua Jerus. n. 118.

Statio XIII.

Christi Corpus deponitur ad sinum V. Matris.

✠. Adoramus te, ut suprà.

PErpende, quomodo corpus JESU, de Cruce depositum, & ad sinum purissimæ Matris delatum sit, simulque recogita, quòd interim petrae sint scissæ, monumenta aperta, & terræ motus magni fuerint.

O me misellum ! non habeo sanctitatem Matris, sed pravitatem latronis. Petrà sum durior, monumentum foetidissimum, & terrenorum terrenissimus. Et quale gaudium præbebit cor meum JESU meo Eucharistico ?

Hoc ipso, quia miser sum, & miserabilis, veni ô JESU Eucharistice ! Etsi enim non habeam sanctitatem Matris tuæ, ut dignè te recipiam ; latronis tamen pravitatem habeo, ut ad latus tuum crucifigi debeam. Etsi non sim tanquam nobile templi velum, ut in morte tua scindar ; sum tamen monumentum foetidum, ut ad apertionem lateris tui aperiri debeam. In morte tua petrae scissæ sunt : ego durior sum petrâ. Emolli me ! terra mota est : ego sum terrenissimus. Abstrahere me ! & sicut voluisti ferrum intrare, & vulnerare latus tuum, ita me per vulnera jam facta intrare permitte, ut tu intres in me, & ego in te, Amen.

Pater, & Ave.

O Amor Crucifixe ! miserere mei

Statio

Statio XIV.

Corpus Christi sepelitur.

✠. Adoramus te, ut suprâ.

Petrosô, & lapideô sepulchrô humatur Corpus Redemptoris, in quo elegit post infinitos labores exantlatos requiescere.

Magna totius orbis veneratione colitur sepulchrum illud, in quo jacuit Corpus flagellatum, coronatum, consputum, dilaceratum, crucifixum. Majoribûs longè honoribûs coronabit DEUS Religiosi illius corpus, in quo jacuit anima mortificata, coram mundo contemptibilis reputata, vilipensa, crucifixa, & Christo commortua. Qualem, quæso! tu expectare potes sepulchri illius, id est, corporis tui, à justo Iudice honorem?

O JESU! ubi de passionibus, & mortificationibus agitur, mox erubescere debeo; nihil enim dignum in conspectu tuo egi, quod à te jure exigere posset mercedem. Da igitur gratiam tuam, ut, quod fragilitas mea non potest, ejus viribûs deinceps possim, Amen.

Pater, & Ave.

O Amor Crucifixe! miserere mei.

Statio XV.

Sancta Helena cum Cruce.

✠. Adoramus te, ut suprâ.

Quam sollicitè quæsit Crucem Helena, eandem tenerrimo strinxit affectu inventam.

Aft


Ast ego, præterquam, quòd nec cogitem de Cruce quærenda, de inventa tristior, eamque totis à me viribus amovere contendo, semper clamans : *Transent à me calix iste !* & nunquam cum Christo prioribus verbis adjungens : *verumtamen non sicut ego volo, sed sicut tu.* (k) Sed unde hoc ? quia nimirum Crucem non amo.

O sancta, & salvifica Crux ! transfunde in me vel unicam amoris flammulam, quâ in te consumptus est Salvator meus JESUS Christus, ut discam salutis meæ pretium quærere, quæsitum amare, & amatum possidere in omnem æternitatem, Amen.

Pater, & Ave.

O Amor Crucifixæ ! miserere mei.

(k) *Matth. 26.*



PRAXIS VIII.

Statio I.

Christus adjudicatur morti.

- †. Adoramus te sanctissime Domine JESU Christe, & benedicimus tibi !
 ✠. Quia per sanctam Crucem tuam redemisti mundum.

Tulit Pilatus sententiam mortis contra JESUM, dicens : *Accipite eum vos.* (a) JESUS autem, dum accipiebatur, & rapiebatur à Judæis,
 pa-

patienter, & demisso capite, sustinuit, crudelē hanc sententiam æquanimiter acceptans.

Ex hoc mysterio, ô Religiose ! sufficit, si addiscas, quod didicit S. Cyprianus Martyr, qui auditâ mortis injustæ sententiâ alta voce dixit : *Deo gratias !* Proinde, si te obruit tristitia, adversa valetudo, vel quæcunque demum adversitas, statim in animo tuo cogita, quòd hæc si sententia DEI : *Accipite eum vos.* Tu igitur capite voluntatis tuæ reverenter inclinato mox responde : *Deo gratias ;*

Deo gratias ago pro saluberrimo hoc remedio, seu potius alexipharmaco, quo præservante nulla mihi nocebit adversitas, nullus dejiciet casus sinister. Da pijsime Domine ! ut frequens usus hujus universalis medicinæ, & cordi, & ori meo fiat dulcis super mel, & favum.

Pater, & Ave.

O Amor Crucifixe ! miserere mei.

(a) Joan. 78.

Statio II.

Christo imponunt Crucem.

†. Adoramus te, ut suprà.

Christus JESUS, latâ in eum mortis sententiâ, educitur à populo Judaico, haud secus, ac olim innocentissimus Abel ab invido fratre Caino. Lignum ei Crucis imponunt, ut, ceu verior Noë,

ARCANA

arcam ex eo fabricet, salvando generi humano destinatam. Nec gravatur illud in suos suscipere humeros, ut in eodem, velut figuratus Isaac, immoletur in monte Calvariæ.

Cainam erga JESUM crudelitatem exercet, qui fratri suo, aut proximo, meliorem fortunam, existimationem, honores &c. invidet. Noëmum non imitatur, sed irridet, qui pro ædificanda æternæ salutis suæ arca pati nihil vult, & lignum Crucis portare renuit. Isaac non est, qui, cum Divinus Pater eum non immolare, sed probare desiderat, resistit, & fugit. Sed cuinam horum sum ego similior?

O Domine! da mihi Abelis religiositatem, Noëmi, circa salutem animæ meæ industriam, & simplicem Isaaci obedientiam, ut tecum Crucem tollam, feram, retineam, & patiar, Amen.

Pater, & Ave.

O Amor Crucifixæ! miserere mei.

Statio III.

Christus in terram prolabitur.

✠. Adoramus te, ut supra.

JESUS Crucis pondere pressus fatigatur, & in terram gravissimè labitur.

Jam incipiunt mysteria, exclamat S. August. (b) non enim frustra fatigatur JESUS: non enim frustra fatigatur virtus Dei: non enim frustra fatigatur, per quem fatigati recreantur: non enim frustra fatigatur, quo deferente fatigamur, quo presente firmamur. Tibi fatigatus est ab itinere JESUS. Infirmitas Christi te

K

recrea-

recreavit, infirmitas Christi fecit, ut, quod erat, non periret. Condidit nos fortitudine sua, quæsiuit nos infirmitate sua.

O Religiose! quid omnem tu desideras requiem, pro cuius salute adeò fatigatus est JESUS? Labora, psalle, vigila, mortifica, fatiga corpus tuum, ut hac fatigatione JESUM reficias fatigatum.

O amantissime Salvator Christe JESU! querens me sedisti lassus, redemisti Crucem passus: Ah! tantus labor non sit cassus, Amen.

Pater, & Ave.

O Amor Crucifixe! miserere mei.

(b) *Tract. 15. in Joan.*

Statio IV.

JESUS occurrit afflictissima Matri.

†. Adoramus te, ut supra.

Vix à lapsu se recollegerat Filius DEI, mox novò tormentò cor ejus conquassatur. Occurrerat enim ei Mater sua afflictissima simul, & dilectissima, ultimum dictura vale. Ast neutri triste concessère alloquium efferi carnifices; sed JESUM immaniter propellunt.

Ah! quàm immensus dolor amantissima non perforaverit corda, dum eis breve negatur alloquium, dolorosi affectùs contestativum. Ego autem in obvijs quibusque tribulationunculis solatia
emen-

mendico ab amicis, à voluptatibus, à cura carnis. Quid? si in recognitionem illius tremendi, ac mutui doloris, dolorem meum, & afflictionem in corde meo tacitus suffocarem, & Nato Dei, ac Matri ejus sacrificarem cum pio affectu?

O desolatissima JESU & Mariæ pectora! vobis ego omnes meas desolationes, pressuras, & afflictiones non tam commendo, quàm immolo. Date! ut discam posthac tacitus pati, & non omnia querelâ implere, ac ab hominibus, aut levamen exprimere; sed à vestris afflictionibus patientiæ gratiam impetrare, Amen.

Pater, & Ave.

O Amor Crucifixæ! miserere mei.

Statio V.

Simon fit Crucis socius.

†. Adoramus te, ut suprà.

Videntes carnifices JESUM deficere viribûs, coegerunt hominem transeuntem, ut Crucem tolleret post eum. At ille diu reluctabatur id obsequij præstare Christo Domino.

Haud aliter se habuit Religiosus ille, (c) qui tentamenti diabolicis seductus eò usque insaniit, ut relictò monasteriò apostataverit. In actuali fuga constitutus obvium habuit hominem, qui se interrogaret: quare confusus adeò, & perplexus appareret? Cui ille: *quid ad te?* alter econtrà: *plurimum ad me;* & discissa veste (Christus

enim erat) perforatum ei ostendit latus. Ego enim, inquit, pro te incarnatus, natus, passus, vulneratus, mortuus sum; & tu audes dicere : *Quid ad me ?* Quô visô, & auditô, contremuit miser, & resipuit. Nunquid Religiosus ille Simon fuit, quocum se Cruci opposuit dicens : *quid ad me homo iste ?* O utinam alteri horum tu non esses similis ! si ergo ad Deum tua salus attinet : etiam ad te attinet Deus tuus, qui totus lassus, & exhaustus, Crucem in te transferre desiderat. *Hæc ad te.* Accipe ergo ipsam reverenter de manu Domini, & resipisce.

O Domine ! si ad te pertinere noscitur meæ salutis periculum, vicissim concede, ut humilis tuæ Crucis sequela magis mihi cordi sit, quàm hætenus, Amen.

Pater, & Ave.

O Amor Crucifixe ! miserere mei.

(c) *Maffæus.*

Statio VI.

Pium Veronicæ obsequium.

✠. Adoramus te, ùt suprâ.

Detrahit velum capiti suo Veronica, ut faciem JESU probris affectam, & sputis dehonestatam, purificaret.

Quid agis ô matrona nobilissima ! an non verecundaris tuum velô caput denudare ? Non verecun-

cundor, ait, amorosum obsequium, aut obsequiosum amorem, etiam cum mea erubescencia Christo impendere. Velum capiti tuo detrahere & potes, & debes, qui tua peccata, quæ coram facie Domini commisisti, sincerè confiteri desideras. Sed quoties, qua humilitate, & diligentia, id facis ?

O Domine ! da gratiam, ut cum saluberrima mei confusione velum capiti meo tam frequenter quàm humiliter, in Sacramentali confessione detraham, quatenus faciei tuæ imaginem, in anima mea peccati sordibus pessimè deturpatam, pristino splendori restituas, & Spiritum rectum innoves in visceribus meis, Amen.

Pater, & Ave.

O Amor Crucifixe ! miserere mei.

Statio VII.

Secundus Christi lapsus.

✠. Adoramus te, ut suprà.

TRiste denuo spectaculum fit Salvator, dum dolens, & gemens, Crucis ponderi succumbit.

Refert S. Pagina, (d) qualiter Urias Davidi, ut domum reversus suis non nihil indulgeret commoditatibus, suadenti responderit : *Arca DEI & Israël, & Juda habitant in Papilionibus, & Dominus meus Joab, & servi Domini mei, super faciem terræ manent & ego ingrediar domum meam, ut comedam, & bibam ? per salutem tuam, & salutem animæ tuæ, non faciam rem hanc.* O Religiose !

K 3

in-

Incarnata Dei arca, & Dominus tuus JESUS Christus habitat in Papilionibus, & cruentò Passionis suæ decertat præliò: & tu quæras requiem & commoditates? Christus Dux tuus gravissimo Crucis succumbit oneri: & tu elato sis animo? Ille infinita patitur tormenta: & tu corporeas venaris voluptates?

O JESU! per salutem tuam, & salutem animæ meæ, non faciam rem hanc. Sentiat etiam corpus meum, & caro mea, amaritudinem Crucis tuæ. Exemplum dedisti mihi. Hinc, quemadmodum tu fecisti, ita & ego deinceps faciam.

Pater, & Ave.

O Amor Crucifixe! miserere mei.

(d) 2. Reg. 11.

Sratio VIII.

Flentes Christo occurrunt Mulieres.

ÿ. Adoramus te, ùt suprà.

Recordatæ quædam Mulieres, quæ, & quanta beneficia aut sibi, aut suis à JESU fuerint collata, secutæ sunt eum in via hac, qua ambulabat, flentes, & lugentes.

Referunt, (e) canem, cujus Dominus in publica urbis Romanæ platea interfectus fuerat ad mortui cadaver per aliquot dies impastum sedisse, & lugentem. Et ego, Religiosus cum sim, & Sacerdos Altissimi, nunquam, aut rarò admodum

JESUS
ntò Pas-
equiem
gravissi-
lis ani-
corpo-

animæ
am cor-
Crucis
uemad-
am.

dum compaream in publica Crucis viæ platea, ubi Dominus meus, & Deus meus horrenda morte succubuit, & pro me interfectus est, & quidem à me interfectus est? Utinam saltem, si oculos non obruunt lacrymæ, grata hujus scenæ memoria subiret animum, ut cum pia hac Mulierum turba devotam exhibeam grati animi contestationem.

O Domine! tam obliviosus deinceps non ero, ut à mulieribus Judaicis, aut omnino à cane vinci me patiar in Domini mei luctu. Dies abibit nulla, quâ non piis operibus, aut saltem devotis affectibus gratum me ostendam, Amen.

Pater, & Ave.

O Amor Crucifixæ! miserere mei.

(e) P. Fritsch in *manuduct. f. 59.*

Statio IX.

Tertius Christi sub Cruce lapsus.

✠. Adoramus te, ut suprà.

Prostermitur in terram innocens Deus non una tantum, sed iterata, ac tertia vice. Gravis fuit primus ejus lapsus, gravior secundus, gravissimus omnium tertius, ac dolorosissimus, qui magnam sacrosancti sanguinis copiam post se trahebat.

Attende Religiose! an non trium horum lapsum tu extiteris causa? lapsus enim es primò in

juventute tua ; secundò in ætate profectiori : ac tertio in Religioso , & sacerdotali statu. Gravis erat primus ille tuus lapsus : alter gravior : gravissimus tertius , ac tibi periculosissimus juxta , ac Christo tuo dolorosissimus , pro cujus expiatione integrum requirebatur Divinissimi sanguinis profluvium.

O JESU Redemptor piissime ! immensas tibi ago gratias pro omni tua pœnosissima Passione , & cordintimè doleo , quòd mea fragilitas lapsuum tuorum repetita fuerit causa. Non adjiciam posthac te ad lapsum , præcipuè gravissimum illum tertium , impellere , Amen.

Pater , & Ave.

O Amor Crucifixæ ! miserere mei.

Statio X.

Christus privatur vestibûs.

†. Adoramus te , ut suprà.

EX violenta vestium direptione renovabantur JESU vulnera , abstrahabatur à corpore cutis , recens oboriebatur sanguis , & venerandum ejus caput ex spinosæ coronæ immiti avulsione , & immani reimpositione , duplicata crudelitate dupliciter vulnerabatur.

Tremendum planè spectaculum ! hoc , Religiose ! sapiùs tibi præfige , & evades ex tepido fervidus , & ex vano contemptor mundanarum vanitatum , velut S. Rosalia (f) cui , cùm vani ornatus gratiâ speculum inspicienti Christus in præ-
tacta

taſta horrenda forma ſemel, ac iterum repræſentatum ſe objeciſſet, tanto horrore correpta eſt, ut horrere mundum didicerit, ac dimiſiſſis ſæculi pompis uniſverſis reliquam vitam aſpero in antro tranſegerit. Inſpice etiam tu hoc ſpeculum.

O JESU ! quis quærat vanitatem, aut aliquam commoditatem, dum te tam enormiter excarnificatum intuetur ? Faxit tua gratia, ut, qui te oculis fidei in hac ſacra ſtatione tam indignè tractatum doleo, mentem ab omnibus vanitatibus totaliter avulſam reportem, Amen.

Pater, & Ave.

O Amor Crucifixæ ! miſerere mei.

(f) *Præcitatus f. 120.*

Statio XI.

Chriſtus Cruci affigitur.

†. Adoramus te, ut ſuprà.

CAro Chriſti delicatiſſima, Virginea, Regia, à Spiritu S. formata, clavibus trabalibus configitur, malleo contunditur, dilaniatur, dilatatur. Et dolorem ejus quis enarrabit ?

Viſ nōſſe, quantus fuerit dolor ? ex ungue leonem metire. Puncturam acūs ſemel, & iterum repetitam, ægerrimè ſuffers. Sciſſura, vulnusque cultri ſubito declinantis, quantum tibi infert ſupplicium ? Digitum ſuper candelam ardentem per paucula momenta abſque clamore vali-

K 5

do

do num tolerabis ? unicam sulphuris , aut ariâ
eliquati guttulam , in manus decidentem , quo do-
lore sustineres ? quantus igitur , quàm infinitus
fuerit dolor carnis Christi tenerrimæ , dum clavi
cruces , oblongi , & truncati plus quàm quinqu-
aginta validissimâs ictibûs , manus , pedesque sacra-
tissimos inauditâ violentiâ adaçti , perforabant ?

Vah tenellum , & delicatulum Christi servum !
quem moderatæ abstinentiæ rigor , & observan-
tiæ Religiosæ tolerabilis clavus , non in Crucem ,
sed in fugam agit.

Ah ! cur unus horum ictuum non dirumpit , &
emollit pectus meum adamantinum ? Eheu ! di-
mittite clavi istas innocentissimas manus , & con-
figite cor meum , illudque compassione intermi-
nabili vulnerate , Amen.

Pater , & Ave.

O Amor Crucifixæ ! miserere mei.

Statio XII.

Christus emittit Spiritum.

ÿ. Adoramus te , ut suprâ.

Superatâs infinitis doloribûs , opprobriis , passio-
nibûs , ac tormentis inclinat JESUS caput ,
mortique facultatem impertitur , fatali falce vitæ
stamen demetendi : *Et inclinato capite tradidit
Spiritum. (g)*

Inclinato capite moritur JESUS , ut mihi am-
plexum , mihi det osculum reconciliationis. *In-
clinato capite* , ut mihi dicat ad aurem cordis mei :
mior ,

mior , & libenter mior amore tui ; hujus noli oblivisci amoris. *Inclinato capite* , ut inspiret in faciem meam spiraculum vitæ , & suum mihi ingereret Spiritum.

O anima mea ! tradidit pro me JESUS Spiritum , & ego spiro ? Verbum æternum pro me sinit : & ego loquor ? Deus meus pro me mortuus est : & ego vivo ? cur non venis ô hora , ut & ego moriar , dum pro me Dominus meus JESUS mortuus est ? cur non saltem compassione mior ego ; cùm iam exspiraverit in Cruce vita mea ? O vita mortifica me ! ô mors vivifica me !

Pater , & Ave.

O Amor Crucifixe ! miserere mei.

(g) *Joan. 19. v. 30.*

Statio XIII.

Deposito Christi de Cruce.

✠. Adoramus te , ut suprâ.

Deposito Corporis Christi de Cruce ad sinum Virginis Matris dolorosissimæ inexplicabili dolore Marianum pectus replevit , ut conspexit propius hiantia vulnera , latus transossus , caput tot spinis laceratum. Certè , si me præsentem habuisset dolorosissima Virgo , in has , aut similes querelas erupisset :

Aspice Redemptorem tuum , tam crudeli morte ob tua scelera peremptum , cujus pedes tot pro te fatigati

gati itineribus, ferreis in ligno transverberati clavibus biant : manus operatrices tot mirandorum operum, atroci vulnere transactæ sunt : cor, ac pectus Divini amoris reclinatorium, immani lanceæ ictu patefactum : caput, æternæ Sapientiæ sedes, dirissimis spinarum aculeis fodiatum est : tota corporis compago, singulare totius Trinitatis organum, tot plagis livida, tot vulneribus lacerata est. O tragicum facinus, ad quod sidera se occuluerunt, saxa rupta sunt, concussa tellus universa. Tu hæc fecisti; & absque doloris sensu in saxum induruiisti ? Heu justam simul, & amaram querelam !

O ! quis mihi tribuat illum doloris sensum, quem tu beatissima Mater percepisti, quando brachiis, ac sinu tuo lacerum, ac tot vulneribus deformem Filij tui cadaver excepisti ! quantò ego dolorem illum sentirem justius, qui illum injustè Filio, tibi que meis peccatis inflixi ! O Mater per tuas lacrymas enitere me doloris filium, & socium, Amen.

Pater, & Ave.

O Amor Crucifixe ! miserere mei.

Statio XIV.

Corpus Christi deferretur ad sepulchrum.

¶ Adoramus te, ut suprà.

Magna cum reverentia adorandum. Christi corpus ad sepulchrum deportarunt, ac unguentis optimis inunxerunt.

Tu unge illud affectu pio, qui ante oculos Domini-

mini omnî pretiosior est unguentô. Nam cui-
dam devoto Christi cultori *(b)* revelatum est, non
posse sibi ab hominibus gratius præstari obsequium,
quàm gratâ Passionis suæ memoriâ. Id, quod
confirmat Albertus M. *(i)* dicens, unicam sim-
plicem de Passione Christi cogitationem plus me-
reri apud Deum, quàm unius anni jejunium in pa-
ne, & aqua : aut quotidianam per flagellationes
cruentationem : aut prolixas preces. Sic Re-
ligiose ! sic unge corpus Christi, quia fors aut non
vis, aut non potes tam strictè jejunare, flagris
te macerare, aut horas precibus consumere. Sed
nec hoc nec illud fortasse fecisti.

O JESU ! emolli cor meum, & excita illud à
profundissimo torporis lethargo, ut piis affecti-
bus ad S. tuum sepulchrum vigil excubet, & la-
crymosa mea suspiria lampadem accendant inex-
tinguibilem, ac pia tuæ SS. Passionis memoria cor-
pus tuum purissimis involvat lintheaminibus, ac sua-
veolentibus condat unguentis, Amen.

Pater, & Ave.

O Amor Crucifixe ! miserere mei.

(b) Apud Ludoph. Carth. vitæ Christi p. 2. c. 58.
(i) apud Discipulum ser. 1. in Parasc.

Statio XV.

Sancta Helena cum Cruce.

✠. Adoramus te, ut suprà.

Dilexit ferventi amore sanctam Crucem Bea-
ta

Helena ; & ideo eam ardentè quæsit , & gaudenter invenit.


Crucem ama ! & ut exclamat S. Bern. (k) *Totus nobis figatur in corde , qui pro nobis totus fixus est in Cruce.* Christus portabat Crucem vivus , & , ut ne mortuus quidem ab ea divelleretur , ab ea portari voluit. Tu verò , ne à Christo divellaris , à Cruce ne avellaris.

O Crux , ave spes unica ! individuo me tibi nexu conjunge , ut , quem habitus Religiosus , & dignitas Sacerdotalis , Crucis amatorem coram mundo proclamant , talis inveniar in cœlo , Amen.

Pater , & Ave.

O Amor Crucifixe ! miserere mei.

(k) *lib. de Vit. Honest.*



PRAXIS IX.

Statio I.

Injustè Christus morti adjudicatur.

- γ. Adoramus te sanctissime Domine JESU Christe , & benedicimus tibi !
- β. Quia per sanctam Crucem tuam redemisti mundum.

IMmanis erat vox efferati Judæorum populi , in mortem JESU conspirantis. Causam percontanti Pilato responderunt perfidi : *Si non esset hic malefactor , non tibi tradidissimus eum.* (a)

Heu

Heu grandem calumniam ! ergone est malefactor, qui pertransiit benefaciendò, & sanandò omnes ? Disce, ô Religiose ! devorare injurias, calumnias, & detractiones. Tu enim non es innocentior Filiò DEI ; quia absque peccato non es : adeoque es malefactor. Propterea hæc dicit Dominus : *Si non esset hic malefactor, non eum tradidissẽm calumniatoribus, accusatoribus, infamatoribus.* Profectò non debetur tibi honor, qui honorem Deo per tua peccata furatus es. Restitue læsum honorem Deo per fortem infamiæ, confusionumque sufferentiam, ac propriæ vilipensionis amorem : *Quoniam magna potentia DEI solius & ab humilibus honoratur.* (b)

O JESU, immensam calumniarum vim pro me perpesse ! in reverentiam tremendæ illius confusionis, immolo, resigno, ac sacrificio tibi omnem meum honorem, famam, existimationem, & in omnem ignominiam, ac confusionem, si quam immittere tibi placuerit, me paratum tibi exhibeo. Conforta me, Amen.

Pater, & Ave.

O Amor Crucifixe ! miserere mei.

(a) Joan. 18. (b) Eccles. 3. v. 21.

Statio II.

Christus levat Crucem in suos humeros.

✠. Adoramus te, ut suprâ.

Universas JESUS, quæ adhuc post tanta tormenta

menta residuæ erant, collegit vires, ut Crucem gravissimam, & probrosissimam in suos exulceratos levaret humeros, & ad montem usque Calvariæ deportaret.

Tu, ô Religiose Christi imitator! si aut diuturna, aut inopina obrueris cruce, assume animum generosum, omnes vires collige, & illam crucem, in humeros tuos levatam, deporta; non quidem ad montem Calvariæ (nè distantia loci, & nimium pondus te dejiciant) sed ad sacram hanc Stationem, ac ad pedes JESU fatigatus quiesce: ille tibi crucem reddet portabilem, levem, dulcem, ac consolatoriam, viresque novas subministrabit. Utinam hoc fecisses sæpius! haud dubiè non toties defecisses.

O JESU! amore tui omnem crucem, omnem tribulationem, adversitates omnes in meos suscipiam humeros. Tu me tuâ confortabis gratiâ, pro qua obtinenda tu eris refugium meum, & virtus, Amen.

Pater, & Ave.

O Amor Crucifixe! miserere mei

Statio III.

Primus Christi lapsus.

✠. Adoramus te, ùt suprâ.

A Cerbè adeò trahebatur, & tractabatur innocens DEUS, ut continere se non potuerit, quin lapsu horrendo lassus in terram prosternetur

tur, haud dubiè illud mente recogitans : *Popule meus ! quid feci tibi ? aut quid molestus fui tibi ? responde mihi (c)*

Tu, qui JESUM sub Cruce fatiscentem contemplaris, animum ad audiendum acue, & Christo, te proprio nomine compellanti, responde. NB. *Quid feci tibi ? aut quid molestus fui tibi ; Ecce ! quòd nunc in terra jaceam, impiorum pedibus conculcatus ; tui causâ jaceo. Tu me adeò vilipendisti : tu me in terram dejecisti : & utinam non dejeceres iterum, iterumque ! Porro quoties dum vives, me conculcabis ? quid feci tibi ? responde mihi.*

Ah ! *Quid dicam Domine, aut quid respondebo tibi ? Dimittam adversum me eloquium meum : loquar in amaritudine animæ meæ ; dicam Deo : Noli me condemnare. (d)* Vilipendi te ; adeò in tuo servitio aut intepui, aut illud omninò abhorruì. Dejeci te in terram, & conculcavi ; cum sanctis tuis inspirationibus posthabitâ abij in consilio impiorum, & in via peccatorum steti. Supplices igitur tendo manus, pectus tundo, & doloroso gemitu peroro causam meam. Tuere causam meam, Defensor vitæ meæ, Domine DEUS meus ! Amen.

Pater, & Ave.

O Amor Crucifixæ ! miserere mei.

(c) Mich. 6. v. 3. (d) Job. 10.

Statio IV.

Beatissima Virgo obviat Filio suo.

✠. Adoramus te, ut suprà.

Intuebatur miseranda parens Unigenitum suum innocentissimum inter latrones iniquissimè raptari, omnibùs licitoribùs, & militibùs, in hunc unum sævientibùs. Et quis explicabit, quàm vehementem dolor Materna ejus viscera penetraverit, pertingens usque ad divisionem animæ, quæ erat ejus Filius?

Cum David discalceatus, & operto capite, flens Absalonem fugeret, & montem olivarum scanderet, tantam commiserationem ciebat, ut omnis populus, qui erat cum eo, operto capite ascenderet plorans. (e) Quo, putas, doloris sensu, Christum amantissima Mater non sit consecuta? David flendò ciebat lacrymas: at Christus fuso cruore. David nullo affectus vulnere, & integræ sanitatis: Christus vulneribùs plenus, & nullius sanitatis, quin imò vitâ ad ultimum destinatâ supplicium, quomodò non tormentavit cor dulcissimæ Matris? ô JESU! ô MARIA! tenerrimè vobis compatior.

Interveniat pro nobis, quæsumus Domine JESU Christe! nunc & in hora mortis nostræ, apud tuam clementiam B. V. Maria Mater tua, cujus sacratissimam animam in hora tuæ Passionis, doloris gladius pertransivit, Amen. Pater, & Ave.
O Amor Crucifixe! miserere mei.

 (e) 2. Rog. 11.

Statio

Statio V.

Simon fit Crucis Socius.

†. Adoramus te, ut suprâ.

SEptuaginta duos numeravit Christus discipulos, qui ipsum jugiter comitabantur. Ast ubi viderunt eum ad mortem condemnatum, *Omnes declinaverunt, simul inutiles facti sunt. (f)* Nullus eorum Crucis socius, aut luctuosi itineris comes esse volebat, ut meritò conqueri potuerit Salvator : *Foras fugerunt à me, oblivioni datus sum, tanquam mortuus à corde. (g)*

O probrum modernæ Christianitatis ! antiquorum Cæsarum, & Heroum statuas, venerabunda coluit Roma ; & nostrò adhuc ævò fortia illorum gesta penicillò, & cuprò depicta celebrantur, ac avidè perlustrantur. At verò statuas fortiter exantlatæ Passionis, Crucis, & mortis : ingentem de mundo, carne, & diabolo victoriam, à JESU Christo relatam, fugimus, & nostro vix dignam aspectu judicamus. An non rectè exclamat To. Kemp. *Heu Domine ! quàm multi inconsideratò coram te transeunt siccis oculis, & incompassibili corde ?* O ingritudinem summè detestandam ! si itaque cum Simone stolidè Crucem, & Crucis memoriam fugimus : deinceps serò licèt eam amplectamur, & dimittamus nunquam.

Ignosce, piissime Salvator ! erubescendam meam socordiam, & detestandam in Cruce fe-

renda erubescantiam. Trahe me post te, ut in
Cruce sequar te, & æternum consequar.

Pater, & Ave.

O Amor Crucifixe miserere mei.

(f) *Psal. 13.* (g) *Psal. 30.*

Statio VI.

Veronica Christo porrigit sudarium.

✠. Adoramus te, ut suprâ.

UT vidit Veronica JESU faciem extremè confu-
sam, & sordidatam, intimè doluit, & cum
aliud non posset præstare obsequium, sudarium
obtulit.

Lacrymabilis certè erat aspectus JESU patien-
tis. Ut vidit Judas JESUM ad mortem condem-
natum, miserando ejus aspectu adeò commotus est,
ut mox retulerit triginta argenteos, dicens: *Pec-
cavi, tradens sanguinem justum.* (b) Quid, si vi-
disset adeò conspurcatum, lividum, vulneratum,
flagris laceratum, spinis coronatum? Quid si Cru-
cifixum, mortuum? profectò non amplius tradi-
disset eum; sed præ dolore crepuisset medius,
etiam non suspensus. Videt hæc omnia Christia-
nus, Religiosus, Sacerdos: & quid facit? iteratò
tradit JESUM, dum iteratò peccat. Ergo pejor
est Judâ.

Ita est, mi JESU! dolens fateor, quòd pejor
fuerim pessimo proditore Judâ. Ille semel, ego
iterum, & sapius te tradidi. Ego te vidi in tor-
mentis,

mentis, & flagellis subditum : & iterum te tormentavi, & flagellavi. Ego te vidi in Cruce morientem, delolatum ; & denuo te crucifixi, occidi. Ah mi Deus ! nunc sentio commoveri mihi viscera, cor palpitare, & animam doloribus liquefieri. Suscipe (cum aliud reddere non possum) suscipe doloris velum ardentibus lacrymâs madefactum : & in eo purifica faciem tuam, quæ est facies animæ meæ, Amen.

Pater, & Ave.

O Amor Crucifixæ ! miserere mei.

(b) Matth. 27.

Statio VII.

JESUS secundò sub Cruce cadit.

✠. Adoramus te, ut suprà.

Altera jam vice in terram corrui, & facie sua Divina humi figitur Salvator noster, novisque vulneribus plagatus, hostium suorum pedibus proteritur, ac ab omnibus deridetur.

Memento, tuâ JESUM inconstantia, & volubilitate denuo ad terram usque dejectum esse. O ! quot bona proposita in sacris meditationibus, aut exercitiis spiritualibus concipis. Ignem spiras, & leonem. Sed vix aliquot passus animò ita obfirmatò conficis, lassaris, & quavis aurâ, levissimâque tentatiunculâ dejiceris. Pete à Domino, pro te infirmato vires constantiæ.

O JESU ! qui mille inter opprobria ad mor-

tem eductus, & præ nimio vulnerum dolore, ac tenerrimi corporis lassitudine, terram es colapsus: confirma me in bonis propositis exequendis, ut non amplius vacillem, & te unâ mecum à terra tollam, Amen.

Pater, & Ave.

O Amor Crucifixe! miserere mei.

Statio VIII.

Mulieres flentes sequuntur JESUM.

✠. Adoramus te, ut suprâ.

Mulieres oculis corporis, & mentis aspicientes indignum, quò JESUS tractabatur, modum, amarè fleverunt, & secutæ sunt eum in itinere Crucis.

Si istæ mulieres domû suæ flêssent, aut in via Crucis quidem; nihil tamen de doloribus JESU cogitantes: putasne, JESUS eas respecturus fuerat, & consolaturus? Minimè sanè. An igitur putas, Religiose, & Sacerdos tepide! Deo placituras orationes tuas, quas vel domi privatim, vel publicè fundis in Choro; si de Deo vix aliquid, de nugis autem, & vanitatibus plurimæ cogites? ànne meritum, & consolationem Divinam exinde expectare potes? An non potius verum est, quod ait ille: *(i) Non plus delectatur Deus in oratione vocali sine attentione mentali, quàm in garritu avium, vel in grunntu porcorum.* Vah magnam orationis tuæ præstantiam! qua propter in Deum intende, si vis, ut gemitus tuos, & oratio-

orationes consoletur, ac respiciat, sicut mulierum, sibi in Crucis via intendentium, & sequentium.

O JESU ! dolens, ac gemens confiteor tibi, quòd hæcenus per luridas meas orationes, psalmodias, cantus, & preces aliud non meruerim elogium, quàm quod ex ore tuo reportârunt ii, de quibus conquereris : (k) *Populus hic labiis me honorat : cor autem eorum longè est à me.* Da gratiam, ut deinceps psallam tibi spiritu, psallam tibi & mente, Amen.

Pater, & Ave.

O Amor Crucifixe ! miserere mei.

(i) Vincent. Bellov. spec. mor. part. 10. dist. 33.
 (k) Matth. 15. 8.

Statio IX.

JESUS tertio sub Cruce corruit.

†. Adoramus te, ut suprâ.

Tertio in terra jacentem Dei Filium, tertia jam vice in eadem Crucis via contemplaris. Sed etsi centies redires in idipsum, stupendam illam Filij Dei exinanitionem capere non posses satis. Jacet Judex apud pedes rei : Dominus adgeniculatur servo : Rex ad pedes lictoris provolvitur : Deus, tremendæ Majestatis Dominus, sub turpibus alicujus vermiculi pedibus ingemiscit.

Hæc consideras, ô homo ! & superbire, aliisque te antepondere, & nemini subesse præsumis.

Nôstine, quid sis? si nescis, dicam. Ex evan-
 da vitæ vappa, mortis larva horribilis, putre-
 dinis sentina, foetoris cloaca, seminarium ver-
 mium, turpitudinis spectrum, naturæ nausea, de-
 forme scheleton. Quid multis? terra, cinis, &
 nihilum. (l) si adhuc superbis, ex Bernardo quæ-
 re: quid fueris? sperma foetidum. Quid es?
 saccus stercorum. Quid eris? esca vermium. A-
 spice hanc hominis formam, pro qua reforman-
 da adeò humiliavit semetipsum humilis Deus. Et
 miser homo se non humiliabit?

Vicisti, ô magne Deus? vicisti humilitate tua
 meam superbiam. Totus itaque contritus, ac
 confusus tuis sanctissimis me subterno pedibus,
 ut iisdem meam conculces superbiam, & humi-
 lem Crucis instilles scientiam, Amen.

Pater, & Ave.

O Amor Crucifixe! miserere mei.

(l) P. Schwarz in peripatetico.

Statio X.

Christus exiit vestibûs.

†. Adoramus te, ut suprà.

Direptis vestibûs, & renovatis exterioribus
 totius corporis vulneribus, etiam linguam
 cruciaturi crudeles carnifices, vinum myrrhatum
 & amarissimum Christo propinant; quod, cum
 gustasset, noluit bibere. (m)

Quare noluit bibere? ut ego biberem, & sen-
 tirem

tirem amaritudinem: ut metam myrrham meam cum aromatibus. (n) Vinum istud est myrrhatum tristitiâ, internis animi desolationibus, & afflictionum amaritudinibus, quibus Divinarum rerum sapor, succus orationum, & carnis victoria amaricatur; velut expertus est aliquis Religiosus, (o) qui cum gustavit, noluit bibere, fastidians omnia spiritualia exercitia, eò usque, donec, cum in cella præ mærore tabesceret, ejus auribus cælitus hæc vox allapsa est: *quid hic sedes otiosus, in teipso tabescens? Surge, & meam devotè pertracta Passionem, & in amaritudine tuum vinces dolorem.* Surrexit, pertractavit, amaricatus est, vicit. Imò non est amaricatus. Nam ex eo, quòd JESUS gustaverit, myrrha amarissima fit favus dulcissimus, & vinum sapidissimum; nec jam amplius torquet sua amaritudine, sed recreat: & inebriat instar generosissimi vini. (p) O Religiose aride, tribulate, desolate! quid sedes otiolus? surge! pertracta passionem Domini, & in amaritudine dulcissima vini myrrhati dolorem vinces. Fac, velis.

Et quid nî velim, ô Domine! potari de torrente voluptatis tuæ? Surgam igitur, & tecum bibam vinum tribulationum, sciens, quòd in recordatione tui potûs dulcedinem expertus sim; nam dulcia non meruit, qui non gustavit amara.

Pater, & Ave.

O Amor Crucifixæ! miserere mei.

(m) Matth. 27. (n) Cant. 5. (o) apud Rudolpb. de Saxon p. 2. vitæ Christi c. 15. (p) Jacob Tyrinus in eit. passum ex Cant.

L 5.

Statio

Statio XI.

Christus Cruci affigitur.

✠. Adoramus te, ut suprà.

CUm unicè in votis fuerit Judæis JESUM Crucifixum cernere, & mortuum : idcirco rabidorum instar canum eum invadunt, perfodiunt, trahunt, dilaniant, & quasi exenterant, velocésque non tantum pedes, sed & manus eorum fuere, ad effundendum sanguinem JESU Christi.

Hos Judæos, carnificésque imitatur, aut superat luridus Sacerdos, qui, quàm primum corpus JESU de cœlo tractum, in suas cruentas accepit manus, statim incipit crucifigere, illud in altare (velut denuò in duram crucem) prosternendò raptim, hinc inde raptandò, discerpendò, accelerandò, donec illud quasi occisum videat in suo stomacho. Cuidam ex horum numero quondam in aurem dixit S. Bonav. Epif. *Virginis Filium trahetis*. Sed repones : parcendum esse candelis, hominésque non detinendos. Ast heus tu ! ut candelis parcas, Filio Dei non parcis ! crudelis es in Deum, pius in candelam. Prò pudor ! ad hæc homines, sæculares etiam summoperè scandalizantur, & scandalò datò detinentur. Post hanc crucifixionem, velut triumphans de musca Domitianus, ad fabulas converteris. Ah utinam ! pectus sunderes dicens : *Verè Filius Dei erat iste.* (q)

O Christe JESU ! ego, qui mea in celebrando luriditate, & post celebrationem ingratitude tor-

toris

toris personam sustinui : studebo deinceps per devotissimam celebrationem Sacerdotis partes implere. Ah ! auge in me reverentiam tanto Myserio debitam , Amen.

Pater, & Ave.

O Amor Crucifixe ! miserere mei.

(9) *Matth. 27. v. 54.*

Statio XII.

JESUS in Cruce moritur.

Ÿ. Adoramus te, ut suprà.

Aspice, ô anima Religiosa ! Deum tuum in Cruce pendentem, titubantem, desolatum, & morientem. Aspice ! nam JESUS aliud pro morte sua à te præmium non expectat, nisi unicum ejus in Cruce aspectum.

Aspice ! sed affectu beatæ Elisabeth, (r) cui ex aspectu Crucifixi, honores, pompæ, sæcularia desideria, & cura carnis, adeò desipuerant, ut deliquium passa in terram conciderit. Utinam & illa tibi tandem desiperent ! Aspice ! sed oculis illis, (s) quæ per Ecclesiam ad choreas properans, conspecta Crucifixi imaginis hæc verba sibi dici audivit : *Vade; frue mundanis vanitatibus, oblita, quòd ego tui causâ in cruce suspensus, & extensus hæream.* Qua voce, velut fulmine icta, corruit, mundo valedixit, & in ordine Carmeli adeò virtutibus splenduit, ut palàm constaret, quid sit JESUM aspexisse crucifixum. Vade & tu,
 Ô Re-

ô Religioſe ! vade ! & delectare vanitatibûs , & diſſolutionibûs. Sed quæſo te ! vel ſemel JEſum pro te Crucifixum aſpice. Si hic te aſpectus non moveat, vades, imò properabis ad æternam perditionem.

O JEſU ! quò vadam, niſi ad te ? vulnerâſti cor meum : ô Dilecte mi ! vulnerâſti , & rapuiſti illud ab amore vanitatum , & levitatum, ad amorem Crucis, ad ſitum Religioſæ obſervantiæ , ad fugam tepiditatis, O Amor mi ! nè permittas me ſeparari à te ! ô bone JEſU exaudi me !

Pater, & Ave.

O Amor Crucifixæ ! miſerere mei

(r) *Surius in vita. (s) B. Anna à S. Bartholomæ apud P. Fritſch. f. 120.*

Statio XIII.

Corpus Chriſti de Cruce deponitur.

✠. Adoramus te, ut ſuprà.

POSTquam JEſUS emiſit ſpiritum, per manus Joſephi, & Nicodemi, depositus eſt de Cruce, & ad ſinum Virginis Matris reclinatus.

Talis decuit ſinus Crucis amatorem Chriſtum. Aſt, ſi ego in Cruce pœnitentiæ, & veræ Religioſitatis mortuus fuerim, tunc non hominum, ſed Dei manibus de cruce deponendus ſum, & deportandus, non in ſinum hominis, ſed in ſinum Abrahæ, ut ibidem hæreditatem capiam ſalutis.

Ita

Ita nimirum Deus amat Crucis Religiosæ amatores! & ego eam tam parum amo!

OMARIA, Virgo dolorosissima! per tuos, & Filij tui dolores rogo te: illos tuos misericordes oculos ad eundem Filium tuum pro me miserabili peccatore converte, ut verum mihi instillet crucis amorem, & post crucem præsentis miserix, felicem ad sinum Abrahæ depositionem, Amen.

Pater, & Ave.

O Amor Crucifixæ! miserere mei.

Statio XIV.

Sepelitur Corpus Christi.

¶ Adoramus te, ut suprà.

Christus est sepultus, postquam vitam triginta trium annorum laboribus, sudoribus, ærumnis, & doloribus, sed & meritis plenam, finierat.

Religiose! si tu hodie deportareris ad sepulchrum, quot putas, numerares annos in Religione transactos: annos, inquam, non ætatis, sed Religiositatis, sanctitatis, laborum, mortificationum, meritorum! *Filius unius anni erat Saul, cum regnare cœpisset.* (t) Et quot annorum tu eras filius verus tui S. Fundatoris; cum sepeliri cœpisses? forsan nec unius diei, nè dicam anni. Exurge igitur, qui dormis, & illuminabit te Christus. *Si enim persona Religiosa, sui tantum commodi sordide studiosa, ut plurimum de peccatis solum gravioribus cavendis sollicita fuerit, de reliquo aut ex*
malitia

malitia, aut negligentia in omnem sese laxitatem effuderit, ingratitude hæc erga Deum gravissimam meretur censuram. (u)

O Domine Deus meus ! fateor : licet multos jam annos in Religioso statu, & habitu numerem, si tamen Religiosam perfectionem computaveris, infans unius diei sum. Ast nunc tandem serò licet, tua Divina vegetante gratia, ab infantia mea Religiosa, excussis vanitatum, ac tepiditatum crepundiis studebo evadere in virum perfectum, in plenitudinem ætatis Christi, Amen.

Pater, & Ave.

O Amor Crucifixæ ! miserere mei.

(t) 1. Reg. 13. (u) Cam Hecl. p. 3. solit. sac. f. 74.

Statio XV.

Crux Christi salvifica.

†. Adoramus te, ut suprà.

HÆc est Crux illa, quæ quindecim pedes longa, & octo lata, humeris Salvatoris incubuit, & eum morientem sustentavit.

Nunquid gauderes, ô Religiose ! si tibi vel minima hujus sanctissimæ Crucis particula obtingeret ? utique. Sed en ! non particula tantum, sed tota Crux te expectat. Venalis est ; compara eam, si vis. Vacua est, te expectat, & à te possideri tota parata est. Occupa igitur, & ascende eam. Non deterreat te ab ejus consensu, Crucis altitudo, aut ab emptione, pretium. En tres gra-

dus

atemes-
vissimam
multos
merem,
taveris,
serò li-
tia mea
tum cre-
um, in

duſ tibi ſuppono, totidémque, quibùs eam coë-
mas, denarios. Qui illi? primus eſt poſſibilis
parſimonia in cibo, & potu. Secundus: omnis
poſſibilis taciturnitas. Tertius: attenta, & fer-
vens oratio. Hos applica gradus: hos expende
denarios; & haud procul aberit, quin ſis perfe-
ctus Crucis poſſeſſor.

O ſalve amatum Crucis pignus! in meos te the-
ſauros inferam. Non pœnitebit, nec terrebit
me trium illorum denariorum pretium. Dicat homo
inferior, quidquid velit: mea eris tota! Amen.

Pater, & Ave.

O Amor Crucifixe! miferere mei.



PRAXIS X.

Statio I.

Injuſta Pilati contra Chriſtum ſententia.

- ¶ Adoramus te ſanctiſſime Domine JESU Chri-
ſte, & benedicimus tibi!
¶ Quia per ſanctam Crucem tuam redemiſti
mundum.

CHRISTUS nec conſeſſus, nec convictus, nec legiti-
mè accuſatus, ſed ab ipſo Judice pro inno-
cente agnitus, damnatur nihilò minus ad probro-
ſam Crucis mortem.

In hac ſententia contra prima Juris, ac æqui-
tatis principia, erratum eſt. Ah! utinam non er-
ràſſem

râssem ego contra prima Statûs Religiosi principia ! Quæ illa ? (a) *primum principium* status Religiosi est : *Vivendum esse juxta voluntatem superioris*. Et ego juxta meam volui vivere. *Primum principium* est : quòd *status Religiosus sit status Penitentia*. Et ego meas sectatus sum commoditates. *Primum principium* est : *non affigere animum certo loco, officio, rei, personæ &c.* Ego autem non fui penitus indifferens. *Primum principium* est : *impossibile esse, placere omnibus*. Et ego turbor, si rectè factò, uni, alterive displiceo.

O JESU ! contra prima statûs Religiosi principia erravi, & eheu ! frequenter nimis. Injusta tamen Pilati sententia dedocebit me meos graves errores, & Divina tua aspirante gratia efficiet me Religiosum Principistam, Amen.

Pater, & Ave.

O Amor Crucifixe ! miserere mei.

(a) *Camill. Hector. p. 3. solit. Sac.*

Statio II.

Christo Crux imponitur.

✠. Adoramus te, ut suprà.

A Udicâ mortis sententiâ tripudiant Judæi, ac exultant, quòd victoriam contra JESUM innocentissimum reportârint. Hinc currunt, & gravissimum Crucis truncum ad pedes JESU projiciunt, ab eo tollendum.

Hæc Judæorum detestanda exultatio quavis cruc

ce g
nin
illud
male
ut g
tua
quo
steno
cton
ctûs
mili
Chr
inflig
In h
mor
& ab

✠.
E
fere
luit
usque
cat

ce gravius honestissimum JESU Christi affixit animum. Vide Religiose ! an non simili dolore cor illud amabilissimum diserucies, dum lætaris, cum malè feceris, & exultas in rebus pessimis ? Absit ! ut glorieris de tua velocitate in celebrando : de tua dexteritate, in tuo inimico denigrando, aut quovis modo lædendo ; de tua audacia in resistendo Superioribus, & contradicendo : de victoria in computando, de tui præstantia intellectus, rebúsque, ut ut bene peractis, & alijs similibus, quæ mundo risum, & admirationem, Christo autem, & tuæ animæ non leve vulnus infligunt.

O JESU ! absit à me tam temeraria gloriatio. In hoc solo deinceps gloriabor, si ex amore amoris tui meipsum possum vincere, mortificare, & ab alijs toleranter mala pati, Amen.

Pater, & Ave.

O Amor Crucifixæ ! miserere mei.

Statio III.

Christus primò succumbit Cruci.

¶ Adoramus te, ut suprà.

Extremè infirmus cadit ; sed miraculosè refarcitis viribús, quæ ad Crucem dolorosissimè ferendam ægrè sufficerent, denuo procedit. Noluit scilicet non crucifixus mori, tactus obediens usque ad mortem.

Hujus suæ admirandæ obedientiæ testem invocat universum mundum : (b) *Ut cognoscat mundus,*
M
quia,

quia, sicut mandatum dedit mihi Pater, sic facio; surgite: eamus hinc. O Religiose! si tu aliquando diceffurus es ex hoc mundo, potesne salvâ conscientia vel à solo superiore tuo tale petere testimonium, quòd exactè, promptè, alacriter, absque contradictione, absque strepitu, murmure, & indignatione, executus sis omnia, quæ præcepit tibi Pater, id est, tuus Superior, aut Pater Divinus in tuo Superiore? An verò fors in illis tantum fuisti obediens, quæ non fuere contraria appetitui sensitivo? aut, si fuere contraria, obedivisti quidem; sed ex mero respectu humano, cum multa amaritie animi &c.? Profectò cum simili testimonio non admitteris ad universitatem cœlestem.

O JESU! facite obediens non tantum usque ad terram, sed usque ad mortem Crucis! tuis ego pedibus subterno omnem meam voluntatem, & universam meam libertatem. Vos jam, ô Superiores mei sacratissimi! præcipite, quidquid velitis, modo non sit contrarium animæ meæ, & Regulæ nostræ: & ego amore JESU obedientissimus ero vobis obediens usque ad mortem, Amen.

Pater, & Ave.

O Amor Crucifixæ! miserere mei.

(b) Joam. 14. v. ult.

Statio IV.

Christus obviat Matri.

✠. Adoramus te, ut suprà.

REX cœli Christus JESUS, sicut voluit Matrem coronare cœlorum Reginam, ita voluit ingentium dolorum suorum non spectatricem tantum, sed & consortem.

Lex Medorum, atque Persarum erat, ut omne decretum, quod constituerit Rex, non liceat immutari. (c) Verius hæc lex est Christianorum, ac Religiosorum, ut omne decretum, quod constituerit Rex cœli, & terræ, non liceat immutari. Constituit autem JESUS Christus hanc legem: *(d)* *Ego dispono vobis, sicut disposuit mihi Pater meus, regnum.* Quomodo autem disposuit tibi Pater regnum? *Per calicem Passionis*, ait. *(e)* Hunc calicem etiam gustare debuit Mater sacratissima. Gustavit etiam, & multum gustavit, & plus cæteris omnibus creaturis rationalibus. Religiose! vides jam: aut nolle regnum, aut velle calicem passionis debes. Quare ergo nihil vis ab altero sufferre? à te ipso nihil mortificationis pati? aut cur patiendi occasionem, à Deo permissas, & immixtas maximopere respuis? Cave: ne regnum respuas.

O JESU! *si non potest hic calix transire, nisi bibam illum, fiat voluntas tua. (f)* Calicem salutis, & regni æterni, accipiam, & non dimittam. Non horrebo spinas, ut rosis potiar. Amarus sit li-

cèt cortex , dulcis est nucleus. Gustabo ego cum JESU , gustabo cum MARIA , cujus inter-ventu spero fore , ut frequens hujus calicis eva-cuatio proficiat mihi in vitam æternam , Amen.

Pater , & Ave.

O Amor Crucifixe ! miserere mei.

(c) Dan. 6. v. 15. (d) Luc. 22. (e) Oleaster in loc. cit. (f) Matth. 26.

Statio V.

Simon cogitur Crucem ferre post JESUM.

✠. Adoramus te , ùt suprà.

CUM JESUM denuo viribùs destitui cernerent carnifices , in Simonem Cyrenæum , toto corpore , & animâ reluctantem , & sese subdu-cere satagentem , transferunt pondus Crucis.

Quid ais ? ô Simon ! an Filius Dei esse detre-ctas ? si ità : plus te tua confundet amentia , quàm humilis bajulatio Crucis. Si non detrectas : er-go nec Cruci te subducere debes ; Si enim Deus flagellat omnem Filium , quem recipit ; sine dubio , quem non flagellat , non recipit. (g) E duobus eli-ge , quod velis : dum enim Crucem sustines , aut sanctus es ? & probaris. Aut peccator ? & injustè quereris , minora sustinens , quàm mereris. (h) Hæc tibi dicta crede , ô Religiosè ! & in omnibus , quæ adversa pateris , te ipsum intrans examina , an crucem patiaris , ùt sanctus ? an ùt peccator ? Non ùt sanctus ; aliàs non esses adeò impatiens.

Si

Si ut peccator : Crucem meruisti , & majorem
meritus contrà minorem injustè quereris.

O Deus ! digna ego factis recipio. Tu con-
cede , ut per Filij tui patientis innocentiam , me-
us , nocentis, reatus in Cruce ejusdem deleatur,
Amen.

Pater , & Ave.

O Amor Crucifixe ! miserere mei.

(g) S. Aug. ser. 105. de temp. (b) S. Hier. Ep. 25.
ad Paulam.

Statio VI.

Veronicæ erga JESUM officiositas.

†. Adoramus te , ut suprà.

Miserandus erat aspectus faciei Divinæ , quam
omni possibîlî , à diabolis inspiratò modò , de-
honestavit Judaica perfidia. Hinc Christo intimè
compassa Veronica , velò capitis sui , sordes de-
terfit.

Assistat hic devota anima (exclamat V. Beda, (i)
& Passionis colligat fasciculos , in quos , nè pereant ,
pretiosas guttas suscipiat ; rubicundum Dilecti sui
corpus (faciem) fletu abluat , & gratiarum actione
tergat. O Religiose ! accede , & foetentia sputa ,
ulcera , rabiem , & concretum frigore sanguinem ,
à facie Domini amove. Poterisne hoc facere
absque horrore , & nausea ? vix poteris. Qua-
lem ergo foetorem , & horrorem habebunt tua
peccata , & transgressiones , coram facie Domini ?

M 3

Ah !

Ah ! non sum ille , quem tu formâsti , innocens , justus , & pius ; sed confusio cooperuit faciem animæ meæ. O JESU mi ! in sanguine tuo reforma me , nè perdat iniquitas mea , quem tua fecit , & refecit omnipotens bonitas , Amen.

Pater , & Ave.

O Amor Crucifixæ miserere mei.

(i) Ser. 6. de Pass.

Statio VII.

Christus secunda vice cadit in terram.

†. Adoramus te , ut suprà.

REdeunte virium defectu , JESUS denuò , (quod absque gemitu cogitari non potest :) in terram semi - mortuus prolabitur.

Cur hoc ? *Quia copiosa apud eum Redemptio.* (k)
Non sufficit ejus insatiabili Reverentiæ , ut una tantum vice pro meis peccatis prosternatur , sed iteratis vicibus , de genu supplex , veniam à Patre pro meis peccatis flagitat. Sequere Christum , ô Religiosa anima ! non sufficiat tibi , vota tua solemnia quoad substantiam præcisè observâsse ; sed verbi unius suppressionem , aliquod honoris punctulum , & incommoditatulam aliquam supererogâ , & sacrificia : verbum pungens pleno guttore degluti : aures , oculosve quandoque paulisper cohibe. Sed utique non dices : hoc facere non esse peccatum. Nec enim Christus peccasset te non redimendô , nec David præ siti ferè moriens ,

riens, aquam exhauriendô. Et tamen Christus infinita supererogavit : & David *aquam noluit bibere, sed libavit eam Domino.* Et Rex erat David, ac miles ; nos Religiosus. Hic stans delibera, an exemplum Christi tuam mereatur sequelam ?

O JESU ! si tuum me non movet exemplum, merito timeo, nè tanquam ovis scabiosa à tuo excludar ovili. Plurima tu prome fecisti, & passus es : deinceps plura etiam ego pro te faciam, & patiar. Vincam, quod delectat : fortiter aggre-
diantur, quod terret : feram leniter, quod do-
let.

O Amor Crucifixe ! miserere mei.

Pater, & Ave.

(k) Psalm. 129.

Statio VIII.

Mulieres lugentes, super JESU.

† Adoramus te, ut suprâ.

V Idens JESUS fletum, & luctum Mulierum, conversus ad eas dixit : *Nolite flere super me ; sed super vos ipsas flete, & super filios vestros.* (l)

Hic verbis (ait non nemo) Christus Mulieres, si-
bi condolentes, ad inferni penas jubet respicere : nec
extremos suos doleres æstimat his comparatos. (m)
Quod Deus innocuus, quod amicus noster, & bene-
factor maximus ; quod à sceleratis, quod ab electo
populo suo, & à tam ingratis patiat : quod in
opibus, in fama, in honore, per contemptum Di-

vinitatis suæ, & mille opprobria; quòd in potentiis, sensibus, ac membris omnibus, quòd diversissimo, ac atrocissimo suppliciorum genere patiatur: hoc totum parum est, ac vix defendendum, si ad futuras reproborum pœnas attendamus. Pœna Christi temporalis fuit, pœna inferni est æterna. Illa erat Patris Filium castigantis; hæc est hostium: illa misericorditer plectentis Dei; hæc nunquam misereantis: illa crudelis quidem, hæc prorsus immanissima. O peccati pravitatem, & gravitatem!

Ergóne, mi JESU! potiùs vis, ut mihi, quàm tibi compatiar, nè veniam in hunc locum tormentorum, quem quidem peccata mea sæpius meruère: te tamen iniquitates meas portante ab illa voragine hætenus præservatus sum. Tu eras lignum viride: ego aridum; sed nè excidar, æternis incendiis deputandus, nunc firmissimè statuo: infinities millies mori malo, & omnia, etiam ipsius inferni tormenta, sustinere, quàm gravè te peccatò offendere, Amen.

Pater, & Ave.

O Amor Crucifixe! miserere mei.

(l) Luc. 23. (m) P. Masenius in Duce viæ.
Medit. 3. diei 6.

Statio IX.

Tertius Christi lapsus.

ψ. Adoramus te, ut suprà.

Christus Crucem sibi bajulans, totus quantus dima-

dimanabat sanguine, tum ex Crucis concussione, tum ex verberum condensatione. Verbô : adeo viribus erat exhaustus, & doloribus obrutus, ut tertia vice crudeliter in terram prosterneretur.

In hac figura, cùm Christus B. Catharinæ Genuensi apparuisset, ipsa hoc spectaculo summo opere commota exclamavit : *O JESU! non amplius peccare: o JESU! non amplius peccare.* Dein protinus confessione generali præterita delicta expiavit, ac tantum de peccatis horrorem concepit, ut sanctitatis miraculum evaderet. (n) Aspice, ô anima mea pari affectu JESUM, & exclama, dolore cordis tacta intrinsecus : *O JESU! non amplius peccare. O JESU! non amplius peccare.* Et certè infinita est audacia peccatoris, qui post tale spectaculum peccare non formidat. (o)

O JESU! non amplius peccabo. Non lavabo manus meas in sanguine innocente. Divinus tuis pedibus advolutus per tuum te sacratissimum sanguinem, & cruenta obtestor vulnera : efficacem confer gratiam, ut non amplius peccem tibi. *O JESU! non amplius peccare.*

Pater, & Ave.

O Amor Crucifixæ ! miserere mei.

(n) *P. Frut. cb. f. 82.* (o) *S. Thom. Vill. ser. 2. Advent.*

Statio X.

Christus probrosè denudatur.

✠. Adoramus te, ut suprâ.

EXtremam confusionem ex probrosissima vestitum

M 5

stium

fium detractiōe sustinet honestissimum, & Regium cor JESU Christi.

Accede, Religiosa anima ! JESUM tuum contege, & tuniculam consue ex quotidiana quadam devotione erga dolorem hujus tremendæ verecundiæ, ut in hora mortis audire merearis à Christo, quod olim ille : *Martinus adhuc catechumenus hac me veste contexit.* Operire nudos est actus misericordiæ corporalis, quem, cum non possis exercere corporaliter, exerce spiritualiter, JESUM piis affectibus, & devotiunculis vestiendò.

O verecundissime JESU ! ago tibi cordialissimas gratias, pro ineffabili illo pudore, & rubore, quem in ignominiosissima, ac dolorosissima vestium tuarum detractiōe persensisti, eumque cum intima gratitudine, ac compassione offerens, rogo, ut ejus virtute in gratiam tuam me recipias, & ab æterna confusione, quam quidem peccatis meis sapius merui, misericorditer præferves, Amen.

Pater, & Ave.

O Amor Crucifixæ ! miserere mei.

Statio XI.

Christus Cruci affigitur.

✠. Adoramus te, ut suprà.

IN Crucem immani rabie prostermitur agnus Dei innocentissimus, ejusque manus, & pedes, obtusis, ac oblongis clavibus perforantur.

Heu factum malè ! Judæi JESUM crucifigunt,
non

non attendentes publicum ipsius Judicis testimonium : se nullam in eo mortis causam invenire. (p) Reponunt perfidi unanimiter vociferantes : *Reus est mortis.* Sed quæ mortis causa ? *Filium Dei se fecit.* (q) Ah utinam similis causa inveniretur in me ! Extremè oppositum de me verificatur, qui, cum essem filius Dei per gratiam, feci me filium diaboli per peccatum. Ego igitur sum reus mortis ; & tamen nemo me condemnavit.

O JESU ! per Passionem tuam amarissimam destrue in me, quod ego feci , ut reformetur in me quod tu fecisti ; nè deinceps coram tremendo tuo tribunali reus mortis inveniatur , & cum filijs diaboli æternùm excrucier, Amen.

Pater, & Ave.

O Amor Crucifixe ! miserere mei.

(p) *Joan. 19.* (q) *Ibidem.*

Statio XII.

Christus in Cruce moritur.

†. Adoramus te, ut suprà.

Jesus Nazarenus Rex Judæorum (quò titulò eum insignivit Pilatus pro Crucis superscriptione) confectus vulneribùs, consummatus ingentibùs doloribùs, tandem in manus Patris beatum emisit Spiritum.

Considera Religiose ! qualiter JESUS Regis titulum, quem alias nec acceptavit, nec usurpavit, sed extremè fugit, in Cruce suspensus, & extensus

extensus admittat. Voluit nimirum è cathedra Crucis docere, illum verè esse Regem, qui mundo, & cui mundus est crucifixus. Eja age ! se-
pone humilitatem, Regiam ambito dignitatem !
conscende thronum ; & esto Rex passionum tua-
rum, affectuum, pravorum carnis, diaboli, &
mundi universi !

O JESU ! quia tibi placet, ut Rex sim ego :
Doce manus meas ad prælium, & digitos meos
ad bellum : ut contra hostes, & invalores regni
mei, strenuè decertem, & per gratiam tuam trium-
phem, Amen.

Pater, & Ave.

O Amor Crucifixe ! miserere mei.

Statio XIII.

Depositio Christi de Cruce.

†. Adoramus te, ut suprà.

Corpus Dominicum, de Cruce depositum, ad
sinum Virginis Matris reclinatur. Quare ?
ideò, ut aëris inclementiâ, & mortis frigore con-
gelatum in amorosissimo Virginis Matris sinu, qua-
si foveatur.

Et quis æstimabit amoris incendium, quo B. V.
MARIA conflagraverit viso cruento, ac excarni-
ficato Filij sui corpore ? S. Maria Mag. de Pazzis
(r) in aspectu Crucifixi tanto amoris agebatur im-
petu, ut per Monasterium cursitans, alta voce
identidem ingeminaret: ò Amor ! ò Amor ! ò Amor !
Quomodò ergo Mater amantissima temperare si-

bi potuerit, quin in aspectu non crucifixi tantum, sed & dilaceratissimi corporis Filij sui per incomprehensibilem intolerabilis amoris excessum exclamârit : *O Amor ! O Amor ! O Amor.*

Ah Divine Amor ! cordi meo frigidissimo te pariter insinua : & vel minimum igniculum sinceri amoris in eodem excita ! ita rogo te per reverentiam ardentissimi amoris illius, quod te Mater tua Virginea, de Cruce depositum excepit, Amen.

Pater, & Ave.

O Amor Crucifixe ! miserere mei

(r) in ejus vita.

Statio XIV.

Corpus Christi defertur ad sepulchrum.

✠. Adoramus te, ut suprâ.

EX oculis Matris, ac devotorum Christi Discipulorum delatum est Corpus Domini ad monumentum, ibidemque sepultum.

Sepultô Dominô non sepeliebantur ejus mira facta, & gesta ; sed Spiritus S. insiluit in Apostolos, & Evangelistas, qui de ejus gloriis operibus, vita, conversatione, miraculis, passione, & morte sunt testificati. O Religiosè tepide ! si post tuam mortem exurgeret quidam Notarius, tua facta Religiosa conscripturus : Quid aliud posset scribere, nisi hoc solum : Hic homo promisit Deo multum, & servavit parùm. Aut : *Hic homo cepit ædificare, & non potuit consummare ?* (s) Stude igitur

igitur æternitati laborare, ut tui memoria apud Deum in benedictione sit.

O JESU ! da gratiam, ut, qui hætenus vivus jam in sepulchro ignaviæ, & teporis delitui, post-hac incipiam vitæ spiritualis signa, & opera edere, nè coram te appaream mortuus ; sed annotari merear in libro viventium, & beatæ prædestinationis, Amen.

Pater, & Ave.

O Amor Crucifixæ ! miserere mei.

(f) *Luc. 14.*

Statio XV.

Signum sanctæ Crucis.

†. Adoramus te, ut supra.

Helena Imperatrix sedulò Crucem quæsit, inventamque amavit, ac honorificavit. Hinc majus sibi decus ex S. Cruce, quam ex imperatorio titulo comparavit.

O Religiosè ! esto & tu sedulus Crucis amator, & eris Imperator passionum tuarum, eas in Crucem agendò, de Cruce, & tribulatione gaudendò, ac gloriandò. Et parem cum B. Helena fructum feres, nimirum gloriam sempiternam.

O JESU ! ab humili Crucis tuæ amore generosiores mihi suggere Spiritus, ut ad imperatoriam potestatem erga hostes tuos, irrefrenatas meas concupiscentias, exercendam promptus inveniar ;


quate

quatenus adimpleam illud : *Sub te erit appetitus tuus, & tu dominaberis illius.* (t)

Pater, & Ave.

O Amor Crucifixæ ! miserere mei.

(t) *Gen. 4. v. 7.*



PRAXIS XI.

Statio I.

Christus injustè condemnatur.

†. Adoramus te sanctissime Domine JESU Christe, & benedicimus tibi !

&. Quia per sanctam Crucem tuam redemisti mundum.

A It Pilatus ad Judæos JESUM per invidiam accusantes : *Accipite eum vos, & secundum legem vestram judicate.* (a)

Pariter Divinus Pater ad sacrificantes, aut communicantes, videtur dicere : *Accipite eum vos, & secundum legem vestram judicate.* Et revera accipiunt eum in manus suas, in os, & in cor. Judicent ergo eum secundum legem suam. Quanam illa ? Non alia, quam ut omnî possibili reverentia eum tractent : ut fervido eum affectu adorent : ut dignos Deo mores ostendant : ut in vocatione, qua vocati sunt, ædificatoriè ambulent. Judicâstine, fecistine secundum legem hanc ?

O DEUS ! conscientia mea me reprehendit, & damnat,

damnat, ac arguit de peccato luridæ præparationis, & indignæ conversationis. Studebo deinceps me emendare, & ad corpus tuum Eucharisticum digniùs accipiendum, ac tractandum, devotius præparare, Amen.

Pater, & Ave.

O Amor Crucifixe! miserere mei.

(a) Joan. 18.

Statio II.

JESUS Crucem suscipit.

✠. Adoramus, te, ut suprà.

UT primùm ad Crucis mortem condemnavit Jesum Pilatus, mox Judæi gravem Crucis trabem ad pedes JESU projiciunt: JESUS autem mox se inclinat, ac cum ingenti animi promptitudine, haud secùs, ac si pretiosum tolleret thesaurum, eandem de terra in suos levavit humeros.

Disce à Christo, ô Religiosè! promptè, & alacriter te cuivis Cruci inclinare, eamque in humeros tuos imponere; & experieris, Crucem non esse pondus, sed subsidium: non onus, sed levamen. Expertus id est Theodosius Imperator, qui, cum in Regia aula deambulans, lapidem conspexisset Cruce signatum, Crucis reverentià commotus præcepit eum tolli, & loco honestiore collocari: quo sublato alius denuo apparuit lapis, pariter Cruce sacrâ notatus, & post hunc

tertius

terius, quibûs pariter sublatîs ingens thesaurus inventus est. (b) Ecce ! quòd Theodosius lapidem Cruce signatum levaverit, incomparabilî thesaurò ditatus est. Quò non thesaurò te putas positurum, si ipsum salvificum Crucis signum cum Salvatore tuo in tuos levaveris humeros, & patienter mortificationes, tibi à temetipso, aut ab alio inflîctas, portaveris. Hanc veritatem quidem agnoscis ; sed non observas.

O JESU ! per illam infinitam dignationem, quâ te alacriter ad suscipiendam pro me Crucem inclinâsti, rogo te : inclina voluntatem meam ad omne adversum pro te promptè suscipiendum. Amen.

Pater, & Ave.

O Amor Crucifixe ! miserere mei.

(b) *P. Fritsch. f. 142.*

Statio III.

Christus primò sub Cruce corruit.

†. Adoramus te, ùt suprâ.

Afflîctus, contritus, excarnificatus, sanguine difluens, sanie scatens, livore tabidus, sputis deformatus, innumerîs vulneribûs debilitatus, ac semi-mortuus Salvator sub immani Crucis pondere fatiscens in terram prolapsus est. Spectaculum sanè non miserandum tantùm, sed & expavescendum.

Et quis inhumanus adeò sit, & brutus, quem

terrificus iste sui Creatoris aspectus non moveat ? Si enim amici Job non potuere videre sedentem in fumo dolorosum, & afflictum, quin extrema commiseratione commoti adeo fuerint, ut testatur Scriptura: (c) *Exclamantes ploraverunt, scissisque vestibus sparserunt pulverem super caput suum, & sederunt cum eo in terra septem diebus, & septem noctibus, & nemo loquebatur ei verbum: videbant enim dolorem esse vehementem.* Quod cor Religiosum præ luctus vehementia non contabescat, videns, & poderans (si tamen ponderari possunt) abyssos dolorum JESU Christi ?

O abyssalis dolor ! quia te non possum capere, cape me : & lacrymas ex oculis, singultus ex corde, ex anima compassionem, & mortualem peccatorum horrorem extorque, Amen.

Pater, & Ave.

O Amor Crucifixe ! miserere mei.

(c) *Job. 2. c. v. ult.*

Statio IV.

Christus occurrit Matri.

¶ Adoramus te, ut supra.

Virgo Deipara tristi spectaculo lugubrem Filij sui vultum, antequam moreretur, studuit contemplari, ut eò dolorosius eidem comparetetur.

Imitare, ô Religiosa anima ! exemplum singularis omnium Religiosorum Patronæ MARIE, ut, quem-

quemadmodum ipsa sollicitè quærebat occasiones
videndi suum dilectissimum filium, eique postre-
mò colloquendi, priusquam in ara Crucis pro to-
tius mundi delictis sacrificaretur; ita & tu, an-
tequam eum in altari incruentò modò sacrificas,
aut sumis, inspicias eum patientem. Non te pœ-
niteat doloris exinde concipiendi, aut temporis
consumendi. Vera enim, & condigna præpara-
tio ad memoriale Passionis celebrandum est ipsa
sacratissimæ Passionis compassiva recordatio.

O JESU! qui incruentum sacrificium in perpe-
tuum tuæ Passionis memoriale instituisti: concede
propitius, ut per merita dolorosissimæ Matris tuæ
cum frequenti hujus sacrificij celebratione, & par-
ticipatione crescat compassiva tuæ amarissimæ Pas-
sionis memoria, Amen.

Pater, & Ave.

O Amor Crucifixæ! miserere mei.

Statio V.

Simon cogitur ferre Crucem.

¶ Adoramus te, ut suprà.

SImonem Cyrenæum, qui lamentabili aspectu
JESU nec quicquam commotus est, coëgère
Judæi, ut Crucem ferret post JESUM extremè
debilitatum.

Certè Simon id obsequij non denegasset homi-
ni, qui magna ejus debita expunxisset, eum è
carcere liberasset, aut morti proximum sanasset,
aut propter grave delictum capitis damnatum libe-
rasset.

râffer. Et quid faciat Religiosus Deo suo, qui gravissima peccatorum debita, sua omnia expendendô, solvit; ab æterna captivitate impendiô suæ libertatis eripuit, lethaliter decumbentem suo sanguine sanavit, sempiternæ mortis reum suæ vitæ pretiô vindicavit? Hoc faciat, & in vicem gratitudinis humeros Cruci, & afflictionibus unde unde adventantibus patienter subdat, suumque corpus supererogatorijs quandôque mortificationibus spontè subjiciat. Hoc enim meretur Deus, hoc gratitudo postulat.

O JESU! da animum, ut te liberem, & me Cruce onerem: quia nec à me aliud exigis, nec ego tibi aliter satisfacere possum, nisi satis patiendô.

Pater, & Ave.

O Amor Crucifixæ! miserere mei.

Statio VI.

Veronica cum sudario.

✠. Adoramus te, ut suprà.

Veronica videns deturpatam adeò Divinæ faciei Majestatem, temperari sibi non potuit, quin accurrens mundô capitis sui velamentô maculas detergeret; sed pietatis suæ immensum retulit præmium.

Considera Religiose! quòd certò certius facies Divina Veronicæ velò non fuisset impressa, si illud Christo sinistro affectu porrexisset, forsan vanam aucupatura gloriam, aut misericordis, vel devotæ matronæ prædicatum relatura. Sed quæ

tua intentio in tuis operibus, laboribus, studijs, aliisque omnibus actionibus, etiam de se pientissimis? an unicè Divinæ spectas faciei reverentiam, honorem, & gloriam? Sanè, si aliorum collimas, frustra fatigaris.

Dirige Domine Deus meus in conspectu tuo viam meam, ut oculus rectæ intentionis sit lucidus, nec aliud laboribus meis expetam præmium, nisi faciem tuam Divinam, quam visurus sum ego ipse, & non alius, & oculi mei conspecturi sunt. Fiat! Amen.

Pater, & Ave.

O Amor Crucifixæ! miserere mei.

Statio VII.

Alter Christi sub Cruce lapsus.

ψ. Adoramus te, ut suprâ.

EX immanissimo licitorum procendi modo JESUS lacrymabili ruinâ in terram dejicitur, & ægerrimè sub Cruce respirat.

Ah anima mea! in te ipsam revertere: & relinque Domino Deo tuo vel modicum respirandi spatium, fractasque vires recolligendi, cessandò interim à tuis usitatis luritatibus, dissolutionibus, conversationibus, inveteratis tepiditatibus, quæ JESUM quodam modo propellunt, & mirum in modum defatigant. Propone hîc stante pede hac septimana singulari curâ abstinere ab ijs actibus, quibus nôsti te, leviter licet, sæpius tamen delinquere.

N 3

Respira,

Respira, ô mi JESU ! respira ! & spiritum sanctum tuum cordi meo inspira , ut novo fervore, novô studiô, novâ cautelâ leviores emendem errores , in quos frequentius prolabi solitus te saepius offendo , Amen.

Pater, & Ave.

O Amor Crucifixe ! miserere mei.

Statio VIII.

Turba Mulierum Christum lugentium.

¶ Adoramus te, ùt suprâ.

Mulieribus compassivâs lacrymâs sese deflentibus dixit Salvator : *Filiæ Jerusalem : nolite flere super me.*

En ! *Filiæ*, ait. O titulum paterno affectu plenum ! longè nobilioribûs titulis Religiosos condecorat amantissimus Deus Deut. 26. dicens : *Dominus elegit te , ut sis ei populus peculiaris , & custodias omnia præcepta ejus : & faciat te excelsiorem cunctis gentibûs , quas creavit in laudem , & gloriam suam , ut sis populus sanctus Domini Dei tui.* Religiose mi ! si nunc Dominus in hac imagine sua , sicut olim mulieres in via Crucis corporaliter alloqueretur : putas , possérne cum veritate te appellare *populum peculiarem*, segregatum à peccatoribus ? *custodientem omnia præcepta ejus ? excelsiorem cunctis gentibûs in mundi , & vanitatum contemptu , ac virtuosâs exercitationibus ?* si non : jure dicet tibi : *noli flere super me , sed super te ipsum flecto.*

Et ah ! utinam flerem super me, meosque defle-

ctus

cius in Religione commissos, desierem incessanter, ut universa tepiditate remota, excelsior cunctis gentibus, fiam pars digna populi peccularis Religiosi, quem creavit Dominus in laudem, & gloriam suam. Placebo igitur Domino in regione vivorum.

Pater, & Ave.

O Amor Crucifixe ! miserere mei.

Statio IX.

Christus tertio cadit.

ŷ. Adoramus te, ut supra.

Ubi ad pedem montis Calvariae ventum erat, subito viribus omnibus destitutus JESUS Christus lapsu horrendissimo jam tertio corruit.

Montis nomine intelligitur diabolus, cui dicit Christus : *tollere, & mittere in mare.* (d) Talis mons est quoque superbia, avaritia, gula, luxuria, acedia &c. Ad pedem igitur hujus montis cadit Christus, cadit ad pedes superbi, gulosi, acediosi &c. ut discas humiliari, gulam cohibere, acediam excutere &c. Infirmatur Virtus Dei, ut te confortet, ut te doceat dicere huic monti, superbiae, acediae &c. *Tollere, & mittere in mare* Passionis Dominicæ, ibidem fluctibus sanguinis JESU Christi absorbendus, & comminuendus. Eja Religiose ! tolle, & mitte in mare, si quos tecum circumfers montes, excute vitia, impugna impugnantem hostes spirituales.

O JESU ! qui ad pedem montis Calvariae su-

perandum vires naturales non habuisti : ecce ! ego non unum , sed multos , & ingentes quidem peccatorum , & pravorum habituū montes superandos habeo. Ah ! tu nōsti , quōd viribūs naturæ nihil possim : tua ergo infirmitate me firma , ut omnes illos montes è medio tollere , & superare valeam ; Amen.

Pater , & Ave.

O Amor Crucifixe ! miserere mei.

(d) Marc. 11. v. 23.

Statio X.

JESUS exuitur vestimentō.

✠. Adoramus te , ut suprā.

Sacerdos secundū ordinem Melchisedech Christus JESUS , futurus cruenta hostia , propriis exuitur vestibūs.

Perpende Religiosa anima ! quōd nemo Sacerdos ad sacrificium celebrandum absque Paramentis accedat. Ideo & summus Sacerdos JESUS se ipsum sacrificaturus propriis exui vestibūs , & paramentis solemnibūs , Episcopum animarum nostrarum decentibūs indui voluit. Quænam illa ? non usus est *Alba* , sed veste rubra , cute corporis , roseo tincta sanguine , mille vulneribus , tanquam gemmis intexta. Verticem sacrosanctum coronabat *insula* , non honoris , sed spinarum mille. *Manipulus* erant compedes , & manicæ ferreæ. Collum circumdabat *Stola* catenæ ponderosissimæ , & funis

funis furibus suspendendis destinatus. *Humeralis* erat Crux ponderosissima, & probrosissima. *Pedi Pa-*
storalis locò ferebat densatos baculorum ictus. *Plu-*
viale fuerat sanguis, & aqua globatim in terram
 defluens. Sic sacrificium istud instituit, & ob-
 tulit summus noster Sacerdos.

O Sacerdos ! ô victima ! ô JESU ! in his ut
 pamentis te intueor, amore langueo !

Pater, & Ave.

O Amor Crucifixe ! miserere mei.

Statio XI.

Christus Crucifigitur.

✠. Adoramus te, ut suprâ.

Summus Sacerdos JESUS, velut ad aram, ita ad
 Crucem resupinus inclinatur, & brachia, quan-
 tum potuit, expandit.

Mox aderant ministri, quorum unus alligata
 fortiter ad Crucem manu dexterâ, genibus bar-
 baris Divinum premebat pectus : alter validissimos
 intentat ictus, immiti clavocarnem, & ossa per-
 fracturus. Concutiebatur horrido tremore ma-
 nus, intumescabant venæ, & atro brachium co-
 lore suffusum est. Alij fune validissimo manui sini-
 stræ injecto, tantâ vi trahebant ad paratum clavi
 foramen, ut ingenti hiaret spasmò vulnus ma-
 nus dexteræ, quæ quidem infanda crudelitas di-
 vellebat brachia, rumpebat arterias, disjungebat
 membra, & horrida costarum diductione discru-
 ciabat pectus, nervosque, ac venas dilaniabat.

N s

Et

Et hi quidem, qui hæc faciebant, erant hujus cruenti sacrificij ministri. An meliorem te reputas sacrificij incruenti ministrum.

O JESU ! Minister quidem tuus sum, licet indignissimus : crudele tamen Judæorum ministerium detestor. Stylum verto, malleum arripio, & eodem non tuam Divinissimam carnem, sed peccatus meum percutio. Tu illud compassivo affectu penitus contere, Amen.

Pater, & Ave.

O Amor Crucifixæ ! miserere mei.

Statio XII.

JESUS in Cruce moritur.

†. Adoramus te, ut suprâ.

Cum extremis conflctans angustiis amantissimus Salvator, tandem inclinat venerandum caput, & beatissimam emittit animam. Judæi interea blasphema voce clamitant : *Si Rex Israël est, descendat de Cruce.* (e)

Audis hanc vocem, quisquis crucem pateris ? si rex passionum tuarum es, descende de cruce : Deus haud erit contrarius. Imò non descende ; sed persevera in cruce, ut Deus, Angeli, & homines dicere possint de te, quòd & de Christo in Cruce perseverante : *Verè Filius Dei erat iste.* (f) nimirum in humilitate, patientia, fortitudine, perseverantia, longanimitate. An hæcenus ostendisti te regem, aut filium Dei ?

O Deus meus ! ego non tantum de cruce descendi,

scendi, sed nec ascendi : nec rex passionum meorum fui, nec filium Dei me exhibui. Posthac autem & crucem exactissimæ observantiæ, ac patientiæ ascendam, & non descendam amplius, Amen.

Pater, & Ave.

O Amor Crucifixæ ! miserere mei.

(e) Matth. 27. (f) Ibidem.

Statio XIII.

Depositio Christi de Cruce.

†. Adoramus te, ut suprà.

EXpalluit Salvator, & mortuus ad sinum Matris deportatus est.

Tacet modò in se : in alio tamen clamat, & vocat me : (g) *Accede ad me, & da mihi osculum fili mi.* Alibi : (h) *Redite prævaricatores ad cor.* Accede ergo Religiosa anima ! & extremum da osculum Patri amantissimo. Redito ad cor, non ad JESU tantum, sed & tuum cor, ut, si illud sortè longè fuit ab amore JESU, deinceps non amplius recedat ; sed ut columba in foraminibus petræ, in caverna maceriæ incessabili gemitu defunctum ploret sponsum. Quod ut efficacius obtineas, ad Mariam conversus exclama :

O Mater sancta ! *Aperito mihi portas justitiæ (seu potius misericordiæ) ingressus in eas confitebor Domino : Hæc porta Domini, justi intrabunt in eam.* In hac porta : exonerabo me ab omni ini-

iniquitate mea, ut perveniam usque ad tabernaculum Divini amoris, ibique conflagrem, Amen.

Pater, & Ave.

O Amor Crucifixe ! miserere mei.

(g) Genes. 27. (b) Isa. 46.

Statio XIV.

Sepulchrum Christi.

✠. Adoramus te, ut suprà.

DE sinu Matris ad cor terræ deportatur Salvatoris cadaver, quocum cor Matris & commoriebatur, & consepeliebatur.

Priscis temporibus in Ægypto florebat *Congregatio commorientium*, in qua uno amantium moriente, & alterum mori necesse erat, cui cum Antonius, & Cleopatra nomen dedissent, illo vis sublato, hæc applicatis corpori quibûsdam viperis se ipsam enecavit. O Religiose ! si sapis, Congregationi commorientium, quam erexere JESUS, & MARIA, nomen dato : & ut illis commoriaris, applica cordi tuo flagra, catastas, coronam spinæ, ac clavos, ceu totidem viperas per frequentem compassionem : flagella quoque, & crucem mortificationis corpori tuo adhibe, & sic JESU, & Mariæ amoribus tuis, commorere.

O JESU ! Congregationis commorientium Institututor, & Præses ! per merita Matris tibi fideliter commorientis non tantum, sed & consepul-

in corde tenus, te deprecor : suscipe me in sanctam illam congregationem , ut in ea discam te amare, tibi compati, & mihi mori. O Amor sagittarie ! sagittâ tuâ cor meum feri ; ut langueam, moriar, & commoriar JESU, & Mariæ, & in corde JESU sepeliar , Amen.

Pater , & Ave.

O Amor Crucifixe ! miserere mei.

Statio XV.

Ad sanctam Crucem.

✠. Adoramus te, ut supra.

CRux sancta est statera Divinæ Justitiæ, in qua nostrorum peccatorum gravitas, & Redemptionis pretium , quod Redemptor nosterolvere venerat , ponderabantur. Huic ergo stateræ imposuit lacrymas, quas in sua fudit infantia ; sed Decreto Divinæ justitiæ nondum satis fecere : imposuit & sanguinem, in circumcisione effusum : & necdum sufficebat. Imposuit suam castitatem, paupertatem, obedientiamque parentibus præstitam, labores item, sudores, defatigationes, & lassitudines ; sed necdum satis. Imposuit etiam torrentem sanguinis in horro sudati ; Et nondum acceptavit Pater. Imposuit funes, catastas, & vincula, pugnos, & alapas. Necdum satis. Imposuit sputa, & opprobria, spinas, & coronam, arundinem, & purpuram, flagra, & columnam, ipsamque tremendam mortis sententiam. Ast licet singula fuerint de se sufficientissima pro mil-


mun-

mundis redimendis, rigori tamen Divini Patris, supereffluentissimam satisfactionem exigentis nondum ultimatè secèrè satis. Quid jam imponat amplius? Imposuit se ipsum, factus obediens usque ad mortem, mortem autem Crucis. Hic tandem, hic Divinus Pater dolore cordis tactus intrinsecus, confregit potentias arcum, scutum, gladium, & bellum, universa delicta nostra, & chyrographum peccati delevit. O peccatum! O pretium! O statera!

Mi JESU! si mea opera, & satisfactiones pro innumeris peccatis meis, appenderes in statera, haud dubiè inveniret minùs habens. Ah! quia apud te copiosa redemptio; de tuo supple, quòd mihi deest, nè infinitum redemptionis pretium frustra pro me sit expensum, Amen.

Pater, & Ave.

O Amor Crucifixe! miserere mei.



PRAXIS XII.

Statio I.

Condemnatio Christi ad mortem.

- †. Adoramus te sanctissime Domine JESU Christe, & benedicimus tibi!
 R. Quia per sanctam Crucem tuam redemisti mundum.

A Udi anima Religiosa, & obstupesce! JESUS Christus, Filius Dei vivi, stat coram tribunali

nali victis manibus, catastas inter, & strictos acinaces, reus mortis proclamatur, & sequenti forma à Pilato condemnatur. (a) *JESUM Nazarenum, seductorem populi, Imperatoris contemptorem, & falsum Messiam (ut eorum criminum à suis superioribus convictus est) educite ad locum supplicij, & velut Pseudo-Regem duos inter latrones medium crucifigite.*

Hœu ! quis hæc crederet de Deo tremendo, & omnipotente, nisi sancta fides, nixa autoritate & veritate Dei revelantis, & per Ecclesiam loquentis, captivaret intellectum, in obsequium Christi ?

Credo firmissimè, & indubitata fide teneo, JESUM Christum fuisse passum sub Pontio Pilato, crucifixum, mortuum, & sepultum. Et ideo credo hoc, & omnia alia fidei sanctæ dogmata, quia tu Deus illa revelasti, qui ut omniscius nec falli, nec ut æterna veritas fallere potes.

Pater, & Ave.

O Amor Crucifixe ! miserere mei.

(a) *Adrichomius in descript. Jerus. n. 115.*

Statio II.

Christus Crucem levat in buñeros.

✠ Adoramus te, ut suprà.

Post immanissimam flagellationem, & dolorosissimam coronationem, ingentiæque alia tormenta, impossibile fuit, tantum in eo remanisse virium

virium, ut ponderosissimum Crucis truncum in suos potuerit levare humeros. Necesse ergo fuit ut per miraculum perditas vires revocaret.

Audis hæc Religiose ! & adhuc in tuis infirmitatibus, adversitatibus, & tentationibus trepidas ? Confide ! fidelis Deus est, non permittit te tentari supra id, quod potes. Si enim miraculosè auxit suas vires, ut pro te plùs pati posset : fierine potest, ut te derelinquat absque viribus, ut pro ipso tu aliquid pati possis ? Postula à Deo, & dabit tibi petitiones cordis tui, vires, robur, animum, consolationem, gratiam, & gloriam ; quia illa promisit, & fidelis, ac omnipotens est in suis promissis adimplendis.

O Deus ! qui largus es in promittendo, & infinite fidelis in exequendo : firmissimè spero in auxilio brachij tui, quòd ineffabile sis mihi daturus auxilium ad sufferenda, & vincenda adversa omnia. Ah ! da etiam, ut illi auxilio fideliter coo-
perer, & collaborem, Amen.

Pater, & Ave.

O Amor Crucifixe ! miserere mei,

Statio III.

Primus Christi sub Cruce lapsus.

✠. Adoramus te, ùt suprà.

EO usque diro Crucis pondere premebatur Christus, ut in terram collabi coactus fuerit.

O lapsus amore plenus ! & nunquid admirandus foret actus amoris, si reo flagitioso, homici-

dæ,

dæ, grassatori, latronive, ab Imperatore ad mortem condemnato, summus Pontifex vitæ gratiam obtenturus, in publica plateâ, coram Imperatore procideret, & de genu supplex pro illo malefactore intercederet? quis non exclamaret: *Ecce quomodo amabat eum?* (b) Hoc, & plus fecit JESUS Christus amator meus, qui, ut mihi hominioni flagitiosissimo, deteriori quovis latrone æternæ mortis millies reo, & à Divina justitia morti adjudicato, ab Imperatore Divino vitæ non tantum veniam, sed & magnam in Hierarchia Ecclesiastica dignitatem conciliaret, miserando in habitu, Crucem sibi bajulans, in publica urbis Jerosolymitanæ platea suis genibus provolutus, anhelans, & gemens, & cum multis lacrymis orabat dicens, si non ore, saltem corde: *Pater dimitte illi.* (c) O charitas! ô amor! ô ignis! ô incendium! & ego frigeo!

Verè bonitatem fecisti cum servo tuo Domine, secundum verbum tuum! Ah! bonitatem, & disciplinam, & scientiam, & amorem, & ingentem amorem doce me, ut, sicut tu amasti me, sic ego quoque amem te, & vigil, & per somnia. Hoc dandò dabis omnia, Amen.

Pater, & Ave.

O Amor Crucifixe! miserere mei.

(b) *Matth. 11. v. 36. (c) Luc. 23. v. 34.*

Statio IV.

Christus occurrit Matri.

†. Adoramus te, ut supra.

Occurrit JESUS vinctus, & horrendum in modum afflictus, circumdatus vinculis, & obsessus tauris pinguibus, (d) carnificibus nimirum, & militibus barbaris, Mariæ Matri suæ, quæ lacrymabili hoc commota aspectu quasi semianimis concidit, & corde tenus contremuit; donec collectis viribus amoris impetu acta in ejus brachia involavit.

Ah! quid dixerit, quid senserit pia Mater? fors exclamavit illis verbis, quibus postmodum in simili aspectu usa est S. Maria Mag. de Pazzis. (e) *O amor! ô amor! quàm parùm cognosceris, quàm parùm amaris! si non invenis, ubi requiescas, veni ô amor! & totum pectori meo teingere. O animæ ab amore creatæ! cur amorem non adamatis? O amor, tu me dolore conficis! ô dolor! tu me amare consumis! Fili mi JESU! JESU Fili mi! quis mihi tribuat, ut moriar pro te! Vale mi JESU! & propitius esto peccatoribus. Hæc inter amorosa lamenta Filius pugnâ, & fustibus propellitur, & Mater à Filio separatur.*

Sancta Mater istud agas, Crucifixi fige plagas cordi meo validè: tui Nati vulnerati, tam dignati pro me pati, pœnas mecum, & amorem divide, Amen. Pater, & Ave.

O Amor Crucifixe! miserere mei.

(d) Psalm. 21. (e) in vita. 12.

Statio

Statio V.

Simon angariatur ad ferendam Crucem.

✠. Adoramus te , ut suprà.

Tantum omnes adversus JESUM concepère odium, ut vilissimum etiam licitoris mancipium post eum Crucem ferre recusaret , ut etiam cogi hominem advenam necesse fuerit.

Majorem Crucis, & Crucifixi amorem demonstravit S. Porphyrius, (f) qui, cum morbo præpeditus non posset pedibus incedere, genibus perreptans singulis diebus sacras Stationes Jerosolymis devotè visitavit. Quondam cum ad pedem montis nimia lassitudine defecisset, elevatis in altum oculis, Christum in Crucis imagine pendentem, sic est assatus : *Domine ! memento mei, cum veneris in regnum tuum.* (g) Post hæc verba præcepit Salvator Latroni à dextris pendenti, ut descendat de cruce, & Porphyrio manum auxiliatricem porrigat. Descendit ille, porrexit manum, & Porphyrium perduxit ad JESUM. Interea JESUS ipse de Cruce descendit, & servo suo obvius præcepit, ut Crucem suam (JESU nimirum) suis impositam humeris ad montis verticem ferret. Extendit Porphyrius manus avidas, Crucem arripit, humerisque suis imponit, cujus contactu de repente sanatus est. Religiosa anima ! quæ infirmaris , & variis casibus torqueris , sacram crucis viam diligenter ambula. In hac occurret tibi JESUS , auxiliabitur tibi, manum, &

Crucem porriget. Noli esse Simō : ferventer illam arripe, & sanaberis, & salvaberis.

O Domine ! memento mei ! da Crucem, da vires, da animum, da amorem. Esto mihi JESUS, & salva me.

Pater, & Ave.

O Amor Crucifixe ! miserere mei.

(f) P. Fritsch. f. 167. (g) Luc. 23. v. 41.

Statio VI.

Officiosa Veronica compassio.

7. Adoramus te, ut suprā.

Veronica, ut vidit faciem Domini indignissime foedatam, velum obtulit : quod obsequium longè gratissimum impressa velo facie remuneratus est Christus.

Credibile est, majus, & acceptius obsequium pro tunc à Veronica non potuisse exhiberi Salvatore. O anima Religiosa ! nunquid & tu parata es, tale Redemptori tuo exhibere obsequium, quod noveris ei fore acceptissimum ? velum exhibere amplius non potes. Aliam proin methodum te docet Christus ipse, cuidam Religioso ita loquens :
 (b) *Gratius mihi nihil feceris, quam si me adjuves in Cruce portanda per frequentiores compassionem, & memoriam Passionis meae. In ore tuo crucem meam porta per cordialem re Gratiationem pro omni eo, quod pro te sustinui. In humeris quoque tuis Crucem meam senties, per voluntariam corporis tui castigationem.*

An

An simile hæcenus obsequium præstitisti Creatori tuo ? an non præstabis imposterum ?

O Domine ! qui leve solum obsequium pro immensis beneficijs exigis ; hoc tibi libentissimè impendam- Memoria memor ero tui, frequenter sacram viæ Crucis peregrinationem obeundò, & Crucis mortificationem pro tui nominis honore jugiter in corpore meo portandò, Amen.

Pater, & Ave.

O Amor Crucifixe ! miserere mei.

(b) *Sandæus in speculo salvationis bunn.*

Statio VII.

Altera vice Christus sub Cruce cadit.

✠. Adoramus te, ut supra.

R Edeunte virium defectu, & non cessante Judæorum crudelitate, iteratò JESUS in terram præcipitatus est.

Cadit JESUS denuo, & meīs depressus sordibus, & peccatis, cadit. Et ego adhuc sto, sanus sum, vivo, & quiesco, qui debebam in ima inferni demergi. O infinita Dei misratio ! quæ me post tot, ac tanta peccata, post frequentes lapsus, servavit illæsum, & hodie sibi voluit compatiens. Si tua bonitas me toleravit peccantem, si sustinuit rebellem, & prolongantem iniquitates suas : an non misereatur pœnitentis, contriti, & profundissimè ingemiscantis ?

Spero in misericordia tua infinita, ô Deus,

O 3

auxilia-

auxiliator unice corporis, & animæ meæ ! & spero in pretioso sanguine JESU Christi Filij tui, cum tanta charitate pro me fuso : quòd sicut me hæcenus peccatis meis immori noluisti, æternis incendijs adjudicandum ; ita deinceps eadem miseratione à peccato præservatum in æternæ salvationis partem sis admissurus. Fiat, Amen.

Pater, & Ave.

O Amor Crucifixe ! miserere meí.

Statio VIII.

Mulieres deslent Christi Passionem.

✠. Adoramus te, ùt suprà.

Mulieres aliquæ, videntes, quæ, & quanta Christus patitur, in cordialem luctum, & compassivas lacrymas effusæ sunt ; quas tamen Christus à fletu desistere jubet.

Mirum sanè mandatum ! potèstne fieri, ut in adversis casibus, & grandibus miserijs, humanum cor non contristetur, & lugeat ? potest profectò fieri, si Pauli consilium sequamur monentis ; (i) *Recogitate eum, qui talem sustinuit à peccatoribus contradictionem.* Si ægritudo vos molestat : *recogitate eum, cujus livore sanati sumus ;* & gaudebitis de sanitate, aut etiam infirmitate vestra. Si persecutionem, & molestiam ab alijs sustinetis : *recogitate eum, quem sui non tantum non receperunt ; sed & negârunt, ac dereliquerunt.* Si in tentationes varias incideritis, si famà, & honore injustè patimini ; *recogitate eum, qui fuit tentatus*

per

per omnia: per infamiam, & bonam famam, per contumelias, & opprobria: qui fuit mancipium opinionum, malè de se sentientium. Hunc in omnibus flebilibus casibus cogitate: & tristitia vestra convertetur in gaudium; juvat enim, Filium Dei socium habuisse dolorum.

O JESU, dolorum meorum socie, & levamen! tu dignatus es pro me infirmari, infamari, contemni, maledici, cruciari, crucifigi, & mori. Et ego delicatulus adeò sum, ut tuus in passione socius esse nolim. Absit! hæc mea consolatio, te socium habere dolorum! te igitur in adversis omnibus recogitabo, tu me consolare, Amen.

Pater, & Ave.

O Amor Crucifixæ! miserere mei.

(i) Hebr. 12.

Statio IX.

Tertiò Christus sub Cruce corrui.

†. Adoramus te, ut suprà.

Tertia vice cadit Christus sub Cruce, Judæi ridet, carnifices verberant, milites propellunt. Hi omnes putarunt, ejusmodi lapsus esse aut casu factos, aut saltem se non fuisse eorum causam.

Sic nimirum judicant homines. Et utinam non etiam Religiosi! quos inter & tu es. Infirmaris, certa adversitate invaderis, ab honoratiore officio dejiceris, injuriaris, infamaris, denigraris, ir-

videris, contemneris : à superiore, ab æqualibus, ab inferioribus duriùs tractaris : & quomodò non inquietaris ? de medijs evadendi sollicitè cogitas, nunquam autem, quòd hæc, & similia, non casu, & fortuitò, sed ex proposito, à Deo immissa sint, non ad insipientiam tibi, sed ad eruditionem, & præmium. Accusata est, & adulterij damnata Susanna. *(k)* Anne malum ei hoc erat ? minimè. Liberata enim est per Danielelem. Daniel ipse in lacum Leonum missus est : *(l)* & Habacuc, ab angelo arreptus, pulmentum eidem attulit ; & educus est Daniel salvus. Job omnes excogitabiles misérias pertulit ; & magnificatus est vehementer. *(m)* Lazarus infirmatus est, & omnino mortuus : & sanitatem, ac vitam recuperavit à Domino. *(n)* Suscipe ergo gaudenter adversa quæque ; quia ad tuam salutem sunt, & ad gloriam sempiternam. Exclama proin :

Deus, cujus providentia in sui dispositione non fallitur : dispone mecum, sicut scis, & vis. Scio enim, quòd mali nihil velle possis. Tantùm largire gratiam, ut, quæ à te mihi immittuntur bona, per meam malitiam non fiant mala, Amen.

Pater, & Ave.

O Amor Crucifixæ ! miserere mei.

(k) Dan. 13. *(l)* Dan. 14. *(m)* Job. 2. & ult. *(n)* Joan. 11.

Statio X.

Christo diripiuntur vestes.

✠. Adoramus te, ut supra.

PAssus sibi est Salvator vestes abripi, tum, ut mors sua esset dolorosior: tum ut tacite inueneret, tanto se charitatis igne erga me ardere, ut vestimenta ferre non posset. O verè *supereminentem scientiæ charitatem!* (o)

O si tantus amor interiora mea adureret, ut habitum tepidæ, & frigidæ conversationis abjicerem! Sed heu (exclamat S. Bonaventura) *heu! frigida super nivem sunt corda nostra, frigida verba, & universa frigida sunt opera, quasi sint adamantina. Dicitur enim, quod adamas nullo igne calleferi potest. Sunt similiter multi, qui adamante duriores, & frigidiores, igne amoris Divini caleferi non possunt.* Utinam! inter hos ego non essem primus, qui insensitivitate, luriditate, tepiditate, frigiditate, & irreligiositate circumdatus sum, velut vestimentò.

Veni Amor satelles! diripe tibi vestimenta mea, ut super vestem tepidæ meæ conversationis mittant sortem mundus, caro, & diabolus: Ego enim cum nudo amatore meo, ab omni affectu, & negligentia mundana nudus, mori desidero. O Amor Divine veni!

Pater, & Ave.

O Amor Crucifixæ! miserere mei.

(o) ad Eph. 3.

Statio XI.

Christus in Cruce extenditur.

✠. Adoramus te, ut suprà.

DEnuo spectaculum amoris proponitur, dum Christus JESUS nullum, etiam ineffabile tormentum, tam grave reputat, quod pro lucrando amore meo non sit sufferendum.

Et ego necdum vel amoris scintillulam sentio; fuit non nemo erga amasiam suam, turpiter amatam, tanto incensus amore, ut eum opere ipso ostensurus, contempto omni doloris sensu, præacutò cultellò nomen suæ amasiæ pectori suo incidere, vulnúsque quotidianâ falis perfrictione renovaverit. Heu lascive amor! quid non mortalia cogis pectora? Et tu Divine amor! dum te impellente JESUS Christus, suum ardentissimum erga me flagitiosissimum, ostensurus amorem, nomen meum suis manibus, pedibus, pectori, quin imò toti corpori insculpi, & inscribi fecit: Tu, inquam, Divine Amor! tantum non valeas, ut JESUS, Amor meus, indelebiter cordi meo inhaereat?

Maledico te, execror, & abominor te flagitiosum, ferinum, barbarum, & diabolicum cor meum, si non amas Dominum nostrum JESUM Christum, extremè te amantem: si tantum amorem non redamas: si cum amore patiente, pati recusas.

Pater, & Ave.

O Amor Crucifixe! miserere mei.

Statio

Statio XII.

JESUS in Cruce moritur.

✠. Adoramus te, ut suprà.

JESUS Christus Rex æternæ gloriæ, quemadmodum in natiuitate sua jacuit inter duo animalia, ita in morte sua moritur medius duos inter latrones.

Hoc mortis genus non conceditur Religioso; bene verò aliud; si nimirum aut ædificatoria conuersatione, aut sedulo pro salute animarum labore inter peccatores moriatur. JESUS elegit mori duos inter latrones. Si JESUM sequi non potes, sequere Joannem Berckmannum, Religiosum Societatis JESU, qui ad extrema deductus, imaginem Crucifixi, Rosarium, & sacram Regulam sibi porrigi voluit, exclamans: *Cum his tribus libenter moriar.* Religiose mi! potésne, si moriendum mox tibi foret, absque tremore Crucifixum aspicere, tanquam concrucifixus? aut Rosarium arripere, tanquam devotus MARIE cliens? aut sacram Regulam tuam ad tribunal tremendi Judicis deferre, ut inuolatus, & fervidus ejus observator?

O JESU! *cum his tribus libenter moriar*; sed etiam deinceps sic vivam, ut tria hæc cœlum mihi referent, nimirum: amor Crucifixi, cultus ardens Matris MARIE: & exactissima sacræ Regulæ meæ observantia. Domine! custodi hanc voluntatem.

Pater, & Ave.

O Amor Crucifixæ! miserere mei.

Statio.

Statio XIII.

Depositio Christi de Cruce.

✠. Adoramus te, ut suprà.

DUM MARIA corpus Filij sui dilectissimi suo sinu, & brachijs superbenedictis excepit, simulque plagas, livores, & vulnera conspexit propius, mortuali dolore correpta est. (p)

Perpendo vel obiter hunc dolorem. Tantus erat, ut sanguineas ei expresserit lacrymas. Tantus, ut præ angustiarum acerbitate sanguinem sudârit, eoque copiosè terram irrigârit. Tantus, ut cor ipsius locò motum vitæ rupisset filum, nisi corporali gloriosi sui Filij præsentia recreata, & potentia fuisset sanata, & ad sibi ulteriùs compatiendum roborata, ac animata. Hac compassione (ut ipsamet revelavit (q)) ingentes charismatum Divinorum, & gratiarum cumulos promeruit, & impetravit iis, qui viæ Crucis exercitium, & compassivum erga Salvatorem affectum affectarent, ac elicerent. Stude, ô Religiose! compati Nato, & Matri: & erit merces tua magnanimis.

O MARIA! tuos mecum partire dolores, ut in recordatione tuarum, & dilectissimi Filij tui Passionum, vitam cum compassivo suspirio, finiam, Amen.

Pater, & Ave.

O Amor Crucifixæ! miserere mei.

(p) *Maria de Agreda in civit. Dei. p. 3. l. 8. c. 10.*
 (q) *Ibidem.*

Statio

Statio XIV.

Sepulchrum Christi.

✠. Adoramus te, ut suprà.

Devotissimas inter Matris, ac amantùm lacrymas, deportatum est corpus Domini ad sepulchrum.

Haud dubiè Divinitas corpori unita largissimam benedictionem pro ultimo vale effuderit super illos, qui postremum obsequium corpori suo impenderunt. Non minorem benedictionis abundantiam ij expectare possunt, qui corpus Dominicum devotissimè tractant, & suscipiunt, & omnem eidem in corpore, & animâ reverentiam exhibent. Anne tu hactenus ejusmodi benedictionem es promeritus?

O Jesu! licèt tuæ sim benedictionis indignus, sum tamen summè indigus. Hinc demississimè te deprecor: (r) *Benedic etiam mihi Pater mi! nunquid & mihi reservasti benedictionem? Num unam tantùm benedictionem babes Pater? mihi quoque, obsecro, ut benedicas.* (s) *Benedicat igitur nos Deus, Deus noster, benedicat nos Deus: & metuant eum omnes fines terræ, (t) Amen.*

Pater, & Ave.

O Amor Crucifixe! miserere mei.

(r) *Gen. 27. v. 34. 36.* (s) *Ibid. v. 38.* (t) *Psal. 66. v. 8.*

Statio XV.

B. Helena sanctæ Crucis inventrix.

†. Adoramus te, ùt suprà.

A Spice sanctam Crucem, de qua S. Augustinus ita loquitur; *Lignum, in quo fixa erant membra patientis, etiam cathedra fuit Magistri docentis.*

Nostine, ô Religiose! quænam fuerit à Divino Magistro, ex hac cathedra, doctrina proposita? perfectio non alia, quàm: *Discite à me, quia mitis sum, & humilis corde, & invenietis requiem animabus vestris.* (u) Didicistine hanc lectionem? Non credam, nisi non extollaris in prosperis, & non deprimaris in adversis. Si injuriæ ultionem quæris, si hominibus displicere metuis, verbò: si requiem non invenis in anima tua, sed turbaris erga plurima, nondum perfectè mitis es, & humilis corde: illa enim requies hujus doctrinæ practicatæ effectus est.


O JESU! levìa quæque, quæ contra voluntatem meam eveniunt, requiem animæ meæ dissipant; quia nimirum non sum mitis, & humilis corde. Tu ergo Divine Magister! eandem doctrinam altius cordi meo inscribe stylò gratiæ tuæ, ut pes meus stet in directo, & non moveantur vestigia mea, Amen.

Pater, & Ave.

O Amor Crucifixe! miserere mei.

(u) *Matth. 11. v. 29.*

Statio



PRAXIS XIII.

Quæ servire poterit in ordine ad Con-
fessionem Sacramentalem.

Statio I.

Christus adjudicatur morti.

- †. Adoramus te sanctissime Domine JESU Chri-
ste, & benedicimus tibi !
✠. Quia per sanctam Crucem tuam redemisti
mundum.

A Pontio Pilato lata est tremenda Crucis, ac
mortis sententia adversus JESUM, sanctum,
immaculatum, innocentem, & segregatum à pec-
catoribus.

Ego, ego sum ille homo flagitiosus, rebellis
Deo, ac læsæ Majestatis Divinæ reus. Ego sum
scelerum omnium sentina, ingratus, perfidus, in-
gentium, ac enormium dilectorum convictus.
Ego sum ille : & nemo me accusat, nemo me
condemnat. O obstupescendam DEI misericor-
diam ! Vindictam postulavit Divina Justitia. Ac-
cusatus sum : convictus sum ; sed non confessus.
Decretam interim mortis sententiam in se trans-
fert Filius Dei. Qua conditione ? ut ego pec-
cata mea unico homini, claves misericordiæ ha-
benti-

benti, in aures revelem : & ut hoc facto non moriar, sed vivam, & narrem opera Domini.

O JESU ! O Pater misericordiarum, & Deus totius consolationis ! qui non vis mortem peccatoris, sed ut magis convertatur, & vivat. Suavissimam illam conditionem humili, & contrito corde accepto. Dixi : confitebor adversum me injustitiam meam Domino : & tu remittes iniquitates servi tui, & dealbabis eas in innocente sanguine tuo, & dabis mihi benedictionem salvificam pro maledictione æterna. Fiat !

Pater, & Ave.

O Amor Crucifixe ! miserere mei.

Statio II.

Christus Crucem suscipit.

†. Adoramus te, ut suprà.

CRucem mihi paratam ad suos humeros transferri voluit benignissimus Salvator ; quam & animò Paternò, & fortè strinxit, suscepit, ac portavit.

Jubebantur in lege Judæi, in die mundationis ab omnibus peccatis, affligere animas suas religione perpetua. (a) In lege gratiæ dies illa mundationis est dies confessionis. In hac, nè nimium affligi debeat anima tua gravî poenitentia, pro qualitate delictorum, à Confessario imponendâ : Christus JESUS non tantum animam suam, sed & humeros, ac totum corpus, gravissimo Crucis

eis pondere affligi voluit. O sacrum, ô dulce, ô leve Confessionis onus ! in qua misericors Deus luit, quod ego peccavi : in qua ille solvit debitum, quod ego contraxi : ac sustinet ultrones poenas, quas ego commerui.

O JESU ! deleatur anima mea de libro viventium, & non habeat partem tecum ! si pro gravissimo peccatorum meorum reatu levem poenitentiam non suscipio. Tu mihi pro poenitentia injungis, ut peccata dolorosè, & sincerè confitear, levémque imponendam satisfactionem suscipiam; cur id non faciam ? Ah ! libenter facio. Tu tantum ô Domine ! miserere mei, Amen.

Pater, & Ave.

O Amor Crucifixæ ! miserere mei.

(a) *Levit. 16. v. 31.*

Statio III.

Christus cadit sub Cruce.

ÿ. Adoramus te, ut suprâ.

Unigenitus Dei Filius, quem Deus Pater infinito diligebat amore : JESUS Christus, Dominus Deus exercituum, fortis Israël (b) Pretiosissima illa Persona, in cujus comparatione infiniti Angelorum, & Mundorum milliones, arena sunt exigua, & tanquam nihil æstimantur, adeò, ut satius fuisset, Angelos, homines, animata, & inanimata, ac creaturas omnes perire, ac in nihilum suum ruere, quàm Christum pati. Ille, in-

quam

quam, talis, ac tantus, viribus destituitur, immani Crucis pondere debilitatur, lassatur, infirmatur, & eheu! in terram horrendo lapsu præcipitatur, fitque objectum risûs dæmonum, Judæorum, ac inimicorum univerforum.

O prævaricatio! ô peccatum! ô lues! ô bestia atrocissima! quæ adeò debacharis in Filium Dei. Et ego, heu me! ego commisi peccatum! ego peccavi, non semel tantum, sed sæpius. Ah utinam non sæpissimè! utinam non quotidie! utinam non semper! Et toties Filium Dei odivi: toties *fortem Israël* debilitavi: toties Personam Christi, infinities pretiosissimam, in terram præcipitavi, conculcavi, exinanivi.

Eheu! me turpissimum, & abominandum peccatorem! ô Pater æterne! hæc ego feci, & tacuit Filius tuus: imò coram te prostratus in terram veniam mihi exorat. Ah! confringitur cor meum, & in gemitus, ac lamenta dissilit. Cum Filio igitur tuo coram Divina Majestate tua, & eorum Confessario procido, & in rugitu cordis mei peccata mea confiteor, detestor, abominor, execror. Mori, ô Deus! mori malo, quàm deinceps te offendere.

Pater, & Ave.

O Amor Crucifixæ! miserere mei.

(b) *Isaia* 1. v. 24.

Statio IV.*Mater valedicit Filio.*

†. Adoramus te, ut suprà.

CUm Mater dolorosissima valediceret Filio, latronis instar ad mortem educto, tunc gustavit, & vidit Judæorum barbariem, carnificum crudelitatem, militum ferocitatem, ac Nati gravissima vulnera.

Sed tunc Marianus pene emarcuit Spiritus, cum hos inter lictores, Judæos, milites, & carnifices, me maximè furem vidit. Ego diabolico agitated furore totus frendens, prægrandi armatus fuisse, horrendum ictum in Sacro-sanctum JESU caput intentavi sæpius, dum legi Divinæ, & Religiosæ disciplinæ rebelles subtraxi caput. Ego faciem Divinam lutò, sputis, fœcibus, & turpissimis sordibus defœdavi, aut per lubricitatis maculas, aut per luridissimas Psalmodias, & precatationes. Ego eundem in terram collisi, & furibundis pedibus canis instar conculcavi, per delicta mea graviora, aut in Religione, aut in sæculo commissa. Hæc vidit Mater Dei, contremuit, & præ dolore ferme contabuit.

Hæc ego feci! & quid jam restat, nisi ut humillima peccatorum confessione veniam à JESU exorem? Per te, ô MARIA! Matrem dolorum, & sanctæ spei, Filio tuo me spero reconciliandum. Ah impetra mihi fructus dignos poenitentia.

Pater, & Ave.

O Amor Crucifixæ! miserere mei.

P a

Statio

Statio V.

Simon invitus fit Crucis socius.

✠. Adoramus te, ut supra.

CUM JESUS ex virium defectu Crucem solus portare non valeret amplius, coactus est Simon ad eam ferendam : licet autem ab initio vehementer resisterit, postea tamen eam gaudenter portavit.

Forſitan ſi non portâſſet Crucem Simon, actum fuiſſet de æterna ejus ſalute. Cogendus ergo fuit ad Crucem, ut eam mutato affectu libens ferret. O felix coactio ! ô amabilis violentia ! ita nimirum, cujus vult, miſeretur Deus. Heu ! quantum ego, cum eſſem in peccatis, Simon fui, Crucem Divinorum præceptorum ferre recuſans. Petrum Apoſtolum, & Simonem hunc, coëgit ſtebilis Dei patientis aſpectus ad reſpiſcendum, & ad pœnitentiam. Ah ! utinam ex ſimili aſpectu cor meum colliqueſceret intra me, & in ſeriæ pœnitentiæ diſſolveretur lacrymas ! Potuiſſet me Deus poſt vel affectata flagitia inferno addicere, & à conſpectu ſuo æternum abjicere ; ſed poſt ingentia ſcelera non abjecit, ſed reſpexit me, & vulneravit cor meum in uno oculorum ſuorum. Veniam ultroneè offert, obliviſci paratus eſt omnium prævaricationum mearum, trahit ad pœnitentiam, promittit coronam, offert gratiam, invitât ad gloriam. Et quem non pœniteat, tam amabili Domino fuiſſe rebellem ?

OJE.

O JESU ! perduellionis meæ poenas luiturus ipsemet ego Judicem accedo , & coram sacro tribunali me sisto reum. Actoris simul , & Rei personam sustinebo. Sacramentaliter , & rigorosè me accusabo ? misericordiam volens , & non judicium : Tu enim. *Qui Mariam absolviisti , & latronem exaudisti , mihi quoque spem dedisti.*

Pater , & Ave.

O Amor Crucifixæ ! miserere mei.

Statio VI.

Veronica porrigit Christo sudarium.

✠. Adoramus te , ut suprâ.

Veronicæ , pro abstergendis sordibus sudarium exhibenti , unâ cum sudario imaginem vultus sui restituit Salvator.

Inspice hoc sudarium , seu potiùs speculum , Religiose ! & , si nescis , quære : *Cujus est hæc imago ?* (c) & dicet tibi Veronica : *Cæsaris.* O ! *quomodo obscuratum est aurum , mutatus est , color optimus ?* (d) Utinam , ô Religiose ! in hoc sudario tuam ipsius inspiceres , & agnosceres faciem ! splendida hæc erat in Novitiatu , in primis Religionis , ac Sacerdotij annis , modesta , innocens , & fervida. Sed eheu ! *quomodo obscuratum est aurum , mutatus est color optimus ?* à fervido factus es tepidus , à calido frigidus , à modesto effusus , à composito dissolutus , à mortificato immortificatus , à Religioso irreligiosus , & præter annos , in sancta Religione non sanctè transactos ,

Religiositatis numeras nihil, ut vel ab unius mensis Novitio perfectione supereris: Etenim cum deberes esse Magister propter tempus: rursum indiges, ut tu docearis, quæ sint elementa exordij sermonum Dei: & factus es, cui lacte opus sit, non solidò cibò Heb. 5. Hæc si ita sint, vade, & lavare septies in Jordane poenitentia, ut à tepidissima conversationis lepra emunderis.

Amplius Domine! amplius lava me ab iniquitate mea, & à peccato meo munda me! quoniam iniquitatem meam ego cognosco, & peccatum meum (tepiditatis, & irreligiositatis) contra me est semper. Tibi soli peccavi, & malum coram te feci (e) Sed deinceps non faciam amplius. O JESU! redde mihi lætitiā salutaris tui, & spiritu principali confirma me, Amen.

Pater, & Ave.

O Amor Crucifixe! miserere mei.

(c) Matth. 22. (d) Tbren. 4. (e) Psal. 50.

Statio VII.

Christus secundo sub Cruce cadit.

7. Adoramus te, ut suprà.

Cecidit Verbum Dei, immani Crucis depressum pondere secus viam, & conculcatum est ab hominibus.

Considera, Religiose! quòd Christus in hoc lapsu personam egerit pijssimi Patris, & tu filij prodigi. Tu portionem substantiæ, quæ te contin-

gebat

gebat, id est, infusos virtutum habitus, baptismalem innocentiam, dona naturæ, & gratiæ, salutarem Sacramentorum effectum, pretium sanguinis, & mortis JESU Christi, jus ad æternam gloriam, tot bonum operandi occasiones, ac tanta universa dilapidasti, luxuriosè, luridè, intemperanter, tepidè, aut irreligiosè vivendò, & propterea ad tantam inopiam reductus es, ut ventrem replere coactus sis de siliquis porcorum, & mundanarum, ac vilissimarum voluptatum. Sed gratiâ Divinâ tibi irradiante dixisti: *Surgam, & ibo ad Patrem meum, & dicam ei: Pater! peccavi in cælum, & coram te, jam non sum dignus vocari filius tuus.* (f) Cùm verò te à longè vidisset Pater tuus Divinus, misericordiâ motus est, & accurrens cecidit non tantùm super collum, sed ad pedes tuos, exclamans: *Citò proferte stolam primam, & induite illum, & date annulum in manu ejus &c.* Stola illa prima est secunda post naufragium tabula, seu sacratissimum poenitentiae sacramentum, quo vestitus sum stola gratiæ sanctificantis. Annulum porrexit in signum reconciliationis, & fœderis sempiterni. O stupenda Dei misratio! sed, heu me! stolam illam abjeci, pactum violavi, denuo amantissimum Patrem meum reliqui, & aufugi ad porcos. O me miserum!

Ah mi JESU! *Verè jam non sum dignus vocari filius tuus. Peccavi, ab peccavi in cælum, & coram te! quò me jam vertam, nescio. Major quidem est iniquitas mea, quàm ut veniam merear: infinities tamen major est pietas tua, quia tu es, qui pec-*

catores recipis. (g) Tu ergo, qui peccatores recipis, *propitius esto mihi peccatori!* qui plasmasti me miserere mei! opus manuum tuarum Domine, & pretium sanguinis tui, nè despicias.

Pater, & Ave.

O Amor Crucifixe! miserere mei.

(f) *Luc. 15.* (g) *Ibid.*

Statio VIII.

Mulieres plangunt JESUM.

†. Adoramus te, ut suprà.

Plæ hæ Mulieres, certa fide tenentes, JESUM ex invidia Judæorum traditum, innocentem esse, & sanctum, in lacrymabili hac processione cum amarissimè deshebant.

O Religiose! tu quoque innocentiam JESU perspectam habes, & credis insuper, quòd tuos reatus morte sua luat. Altius ergo hanc veritatem rumina cum S. Augustino, ut compunctionis lacrymas provoces. En! *Peccat iniquus, & puni-
tur Justus: delinquit reus, & vapulat innocens: of-
fendit impius, & damnatur pius: quod meretur ma-
lus, patitur bonus: quod perpetrat servus, exsolvit
Dominus: quod commisit homo, sustinet Deus. (h)*
& insuper non contentus fuit lacrymâ oculorum; sed totius corporis sanguineis lacrymâ peccata nostra flere, & lavare voluit. (i) Hæc ego video: & non vehementissimis, ac cordis fragis lacrymâ ingentia delicta mea deplorem, & incessabiliter lugeam?

O pec-

O peccatum ! ô maledictum peccatum ! quod sanguineô JESU Christi lavacrô fuit expiandum. Quis mihi det, ut reliquias tuas amarissimis delectam lacrymis ? Tu, ô JESU ! tu solus hoc dare potes. Potentissimo igitur dolore cor meum conquassa, ut te offensus intolerabiliter doleam, & præ doloris vehementia moriar, Amen.

Pater, & Ave.

O Amor Crucifixe ! miserere mei.

(b) *S. Aug. in Manual. c. 7.* (i) *S. Bern. ser. 3. de Nativ. Dom.*

Statio IX.

Tertius Christi lapsus.

✠. Adoramus te, ut supra.

GRavissimum virium defectum cum passus esset JESUS, sub immani Crucis pondere, in terram collapsus est, & ex violenta corporis collusione, copioso sanguine dimanavit.

O anima peccatrix ! an non ad lugubre hoc spectaculum colliquescis ? Secundum aliquorum Patrum testimonium tunc primum Adamus transgressionem suam & profundius ponderavit, & amarius, ac cordalius deflevit, cum filium suum Abel, à Caino interfectum, recenti cruore perfusum, malè vulneratum, & proprio sanguini innatantem conspexit. Tunc luxit ; tunc ejulavit, & à gemitu cordis sui irrugivit. Et tu, ô anima !

P 5

videns

videns amantissimum Patrem, Deum, ac Salvatorem tuum, Cruci alligatum, gravissimè respirantem, dirissimè vulneratum, immanissimè tormentatum, & roseo sanguine totum diffluentem, tu iniquam, profundissimè non ingemiscas, eidemque illacrymeris, ac integros lacrymarum fontes non effundas, & peccata tua enormissima, crudelissima, innumera, non detesteris, non desleas, non infinities abomineris? O prævaticatio! ô peccatum!! ô bestia! ô fera pessima! quæ devorasti Patrem meum dilectissimum, & Filium Dei unigenitum JESUM Christum.

O JESU! doleo, & cordintimè doleo. Ah! tu nôsti, quia verè, & profundissimè doleo, & dolebo inconsolabiliter: & mori malo, perire, ac ardere æternum, quàm denuo te offendere. O JESU, Filij David! miserere mei, & præserva me à peccato, Amen.

Pater, & Ave.

O Amor Crucifixe! miserere mei-

Statio X.

Christus exuitur vestibûs.

✠. Adoramus te, ut suprà.

ANtequam ad locum Crucis ventum erāt, adoriuntur JESUM efferati carnifices, ac immani rabie ex cerebro spineam Coronam, ac ex vulneribus, quibus concreta erat, tunicam unā cum carne, ac cute, abstrahunt tanta crudelitate, ut JESUS, ceu excoriatus, ac excarnificatus,

tus, totus sanguineus appareret, verè factus *Sponsus sanguinum.* (k)

Accede jam propius ô peccator ! & *lege rubrum, si vis cognoscere nigrum.* Lege ex roseo JESU Christi sanguine, ceu Rubrica, nigredinem, abominationem, gravitatem, & enormitatem peccatorum tuorum, & exclama cum S. Thoma Villanovano : (l) *O infinitam audaciam peccatoris ! qui post tale spectaculum peccare non formidat.* Sed non formidavi ego ! Protervâ igitur frendens audaciâ, crudali manu JESUM spoliavi vestibus, quem proposuit Deus propitiationem per fidem in sanguine ipsius, ad ostensionem justitiæ suæ propter remissionem præcedentium delictorum. (m) En ! ait Apostolus : *propter remissionem præcedentium delictorum* ; quia (ut exponit S. Thomas) impossibile videbatur Apostolo, quemquam deinceps peccare posse, qui crediderit, tanta JESUM tormenta pro expiatione peccati perpeßum esse.

O mi JESU ! utinam non fuisset possibile, ut te, post tam horrendas passiones, & tam graves pro peccatis satisfactiones, de novo, & frequentissimè quidem offenderem. Quoniam verò factum infectum fieri non potest, saltem deinceps luctabor adversus omne peccatum, & ad sanguinem usque resistam, ut non amplius peccem tibi, Amen.

Pater, & Ave.

O Amor Crucifixæ ! miserere mei.

(k) *Exodi 4.* (l) *ser. 2. Advent.* (m) *ad Rom. 3.*

Statio XI.

Christus Crucis figitur.

✠. Adoramus te, ut suprâ.

JESUS Christus à petulanti carnificum turba immanissimè in Crucem prostratus, manibus, pedibusque incredibili crudelitate Cruci acclavatur, & affigitur.

Super luctuoso hoc spectaculo dole, ô anima mea! & multum dole. An enim non doleres, si audires belliducem prædivitem Regis cujusdam Christiani à turcis, sponfione unius nummi sollicitatum, ut Regem suum occideret, eò perfidiæ progressum esse, ut turpis lucri pretiò inescatus re ipsa Regem suum immani vulnere è vivis exturbavit? vah! quantum lugeres, & tantam perfidiam cordialissimè detestareris? Rectè luges: sed, si sapias, hunc ipsum luctum ad te converte. Tu enim es ille Bellidux prædives, utpote Dominus omnium Creaturarum, multa naturæ, & gratiæ talenta nactus, sub signis JESU Nazareni Regis Judæorum militans: tu, inquam, es ille, quem juratus Christiani nominis hostis, turca infernalis, ad Regis necem instigabat, sponfione facta unius nummi, vilissimæ cujusdam voluptatis, momentanei honoris &c. Et (heu! quis tantum nefas de Christiano, nè dicam Religioso, credat?) tu vilissimi amoris pretij, Regi tuo, Deo & Creatori tuo, necem machinatus es, eundem in Crucem egisti, tribus horrendis clavibus crudelissimè

simè crucifixisti, barbaros mallei, feti malitiosæ voluntatis ictus multiplicasti, & Regem tuum occidisti. Et tamen non luges, non tristaris, non contremiscis, & præ dolore non moreris !

O JESU ! Dominus meus, & Deus meus ! doleo utique, & meum me delictum, & immanis perfidia, horrendum discruciat. Ah ! utinam in tantum possem illum dolorem intendere, ut vitam, quam tibi perfidè ademi, meæ vitæ profusione aliquatenus compensare possem, Amen.

Pater, & Ave.

O Amor Crucifixæ ! miserere mei.

Statio XII.

JESUS in Cruce moritur.

†. Adoramus te, ut suprâ.

JESUS Christus, ut perfectum de peccato reportaret triumphum, immanissimâs doloribûs oppressus, in Cruce mortuus est.

O anima ! potesne hæc videre, & vivere ? Occiponti ærea statua visitur nobilis cujusdam equitis, lanceæ suæ innixi. Hic, cum audivisset, Patrem suum ab hostibus bellò captum esse, continua strage illos persequabatur, & inter alios Patrem suum proprium, quem hostem crediderat, lanceâ suâ interemit. Reversus tandem, ut inter furoris sui victimas cataphractum conspexit militem, galeam eidem detraxit, & mox summo horrore correptus vidit amantissimum suum Patrem à se fuisse occisum. Flebilis iste casus adeò cor
ejus

ejus penetraverat, ut lanceæ suæ innixus, lacrymas inter, & lethales singultus, ipsemet mortuus super Patrem corruerit. O Peccator! Peccator! tu non per errorem, sed ex proposito, amandissimum tuum Patrem, à quo vitam, & ingentia beneficia accepisti: tu Deum, Dominum ac Redemptorem tuum, amabilissimum animæ tuæ sponsum ac fidelissimum amatorem: tu, inquam, Patrem tuum Divinum, crudeli peccatorum tuorum lanceâ dirè vulnerâsti, transtixisti, occidisti. En! mortuus pendet coram te, totus vulneratus, & sanguine perfusus. Eheu spectaculum ab orbe condito luctuosissimum! Huc oculos! huc mentem, ô peccator! vide, dole, lacrymare, eiula, morere!

O JESU! O Amor! ô funus! ô spectaculum! ô infinities maledictum peccatum! Ah! vivere supplicium est, dum vitam meam in cruce video mortuam. Profecto: *videbunt, in quem transfixerunt.* (n) Ah mors veni! & crudelem meam animam ex corpore expelle!

Pater, & Ave.

O Amor Crucifixe! miserere mei.

(n) *P. Fritsch. in Manuuct. ad viam Crucis.*

Statio XIII.

Depositio Christi de Cruce.

✠ Adoramus te, ùt suprâ.

CORPUS Salvatoris mortuum piorum quorundam manibûs de Cruce fuit depositum, & ad sin-

num

num Virginis Matris, juxta Crucem sedentis, & lugentis, deportatum.

Nôsti, ô peccator! reus es homicidij, & Deicidij. Divinus Pater Judex tuus est: ipse ulciscetur mortem Filij sui Unigeniti: lata jam est sententia: *Sanguinem pro sanguine: animam pro anima.* Heu! quomodò subistēs? Sed novos resūme animos! necdum enim tuâ causâ cecidisti. *Neque enim Pater judicat quemquam; sed omne judicium dedit Filio.* (o) Accede ergo Judicem tuum, cum multa fiducia. En! pro tribunali sedet in sinu Matris Misericordiæ. O verè stupendam Dei miserationem! *Pater non judicat quemquam:* Sed me judicari vult à fratre meo amantissimo: ab illo, qui per 33. annos laboravit, & Patronum causæ meæ egit, ut propitiā impetraret mihi sententiam. Nunc omne judicium illi datum est. Misericordiam clamat Mater misericordiæ: Misericordiam postulant tot ora, quot vulnera: Et Judex meus inclinato capite dixit: *Fiat.* Imò hanc decretoriam protulit sententiam.: *Pater! dimitte illis; non enim sciunt, quid faciunt.* (p)

Deo gratias pro hac clementissima sententia! O Jesu! tu verè es *Pater orphanorum, & Judex viduarum.* (q) Verè *misericordia, & veritas obviaverunt sibi: justitia, & pax osculatæ sunt.* (r) Ah; da gratiam, ut misericordiam consecutus, tuam indignationem tremendam, per vitam ingratam non provocem, Amen. Pater, & Ave.

O Amor Crucifixe! miserere mei.

(o) Joān. 5. (p) Luc. 23. (q) Psal. 67. (r) Psal. 84.

Statio

Statio XIV.

Corpus Christi defertur ad sepulchrum.

ψ. Adoramus te, ut supra.

Joseph Arimathæus audacter accessit Pilatum, & petiit ab eo, ut sibi liceret corpus JESU mortuum de cruce deponere: quo impetrato illud operâ Nicodemi reverenter deposuit.

Non pepercerunt sumptibus, & laboribus, Joseph, ac Nicodemus, ut sepulturam Christi redderent gloriosam. Exciderunt sepulchrum amplum, & magnificum: straverunt illud sindone munda: replerunt pretiosissimâs aromatibûs, & cum multis lacrymis in eodem corpus Dominicum deposuerunt. O anima Peccatrix! tu fors non habes, unde sumptuosum Christo adornes sepulchrum: habes tamen duo minuta, quæ ad sepulchrum Christi offerre potes, corpus scilicet tuum, & animam. Hæc depone, & sindone munda involve, hoc est: corpus, & animam tuam, omnî curâ & studiô, conserva in puritate vitæ, ac morum integritate, ut nihil deinceps committas, quo sepulturam Christi sanctam, ejusque corpus immaculatum, inhonorare possis.

O mi JESU! hæc duo minuta, corpus nimirum, & animam meam ad sancti tui sepulchri devotissimam venerationem offero. Tu advolve lapidem ad ostium monumenti, ut nihil coinquinatum intrare deinceps possit in animam meam, quo te denuo offendere præsumerem, Amen.

Pater, & Ave.

O Amor Crucifixe! miserere mei.

Statio

Statio XV.

Signum sanctæ Crucis.

✠. Adoramus te, ut suprà.

Sancta Crux est nidulus ille, in quo voluit mori Job, dicens : *in nidulo meo moriar.* (f) Nidulus iste durissimus fuit Salvatori nostro : nobis autem mollis, & suavis ; velut expertus est ille, qui, cum peragratís locís sacrís, in quibus Mysteria Dominicæ Passionis recolebantur, venisset ad eum locum, è quo Christus triumphator cœlum conscendit, constitit, in hæc verba prorumpens : *O JESU ! amore tui ingens confeci iter : vestigia tua sacra veneratus sum, & demum postrema, quæ ascensurus ad Patrem reliquisti, devotissimè exosculor : Dignare animam meam ad te in cœlos avocare.* Hæc elocutus obdormivit in Domino. (t)

O anima ! Sacro-Sancta Redemptoris tui vestigia in hac sacra crucis via, devotè venerata es, & eadem multís gemitibûs honorâsti. Postrema jam ejusdem vestigia, in sancta cruce relicta, ardentè exosculare, & exclama :

O Crux sacratissima salve ! tu es requies mea in sæculum sæculi : hic habitabo ; quoniam elegi eam. In hoc nidulo meo moriar. O JESU ! sacrum hoc iter verè pœnitens confeci. Ah ! stabilem in me conserva tuæ Passionis memoriam, & crucis amorem, ut inde mihi cœlum conscendere liceat, unde tu conscendisti. Hanc unicam nè denega gratiam :


Q

tiam : ut, si me denuo prævaricatorem futurum prævideas, hoc momento è vita tollas, Amen.

Pater, & Ave.

O Amor Crucifixe ! miserere mei.

(f) Job. 19. (t) Apud S. Bern. sen. ser. 1. de Ascens.



PRAXIS XIV.

Sacrae Communioni , & Sacrificii
accommodata,

Statio I.

Christus damnatur ad Crucem.

- †. Adoramus te sanctissime Domine JESU Christe, & benedicimus tibi !
- ✠. Quia per sanctam Crucem tuam redemisti mundum.

Satisfactorus impiæ Judæorum petitioni Pilatus, tradidit JESUM voluntati eorum.

O Religiose ! æternus Pater in SS. Missæ sacrificio , aut SS. Communione, etiam voluntati tuæ tradidit JESUM. Cogita, quid fecerint Judæi : quomodo ad eum excipiendum cum fustibus , & laternis processerint ? qua ratione eum tractaverint ? Ah ! quid tu fecisti ? An non etiam tu venientem ad te filium Dei fustibus malæ præparationis , immundæ conscientiaë , & luridæ , ac perfunctoriaë actionis excepisti ? quomodo eum tractasti ?

Etâsti ? quâ reverentiâ ? quô studiô , timore , ac tremore ? O ! si Pilatus, lumine fidei illustratus, cognovisset, JESUM esse filium Dei : Regali haud dubiè cultu eum honorâsset. O Sacerdos ! ô Sacerdos ! Sicne filium Dei vivi , Deum tuum , Judicem tuum tractas , & tractare perges ?

O Pater æterne ! qui dedisti filium tuum Unigenitum voluntati meæ : da pariter , ut voluntatem meam perversam vicissim tibi tradam, ut aliud deinceps adeò cordi mihi non sit , quàm JESUM amare , quàm eum devotissimè excipere , & decen-ter tractare, Amen.

Pater, & Ave.

O Amor Crucifixe ! miserere mei.

Statio II.

Christus Crucem suscipit.

✠. Adoramus te, ut suprâ.

AUditâ injustissimâ Pilati sententiâ summopere jubilârunt Judæi , & JESU Christo , ferreïs vinculis , funibusque constricto , gravissimam Crucem imposuerunt.

O Sacerdos Dei altissimi ! ad prolationem verborum Consecrationis audita est Divini Patris sententia : *Accipite eum vos , & secundum legem vestram judicate.* Et re vera tu accepisti filium Dei : sed eum secundum legem tuam sacerdotalem , & Religiosam , non judicâsti. Hinc ex Religioso Judæus , ex sacerdote factus es lictor. Tu JESUM inhonorâsti : gravem ei crucem imposuisti , imò ad

mortem duxisti non tantum, sed fors rapuisti, scandalosa SS. Missæ sacrificij acceleratione, actionibus irreligiosis, oculis dissolutis, manibus minacibus, affectibus non purificatis, & utinam! actu non coinquinatis. Ah! tibi à JESU tacitè acclamari crede, quod S. Bonaventura lurido ejusmodi Presbytero in aurem dixit *Virginis Filium tractas*.

O JESU! ah! utique etiam ego, & quidem frequenter nimis, novum Crucis pondus tibi imposui, & contumeliosis funibus constrinxi, dum Sacro-Sanctum corpus, & sanguinem tuum Eucharisticum indispositè, luridè, ac irreverenter tractavi. Da, quæso hujus veniam criminis, pro cuius, & aliorum omnium delictorum meorum, expiatione, quàm ardentissimo affectu Sacratissimum corpus. & sanguinem tuum, hodie, & deinceps, conficiam, & recipiam, Amen.

Pater, & Ave.

O Amor Crucifixe! miserere mei.

Statio III.

JESUS sub Cruce corruit.

Ÿ. Adoramus te, ut suprà.

EX horribili Judæorum, ac carnificum crudelitæ, JESUS viribus destitutus in terram corruit ad pedes impiorum, qui se affixerunt.

Ad tuos quoque pedes virtus Dei demittitur & Sacerdos! Cave, nè tuus illum Sacrilegus pedibus protundas, & propulses: dum JESUS furiosis tuis pas-

passionibus, & indomitis animi affectibus, haud secus, ac pedibus hostium suorum, iniquissimè fors subditur, & conculcatur. Ah emendate, & vice versa pedibus JESU tuas subde passiones, ut sub te sit appetitus tuus, & tu domineris illi. Capte generosos spiritus, & firmiter propone, passiones illas crudeles suppressere, quibus nòsti te frequentius succumbere, & Deum sæpius offendere. Hoc si efficaciter desideras, examen particulare institue.

O JESU Eucharistice ! nè deinceps incidens in latrones, pedibùs immortificatarum passionum, ac affectionum mearum, pessimè tracteris, ac conculceris, sollicitè vigilabo, ut illas supprimam, eradice, & quietam in corde meo tibi sedem construam, Amen.

Pater, & Ave.

O Amor Crucifixe ! miserere mei.

Statio IV.

JESUS obviat Matri suæ Mariæ.

✠. Adoramus te, ut suprà.

VOluit JESUS, ultimum dicturus vale Matri sacratissimæ, paulisper cum ea morari in colloquio : sed cum summa rabie à lictoribus propulsatus est.

Ah ! quis nolit cum JESU tantisper conversari ? Ille non vult, qui Sacro - Sanctum Missæ sacrificium celerrimè deproperat, & tam intra, quam post sacrificium, Sanctamve Communionem, diutius

tiùs cum JESU conversari, & commorari fastidit: imò volentem diutiùs manere, & suave affectantem alloquium, cum fastidio repellit, & dedignatur, ad vanas properans garrulitates, & occupationes. Heu qualis impudentia! Regis alloquium respuere, ut cum vilissimis mancipiis confabulari liceat.

O JESU mi dulcissime! dolenter recogito, quòd te neglecto, horas, & tempus omne, in vanissima conversatione perdiderim. Ast deinceps, præsertim in SS. Missæ sacrificio, & post Communionem, longiorem moram in tua conversatione protraham. Tunc loquere, ô Domine! quia audit servus tuus, Amen.

Pater, & Ave.

O Amor Crucifixe! miserere mei.

Statio V.

Simon invitus portat Crucem JESU.

†. Adoramus te, ùt suprà.

JESU deficiente, cùm nemo inventus esset, qui Crucem post eum ferre vellet, coactus est Simon: at ipsa hujus reluctatio cor JESU novo dolore discruciabatur.

Eodem dolore JESUM afficit Sacerdos, raro Passionem Dominicam recogitans. Cùm fugeret David à facie Absalonis, *universi servi ejus ambulabant juxta eum* 2. Reg. 15. Solus Miphiboseth, commensalis ejus, quia altero pede claudus erat, non veniebat cum eo. Cujus absentiam ægrè adeò

deò tulit David, ut postliminiò reversus eidem exprobraret : *Quare non venisti mecum Miphiboseth?* Quasi diceret : ad mensam meam comparuisti : at dum fugio ad montem oliveti, *quare non venisti mecum?* O Sacerdos ! qui de Divina JESU Christi mensa Regalibùs, & cœlestibùs sæpe refectus es dapibùs : ingenti dolore cor JESU dilanias, si non exeas cum eo ad montem oliveti, & sacras Stationes rarò recolas.

Domine mi Rex, Christe JESU ! non tantùm in montem oliveti, sed in mortem tecum ire paratus sum, & animam meam pro te ponere, quam Sacramentali pane, ac vinò, hætenus tam misericorditer pavisti. Qui autem jam tecum mori non possum, saltem cruenta mortis tuæ vestigia devoto sæpe affectu recolam, & lacrymîs irrigabo, Amen.

Pater, & Ave.

O Amor Crucifixe ! miserere mei.

Statio VI.

Veronica cum Sudario.

✠ Adoramus te, ut suprâ.

Veronica, videns miserandam JESU faciem, commiseratione commota, velum eidem porrexit : & muneris locò Divinæ faciei effigiem reportavit.

Miseranda pariter erat facies animæ meæ, peccatorum sordibùs fœdissimæ. Commiseratione autem commotus æternus Pater, velum mihi por-

rexit, *purgationem peccatorum faciens.* Hebr. 1. Sacratissimam Christi humanitatem, & imaginem vultûs sui in augustissimo Altaris Sacramento mihi donavit. Sed quid ego vicissim tanto Benefactori obtuli? An non, si non ore, saltem opere dixi juratis Dei mei hostibus: *quid vultis mihi dare, & ego eum vobis tradam?* Si hoc non dixissem debuissim majorem adhibere conatum ad peccata vitanda, ad concupiscentias edomandas, ad condignam tanti hospitis venerationem, & sanctimoniam cultum.

O JESU! justissimè tu conquereris Psal. 87. *Traditus sum, & non egrediebar: oculi mei languerunt præ inopia.* Traditus es mihi in SS. Altaris Sacramento, & non egrediebaris: oculi autem tui languerunt præ inopia, nihil in me videntes, quod tanta dignum foret Majestate. Tu igitur tuâ sacratissimâ præsentia cor meum cœlestibus virtutum thesauris reple, illudque æternum posside, Amen.

Pater, & Ave.

O Amor Crucifixe! miserere mei.

Statio VII.

Christus altera vice sub Cruce cadit.

Ÿ. Adoramus te, ut suprà.

EXtra portam, quæ *Judiciaria* dicitur, grave denuo patitur JESUS deliquium, & gravissimo lapsu sub Cruce in terram corruit.

Arbitrantur non nulli, lapsum hunc inde contigisse, quòd piissimus Salvator non procul à via ex arbo-

re

re pendentem conspexerit Judam : qui aspectus furiosæ instar lanceæ omnes ejus medullas penetrabat. Considera ! si tanto dolore Divinum illud cor affectum est ex aspectu furis , apostatæ , & traditoris sui : quantò non afficietur , si videat Ministrum suum , amicum , & Plenipotentiarium , Sacerdotem scilicet , graviora , aut æquè gravia , ac Judas , perpetrare facinora ; furem fieri Divinorum Mysteriorum , apostatamque ab Apostolica vivendi forma : imò Dei , ac Domini sui contemptorem , ac traditorem ? Ille aspectus , cor JESU affligit , vires adimit , & in terram præcipitat , ut justè conqueratur Psal. 54. *si inimicus meus maledixisset mihi , sustinuissem utique : & , si is , qui oderat me , super me magna locutus fuisset , abscondissem me forsitan ab eo. Tu verò homo unanims , dux meus , & notus meus , qui simul mecum dulces capiebas cibos. Tu quia talia fecisti , doloris impotens in terram ruo.*

O JESU ! ulteriora hujus Psalmi verba , quovis gladio penetrantiora , dignanter suspende : *Veniat mors super illos , & descendant in infernum viventes : quoniam nequitiae in habitaculis eorum.* Scio : mortem , & infernum merui. Non Sacerdos , sed carnifex : non Minister , sed apostata fui , ac proditor. Tu autem , qui meas iniquitates portasti , miserere mei , Amen.

Pater , & Ave.

O Amor Crucifixe ! miserere mei.

Statio VIII.

Mulieres deflent JESUM.

†. Adoramus te, ut suprà.

Plæ quædam mulieres, cùm vidissent, quòd JESUS tam indignè, ac bestialiter, à Judæis affligatur, non potuerunt sibi temperare à cordialissimis lacrymis.

Et quis non fleat, si videat Salvatorem suum tam malè, & indignè tractari? lugemus, si nostris parentibus, aut amicis, sinister casus accadat; nec possumus dolorem abscondere. Cur autem dolorem, si quem habemus ex Passione Domini, Patris nostri amandissimi, abscondimus, & eum in frequenti Sacrarum harum Stationum visitatione non manifestamus? Ah! si dolore non possumus vices JESU, à Judæis crudelissimè tractati: saltem ingemiscences doleamus, quòd à multis luridis Sacerdotibus tam malè, imò pessimè tractetur. Utinam & ego non essem inter illos!

O JESU, Episcopo animarum nostrarum! da veniam, quòd te quidem per peccata nostra fecerimus deflendum, non autem defleverimus. En! corda jam, & oculi nostri, tibi illacrymantur. Ah! pariter Deus tu conversus vivificabis nos, & plebs tua lætabitur in te, nec ampliùs te offendet, sed digna tua Majestate operabitur, Amen.

Pater, & Ave.

O Amor Crucifixæ! miserere mei.

Statio

Statio IX.

Christus tertio sub Cruce cadit.

✠. Adoramus te, ut supra.

DEsPICABILITER Christus à lictoribus tractatur. Ille caput, alter dorsum, tertius brachia, alius latera fuste tundit aut pede : ut adeò totus debilitatus miserando lapsu in terram cadere coactus sit.

O Sacerdos ! quomodò tu eum tractus ? fors luridè satis , & indecenter. Dolorosè hæc tractatio Christo accidit. Adversus Judæos non legitur JESUS conquestus esse ; sed adversus luridos Sacerdotes conqueritur Malach. i.v. 6. dicens : *Filius honorat Patrem, & servus Dominum suum. Si ergo Pater ego sum : ubi est honor meus & , si Dominus ego sum ; ubi est timor meus ? dicit Dominus exercituum ad vos, ô Sacerdotes ! qui despicitis nomen meum, & dixistis : in quo despeximus nomen tuum ? Offertis super altare meum panem pollutum, & dicitis : in quo polluimus te ? in eo, quod dicitis : mensa mea despecta est.* O Sacerdotes ! notate verba , signate mysteria.

O mi JESU ! per amaras illas, quas tibi expressi querelas, perque repetitos te rogo lapsus , concede gratiam, ut tanto fervore deinceps , quantâ prius negligentia, Divina peragam Mysteria , & meæ dignitati digna respondeat vita , & conversatio, Amen.

Pater, & Ave.

• O Amor Crucifixæ ! miserere mei.

Statio

Statio X.

JESUS exuitur vestibûs.

✠. Adoramus te, ùt suprâ.

UT confusio major, & dolor esset penetran-
tior, triplicata crudelitate in JESUM defæ-
vitum est. Vestibûs eundem exuerunt, & co-
ronam spineam, quam priùs profundè venerando
ingesserant capiti, violenter evellunt, ac denuo
majori vî imprimunt.

Sic nimirum agnus ille immaculatus aptatur ad
sacrificium, tripudiantibûs interim Sacerdotibûs,
hujus crudelitatis authoribûs. Ast Patri Divino
placuit quidem sacrificium; sed non placuère Sa-
cerdotes; & ideo gravissimè in eos animadvertit.
O Sacerdos Religiose! recogita: an non Pater
Divinus, dum incruentum offers sacrificium, mul-
ta in te inveniat, quæ ejus mereantur displicen-
tiam? si reum tenôsti, dole, & emendare.

O Deus meus! multa utique, & valde multa
sunt, quæ tibi in meo potuère ministerio displi-
cere: præparatio lurida: actio indevota: affe-
ctus frigidus, & indigna filij tui tractatio. Ah
parce precanti! deinceps, te adjuvante, talem me
exhibere conabor, qui dignus sit, ut sacerdotiò
fungatur, Amen.

Pater, & Ave.

O Amor Crucifixæ! miserere mei.

Statio

Statio XI.

Christus Cruci affigitur.

✠. Adoramus te, ut suprà.

Apprehenderunt carnifices JESUM, & in crucem dejectum manibùs, pedibùsque, clavìs ferreìs affigunt, sanguinèmq; copiosè defluentem aut rident, aut aspernantur.

Tu ô Sacerdos ! sanguinem Sacro - Sanctum collige ; tibi enim, & tui similibus per Isaiam c. 12. dictum est : *haurietis aquas in gaudio de fontibus Salvatoris* : aquas nimirum salientes in vitam æternam. Recordare interim : an in gaudio, an verò omnino has possis haurire aquas ? In gaudio non bibuntur aquæ turbidæ. Ah utinam ! purissimas horum fontium aquas, quantum in te est, non turbasses, apponens cor & os coinquinatum, nè dicam Sacrilegum. Utinam ! venam æquarum, viventium non totaliter obstruxisses, accedens absque siti, sinè devotione, sinè præparatione ; imò cum nausea, luridè, coactè. & indignè. Sed cave : nè ex fontibus Salvatoris, non salutem, sed interitum bibas ; *qui enim manducat, & bibit indignè, judicium sibi manducat, & bibit, non dijudicans corpus Domini.* 1. ad Cor. At verò quomodò tu dijudicasti corpus, & sanguinem Domini ?

O JESU ! si vera fide dijudicàssem corpus, & sanguinem tuum, impossibile fuisset, ut ad tantam incuriam, tepiditatem, & nauseam devenirem, ad quantam me devolutum actu conspicio.

Sed

Sed dabis gratiam, ut ferveam, ut sitiarn, meque ipsum probem, & sic salutem hauriam de SS. sanguine, ex fontibus Salvatoris descendente, Amen.

Pater, & Ave.

O Amor Crucifixe! miserere mei.

Statio XII.

JESUS in Cruce moritur.

✠. Adoramus te, ut supra.

Christus moritur, & in Cruce vivam sese Patri pro peccatis meis offert Hostiam.

O Sacerdos! tu etiam Patri offers in Altari Hostiam; sed non de tuo. Offer ergo, si quid habes, etiam de tuo. Si non invenis, quod offeras, fac, quod Christus B. Mechtildem docuit, dicens: *Offeras Patri meo caelesti, vel mihi, meam puritatem, & innocentiam pro tua impuritate: meam humilitatem, pro tua superbia: meam pietatem, & charitatem, pro tua duritia, & tepiditate: meam denique sanctissimam conversationem, pro tua negligentia, & imperfecta vita.* Sequere hoc consilium, tibi summè necessarium, & idic:

O Pater aeternae! simul cum hoc pane, & vino, offero tibi intellectum, voluntatem, oculos aures, linguam, cogitationes, verba, & opera, non ut munera Majestate tua digna; sed ut haec omnia in melius commutes. Sicut enim panem, & vinum, in Filij tui corpus, & sanguinem convertis; ita intellectum meum in intellectum Chri-

sti converte ; ut cogitem, quæ ipse cogitat , voluntatem meam in Christi voluntatem ; ut aliud non velim, quàm velit ipse. Membra denique cætera in membra Christi ; ut vivat Christus in me. Ipse per oculos meos videat, per linguam meam loquatur, per aures meas audiat, voluntate mea velit, & intellectu meo cogitet. Hac per mutatione totus desinam esse meus, & fiam totus tuus. Amen.

Pater, & Ave.

O Amor Crucifixe ! miserere mei-

Statio XIII.

Christus de Cruce deponitur.

✠. Adoratus te, ut suprà.

COrpus Redemptoris Josephus, & Nicodemus, de Cruce deponentes, ad sinum Virginis Matris Mariæ deportaverunt, antequam ferretur ad sepulchrum.

Considera Sacerdos ! Noluit JESUS corpus suum, mortuum licet, confestim tamen glorificandum, ad nudam terram ; sed ad sinum Sanctum, amantissimum, immaculatum, & Virgineum deportari. Quomodo ergo non horrebit, si in cor tuum asperum, conspurcatum, vanum, & incompositum, post verba Consecratoria deferri corpus suum glorificatum videt ? O Sacerdos ! non habes sanctitatem S. P. Francisci, nec puritatem S. Bonaventuræ, & tamen ille à sacerdotio, hic à SS. Communionem abstinuit, uterque se

se indignum , & impurum ratus. Tu autem nec abstines , nec purus es à peccato , nec diligentiam adhibes , ut immaculatum te custodias ab hoc sæculo.

O JESU ! ô Amor ! ô Ignis ! tandem aliquando è foco Eucharistico cor meum apprehende : negligentias concrema : teporem excute , & sanctum me redde : tui amatorem effice : purifica , & ad digniorem tui receptionem præpara , Amen.

Pater , & Ave.

O Amor Crucifixe ! miserere mei.

Statio XIV.

Sepultura Christi Domini.

ÿ. Adoramus te , ut suprà.

COrpus Filij de sinu Matris Virginis tollitur , & ad sepulchrum lapideum quidem , sed mundissimum , transfertur : quæ quidem translatio Matri amantissimæ dolorosissima fuit.

Perpende ô Sacerdos Religiose ! an non multò major dolor pectus divini Patris , & viscera Filiæ æterni Patris , ac Matris Filij Dei pervaserit , & pervasurus sit ; ubi viderit , per verba consecrationis tremenda Filij sui corpus , è sinu suo ereptum , ad sepulchrum cordis tui , multifaria , & omnigena coinquinatione maculatum , transferri ? Et hunc dolorem , cùm facile possis , non mitigas !

O Pater æterne ! JESU Fili Dei vivi ! ô MARIA ,

RIA, Mater dolorosissima! miseremini mei! Ah! ex intima cordis affectione doleo, quòd indigna corporis Dominici, aut saltem indevota ejus sumptione, corda vestra ingenti dolore discruciaverim. Ah! rogo vos quàm demississimè: dolorem pariter illum à cordibus vestris ad meum cor transferte, ut eo instructus docear majori reverentiâ, fervore, & devotione, ad SS. Eucharistiam accedere, Amen.

Pater, & Ave.

O Amor Crucifixe! miserere mei.

Statio XV.

Triumphale Crucis signum.

Ÿ. Adoramus te, ut suprâ.

Sancta Crux est vexillum supremi Ducis nostri JESU Christi, quod debent sequi omnes illi, qui Christiana Religione, multò magis, qui Religiosa professione censentur.

Sacerdos Religiosè! quid de illo judicas, qui se strenuum invictissimi hujus Ducis militem jactitat: ast ubi in sequela hujus vexilli iter ineundum, & in aciem descendendum est, toto corpore, & animò trepidans, ire recusat, eo solum absterritus motivò, nè fors tenellos pedes suos, ad parvos lapillos, in via positos, offendat? Profectò dices, eum & nomine, & chlamyde militis indignum. Verùntamen ex ore tuo te judicasti. Miles es Christi, & Religiosus quidem; id enim vestis tua Religioso-militaris declarat.

R

clarat.

clarat. Ast sequerisne Crucem ? Ecce ! ante, & post sacrificium valde tremulus es, non audes per quadrantem, nè dicam per medium horulæ, in præparatione, & gratiarum actione persistere, ne parvi lapilluli levissimæ cujusdam incommoditatulæ te premant : hos ipsos times in observatione silentij, in sensuum ex- & internorum refrigeratione. O te præclarum militem ! aut nomen muta, aut animum.

O JESU ! nomen Religiosi militis nec possum, nec volo mutare : mutabo tamen mores, & animum. Crucem sequar, Crucem arripiam, & sub hoc vexillo contra meipsum decertabo, Amen.

Pater, & Ave.

O Amor Crucifixæ ! miserere mei.

PRAXIS XV.

Quæ pariter servire poterit in ordine
ad Eucharistiam.

Statio I.

Christus damnatur ad mortem.

†. Adoramus te sanctissime Domine JESU Christe, & benedicimus tibi !

&. Quia per sanctam Crucem tuam redemisti mundum.

Christus JESUS à Pontio Pilato per summam inju-

ante, audes, rula, riste, com, obfer, m re, t no-
injustitiam condemnatur ad mortem, & æquanimi-
ter sustinet.

Considera, quòd etiam Christus in SS. Com-
munionem ab infinita sua, qua te diligit, charitate,
damnetur ad cor tuum, quod forsan est omnî Pi-
latò crudelius, omnî Judæò ferocius. Anne pu-
tas, quòd etiam hanc tuam injustitiam æquani-
miter ferre possit?

ffum, & ani- & sub nen.
O Amor Divine! mitte, quem missurus es, &
demitte illum in cor meum; per tuam enim gra-
tiam illud non erit amplius sedes iniquitatis, sed
Regia Deò digna. Veni ô JESU! & cor meum
incole, illustra, & totaliter sanctifica, Amen.

Pater, & Ave.

*50
O Amor Crucifixe! miserere mei.

Statio II.

Christus Crucem suscipit.

line
†. Adoramus te, ut supra.

C Hristus JESUS Crucem, à Judæis sibi præ-
paratam, cum ingenti amore, ac fervore
suscipit.

Christi- emissi- amam ju-
Quid huic amori respondebis Religiose? Cor-
pus Christi Eucharisticum stude semper suscipere
cum ingenti amore cordis, & fervore spiritûs, &
quemadmodum Christus Dominus ad mortem se
preparavit per voluntariam Crucis bajulationem,
ita quoque ad suscipiendum SS. Eucharistiæ Sacra-
mentum te præpara per voluntariam Crucis tole-
rantiam, per mortificationes, ac opera supererogata,
R 2 roga-

rogatoria. Fecistine unquam talia ? si non : saltem deinceps facies.

O JESU Eucharistice ! qui te ad tuimet ipsius sacificationem per catenarum, ac Crucis pondera , per spinas, & flagella , per dolores, & vulnera præparasti : concede, ut ad Divinas tuas epulas, ex SS. Sacrificio isto participandas, carne & spiritu mortificatus semper compaream, Amen.

Pater, & Ave.

Q Amor Crucifixe ! miserere mei.

Statio III.

Christus sub Cruce cadit.

†. Adoramus te, ut suprà.

Cum Salvator innocentissimus, per urbis plateas, lapidibus stratas, verbera inter, & mille opprobria propelleretur à vesana carnificum turba, nec propter dolorosissima pedum, humerique vulnera, ulterius progredi valeret, gravissimo lapsu sub Cruce corruit.

Gravis equidemerat hic lapsus; sed tolerabilis adhuc videri poterat, si cum eo comparetur, quo JESUS affligitur, dum in cor petrosum, & laxeum, aut manus cruentas improbi Sacerdotis, & communicantis dejicitur, ac male torquetur. Proinde, si tu ad consimilem lapsum impulisti JESUM, efficacissimam propone emendationem.

O JESU Eucharistice ! tu non tantum sæpius in cor meum saxeum, ac petrosum, sed omnino spinis, ac tribulis confutum, decidisti. Ah mitte in illud

illud penetrantem amoris tui flammam, ut purificetur, & colliquescat, Amen.

Pater, & Ave.

O Amor Crucifixe ! miserere mei.

Statio IV.

Christus valedicit Matri.

†. Adoramus te, ut suprà.

EXtremè valedicturis Filio, & Matri, non permixtum est, mutuïs affectibûs plura loqui; sed immani separatione Hæc rejecta, Ille fuit propulsatus.

Considera Religiose ! quantum à Matre amantissima ægrè recedit Filius Dei, tantum ad te non amantem horret accedere. Tu igitur, quemadmodum lacrymæ Matris in doloroso Crucis itinere Christum ad reciproci amoris exhibitionem invitabant; ita per lacrymas & pœnitentiæ, & compassivi affectûs, Christum ad te invita, & Matris intercessionem implora.

Ah! utinam amore tui diffuam ô JESU ! ut te dignativum cordis mei incolam habere merear. O MARIA ! per amarissimam tui à Filio separationem te deprecor : impetra mihi gratiam, ut hic, & in æternum, JESU meo conjungi merear, Amen.

Pater, & Ave.

O Amor Crucifixe ! miserere mei.

Statio V.

Simon tollit Crucem.

✠. Adoramus te, ut suprà.

CUm vidissent Judæi, & carnifices, JESUM deficere, nè solo Crucis pondere enecatus crucifixionem evaderet, reluctantiis aliis omnibus, Simonem quemdam, fortè transeuntem, angariaverunt, ut Crucem JESU tolleret: qui & ipse initialiter omnibus viribus restitit.

Talis Simon, transiens viam Crucis, hancque volens tollere, & portare, est Sacerdos, Sacrificium incruentum offerens absque debita præparatione, & frequenti meditatione Passionis Dominicæ. Indigna profectò res est! Christus, semetiplum sacrificaturus, Crucem bajulat: & Sacerdos, minister Christi, nil minus cogitat, quam de Cruce, & Passione Domini.

Sit ergo fixum, ô JESU! devota sæpe mente Mysteria sacratissimæ Passionis tuæ recolam, ut per ea aptiorem me reddam ad memoriale Passionis tuæ celebrandum, Amen.

Pater, & Ave.

O Amor Crucifixæ! miserere mei.

Statio VI.

Veronica porrigit Christo sudarium.

✠. Adoramus te, ut suprà.

UT vidit Veronica vultum JESU Christi, miseran-

randum in modum defœdatis , urgente intus cordiali amore accurrit , & sudarium eidem ad fordes abstergendas offert.

Tu ô Sacerdos ! fidei oculô eundem vultum perspicis ; omnesque , qui te vident Altare conscendere judicant , quod illum purgare velis , & JESUM , in extremis suis angustiis consolari. Paramenta , situs , habitus , externa omnia , tuam commendant non minùs devotionem , quàm olim velum Veronicam. Tu interim (quod horreo dicere) accedis ad JESUM , velut proditorius Joab ad Amasam dicens : *Salve mi frater ! & tenuit mentum Amasæ , quasi osculans eum , -- & percussit eum in latere.* 2. Reg. 20. Ita scilicet Christum percutis luridissimâ actionibûs , dissolutionibûs , & moribûs Sacerdotem dedecentibûs.

O mi Deus ! si homines nôssent , quàm iniquus & indignus Sacerdos ego sim , digniorem me sîmô , quàm Sacerdotiô judicarent. Tu hoc nôsti ; & tamen Sacrificium accipis de manibus meis. Ah utinam ! me totum tibi sacrificarem. En ! cum Filio tuo memet offero : respice non in meam , sed in Christi tui faciem , & faciem tuam averte à peccatis meis , Amen.

Pater , & Ave.

O Amor Crucifixæ ! miserere mei.

Statio VII.

Christus denuo sub Cruce cadit.

✠. Adoramus te , ut suprà.

Non cessante carnificum barbarie , & doloribûs

bûs nihil diminutis, sed continuo crescentibûs, iteratò JESUS viribûs destitutus in terram prolabitur, & sub Crucis pondere ingemiscit.

Valde gravis, & pœnositus erat hic lapsus; dolorosius enim cadit homo debilis, marcidus, & infirmus; & quidem eò dolorosius, quò frequentius. Sed, quòd ego tam graviter, tam frequenter in peccata corruam, debilis sim, & marcidus, hoc imperceptibile est; cum tamen quotidie splendide epuler, & cœlestibûs reficiar ferculis. Stomachus meus fors in causâ est, qui nauseam habet super cibo isto levissimo. Heu me! hæc ægritudo certè est ad mortem, & nisi efficacissima adhibeam remedia, vigilias, orationes, carnis macerationes, & præsertim meditationem Passionis Dominicæ.

O JESU! potentissime animarum nostrarum Medice! ah! cura periculosum hunc morbum, & insatiabilem cœlestis mensæ tuæ famem in anima mea excita, ut panis ille tuus cor meum confirmet in bono, & mihi conducatur in vitam æternam, Amen.

Pater, & Ave.

O Amor Crucifixæ! miserere mei.

Statio VIII.

Mulieres plangunt JESUM.

✠. Adoramus te, ut suprà.

JESUM ad mortem eductum secutæ sunt non nullæ Mulieres, quæ ex aspectu crudelissimæ tra-

cta-

Stationis in cordialissimas lacrymas sunt resolutæ : JESUS autem præcepit eis, ut super se ipsas flerent.

Cogita, ô Sacerdos ! si JESUS, mox futurus cruentum in Cruce Sacrificium, Mulieres se sequentes jussit, ut se ipsas deherent : quantò magis Sacerdoti, illius sacrificij memoriam celebraturo, dictum velit : *Super te ipsum flecto*, qui per peccata tua mortis meæ causa extitisti. Sed quo animi luctu, qua contritione, & à peccatis averfione, accessisti ad sacrificandum ? quoties lavacrò poenitentiae Sacramentalis animam purificas ? Si te negligentem deprehendas, dole, & dic :

O JESU ! doleo intimè, quòd absque dolorosa peccatorum meorum detestatione, aut Sacramentali confessione, Sacro - sanctum Missæ Sacrificium, quod est memoriale tuæ sacratissimæ Passionis, celebrare præsumpserim. Deinceps verò in luctu, & puritate animi, Divina Mysteria devotissimè celebrare studebo, Amen.

Pater, & Ave.

O Amor Crucifixe ! miserere mei.

Statio IX.

JESUS tertio sub Cruce deficit.

¶ Adoramus te, ut suprà.

TAm horrendus, & violentus erat hic lapsus, ut copioso corpus JESU totum dimanaret sanguine : sanguis verò iste scelestissimorum hominum pendibus fuit conculcatus, & inhonoratus.

R 5

Sed

Sed utinam ! Judæi tantum , & inimici Crucis Christi , sanguinem istum profanâssent. Utinam non esset invenire Sacerdotes , qui ex sumptione Calicis Eucharistici recenti adhuc sanguine Christi madentes , in vanas conversationes , confabulationes , occupationesque frivolas effunderentur ! sed quid hoc est aliud , quam sanguinem Christi profanare , & conculcare ? Vide sis , an non & tu illis annumerari merearis ? Sed vœ tibi !

Ah mi JESU ! utique illorum unus ego sum , qui magnâ irreverentiâ te affecerunt , quotidie sumpto corpore tuo , & sanguine , ad nugas , & vanitates effusi. Intimè desuper doleo , proponoque firmissimè , sumptis hîs Sacramentis in gratiarum actione diutius perseverare , & dignè te ambulare , Amen.

Pater , & Ave.

O Amor Crucifixe ! miserere mei.

Statio X.

Christo auferuntur vestes , & corona.

✠. Adoramus te , ut suprâ.

ANtequam ventum erat ad locum Crucifixionis , aggređiuntur carnifices JESUM , ac primò coronam spineam , per cerebrum , & tempora , vî revellunt : dein concretam vulneratæ carni tunicam , pari immanitate , unâ cum cute , & carne abstrahunt : ut adeò JESUS immenso dolorum , ac proprij sanguinis pelago , innatari videretur.

Eheu !

Eheu ! hoc est diluvium peccati grande, quod fecit JESUS in sanguine suo. Hoc diluvium non quidem summitates montium quindecim cubitis ; sed summitates universæ malitiæ humanæ transcendit, non tantum quindecim cubitis, sed infinitis parafangis. Disce, ô Sacerdos ! valorem hujus sanguinis, disce pretium. Gratis quidem valor iste, & pretium à Deo datur : nemini tamen, præterquam æstimanti, & suspiranti. Quænam verò tua est hujus æstimatio, & desiderium ?

O Domine ! in recordatione priorum mearum negligentiarum, & vanissimarum conversationum, convincor, quod exiguam de tam pretioso thesauro habuerim existimationem : modò autem ejus valorem accuratius expendens nihil æquè desidero, quàm ut sanguis tuus veniat super me, & operiat multitudinem peccatorum meorum, Amen.

Pater, & Ave.

O Amor Crucifixe ! miserere mei.

Statio XI.

Christus in Cruce extenditur.

✠. Adoramus te, ut suprà.

JESUS Christus, licèt, velut agnus mitissimus, spontè se in Crucem inclinaverit, manusque, ac pedes, ad crucifigendum extenderit ; ferocissimè tamen à carnificibus distenditur, acclavatur, dilaniatur, perforatur.

JESUS quidem hæc sustinuit, & crudeli hoc modo

modo sacrificari voluit. Tu autem, licet libenter Deo tuo cum Hostia Eucharistica sacrificare te velles; truculentas tamen carnificum manus horres, & expavescis. Sed noli metuere! si sacrificari desideras: ecce Sacerdos magnus, Christus JESUS, amantissimus Pater tuus te sibi sacrificare dignatur, & longè mitiùs, mansuetius, & leniùs te aget; jugum enim ejus suave est, & onus leve. Sed tu etiam hoc excutis.

O JESU! *Quoniam si voluisses, Sacrificium dedissem utique*: Tu verò ex infinita tua misericordia *holocaustis*, acerbissimè sacrificandis, *non delectaberis. Sacrificium Deo spiritus contribulatus: cor contritum, & humiliatum, Deus non despicies.* Spiritum ergo contribulatum, & ob ingentia peccata mea profundissimè ingemiscentem, dignanter suscipe in odorem suavitatis, Amen.

Pater, & Ave.

O Amor Crucifixæ! miserere mei.

Statio XII.

JESUS in Cruce moritur.

✠. Adoramus te, ut suprà.

Summus Sacerdos, Hostia immaculata, & Sacrificium, immensitate dolorum victi, per dolorosissimam mortem, in medio duorum latronum, defecerunt, & consummati sunt.

Sic nimirum, sic Sacrificium istud instituit; cuius officium committi voluit solis Presbyteris, quibus sic congruit. Hoc Sacrificium peragit Sacerdos

dos in Persona Christi. Quis porro Personam Christi perfectius sustinebit, & exprimet, quàm ille, qui sibi ipse mortuus est in Cruce propria abnegationis, & indefinens mortificationis, ut verè possit dicere: *Christo confixus sum Cruci?* Potesne, ô Sacerdos! tu hoc dicere? si non: fac possis. Præterea cave, nè corpus, & anima tua sint duo quasi latrones, in quorum medio crucifigatur denuo Filius Dei Eucharisticus.

O JESU! qui dedisti mihi indignissimo Sacerdoti potestatem, & commissionem tuam, sacrificantis Personam sustinendi: concede propitius, ut & modum sacrificantis observans, tibi crucifigar, & commoriar, Amen.

Pater, & Ave.

O Amor Crucifixe! miserere mei.

Statio XIII.

Corporis Christi de Cruce depositio.

✠. Adoramus te, ut supra.

SEdebat non procul à Cruce Mater Crucifixi JESU; quia stare non poterat, dolorum gladiis penetrata. Et per hos meruit, ut Filius dignaretur in ejus brachiis requiescere, priusquam ad Sepulchrum deferretur.

Considera: quanta mereatur per suos dolores Mater afflictissima, non tantum sibi, sed & mihi. Si enim compassa Sponso in nuptiis Chana: meruit, ut ex aqua vinum fieret: quid, putas, merebitur extremè compassa Filio? nunquid

ut ex lapidibus his, quorum omnium durissimus tu es, filij Abrahæ fiant? Accede, & roga eam ut à Filio tibi impetret donum compassionis, & dignæ Sacrificationis, ac Communionis.

O Mater desolatissima! per immanitatem doloris illius, quo Filium tuum mortuum, & dirissimè vulneratum vidisti, pérque amorem, quo eum strinxisti, rogo te: impetra mihi compassivum dolorem, & dignam semper, ac amorosam corporis, & Sanguinis Eucharistici participationem, ut per tuas Virgineas manus in sinum Abrahæ deportari merear, Amen.

Pater, & Ave.

O Amor Crucifixe! miserere mei.

Statio XIV.

Corpus Christi fertur ad sepulchrum:

†. Adoramus te, ut supra.

AD condignam Corporis Dominici sepulturam Nicodemus, & Josephus, nec sumptibus, nec laboribus pepercere. Exciderunt enim monumentum novum; coëmerunt aromata, præparaverunt linteamina; accefferunt Pilatum: contempserunt timorem Judæorum: verbò: intentatum reliquerunt nihil, quod devotio, & pietas suggessere.

Sacerdos, aut Communicans Religiose! numquid complaces tibi in fervore horum Judæorum, qui erant occulti Christi Discipuli? Tu verò es publicus Christi Discipulus, & in consimili cura,
circa

circa sepeliendum Corpus Christi in corde tuo per SS. Communionem, complacet sibi Dominus. Verùm edic: quos sumptus temporis, quos labores impendis, ut sepulchrum cordis tui excidatur, & in formam novam redigatur? ànne præparas linteamina virtutum, aromata bonorum operum, &c.

O JESU! confundunt me Judæi, qui summo-
pere curârunt, ut Corpus tuum externè humaretur debito cum honore: ego verò, ut illud intra me ipsum recipiam, sterto, deses sum, & otiosus. Ah! maledictam hanc injuriam amove à me, & miserere mei, Amen.

Pater, & Ave.

O Amor Crucifixæ! miserere mei.

Statio XV.

Helena cum Cruce.

ψ. Adoramus te, ut suprà.

A Scendens Christus in altum, captivam duxit captivitatem, eandemque alligavit Cruci vinculis insolubilibus.


Sacerdos Religiose! quoties ascendis ad altare, ascendis in altum: sed securius non ascendes, quàm si prius in altum Crucis verticem ascenderis. Ecce enim vacua est. Ascende ergo, & captivam duces captivitatem passionum tuarum, qua hætenus detinebaris, easque Cruci Sanctæ ita alliga, ut nocere tibi deinceps nullatenus possint.

Per admirabilem ascensionem tuam, ô JESU
Christe!

Christe ! qua nos in libertatem filiorum Dei perfectam asseruisti ; rogo te : doce me Crucem conscendere , & regnare à ligno , ut sub me sit appetitus meus , & hostes universi ; quatenus ad conscendendum sanctum Altare tuum perfectius disponar , Amen.

Pater , & Ave.

O Amor Crucifixæ ! miserere mei.



PRAXIS XVI.

Statio I.

Christus à Pilato ad mortem Crucis condemnatus est semel : à me autem sæpissime.

O JESU ! in æternum te non offendam amplius.

Statio II.

Christus nuper gloriosè , & cum plausu exceptus , nunc fert Crucem , & ad mortem educitur. Si fors ego hodie ad sepulchrum educendus , aut efferendus sum : quid me juvabit heri fuisse æstimatum , & in bonis dies duxisse ?

Vanitas vanitatum , & omnia vanitas , præter amare Deum , & illi soli servire ! Scribe , ô JESU ! hanc veritatem in corde meo , stylô ferreô.

Statio

Statio III.

Doloribûs oppressus in terram ruit cum Cruce. Si quid è manibus honoratoris Domini exciderit, solemus id tollere, sed cum Christus è sinu Patris in terram decedit, velut gemma pretiosissima, non eum tollimus. Tu saltem Crucem ab humeris ejus tolle, ut faciliùs respiret.

O Pater æterne ! utinam decideret Filius tuus cum Cruce in cor meum ! & nemo eum tollat à me.

Statio IV.

Luget Mater DEI, conspicata Filium suum à Judæis ad mortem educi. Et non lugebit, ut videt, quòd à me educatur toties, quoties pecco ?

O MARIA ! tam tristis educationis spectatricem te non amplius efficiam.

Statio V.

Circumspicit JESUS undique, an non se offerat aliquis ad Crucis bajulationem Quæsit utique etiam me Crucis bajulum, & consocium. At verò nova Cruci adjicio pondera.

O ! si essem tam gravis, & severus mihi, quam gravis, & molestus fui Deo meo.

Statio VI.

Heu miserè affectam, & in Veronicæ sudario

expressam Domini faciem ! sed talem se foris exhibet . qualis intus est in mente mea.

Sic nimirum : ô JESU ! in corde meo tu es novissimus virorum , despectus , & neglectus ! Ah ! respice me , ut agnoscam te.

Statio VII.

JESUS denuo cadit. Qui alios salvos fecit , se ipsum salvare non vult à lapsibus , ut me salvet. Sed Sacerdos , confessarius , ac Religiosus , alios salvos facit per adhortationes &c. Seipsum autem salvare non vult idem faciendô.

Deinceps , ô JESU ! factor legis , non Doctor tantum ero.

Statio VIII.

Ugent Mulieres JESUM à Jerosolymis egressum ; quia egressus est à filia Sion omnis decor ejus : id est , gratia ab anima fideli ; imò non egressus , sed expulsus. An hoc decore deinceps te spoliabis ?

Mane nobiscum , Domine ! nè meritò expellar à te.

Statio IX.

JESUS , cum se sequentes Mulieres misericorditer esset consolatus , ideo propter bonum præstitum crudeliùs propellitur , cæditur , concalcatur ; donec in terram corruat. Ego verò , cum pro meritis aut à Deo , aut ab homine punior , excandesco.

Ego ,

Ego, ô JESU ! in flagella paratus sum : sustinebo & à te, & ab homine : modò in æternam parcas.

Statio X.

Spoliatur vestibûs, & innocentissimo vestitur sanguine. Sanguis Christi philtrum est, quò in sui nos amorem nolentes cogat Deus. Ah inebrier hòc philtro !

Dignare me, amare te, ô JESU amantissimè !

Statio XI.

Crucifigitur, ut omnes videant, quid agendum, ut vitam æternam habeant. Ah video ! sed non facio.

Faciam tamen, amore tui, ô JESU ! mei ipsius crucifixor fiam.

Statio XII.

Confectis tandem à prætorio Pilati usque ad locum mortis 1321. passibûs, crucifixus, & in cruce elevatus est innocens Deus. Et quot passus ego feci pro amore Dei ? pro bona morte ? quot ad Dei injuriam, ad infernum ?

O JESU ! tu quidem gressus meos dinumerasti : Sed parce peccatis meis.

Statio XIII.

A Spectus JESU mortui, & de Cruce depositi doloris gladium in MARIÆ adegit viscera : sed non in mea.

O JESU ! doloris gladium ex beatissima Matris tuæ anima extrahe , & perverso cordi meo profunde infige , ut discam pati , & compati.

Statio XIV.

Dormit JESUS post labores in Sepulchro. Ego, ubi agitur de salute animæ meæ, dormito, laboro nihil : at ubi Deus offendendus est, vigilo.

O JESU ! pro tua gloria deinceps vigilabo , pro mea dormiam.

Statio XV.

Sancta Crux est lignum , de quo ait Salvator : Signem veni mittere in terram : & quid volo, nisi ut accendatur ? quid verò tu vis ?

O ! si hujus ligni ignis terram cordis mei apprehenderet , & accenderet.

❧*****❧

PRAXIS XVII.

Statio I.

Ad mortem damnatur à Pilato, homine ethnico , infideli , barbaro. Utinam non idem sustinere deberet Christus ab homine fideli, Christiano, Religioso , & Sacerdote !

O JESU ! Pilatus fui hæctenus : sed deinceps ero Religiosus , & amator tuus.

Statio

Statio II.

Imponunt Judæi Christo Crucem gravissimam: & non recusat. Imponit mihi divina providentia crucem levem: & recuso. O dedecus!

Salve sancta Crux! te non recusabo posthac.

Statio III.

JESUS primò cadit sub Cruce. Ah! quoties ego cecidi nulla pressus cruce?

O infirmitas JESU mei! confirma me; ut non cadam amplius.

Statio IV.

Occurrit Mater Filio Crucem bajulanti: Aspectus hic verè erat dolorosus Matri: sed dolorosior, dum me videt à cruce mortificationis fugientem.

Abstet à me tam turpis fuga.

Statio V.

Recusavit Simon Crucem primitus; sed mutatus tulit eam. Tu, qui cum Simone Crucem recusasti, cum Simone emendatus resipisce.

O JESU! deinceps ad Crucem vocabis me, & ego respondebo tibi: operi manuum tuarum porriges dexteram.

Statio VI.

Aspice impressam velo faciem. Cujus est hæc
S ; ima-

imago ? Nunquid , Cæsaris ? Reddidistine , quæ sunt Cæsaris , Cæsari ?

Ah ! non reddidi ; sed , quæ defraudavi , eisdem reddam quadruplum.

Statio VII.

Immunitate militum , & carnificum , debilitatus JESUS in terram secundò corruit. Desiste , ô carnifex ! à tua ferocia ! At ille respondet mihi : desiste tu à peccatis tuis.

Ah desistam ! & non adjiciam ultrà peccare Deo meo.

Statio VIII.

Ut primùm hæ Mulieres viderunt JESUM acerbissimè tractatum , mox flere cœperunt. Ego cum taliter tractavi per peccata mea : sed quando deslebo illa ?

Nunc tandem , ô oculi ! in fervidas erumpite lacrymas , & mea deplorate scelera.

Statio IX.

JESU , tertiò cadenti , non parcunt Judæi. Mihi millies cadenti pepercit Deus. Quare ? ut parcam Christo , non parcens mihi.

Ab sit , ut in te , mi JESU ! fuerim crudelis , & in me sim pius.

Statio X.

Exuitur vestibûs , solâ tectus innocentia , & sancti.

sanctitate. Tu, si Religioso exueris habitu, haberésne, quo adhuc tegereris?

Ah! hoc in casu planè nudus consisterem. Sed ex nunc incipiam mihi texere vestem ex inaufertibili virtutum tela.

Statio XI.

Dolorosissimè crucifigitur; quia sic oportuit pati Christum, ut intraret in gloriam suam. Quid de me fiet, qui nec quidquam facio boni, nec quidquam tolero mali?

Abstine! ut ducam in bonis dies meos, & in puncto ad inferna descendam.

Statio XII.

Moritur amore hominis JESUS. Ecce tantum te fecit Deus. Vis scire, quanti tu illum facias? propter modicam voluptatem offendis.

O maledicta voluptas! quæ morte Filij Dei comparatur.

Statio XIII.

DE Cruce deponitur per manus Nicodemi. Etiam meis deponi vult, desiderans, ut manus, quas extendi ad peccatum, extendam ad amplexum amoris, & boni operis.

O JESU mi! amplector te: Ah! pariter tu stringe me: non amplius dimittam te: & tu nò derelinquas me, Amen.

Statio XIV.


DElatus est ad sepulchrum inter inenarrabiles Matris afflictissimæ singultus. Ipsa nimirum optimè novit, quid sit Deum derelinquere, & à Deo separari. Utinam & ego hoc perpendifsem!

O JESU! ego te sæpe dereliqui. Ah! noli me poena talionis punire. Adjutor meus esto: & nè derelinquas me.

Statio XV.

GLoriosissima Christi Crux est; ast adeò gloriosa haud foret, nisi in ea mortuus esset Salvator. Pariter Crux Religiosi instituti non erit mihi gloriosa, nisi in eadem mortuus fuerim.

O Crux Christi! mortifica me, ut cum JESU glorificem te.



P R A X I S XVIII.

Statio I.

CHristus voluntati Judæorum traditus est non tam à Pilato, quàm à SS. Trinitate, quæ infinito amore diligebat JESUM; traditus est tamen. Ah! utinam in tantum diligerem, ut Deo meo me mutuo traderem.

O JE.

O JESU ! totum me tibi offero. Jam non sum meus, sed totus tuus.

Statio II.

CRucem suscipit ; sed antea propriis indutus est vestibûs , ut eò facilius agnitus majori haberetur ludibrio. Si tu , ô Religiose ! in die Judicij comparueris in vestibus Religiosis , & non vixeris religiosè , dæmonum , Angelorum , & hominum ludibrio , ac risui exponeris.

Lugebo jam ad pœnitentiam , nè quondam irideant me inimici mei.

Statio III.

CAdit in terram , & carnificum pedibûs conculcatus , ac opprobriosâ blasphemîâ laceratus , altum silet. Tu , homo superbe ! leve dicterium , verbum punctorium , aut correctorium , non sustinens , omnium te pedibûs conculcari conquereris. Vah humilitatem !

O JESU humillime ! doce me veram humilitatem.

Statio IV.

AMat JESUS Matrem ingenti amore : valedicit ei tamen , & ad mortem properat. Heu ! quantum ego amo passiones , & luriditates meas , ut eis amore JESU non valedicam.

Valete vanitates , risus , tepiditates ! ut JESUM habeam , vos jam abjiciam.

Statio V.

Recusat Simon ferre Crucem post JESUM, quem, licet noverit ex fama, non tamen novit inter vincula. Sic & ego ago cum Christo.

O JESU ! qualis amor meus ? Prospera fluunt ; sequor : adversa ingruunt ; fugio. Non ille verè amat, qui non semper amat.

Statio VI.

Corporeis oculis Veronica JESUM aspexit, & commiseratione mota velum capiti detraxit. Ego oculis fidei eum aspicio pro me passum, laceratum, mortuum : & quis sequitur effectus, quæ vitæ emendatio ? quis me impedit ?

Ah ! non alius, quam propriæ carnis amor. O JESU ! hunc tolle à me.

Statio VII.

In finitâ injuriâ lacescit, & in terram dejectus stat statuâ firmius ; quia ad injurias non movetur. Et ego injurias injuriis compenso ? Si Deo illudit mundus, an mihi parcet ?

O JESU ! non est servus major Dominò suò. Irridear à mundo, ut servum tuum me esse comprobem. Exeam ad te extra castra vanitatis, & mundi improperium Crucis tuæ portans.

Statio VIII.

Miserandus Christi patientis aspectus, qui an-

te paucas horas Petro , mox mulieribus amaras exprimit lacrymas. Ego autem sæpe Christum patientem aspicio : sed ubi lacrymæ ? ubi poenitentia ? ubi compassio ?

Planè cor obduratum , & Pharaonicum ego habeo. Tu, ô JESU ! illud emolli.

Statio IX.

CAdit ; sed relictis ultimis viribus scandit montem Calvariæ. Ah ! quàm lentus ego ad Dei obsequium ? quàm promptus ad malum ?

O JESU ! omnes gressus tui clamant , quòd ames me : cur non etiam amem te ? ô ! utinam semper amâssem , & deinceps amarem.

Statio X.

Violenter expoliatur vestimentis. Jacob visa filij sui tunica , sanguine conspersâ , altum ingemuit , & ad mortem usque desolatus est. Et ego visâ Filij Dei tunicâ , totâ quantâ sanguine purpuratâ , non ingemiscam ?

Ah ! ingemisco tanquam reus : culpâ rubet vultus meu : supplicanti parce Deus !

Statio XI.

AMore mei inclinatus in Crucem , triginta tribus annis expectatam. Heu ! quot annis ego non Crucis amplexum , sed fugam meditatus sum ? quot nimirum annis Christum non amavi.

Erravi,

Erravi, sicut ovis, quæ perijt. Nolo deinceps fugere à Deo meo, & ejus Cruce.

Statio XII.

JESUS in Cruce moritur. Sed quis eum crucifixit? quis occidit. Ah! conscientia mea reum me proclamat. Ego (vah ingratam belluam!) ego eum crucifixi, ego trucidavi! Quid de me fiet, si animam pro anima, sanguinem pro sanguine Deus requirat?

O JESU! mortem merui. Ergo, nè tu eam inferas, mei ipsius judex ero, & lictor: memetipsum crucifigam.

Statio XIII.

Joseph Arimathæus audacter accessit Pilatum, & peijt ab eo, ut sibi liceret corpus JESU de Cruce deponere. Tu Josephum imitatus audacter aggredere tuas passiones, quas hactenus timuisti.

O JESU! sanctam hanc audaciam cordi meo instilla, & conserva.

Statio XIV.

Luget Mater, dolétque super Filium, de Cruce depositum. Sed unde iste dolor? Inde: quòd Deum, amore mei mortuum, non redamem.

O Mater doloris! consortem amoris me fac, & mæroris.

Statio

H
tùm v
O
pente
Amen

✠

U
cus m
nis, c
Au
sed h
parca

JES
nes
merc
ego
mora
Sci

Statio XV.

HÆc est Crux Christi, totius orbis veneratione dignissima. Ego autem eam verbis tantum veneror, & factis fugio, ac horreo.

O Crux sancta ! etiam renitente, & obstrepente carne te amplector, & dimittam nunquam, Amen.



PRAXIS XIX.

Statio I.

UT Pilatus possit manere amicus Cæsaris, Christum ad mortem damnat. Et ego, ut amicus manere possim, non Cæsaris, sed fœdæ carnis, quomodò cum Deo ago ?

Audi flagitiosa caro ! non tuus amicus posthac, sed hostis ero. Deo non pepercisti : nec tibi parcam. O JESU da gratiam !

Statio II.

JESU Christo, omnibus benefico, erga omnes pio, probrosam imponunt Crucem. Hanc mercedem dat nimirum mundus. Ut quid ergo ego labores meos recognosci, laudari, rememorari desidero ?

Scitote homines universi ! vestras sperno mercedes,

cedes, & amplector ludibria, contemptus, de-
tractiones, & judicia. Hæc veniant super me; nec
alia laboribus meis merces sit, nisi solus Deus.

Statio III.

IN terram dejicitur JESUS, & canis instar im-
piorum pedibûs conculcatur, Verè novissimus
virorum JESUS: & ego primos honores amo.
Quæ insania!

O JESU! si in regno tuo novissimi futuri sunt
primi: sim omnium peripsema in hoc mundo.

Statio IV.

ACcerbissimò doloris gladiò cor Matris Virgi-
nis perforatur, ubi videt Natum suum tam
immanissimè tractari, & raptari. Sed quomodo
ego eum tracto in SS. Missæ sacrificio, & Altaris
Sacramento?

O MARIA! ingentis tibi luctûs causâ fui mea
luriditate: sim & causâ solatij ignita devotione.

Statio V.

JESUS ex virium defectu Crucem solus portare
amplius haud poterat, & non erat, qui adju-
varet. Me autem juvat Deus ipsè in portanda
Cruce; & ego eum repello meâ impatientiâ.
Quantum nefas!

In te Domine confido: in omni tribulatione
mea confortabis, & juvabis me.

Statio

Statio VI.

Veronica faciem Christi sudario impressam exhibet. Poterisne, ô anima! absque pio horrore illam intueri? Sed, an vicissim poterit Deus faciem animæ tuæ absque horrore intueri?

O JESU! averte oculos tuos à peccatis meis: nè proijcias me à facie tua.

Statio VII.

Extra portam civitatis cadit Christus secundò. Duas civitatis (ait S. Aug.) fecerunt duo amores: civitatem diaboli, amor sui usque ad contemptum Dei: civitatem Dei, amor Dei usque ad contemptum sui. Scis jam, cur extra civitatem cadat Deus.

O JESU! gravissimo hoc lapsu voluisti amorem mei proprium opprimere. Ah! utinam oppressus maneat.

Statio VIII.

Mullieres, videntes JESUM, secutæ sunt eum plangentes. O anima! nôstine hunc hominem, qui Cruce oneratus educitur ad montem Calvariæ? si nôsti: quare eum non sequeris?

O JESU! sequar te, quocunque ieris: etiam si oportuerit me mori tecum (sed mihimetipsi) non te negabo.

Statio IX.

JESU tertio labitur, & ferociter pertractatur : silet tamen. Et ego in venerationem hujus silentij Religiosum silentium non observem ?

Doce me Domine linguam cohibere, & Religiositatis spiritum in silentio cordis, & oris custodire.

Statio X.

JESUS potatur felle, & acetô, ut in cibo, & potu doceret me abstinentiam. Sed, ô me vanam Religiosi umbram ! cui hactenus magis cordi fuit sanitas, quàm sanctitas : magis refectio, quàm perfectio : sensualitas potius, quàm frugalitas.

Statio XI.

Propositum me redimendi validissimâs Cruci affixit clavâs Salvator. Utinam unicus horum clavorum mea stabiliret proposita !

O JESU ! fortem me fac, & constantem in propositorum bonorum executione.

Statio XII.

Clamans : *Pater ! in manus tuas commendo Spiritum meum*, expiravit. Ah ! utinam Spiritum suum in cor meum immisisset ! sed, ait, non manebit Spiritus meus in homine, quia caro est.

Vincam

Vincam igitur carnem cum suis carnalitatibus ,
ut maneat in me Spiritus Christi.

Statio XIII.

DE Cruce deponitur. Jam ego deberem Cru-
cem ascendere. Sed quando hoc fiet ?

Fac, ô JESU ! ut Crucis ascensum non disse-
ram usque ad diem descensûs in sepulchrum.

Statio XIV.

Post mortem crudelissimam quiescit tandem JE-
SUS in sepulchro. Ego verò quietem quæ-
ro ante laborem.

Laborabo igitur , & vehementer curram , ut
accipiam bravium.

Statio XV.

Sancta Crux est instructissima illa bibliotheca ,
ex qua B. Helena victoriam mundanarum va-
nitatum , & S. Bonaventura stupendam hausit
scientiam. Utere & tu hac bibliotheca.

O sancta Crux ! tuô magisteriô discam JESUM,
& hunc Crucifixum ; & sufficit mihi.

PRAXIS XX.

Statio I.

STat JESUS coram Pilato , ceu malefactor co-
T ram

ram Judice , & ad mortem condemnatur. Si Innocens sic judicatur à Deo ob scelera aliena : quid me nocentem manebit ob flagita propria ?

O JESU ! da , ut , quod malè feci , priùs corrigam , quàm stem coram te Judice ; à judicijs enim tuis timui.

Statio II.

ULtrò , & cum gaudio Crucem amore mei suscipit. Ego ad obsequium Dei vocor , du-
cor , trahor , stimulor , & non vado. Timendum , nè dicatur mihi : *Quia vocavi , & renuisti ; ego in interitu tuo ridebo.*

O JESU ! deinceps vocabis me , & ego respondebo tibi : operi manuum tuarum porriges dexteram.

Statio III.

JESUS in terram ad pedes carnificum corrui : & ut me , qui sub pedibus dæmonum jacui conculcatus , eriperet , ipse conculcari se patitur pro me. Quid huic amorì rependo ? tam nihil , ut meïs denuo pedibùs eum conculcem.

O JESU ! nè permittas te offendi à me ? nè permittas me separari à te.

Statio IV.

LUget Mater obvium in via Crucis Filium. Ego verò vix dignor eum aspicere ; aut rarò saltem obiter , & perfunctoriè.

O MARIA ! non transeuntem tantum , sed permanentem mihi impetra compassionis affectum ; ut tecum pariter , & Christo compatiar.

Statio V.

Imperator cœli , & terræ , ex servis suis invenit neminem , qui voluntariè eum juvaret in Cruce portanda. Si Dominus temporalis haberet servum , qui non juvaret Dominum vestire , aut in alia re non obediret : quomodo eum tractaret ? an rogaret , an invitaret ? JESUS , Dominus meus , & Deus meus , rogat me , invitat me , ut Crucem mortificationis tollam post ipsum : & non juvo , non obedio.

O JESU ! vicisti tandem meam obstinaciam tuâ patientiâ. Dirupisti vincula teporis mei. Jam Crucem amplectar , & à tuo famulitio non desistam amplius.

Statio VI.

UT primum aspexit Veronica vultum Salvatoris indignissimè defœdatum , statim velum capitis obtulit. Ego illum vultum in via Crucis sæpiùs aspicio ; sed quis sequitur affectus ?

O JESU ! da , ut sequatur vitæ , morumque emendatio , & beatifica tui visio.

Statio VII.

Horrendissimè cum JESU agunt Judæi , milites , & carnifices , ac modo peccatores. Ipse

se verò tacet ; non recenset eorum peccata , & crudelitates , sed , *Pater dimitte illis* , in corde tacitus clamat. Ego autem , cùm honorificè non possum , de alijs malè loqui delector ; aut cùm possum honorificè loqui , nolo. O vitium linguæ !

Pone , Domine ! custodiam ori meo , & ostium circumstantiæ labijs meis.

Statio VIII.

Filiæ Jerusalem ! venite , videte Regem Salomonem. Veniunt , vident , lugent. Sed JESUS regnum suum negat esse de hoc mundo ; ideo tam paucos numerat amicos , & servos : mundus autem longè plures , & inter hos etiam me.

O JESU ! non sim de hoc mundo , quem *Patris* tuus arguet de peccato : sed sim inter eos , quos tu de hoc mundo elegisti.

Statio IX.

CAdit JESUS tertio , & me impellente gravissimè prostermitur. Heu ! quam vindictam sumet ? quam satisfactionem exiget ? Non aliam , quam ut ipsum deinceps non offendam , sed fidelius ei serviam. O satisfactionem levem ; & tamen nec hanc præstiti.

O Domine ! habe mecum patientiam , & fidelissimè tuo servitio intendam.

Statio X.

Dolorosa non minùs , ac ignominiosa Christo erat vestium detractio ; sustinet tamen , ut moriturus nihil mundani retineret. Ast & mihi dolorosa accidit vitiosorum habituum depositio ; sed ignominiosior erit post mortem eorundem re-
tentio.

Abjiciamus ergo opera tenebrarum , & induamur arma lucis ; sicut in die honestè ambulemus.

Statio XI.

Nudus in Crucem agitur , & crudelissimè extenditur. Jam numerare licet (si tamen numerari possunt) vulnera , quæ amore mei tulit. In me autem qualia numerabit JESUS ? ipsius , an mundi amore accepta ?

Ah ! utinam tanta fecissem , & sustinuissem vulnera amore JESU , quanta feci , & sustinui vulnera amore mundi !

Statio XII.

SI Filius Dei est (clamabant Judæi) descendat de Cruce. Imò , quia Filius Dei est , non descendit de Cruce. Hæc enim proprietas Filiorum Dei est : hæc est cogitatio excelsa Filiorum Dei , Crucem ascendere , & non descendere. Habesne tu similem cogitationem ?

O JESU ! da , ut habeam , & exequar !

Statio XIII.

JESUS, dignissimus immaculatæ V. MARIE Filius, post mortem suam in ejus sacratissimo sinu voluit quiescere. O MARIA ! pariter in , & post obitum meum *Monstra te esse Matrem !* timeo tamen haud vanè, nè respondeas mihi, quod illi : *Monstrâsses te filium.*

O MARIA ! per vulneratum cor JESU te obtestor : nè despicias me in extrema necessitate mea. Recordare , amantissimæ Matris esse, etiam degenerem non abjicere filium : studebo tamen, ut tuò me dignum reddam deinceps patrociniò.

Statio XIV.

DEportatur ad Sepulchrum venerabile Christi Corpus, sed jam impassibile , & incorruptibile. Ah ! utinam deinceps sic viverem, ut saltem anima post mortem non videat corruptionem.

O JESU ! præserva animam meam à corruptione peccati , ut & de me verificetur illud : *Nondabis Sanctum tuum videre corruptionem.*

Statio XV.


IN hodiernum usque diem stat Crux sancta , tanquam memoriale Passionis Dominicæ , quod è terra eruit B. Helena , & cordi suo impressit Alexander Urfinus , Princeps Romanus , subtus vestem

vestem portans Crucem, ferreis armatam aculeis, eamque validis impressionibus sæpius cruentans. Ah! utinam memoriale hoc cruentum indelebili charactere cordi meo maneat insculptum.

O JESU ! pro sacra hac per viam Crucis peregrinatione, quam propter te suscepi, & deinceps frequenter instituere volo, aliud à te non efflagito præmium, quam indefinentem Crucis amorem, & sitim ejus indelebilem, Amen.

Pater, & Ave.

O Amor Crucifixe ! miserere mei.



OBLATIO,

Seu gratiarum actio post singulas praxes usurpanda.

A Mantissime Domine JESU Christe ! qui ex infinita tua misericordia, & supereffluente charitate erga me, tot & tantis doloribus, laboribus, & cruciatibus, dolorosissimam hanc ad montem Calvarie peregrinationem inire, & perficere voluisti, meque ad idem faciendum tuò sanctò exemplò induxisti : omnes passus meos, omnia suspiria, & affectus, Divinæ Majestati tuæ cum tot centenis, imò millenis passibus, à prætorio Pilati ad Calvarie usque funestum locum per te confectis, unitos, offero, teque cordintimè collau-

collaudans gratias ago profundissimas propter sanctissima tua vulnera, & pretiosissimum sanguinem tuum, propter universam dolorosissimam Passionem tuam, & acerbissimam mortem, infinitaque alia bonitatis, & Misericordiae tuae argumenta, inspirationes, bonos affectus, & pia desideria, quæ in anima mea operari dignatus es, humillimè rogans, ut ad sacram hanc peregrinationem sæpiùs obeundam animum mihi largiri digneris, virésque bona proposita exequendi, peccata præterita deslendi, & vitam Religiosò, ac Sacerdote dignam instituendi. Denique rogo, animas pauperum tuorum, in purgatorio detentas, nè obliviscaris: peccatores omnes in virtute SS. Sanguinis tui emendes, Ecclesiam militantem contra quoscunq; hostium insultus corrobore, & post hanc miseram vitam in cælum transferas, Amen.

Omnia ad DEI Passi Gloriam.



fan-
nem
affio-
aque
nta ,
eria ,
nilli-
nem
eris ,
præ-
acer-
imas
, nè
SS.
con-
, &
ras ,

